

ONA TILI

**Umumiy o'rta ta'lif maktablarining
7-sinfi uchun darslik**

O'zbekiston Respublikasi Xalq ta'limi vazirligi
nashrga tavsiya etgan

Yangi nashr



Toshkent – 2022

УО'К 811.512.133(075.3)
КБК 81.2(O'zb)ya72
O-58

Tuzuvchilar:

Iroda Azimova, Klaraxon Mavlonova, Sa'dullo Quronov, Shokir Tursun,
Nilufar Hakimova, Mansur Siddiqov

Xalqaro ekspert:

Iannuzzi Susan

Taqrizchilar:

- B. Mengliyev – filologiya fanlari doktori, professor.
D. Yuldasheva – pedagogika fanlari nomzodi, professor.
G'. Hamroyev – pedagogika fanlari bo'yicha falsafa doktori.
N. Ergasheva – Farg'ona shahridagi Prezident maktabi oly toifali o'qituvchisi.
Z. Mamatqulova – Farg'ona viloyati Toshloq tumanidagi 15-maktabning oly toifali o'qituvchisi.
S. Sodiqova – Toshkent shahridagi 202-maktabning oly toifali o'qituvchisi.

Ona tili 7 [Matn]: 7-sinf uchun darslik / K. M. Mavlonova. – Toshkent: Respublika ta'lrim markazi, 2022. –224 b.

Shartli belgilari



– o'qing.



– savollarga javob bering.



– yozma mashqni bajaring.



– audiomatnni tinglang.



– qoida bilan tanishing.



– qiziqarli mashg'ulot.



– partadoshingiz bilan bajaring.



– rasmga qarang.



– topshiriqni bajaring.



– uyga vazifa.

ISBN 978-9943-8352-5-2


© Respublika ta'lrim markazi, 2022

MUNDARIJA




Ijtimoiy tarmoqlar

5



Turon yo'lbarasi

14




Zamonamiz qahramonlari

24



C vitamini

36



Qutb yulduzi

45



Kelajak kasblari

54



Kurash – milliy sport turi

64



Maqsadli xarajatlar

73



Veterinar

85



Bobomning pensiyasi

94



Fizika hayotni yengillashtiradi

104



Tutilmay gapiraman

114



Elektromobil



Ochiq osmon ostidagi muzey

125



Yozuvchi bo'lish osonmi?



"Boburnoma" – memuar asar

133



Temiryo'llar



Oliy Majlis

143



"Sharq taronalari" xalqaro musiqa festivali

151




Mualliflik huquqi


163

171

179

190





IJTIMOIY TARMOQLAR

Bu mavzuda o'rganamiz

- ijtimoiy tarmoqlar va ulardan foydalanishga doir ko'satmalar • axborot xavfsizligi • olinma so'zlar imlosi • diagrammani tushunish • fikrni dalillar bilan asoslash.



Rasmdagi belgilarga diqqat bilan qarang va savollarga javob bering.



1. Qaysi belgilarni sizga tanish? Ular haqida qanday ma'lumotga egasiz?
2. Ijtimoiy tarmoqlarning hayotimizga ta'siri haqida fikr bildiring.
3. Ijtimoiy tarmoqlardagi yozishmalarda muloqot odobi deganda nimani tushunasiz?
4. Siz ham biror ijtimoiy tarmoqdan foydalanasizmi? Javobingizni izohlang.



1. Ijtimoiy tarmoqlar nomini yozing va talaffuz qiling.


Namuna "Telegram", ...



Berilgan diagramma bilan tanishing. Uni matn ko'rinishida yozing.


O'ZBEKISTONDA IJTIMOY TARMOQ FOYDALANUVCHILARINING YANGILIKLARGA QIZIQISH KO'RSATKICHLARI

- Muntazam ravishda yangiliklarni kuzatuvchilar
- Yangilik saytlaridagi ayrim sahifalardan foydalanuvchilar
- Tasodifiy kelgan xabarni ochib ko'ruchilar
- Do'stlaridan kelgan xabarni ochib ko'ruchilar
- Biror mavzuga doir yangilik izlovcilar



Yozishmalardagi xatoliklarni to'g'rilang, quyidagi qoliplardan birini tanlab, suhabatni yozing.

Xaridor: ...
Sotuvchi: ...





Matndagi gaplar yakunini aniqlab, mos tinish belgilarini qo'ying. Bo'sh o'rirlarga zarur til birliklarini qo'yib, matnni ko'chiring.

Smartfon, planshet va noutbuklar hayotimiz__(-ni/-ning) ajralmas qismi__(-da/-ga) aylanib ulgurdi ular ____ (uchun/bilan) odamlar hayoti__(-dan/-ga) ijtimoiy tarmoqlar tushunchasi __ (ham/hatto) kirib keldi bugungi kun odamlari__(-ni/-ning) ish faoliyati __ (bilan/ham) shaxsiy hayotlari ____ (ham/kabi) ijtimoiy tarmoqlar ____ (hamda/bilan) bevosita bog'liq olimlar zamonaviy gadjetlar ____ (yoki/hamda) ijtimoiy tarmoqlar____ (-ning/-ni) inson ruhiy salomatligiga ta'sirini o'rganish ____ (haqida/uchun) qiziqarli tadqiqotlar o'tkazishgan.



Matnni o'qing va savollarga javob bering.

Ba'zan "Tilning suyagi yo'q deb, gapiraverasanmi?" degan tanbehni eshitamiz. Tilda har gapni gapirishga to'siq bo'lувchi suyak yo'q ekan, qo'lda-chi? Qo'llarimizda suyak bormi? Bugun biz shu qo'llar orqali istagan mulohazamizni yozishga kirishdik. Nega dildagini yozuvga ko'chirish ishini suyaklar nazorat qilolmayapti? Suyak bir o'xshatish xolos, aslida har bir harakatimiz miya – aql, shu qatorda yurak – qalb orqali boshqariladi. Ammo nechun aqlimiz va qalbimiz har gapni bitishga izn berdi?..

... Har kim o'z fikrini ifoda etish huquqiga ega. Deylik, kimdir internetdagi sahifasiga hayotiy qarashlarini, o'y-maqsadlarini yozib qo'ydi. Matn ostiga internet foydalanuvchilaridan biri o'z mulohazasini bitadi, keyingisi unga qarshi chiqadi, fikr egasiga ham darrov javob qaytariladi, qarabsizki, dahanaki jang!

... Bir-birini hayotda ko'rmagan, yuzma-yuz muloqot qilmagan, ko'cha-ko'yda ko'rib qolgan taqdirda ham, tanimay o'tib ketuvchi kishilar monitor qarshisida bir-biri bilan qirpichoq bo'ladi. Lekin bularning bari reallikda sodir bo'lmagani sabab tomonlar o'zini ayblamaydi, ongli ravishda urush chiqarib, haqoratli so'zlar ishlatganidan vijdoni qynalmaydi.

... Guruh yoki sahifalarda bahs boshlansa, har kim sherigini mot qilish, tortishuvda g'olib bo'lishga chiraniib, lug'atidagi eng ta'sirchan so'zlarni ishlatadi. Fakt keltiradi, misol aytadi, bular ish bermasa, haqorat qiladi. Tushunmaydiki, munozarada ustun kelgan inson emas, balki befoya tortishuvga kirishmagan odam g'olibdir.





... Kimmingdir bir so'ziga yuz izoh qoldirib, keng tarqatishga usta odamlar ba'zan bir og'iz mehrli kalomni taroziga soladi, qizg'anadi. Bayramlar va tug'ilgan kunlar bilan chin dildan tabriklash yo'qolib ketdi. Tarmoq orqali tayyor stiker, foto va animatsiyalarni jo'natishadi. Hatto namuna shaklidagi tabrik va she'rlar ham bor. Yaqinimizga tilak bildirib, so'z izlashimizga hojat yo'q. Minnatdorchilik bildirish borasida ham qiyalmaysiz: tayyor hisbelgilar (emojilar) hozir-u nozir.

Har narsaning uvoli va zavoli bor. Isrof, albatta, yaxshilikka olib kelmaydi, o'z asoratini ko'rsatadi. Bugungi internet olamidagi mulohazasizlar "mulohaza"si chinakamiga so'z uvoidir. Ularda ma'no yo'q, mazmundan yiroq, maqsadi puch: fisq-u fasod, g'iybat, ig'vo, tuhmat. O'zingiz ham bir begona odamning javobidan asabiyashib, bosh ushlab o'tirasiz. Aslida bu o'ylashga arziydimi? Nega fikr bildirishga munosib minbarlar axtarmaysiz?

Muloqot imkoniyati – bizga atalgan ne'matlardan biri. Uni suiiste'mol qilmaslik, so'z uvoliga yo'l qo'ymaslik har kimning o'z qo'lida. Iroda ishga solinsa, teran tafakkur va qalb amriga qulq solinsa bas.

Durdona Alimova



1. Muallifning til, suyak va qo'l bilan bog'liq fikrlarni keltirishdan maqsadi nima?
2. Dahanaki jang qanday bo'ladi? Bunday jangning kelib chiqish sababi nima ekan? Matn asosida javob bering.
3. Hayotda bir-birini mutlaqo tanimaydigan odamlar ham qirpichoq bo'lishi mumkinmi? Javobingizni izohlang.
4. "Munozarada ustun kelgan inson emas, balki behuda tortishuvga kirishmagan odam g'olib". Muallifning ushbu fikriga qo'shilasizmi? Nima uchun?
5. "Bir og'iz mehrli kalomni taroziga solish, qizg'anish" qanday holatlarda namoyon bo'ladi?
6. Chin dildan tabriklash qanday bo'ladi? Siz ham tayyor tabrik namunalaridan foydalanasizmi? Sizningcha, bu to'g'rimi? Nima uchun?
7. So'z uvoli deganda muallif nimani nazarda tutgan?
8. Ushbu matn turini aniqlang (hikoya, tasviriy, muhokama). Javobingizni asoslang.



Berilgan so'zlarga mos izohlarni topib, daftaringizga yozing.

izn

reallik

haqorat

mot qilish

fakt

1

Bahsda raqibini yengish.

2

Kishining or-nomusi, shaxsiyatini pastga uradigan, tahqirlovchi ma'no-mazmunli so'z, gap.

3

Aniq mavjud bo'lgan voqeahodisa, haqiqat.

4

Biror narsa haqida xulosa chiqarish, qat'iy bir fikrga kelish uchun xizmat qiladigan asos, dalil.

5

Biror ishni bajarish, amalga oshirish uchun berilgan rozilik.



Matnga mos keluvchi sarlavhalarni aniqlab, yozing. Yana qanday sarlavhalarni tanlagan bo'lardingiz?

MULOQOT MADANIYATI

VIRTUAL BAHSDA KIM G'OLIB?

YOZISHMALARDAGI MADANIYATSIZLIK

FIKR BILDIRISH HUQUQI

HAQORAT QILMANG!

SO'Z UVOLI

INTERNET OLAMIDAGI MULOHAZASIZ ODAMLAR

RAQIBNI MOT QILISH USULLARI

Matnda qo'llangan tinish belgilariga e'tibor bering. Ular ishtirok etgan gaplarga bittadan namuna yozing. Ayting-chi, ko'pnuqta nima uchun qo'llangan?



Ushbu jumlanı davom ettirib, kichik matn yozing. Unda quyidagi so'zlardan foydalanishingiz mumkin: ammo, lekin, biroq, chunki, shuning uchun, va, hamda, yoki, bilan, uchun, kabi.

Muloqot imkoniyati – bizga berilgan ne'matlardan biri, chunki...



"YouTube" haqida nimalarni bilasiz?



"Sun'iy intellekt" audiomatnini tinglang va savollarga javob bering.

9



1. Aqlli kompyuter sizni qanday tanib oladi?
2. Sun'iy intellekt odamlardek haqiqiy ongga egami? Javobingizni izohlang.
3. Ayting-chi, hozirgi kunda sun'iy intellekt qaysi qurilmalarda bor?
4. Sun'iy intellekt qaysi kasblarning yo'qolib ketishiga sabab bo'lishi mumkin ekan? Bu fikrga qo'shilasizmi? Nima uchun?



Berilgan gaplarni o'qing. To'g'ri fikrlarni aniqlab, yozing.

- 1 "YouTube"ning bir xodimi doimiy ravishda sizning qiziqishlaringiz bilan band bo'ladi.
- 2 "YouTube" sizni qiziqtirgan mavzulariga oid videolavhalarni ko'rsatadi.
- 3 Ayrim kasblar yo'qolib ketishi aniq.
- 4 Sun'iy intellekt internetda izlagan, ko'rgan narsalaringizga asosan qiziqishlaringizni aniqlab oladi.
- 5 Avtomobillar haydovchisiz, sun'iy intellekt orqali boshqarilishi mumkin.



Quyidagi so'zlarni talaffuz qiling. Imlo qoidalari asosida yozilgan so'zlarni aniqlang va ko'chiring.

vidyo

kampyuter

intelekt

avtomobil

suhandon

haydovchi

tamirlovchi

xisobchi

muzlatkich

video

kompyuter

intellekt

aftomobil

suxandon

xaydovchi

ta'mirlovchi

hisobchi


muzlatgich



"Sun'iy intellekt" audiomatnidan olgan xulosangiz asosida quyidagi jumlalarni davom ettirib yozing. Fikringizni misollar bilan asoslang.



"YouTube"da aqlli kompyuter bor



Sun'iy intellekt insonlar kabi fikrlay olmaydi

chunki...



Sun'iy intelekt rivojlanishi bilan bir qancha kasblar yo'qolib ketishi mumkin



Sun'iy intellektning hayotimizga ta'sirini ikki ustunga ajratib yozing.

IJOBİY

SALBIY





Quyidagi ikki ustunda ijtimoiy tarmoqlarning hayotimizdagи о'rnı haqida ma'lumotlar berilgan. Ular bilan tanishib, har bir jihatni asoslash uchun dalillar, hayotiy misollar keltiring.

IJTIMOIY TARMOQLAR

Izlash va muloqotda qulaylik yaratadi.

Ijtimoiy tarmoqlarga bog'lanib qolish xavfi mayjud.

Oson axborot topish va almashish imkoniyati.

Ijtimoiy yakkalanish, baxtsizlik hissini paydo qiladi.

Shaxsiy tarbiya, o'z-o'zini rivojlantirish vositasi hisoblanadi.

O'z hayotini boshqalarniki bilan taqqoslash ruhiy tushkunlikka olib keladi.

Biznes yuritishda beminnat yordamchi.

Hasad tuyg'usini uyg'otadi.

Turli ijtimoiy aksiyalar bo'lib turadi.

O'zimizni yomon his qilishimizga olib kelsa-da, yana va yana ularga qaytamiz.

Ijodkorlar va boshqa soha vakillari uchun keng maydon.

Virtual muloqot jonli muloqot о'rnnini bosmaydi.



Ijtimoiy tarmoqlardan qanday maqsadlarda foydalanish mumkin? Bu boradagi qoidalarni tafsilotlar bilan asoslab yozing. Bunda birinchidan, ikkinchidan kabi so'zlardan foydalaning.



Yozgan matningizni sinfdoshingizni bilan almashing. Uning matni bilan tanishing hamda qisqacha izoh yozing.



Havolada berilgan maqolalar bilan tanishing. Yozgan matningiz bilan solishtiring.



manbalar
uchun
havola





O'QING VA MULOHAZA QILING

ONA TILIMNI SEVMASAM, HAYRATLANMASAM, MENGA SHOIRLIK QAYDA EDI?!

*Oftob chiqdi, quyosh chiqdi, kun chiqdi,
Mehr-u shams-u xurshidi gardun chiqdi.*

Bir zamon bolalar uchun aytilgan shu jo'ngina va g'o'rgina ikki satrning o'zida quyoshning oltita nomini topasiz! Sanoqni yana davom ettirish mumkin. Olimlar, topib bering, yana qaysi tilda quyoshning o'ndan ortiq nomi bor?!

Qaysi tilda osmonni kamalak ranglaridek yetti xil nom bilan ataydilar?

Osmon, falak, samo, charx, gardun, fazo, ko'k...

Bular xayolga kelganlari xolos!

Arsh, davor, minu singari kam ishlatiladigan xos so'zlar ham sanalsa, ro'yxat yanada uzayadi.

Ma'nodosh so'zlarimizning ko'pligiga sabab bor. O'zbek tili uch daryordan suv ichgan. Diniy, ilmiy, ijtimoiy atamalarimiz arab tilidan, ko'pgina ish qurollarimiz, jomadon, xokandoz, dastshu, jomashu, dazmol, qog'oz kabi hunarmandlikka oid so'zlarimiz, shuningdek, yuksak she'riy uslubga xos suxanlar fors tilidan kirgan.

QOYIL!

Biz gapni qoyil qilamiz, boshqalarga qoyil qolamiz, lekin "qoyil" o'zi nima, ma'nosi qanday – surishtirmaymiz.

"Qoyil" so'zlovchi degani. Bu so'z aslida so'zamol odamga nisbatan ishlatilgan. Gap bilgan qoyil, ish bilgan omil deb atalgan. Qoyillar va omillar bahsida so'zamollar ustun kelgan chog'i, *omil* so'zi chekinib, *qoyil* so'zi g'olib bo'ldi va omilning hududlarini-da egalladi. Ishga ustani ham *qoyil* deydigan bo'ldik.

Birov to'p tepishni qoyillatsa, birov yog'och yo'nishni qoyillatadi. Biz esa ularga qarab jim tursak ham qoyil bo'lamiz. Hunar egasi qoyil maqomini olgach, o'rinaltib bajarilgan ishni *qoyilmaqom* deydigan bo'ldik.

Erkin Vohidov, "So'z latofati" kitobidan


ZAMONAMIZ QAHRAMONLARI

Bu mavzuda o'rganamiz

- jamiyat taraqqiyotida qahramon – yo'lboschchi shaxslarning ahamiyati • fe'llarning munosabat shakllari • zamon, shaxs-son qo'shimchalari • matn tuzilishi • esse yozish.



Rasmlarga qarang. Savollarga javob bering.



olim



sportchi



dehqon



harbiy



jurnalist



siyosatchi





1. Berilgan soha vakillaridan qay biri siz uchun zamonamiz qahramoni bo'la oladi? Nega shunday hisoblaysiz?
2. Aiting-chi, zamonamiz qahramonlari qaysi fazilati yoki ishlariga qarab belgilanishi kerak?
3. Nima deb o'ylaysiz, bizga qahramonlar nega kerak?
4. Sizningcha, yurtimizga, jamiyatimizga qanday qahramonlar kerak?
5. Berilgan soha vakillaridan tashqari yana kimlarni qahramon deb hisoblaysiz? Ularning ismini bilasizmi? Nega ularni qahramon sanaysiz?



Fe'lning **munosabat shakllari** uning boshqa so'zlar bilan bog'lanishiga, so'zlovchi-ning maqsadini ifodalashga xizmat qiladi.

1. Asqar yana o'z ishiga qayt**moqchi**.

2. Ukangga ayt: tezroq kelsin.

3. Qani edi, qizim ham baxtini topsa.

1-gapda **-moqchi** munosabat qo'shimchasi so'zlovchi (shu gapni aytgan kishi) Asqarning qaytish maqsadida ekanini ifodamoqda.

2-gapda **-sin** munosabat qo'shimchasi so'zlovchining buyrug'ini ifodalashga xizmat qilgan.

3-gapda **-sa** shakli so'zlovchining istak-xohishini ifodalayapti. "Qani edi" birikmasi esa shu ma'noni kuchaytirishga xizmat qilyapti.

Zamon, shaxs-son va **-sa** qo'shimchalari munosabat shakllari sanaladi. Bu shakllar ni olgan fe'l odatda gap oxirida (kesim vazifasida) keladi.

Munosabat shakllari bir so'zda ketma-ket kelishi ham (*chaqir/di/m, ista/sa/m*), ko'r-satkichsiz bo'lishi ham (*yugur, tanla*) mumkin.



Bo'sh o'rnlarga mos keluvchi ikkitadan kesimni qo'yib, gaplarni yozing. Kesimlar turli zamon va shaxs-son qo'shimchalari bilan shakllansa, gap ma'nosi qanday o'zgarishiga e'tibor qarating.

Namuna 1) yoyadi (*doimiy ish-harakat, III shaxs, birlikda*); 2) yoysin (*buyruq, III shaxs, birlikda*)

- Sportchi yuqori marralarni zabt etib, vatanimiz dovrug'ini dunyoga ...
- Olim ilm-fan olamida katta ixtiolar qilib, odamlarning turmushini ...
- Dehqon dasturxonimizni to'kin-sochin, yurtni boy ...
- Jurnalist tun-u kun tinim bilmay, odamlarga dunyodagi yangiliklarni ...
- Siyosatchi xalqni birlashtirib, yagona maqsad sari olg'a ...
- Harbiy Vatan sarhadlarini yovuz kuchlardan ...



Yuqorida berilgan kasb egalaridan birini tanlang va ta'riflang. Ular qanday qilib zamonamiz qahramoniga aylana olishi mumkinligi haqida yozing.

Namuna Shifokorlar salomatligimiz posbonlaridir. Ular bemorlarni nafaqat bilimi, balki mehri bilan ham davolaydi. Agar shifokor o'z vazifasini sidqidildan bajarsa, o'z ustida doimiy ishlab, mahoratini oshirib borsa, kezi kelganda o'z jonini ham ayamay kasalliklarga qarshi kurash maydoniga chiqsa, shubhasiz, bunday mutaxassisni zamonamiz qahramoni deb atash mumkin.

Biz siz uchun ishda qoldik!

Siz biz uchun uyda qoling!

COVID–2019



Badiiy asarlarda ham qahramonlar yashashi haqida bilasizmi? Ijodkor badiiy asar yaratish ekan, u orqali o'quvchida o'z zamonasining qahramoni haqida tasavvur uyg'otishga harakat qiladi. Sizning ham asarlarda tanishgan qahramoningiz bormi? U haqida ma'lumot bering.

- Bu qahramon kim?
- U qaysi sohada faoliyat olib boradi?
- Qanday fazilatlari bilan boshqalardan ajralib turadi?
- Uning qanday yutuqlari bor?



Matnni diqqat bilan o'qib, savollarga javob bering.

QAHRAMONLAR NEGA KERAK?

- 1** Inson qahramonsiz, oldinga undab turuvchi mayoqsiz **yashashi** mushkul. Buni kitoblardan ham, tarixdan ham, oddiy odamlarning kundalik hayotidan ham bilib olsa bo'ladi. Masalan, o'sha qahramon bo'lmasa, oilada ham, mahallada ham, xalqda ham suyanadigan tayanch nuqta yo'qolganday bo'ladi.
- 2** Bir kuni tengqurlarim bilan "Zamonamiz qahramoni kim?" degan mavzuda suhbatlashib qoldik. Birov: "So'nggi urfda kiyinadigan, kamida ikkita tilni biladigan, chet elda o'qib kelayotgan **yoshlar**", – desa, yana biri: "Zamonamiz qahramoni degan nomga sportchilarimiz munosib, chunki yurtimiz nomini **dunyoga** yoyishda ularning hissalari ko'proq", – dedi. Kimdir dehqonlar desa, kimdir olimlarni, yana kimdir estrada yulduzlarini tilga oldi. Hammamiz o'zimizcha haq edik.
- 3** "Zamonamiz qahramoni kim?" deb savol berishning nima hojati bor, barcha davrlar uchun o'lmas qahramonlar bor-ku, **o'shanday** insonlarga ergashish, taqlid qilish mumkin, dersiz. Darhaqiqat, necha-necha avlodlar uchun yo'lchi yulduz bo'lib kelayotgan, aql-u zakovati, kuch-qudrati, komil fazilati bilan tarixida **o'chmas** iz qoldirgan buyuklarimiz bor. Birgina Amir Temur bobomiz yoki Jaloliddin Manguberdi nomlarini **tilga** olsak, qalblarimiz faxr-u g'ururga to'ladi. Lekin ular shunchalar yuksakdaki, bugungi avlod ularga yeta olishi mushkul. Faqat havas qilish va munosib avlod bo'lishga harakat qilish imkonи bor, xolos. Qolaversa, hayot tarzimiz, fikrlash yo'sinimiz o'rtaida shunchalik katta vaqt masofasi borki, ularni zamonamiz qahramoni sifatida **yonimizda his qilolmaymiz**.
- 4** Bizning ham o'zgarishlar, yangilanishlar to'lqinida kechayotgan o'z zamonamiz bor. O'z orzularimiz va armonlarimiz, o'z g'alabalarimiz va mag'lubiyatlarimiz **bor**. Shular ichida biz o'z zamonamiz qahramonini ham izlaymiz. Ichimizdan biz bilan bir xil imkoniyatga ega bo'la turib, bizdan o'zib ketgan, dunyoni o'zgacha idrok etishi, favqulodda qobiliyati, irodasi, aql-u zakovati bilan bizni hayratga soladigan, **ortidan** ergashtiradigan zamonamiz qahramonlari chiqishini xohlaymiz.

Ibrohim Aziz





1. Maqolada inson qahramonlarsiz yashashi mushkul ekani aytilgan. Siz bu fikrga qo'shilasizmi? Nima uchun?
2. Siz yana kimlarni "barcha davrlar uchun o'lmas qahramonlar" deb hisoblaysiz?
3. "Darhaqiqat, necha-necha avlodlar uchun yo'lchi yulduz bo'lib kelayotgan, aql-u zakovati, kuch-qudrati, komil fazilati bilan tarixda o'chmas iz qoldirgan buyuklarimiz bor". Mazkur gapdagi "yo'lchi yulduz"ni qanday tushunish kerak? Nega tarixiy shaxslar yo'lchi yulduzga o'xshatilgan?
4. Tarixiy shaxslar hamda bugungi odamlarning hayat tarzi va fikrlash yo'sini o'ttasida qanday tafovutlar bor deb o'ylaysiz?
5. Maqoladan qanday xulosa chiqardingiz?



Matn asosida berilgan testlarni yeching. Javoblarni daftaringizga belgilang.

1. **Matn mazmunidan kelib chiqib, berilgan xulosalarning qay biri matnning bosh g'oyasiga mos ekanini toping. Javobingizni izohlang.**
 - A) Insonlar komil fazilati bilan tarixda o'chmas iz qoldirgan buyuklardan ibrat olib yashashi lozim.
 - B) Inson qahramonsiz, oldinga undab turuvchi mayoqsiz yashashi mushkul.
 - C) Bugungi odamlarning o'z orzu va armonlari, o'z g'alaba va mag'lubiyatlari bor.
 - D) Tarixiy shaxslarni zamonamiz qahramoni deya olmaymiz.
2. **Muallif Amir Temur va Jaloliddin Manguberdi kabi tarixiy shaxslarni "yonimizda his qilolmaymiz" dedi. U bu fikrni qanday asoslaydi?**
 - A) ularning aql-u zakovati tarixda o'chmas iz qoldirganini aytish bilan
 - B) ularga havas bilan boqishimiz mumkinligini uqtirish orgali
 - C) hayat tarzimiz, fikrlashimiz ular yashagan davrdan keskin farq qilishini aytish bilan
 - D) bugungi avlodning ularga munosib bo'la olmayotganini ta'kidlash orgali
3. **Ajratib ko'rsatilgan so'z matnda qanday ma'noda qo'llangan?**
"Inson qahramonsiz, oldinga undab turuvchi mayoqsiz yashashi mushkul".
 - A) Kemalarga quruqlikni ko'rsatib turuvchi inshoot ma'nosida
 - B) Mash'ala ko'tarib borayotgan inson ma'nosida
 - C) Yo'lboschi – qahramon ma'nosida
 - D) Ustoz ma'nosida
4. **Muallif matnning qaysi qismida zamonamiz qahramonlarining sifatlarini ochib beradi?**
 - A) 1-qismda
 - B) 2-qismda
 - C) 3-qismda
 - D) 4-qismda



Berilgan so'zlarning ma'nolari bilan tanishing. Bu so'zlar matnda qanday ma'noda qo'llanayotganini aniqlang va ko'chiring.

kundalik	kunda bo'lib turadigan, odatdag'i holat, hodisa hodisalar, kuzatishlar va boshqalar yozib boriladigan jurnal, daftar
qahramon	shijoati, dovyurakligi, botirligi bilan shuhrat qozongan, jonbozlik, mardlik qilib, o'zini ko'rsatgan shaxs biror voqe'a-hodisa va uning sodir bo'lismiga sababchi bo'lgan yoki uning sodir bo'lismiga hissa qo'shgan inson
yulduz	qizigan gazlardan tarkib topgan, tabiatiga ko'ra Quyoshga o'xshaydigan, nur sochuvchi osmon jismi elga tanilgan, shuhrat qozongan shaxs
davr	tarixda biror shaxs yoki kishilar guruhi, sulola nomi bilan bog'langan vaqt, zamon biror-bir avlod yashagan yoki yashayotgan vaqt, zamon



Yuqoridagi so'zlarning boshqa ma'nolarini qo'llab gaplar tuzing.



Matn qismlari uchun mos reja tuzib, yozing.



O'zingizga yoqadigan tarixiy shaxs va uning qahramonliklari haqida "Tarixdagi qahramonlar" mavzusida matn tuzing. Quyidagi ko'rsatmalardan foydalaning.

- qahramonning ismi
- uning tarixdagi o'rni
- qahramonning fazilatlari
- ushbu qahramonga munosib avlod bo'lismiga nimalar qilish kerakligi



"Qahramonlar nega kerak?" matnida qora bilan ajratib ko'rsatilgan so'zlarni o'zak va qo'shimchaga ajrating. Ushbu so'zlarning o'zaklari shakldosh so'zlar sanaladi. Dastlab ularning matndagi ma'nosini, so'ng boshqa ma'nosini namunadagidek yozing.

Namuna dunyoga: dunyo + ga.

1. Dunyo (ot so'z turkumi) – olam, koinot.
2. Dunyo (ot so'z turkumi) – boylik, davlat.



Ushbu so'zlarni matnda kelganidan boshqa ma'noda qo'llab gaplar tuzing.

yosh

til

yon

dunyo

o'ch

ort

bor



Birinchi matnda gaplarni o'zaro bog'layotgan birliklarni aniqlang.

1

Inson qahramonsiz, oldinga undab turuvchi mayoqsiz yashashi mushkul. Buni kitoblardan ham, tarixdan ham, oddiy odamlarning kundalik hayotidan ham bilib olsa bo'ladi. Masalan, o'sha qahramon bo'lmasa, oilada ham, mahallada ham, xalqda ham suyanadigan tayanch nuqta yo'qolganday bo'ladi.

2

Har bir davrning o'z qahramonlari bor. Insonlar o'z davrlaridagi qahramonlarga intilib, o'z qahramonlariga o'xshashga harakat qilib yashaganlar. Qahramon insoniy fazilatlari bilan, xatti-harakatlari bilan boshqa insonlardan ajralib turuvchi shaxs bo'lgani uchun oddiy insonlar ulardan ibrat olib yashaydi. Qahramonga intilib yashash insonga o'z orzu-istiklarini aniqlashtirib olishga, maqsad sari harakat qilishga, qanday fazilatlar sohibi bo'lishi kerakligi bilan bog'liq o'y-xayollarini tartibga solishga yordam beradi.



Quyidagi vositalardan foydalangan holda ikkinchi matnni bog'lanishli matnga aylantirib ko'chiring. Matndagi takroriy so'z va jumlalarni, uslubiy g'alizlikni tuzatishga harakat qiling.

Menimcha, ularga, qolaversa ...



Matn tarkibida ko'k rang bilan ajratib ko'rsatilgan so'zlarda uchraydigan fonetik hodisalarga e'tibor bering. Jadvaldagи so'zlar bilan tanishib, ularda uchraydigan fonetik hodisalarни namunadagidek tahlil qilib yozing.

Yosh+a – yasha (tovush almashishi)

O'sha+day – o'shanday (tovush ortishi)

Qila olmaymiz – qilolmaymiz (tovush tushishi)

Tovush ortishi

Tovush tushishi

Tovush almashishi

achchiq

qayril

angla

unda

ikkala

qaynoq

shunday

susay

to'quvchi



"Qahramonlar nega kerak?" matnining 2 qismida ishtirok etgan fe'llarning zamon va shaxs-sonini o'zgartirib, ko'chiring.



Xalqimizga xizmat qilayotgan, yurtimizni dunyoga tanitayotgan shaxslar faoliyati bilan tanishing. Savollarga javob bering.

Dilfuza Egamberdiyeva – dunyo tan olgan o'zbek olimasi. Mikrobiologiya bo'yicha dunyoning nufuzli olimlari orasida o'z orniga ega. Dilfuza Egamberdiyeva Germaniya, Finlandiya, Angliya, Italiya, Niderlandiya, Xitoy, Amerika Qo'shma Shtatlari universitetlarida ilmiy faoliyat olib borgan. Yirik xalqaro loyihalarga rahbarlik qilgan. Olima UNESCO xalqaro tashkilotining L'OREAL – "Olima ayol" mukofoti bilan taqdirlangan.



Bahodir Jalolov – o'zbekning yengilmas bokschisi. U boksning o'ta og'ir vazn toifasida ringga chiqadi. Bahodir Jalolov shu kunga qadar dunyoning turli nufuzli musobaqalarida vatanimiz bayrog'ini yuqori ko'targan. Xususan, 2019-yili jahon championi, 2020-yili Olimpiada championi sifatida oltin medalni qo'lga kiritib, o'zbek boksi shuhratini dunyoga yoygan. Sportchi "O'zbekiston iftixori" faxriy unvoni va "Fidokorona xizmatlari uchun" ordeni bilan taqdirlangan.

Akmaljon Usvaliyev – fidoyi tadbirdor. U, yura olmasa-da, tinim bilmaydi. Bir necha yillar oldin ijara joy olib, kompyuter xizmatlarini yo'lga qo'ygan. Keyin faoliyatini kengaytirgan, kompyuter texnologiyalarini o'rgangan. Shu kungacha qahramonimiz 40 nafarga yaqin shogird yetishtirib, ushbu sohaning sir-asrorlarini o'rgatib kelmoqda. Hozir 15 nafar yigit-qizni ish bilan ta'minlagan. Tadbirkor ko'p yillik mehnatlari uchun "Jasorat" medali bilan taqdirlangan.





1. Ayting-chi, siz yuqoridagilardan kimni zamonamiz qahramoni deb bilasiz? Nima uchun?
2. Zamonamiz qahramoni mashhur odam bo'lishi kerakmi yoki oddiy odam?
3. Sizning yon-atrofingizda ham zamonamiz qahramonlari bormi? Nega ularni qahramon deb bilasiz?
4. Zamonamiz qahramonining eng muhim sifatlarini nimalarda ko'rasiz?



Matnlar tarkibida uchraydigan olinma so'zlarni ajratib yozing. Ularning talaffuzi va imlosiga e'tibor bering.



Bugungi kunning qahramoni kim? Qanday insonlarni biz qahramon deb ayta olamiz? Zamonamiz qahramonining qanday sifatlari bo'lishi kerakligi haqida o'ylang hamda "Zamonamiz qahramoni kim?" mavzusida esse yozishga tayyorlaning. Essening qoralama nusxasini yozing.



Yozgan essengizni tahrir qiling, so'ng oqqa ko'chiring. Keyingi darsda ushbu mavzuda taqdimot qilishga tayyorlaning.





O'QING VA MULOHAZA QILING

"MUZEY" Dagi MUZIKA



Biz "musiqa" so'zini ko'p ishlatalamiz. Bu so'z tilimizga boshqa tildan kirib kelgan bo'lsa-da, allaqachon bizga butunlay singishib ketgan. Xo'sh, bu so'zning tarixi va kechmishi qanday?

Musiqa yunoncha "muzika" so'zidan olingan bo'lib, uning tub ildizi "muzalar san'ati" degan ma'noni bildirgan. "Muza" – yunon mifologiyasidagi she'riyat, san'at va fan homiyları sanalgan 9 ma'budning umumiy nomi bo'lgan. Tilimizda ishlataladigan "muzey" so'zining ham tub ildizi shunga borib taqaladi va u "muzalar ibodatxonasi" degan ma'noni anglatgan.

Eshqobil Shukur, "Boboso'z izidan"

OPOQI KIM: BUVIMI YOKI BOBO?

"Opoqi" Toshkent shevasida yoshi katta ayollarga hurmat bilan murojaatda ishlataladigan so'z. Asosan buvilarga nisbatan qo'llanadi. "Opog'oyi" so'zining qisqartma shakli. Bu so'z Farg'ona vodiysining ba'zi hududlarida boboga nisbatan ishlataladi. Uning "opoqdada" varianti ham bor.

"Opoqi" so'zini bobo ma'nosida qo'llash tobora kamayib boryapti.

Yaqin qarindoshlarni anglatuvchi so'zlarni xilma-xil ma'nolarda qo'llash, erkakka nisbatan ishlataladigan so'zni ayolga, ayolga xoslangan so'zni erkakka nisbatan tatbiq etish tilda bor hodisa.


Masalan, bugungi tildagi "aka" so'zining "oka", "og'acha" variantlari Bobur mirzo zamonida ayollarga nisbatan qo'llangan. Lekin hozir bu so'zlar faqat erkaklarga nisbatan ishlataladi.

Toshkent shevasida onani "opa" deyish uchraydi, Xorazm shevasida esa "aka" otani anglatadi.


Qirg'iz tilida ona "apa", qozoq tilida esa ota "ake" deyiladi. Qozoq bolalar onalariga "apa" deb murojaat qiladi.

Shevalarga qardosh va qo'shni millatlarning tillari ham o'z ta'sirini o'tkazadi.

Shevalarda qaysi ma'noni anglatishidan qat'i nazar, so'zning adabiy tildagi anglamini bilib olishimiz kerak. Yo'qsa, uni yanglish ma'noda qo'llashimiz, natijada xatoga yo'il qo'yishimiz aniq.



Orif Tolib



TURON YO'LBARSI

Bu mavzuda o'rganamiz

- insoniyat oldidagi ekologik muammolar
- matn tarkibidan fe'llarning munosabat shakllarini aniqlash
- matn mazmunini anglash, xulosa chiqarish
- muhokama matni yaratish




1. "Qirilib ketmoq", "qirib tashlamoq" birikmalari nimani anglatadi? Ularning qanday farqi bor?
2. Hayvonlarni qirish qanday oqibatlarga olib kelishi mumkin?
3. Sizningcha, foyda keltirmaydigan hayvonlar bormi? Ularni qirib tashlasa bo'ladimi?



"Chumchuqlarga qiron keltirgan Xitoy" audiomatnini tinglang. Topshiriqlarni bajaring.




1. Chumchuqlarga qarshi kurashishdan maqsad nima edi?
2. Chumchuq va kalamushlarni o'ldirish qaysi dasturga kiritilgan edi?
3. Chumchuqlarni o'ldirishni dastlab kimlar boshlab berdi?
4. Chumchuqlarga qarshi qanday usul o'ylab topilgan edi?
5. Tabiatdagi muvozanat buzilishi nimalarda ko'ringan?
6. Nima deb o'ylaysiz, Xitoy hukumati o'z xatosini to'g'rilashga harakat qildimi? Hukumat qanday yo'l tutgan bo'lishi mumkin?





Quyidagi rasmlarga qarang. Bu rasmlar audiomatning qaysi qismlari uchun mos keladi? Nega?



Chap ustunda sarlavhalar, o'ng ustunda esa matn qismlarining qisqacha mazmuni berilgan. Ularni moslashtirib ko'chiring.

Tabiatga qarshi chiqish loyihasi

Mao Szedunning 8-syezddagi nutqi hamda chumchuqlarni charchatish usuli orqali o'ldirishning boshlanishi.

Muhim qaror: hasharotlarga va qushlarga qarshi hujum

G'allaning yaxshi rivojiana boshlashi, ammo hosilning kutilgandan kam bo'lishi hamda bug'doy yetishmovchiligi.

Erta quvonish va ocharchilik

"Katta sakrash" deb nomlangan dasturning muhokama etilishi va Mao Szedunning unga rozi bo'lishi.



Quyidagi voqealarning sabablarini yozing.

1. Chumchuqlarni qirib tashlashni o'ylay boshlashdi.
2. Mao Szedun tabiat muvozanatining buzilishi haqida hech nima bilmas edi.
3. Chigirtka va shilliqqurtlar ko'payib ketdi.
4. Bug'doy hosili juda kam bo'ldi.
5. Odamlar chumchuqlarni shovqin-suron bilan qo'rqtishgan.
6. Ko'plab odamlar ocharchilikdan vafot etdi.



Audiomatn voqealari hamda o'z taassurotlaringiz asosida matn yozing. Matn sarlavhasini o'zingiz tanlang.



"Almashish", "almashtirish" so'zlari qanday ma'no anglatadi?



Olmoshlar so'z, so'z birikmasi, gaplar va matnlarga ishora qiladi, ularning o'rnila almashib kela oladi. Masalan, **Salimning sochlari sariq, ko'zлari ko'k. U hecham o'zbekka o'xshamaydi** gapida **u** olmoshi Salim o'rnila qo'llanmoqda. **Asrora sahnaga chiqmadidi. Bu Lola opaning jahlini chiqardi** gaplarida esa **bu** olmoshi butun bir gapga ishora qilmoqda. Mazkur o'rnlarda olmoshlarning qo'llanishi nutqiy qisqalikka, raxonlikka va o'rinsiz takrorlarning oldini olishga xizmat qilmoqda.



Quyidagi olmoshlar ma'nosida, qo'llanishida o'zaro qanday farqlarga ega ekani haqida mulohaza yuriting. Fikrlaringizni tuzgan gaplaringiz orqali asoslang.

men – o'zim

siz – sizlar

har birimiz – hammamiz

nechta? – qancha?

bu – shu

kim? – kim-kim?

kimdir – allakim

allakim – birov

necha? – nechta?

har kim – hech kim

u – o'sha

hech narsa – hech nima

qani? – qayerda?

nega? – nima uchun?

qalay? – qanday?



Berilgan parchalardagi olmoshlarni aniqlang. Ular nimani almashtirayotganini yozing.

Xitoy Ikkinchiji jahon urushidan keyin qoloq bir mamlakat edi. O'sha paytda Xitoyda ahvol juda og'ir, oziq-ovqat yetishmovchiligi bor bo'lib, millionlab odamlar yo'qchilikda yashardi. Xitoy hukumati oldida qishloq xo'jaligi hamda iqtisodiyotda islohotlar o'tkazish va mamlakatni qoloqlikdan chiqarish vazifasi turardi. Amalda shunday islohotlar o'tkaziladi. Ammo ularning foydasidan ziyoni ko'proq bo'ladi.

Bu dasturning hammualliflaridan biri o'sha paytda Xitoy ta'lim vazirining o'rinnbosari bo'lgan biolog Chjou Szyan edi. U o'z dasturida qishloq xo'jaligini rivojlantirish va odamlarning qornini to'ydirish uchun chumchuqlar va kalamushlarni yoppasiga qirib bitirishni taklif qilgandi. Chjou Szyanning hisob-kitoblariga ko'ra, mamlakatda yetishtirilayotgan bug'doyning katta qismini chumchuqlar va kalamushlar yeb qo'yardi. Agar ular qirib tashlansa, millionlab odamlarni to'ydirsa bo'ladigan bug'doyni asrab qolish va mamlakat aholisini qashshoqlikdan chiqarish mumkin bo'lardi.



Jamlamoq, to'pdan ajratmoq so'zlari qanday ma'no anglatadi?



Audiomatndan olingan gaplarni o'qing. Jamlab hamda to'pdan ajratib ko'rsatishni ifodalayotgan so'zlarni aniqlang.

1. Mamlakatdagi qariyb barcha chumchuqlar qirib bitiriladi.
2. Butun Xitoyda chumchuqlarga qiron keltirish boshlanadi.
3. Har bir odamga ma'lum miqdorda chumchuq o'ldirish majburiyati qo'yiladi.
4. Mamlakatdagi qariyb hamma chumchuq yo'q qilingach, tabiatdagi muvozanat buziladi.
5. Har kim ekkanini o'radi, deganlaridek, tabiatga qarshi ayovsiz kurash olib borgan xitoyliklarni tabiatning o'zi shu tariqa ayovsiz jazolaydi.





Shaxs-narsalarning qancha qismi haqida gap ketayotganini ifodalash uchun belgilash olmoshlardan foydalanamiz. **Hamma, barcha, bari, jamiki, butun, yalpi** olmoshlari jamni; **ba'zi, ayrim** olmoshlari esa qismni ifodalash uchun qo'llanadi. Qiyoslang: **Bu xatlarning hammasi sizga kelgan. – Bu xatlarning ba'zilari sizga kelgan.**

Har, har bir, har kim, har nima, har ne, har qanday, har qaysi, har qancha olmoshlari ham jamni bildiradi, biroq har bir uznvi ta'kidlab, to'pdan ajratib ifodalaydi. Qiyoslang: **She'rni hammangizdan so'rayman. – She'rni har biringizdan so'rayman. Hamma ishning o'z qiyinchiligi bor. – Har qaysi ishning o'z qiyinchiligi bor.** Bunday olmoshlar **har so'ziga:** 1) so'roq so'zlarni; 2) **bir** sonini; 3) **narsa** so'zini qo'shish orqali hosil qilinadi.



Muhokama uchun savol. Tabiatdagi muvozanat zanjirida **har bir** jonzotning o'z o'rni bor. Bu yerda **har bir** so'zi o'rnida **hamma** va **ba'zi** so'zlari qo'llansa, mazmunda qanday o'zgarish bo'ladi?



Gaplarni o'qing. Nuqtalar o'rniغا kerakli belgilash olmoshini qo'yib, gaplarni ko'chiring.

1. O'rta maktab ta'limini oxirigacha yetkazmagan Mao Szedun mamlakatdagi ... kalamush va chumchuqlarni qirib bitirish qanday oqibatlarga olib kelishi mumkinligi haqida tasavvurga ham ega emasdi.
2. 1958-yil mart-aprel oylarida ... Xitoy bo'ylab qariyb 2 milliard chumchuq yo'q qilinadi.
3. Mamlakatning ... hududlaridan mo'l hosil olinishi haqida markazga hisobot topshirishadi.



"Adabiyot" darsligidagi istalgan asardan belgilash olmoshlari qatnashgan 6 ta gap ko'chiring. To'pdan ajratish yoki jamlash hodisasidan qaysi biri ro'y berayotganini yozing.



1. Yo'lbarslar haqida nimalarni bilasiz?
2. Sizda yo'lbarsni o'dirish yoki o'dirmaslik tanlovi bo'lsa, qay birini tanlaysiz? Nega?
3. Qizil kitob haqida eshitganmisiz? Unda qanday ma'lumotlar berilgan deb o'ylaysiz?





Matnni ajratib ko'rsatilgan so'zlar o'rniغا quyida berilgan olmoshlardan birini qo'yib o'qing.

uning

ularning

uni

u

OCH QOLDIRILGAN JONIVOR

Yo'lbars – yo'l-yo'l chiziqli bahaybat mushukni kim ham bilmaydi? Negadir ko'pchilik yo'lbars deganda Afrika savannalarini ko'z oldiga keltiradi. Lekin ishonasizmi yoki yo'qmi, Afrikada umuman yo'lbarslar yo'q, mutlaqo! Yo'lbars Osiyo qit'asi hayvonidir.


Yo'lbars mushuksimonlar oilasining pantera urug'iga mansub. **Yo'lbarslarning** 9 ta turi bor. Shulardan 6 tasi hozirda mavjud, uchtasi esa, afsuski, qirilib ketgan. Ana o'sha qirilib ketganlar orasida Turon yo'lbarsi ham bor.

Yo'lbars Hindistonda harbiy jasorat timsoli, Yaponiyada esa mardlik ramzi hisoblanadi. Janubi-sharqiy Osiyo hamda Koreyada **yo'lbarsni** "tog'lar va g'orlar sohibi" deb atashgan. Xitoyda esa yo'lbars kuch va salomatlik ramzi hisoblangan.

Turon yo'lbarsi 200 kilogramm vaznli yirik yirtqich hayvondir. Har bir yo'lbars oilasi o'z yer maydoniga ega bo'lib, o'rtacha 8–10 kvadrat kilometrga xo'jayinlik qilgan. Yo'lbarsning hid bilish organi kuchli rivojlangan, juda yaxshi eshitgan. Ko'zi qorong'ida ham yaxshi ko'rgan. Qochayotgan hayvonni 80–100 metrgacha katta tezlikda quvib borgan. Tutolmasa, uzoq quvib o'tirmagan.

Ov baroridan kelsa, erkagi biryo'la 5–6 kilogrammgacha go'sht yeya olgan. Qorni to'q bo'lsa, 4–5 kun ovga chiqmagan, uyasida ag'anab uxlashni yaxshi ko'rgan. Turon yo'lbarsi bir kecha-kunduzda 18–20 soat uxbab, suv ichish uchungina joyidan qo'zg'algan. Yo'lbarsning tanasi himoya rangiga ega bo'lgan. Mo'ynasi sarg'ish, qora-ko'kimtir yo'l-yo'l chiziqlardan iborat bo'lib, **yo'lbarsni** to'qay-qamishzorlarda payqash qiyin edi. **Yo'lbars** nomi "yo'l-yo'l bars" so'z birikmasidan olingan deb taxmin qilinishiga qaramay, bu so'zning






bezaklar bilan ishlangan yo'lbars tasvirini ko'rish mumkin. Yo'lbarlarning, shu qatorda ularning o'ljalari bo'lgan boshqa tuyogli hayvonlarning ovlanishi, to'qay hamda tog'oldi o'rmonlarining kesilishi, yerlarning qishloq xo'jaligi uchun ishlatalishi, qamishzorlarga o't qo'yilishi – bularning barchasi bu jonivorlarning soni keskin kamayib ketishiga sabab bo'lgan.

XIX asr ikkinchi yarmi – XX asr boshlarida Markaziy Osiyoniyi istilo qilgan Chor Rossiyasi qo'shinlari Turon yo'lbarlari hayotining so'nggi chizig'ini chizib berdi. 1883-yilning 27-fevralida Turkiston harbiy okrugi boshlig'i Toshkent va Chinoz o'rtasida yashaydigan yo'lbarlarni yo'q qilishga buyruq beradi. Ov uchun 12-Turkiston batalyonini jalb etiladi. Toshkent yaqinidagi so'nggi yo'lbarsni 1906-yilda knyaz Golitsin otib o'ldiradi. Jonivorning somon tiqilgan terisi XX asrning 60-yillarigacha Davlat tabiat muzeyida saqlangan. Keyinchalik **yo'lbarsning somon tiqilgan terisi** yong'inda kuyib, yo'q bo'lgan.

Dunyo ekolog va tabiatshunoslari bu turning butkul yo'qolib ketishi **Turon yo'lbarsi** yashaydigan hududlar ekotizimiga katta salbiy ta'sir o'tkazayotganini aniqlashdi. Ayrim jonivorlar keskin ko'payib, boshqalarining esa aksincha – sezilarli darajada kamayib ketishi ekomuhit muvozanatini buzmay qolmaydi, albatta.

Turon yo'lbarsini oxirgi marta 1957-yilda Amudaryo o'zanida ko'rishgan. Oradan 13 yil o'tib, 1970-yilda Turon yo'lbarsi qirilib ketgan deya tan olingan.

Nargis Qosimova





1. Muallif birinchi xatboshini nima maqsadda kiritgan deb o'ylaysiz?
2. Sizningcha, berilgan xarita nimani ko'rsatmoqda?
3. Nima deb o'ylaysiz, nega yo'lbarsning terisi yo'l-yo'l? Bu unga qanday ustunlik beradi?
4. Matnga ko'ra, hayvonning "yo'lbars" deb atalishiga asl sabab nima?
5. Muallif yo'lbarsning suvda yaxshi suzishini nima bilan asoslamoqchi bo'lgan?
6. Turon yo'lbarsining yo'q bo'lib ketishiga sabab bo'lgan omillarni sanang.
7. Tabiatdagi muvozanatning buzilishi deganda nimani tushundingiz?



Olmoshlarning nutqimizdagi ahamiyati borasida qanday xulosaga keldingiz?



Guruhlarga bo'lining. Arilar, qushlar, yirtqich hayvonlar, baliqlarning yo'q bo'lib ketishiga sabab bo'lувчи omillarni yozing. Bu turlarning yo'q bo'lib ketishi qanday oqibatlarga olib kelishi mumkinligi haqida fikr bildiring. Quyidagi jadvaldan foydalanishingiz mumkin.

ARILAR

Qirilib ketishiga olib keluvchi omillar

aloqa to'lqinlarining zichlashuvi

Hodisaning tabiatga zarari

gullarning changlanmay qolishi



Kattalar yordamida hozirgi kunda ekologik muammolarning qanday turlari uchrayotganini aniqlang. Har bir hodisa haqida qisqacha ma'lumot yozib keling.



Quyidagi rasmlarda qanday ekologik muammolarni ko'ryapsiz? Namuna asosida yozing.

Namuna



Muammo – uglerodli iz.

Sabab – avtomobillardan chiqayotgan zararli tutun.

Ta'sir – ob-havoning o'zgarishi.

Yechim – odamlar jamoat transportidan yoki zararsiz yonilg'i dan foydalanishlari kerak.







Guruhlarga bo'lining. Yuqoridagi ekologik muammolardan birini tanlang. Guruh bilan birgalikda ushbu muammo haqida matn yarating. Matnda quyidagilar aks etishi lozim:

- muammoning nomi;
- muammoning sababi;
- muammoning oqibati;
- muammo yechimi uchun taklif (kamida 2 ta);
- taklif etilgan yechimning natijasi haqida taxmin.

Muammoning yechimini taklif qiladigan yaxshi matn quyidagilarni o'z ichiga oladi:

- a) **kirish qismi** – unda muammoning bayoni beriladi. Ya'ni bu qanday muammo ekani tavsiflanadi (uning kelib chiqish sabablarini ham yozish mumkin);
- b) **asosiy qism** – bunda takliflar hamda ularning natija yoki oqibatlari taqdim etiladi. Har bir taklif yangi xatboshidan boshlanadi;
- c) fikrlarni umumlashtiruvchi **yakuniy qismda** muammo va uning yechimi haqidagi shaxsiy fikrlar umumlashmasi yoziladi.

Qo'llanadigan so'z va jumlalarga namunalar:

Takliflarni kiritish uchun: dastlab, usullardan biri shuki, boshqa bir yechim shuki, ... ham yechim bo'lishi mumkin...

Sababni ko'rsatish uchun: tufayli, sababli, shuning uchun, shu sababdan, shuni hisobga olganda...

Ta'sir yoki natijani ifodlash uchun: shunday qilib, demak, natijada, oqibatda, amalda...

Fikrni ta'kidlash uchun: ayon, o'z-o'zidan ma'lumki, ma'lumki, xususan, aynan, ko'rinish turibdiki, shunisi muhimki, shuni ta'kidlash o'rinniki...

Xulosani boshlash uchun: umuman, xulosa qilib aytganda, umumlashtirganda, barchasini hisobga olganda...





O'QING VA MULOHAZA QILING

"AQCHA"MI, "OQCHA"?



Ko'cha-ko'yda ko'p qo'llanadigan "aqcha" so'zining asl ma'nosi hamma ham bilavermagani uchun bu so'z haqida o'qiganlarimni ayтиб о'tishni ma'qul topdim. Bu ma'lumot ham kimgadir asqatib qolsa, ajab emas.

O'tmishda Turkistonda savdo-sotiqlar, to'lov muomalalarida narx, baho, qiymat o'lchovi bo'lgan pul birligi "aqcha" deb atalgan. Aksariyat hollarda aqcha kumushdan zarb qilingan. Manbalarda ta'kidlanishicha, kumushning rangi oq bo'lganligi uchun ham mazkur pul birligi nomi "oq" so'ziga "-cha" qo'shimchasi qo'shilishidan hosil bo'lgan.

"CHANQ" DAGI PAXTA VA MIYA

"Chanoq" so'zining asl ma'nosi – idish. Qadimda otlar va mollar sug'oriladigan idishni "chanoq" deyishgan. Darhaqiqat, paxta chanog'i – paxta turadigan idish, miya chanog'i – miya saqlanadigan idish ma'nosida so'zning asl ildiziga yaqin boradi.

Yana, tarixning ma'lum davrlarida yog'ochdan yasalgan barcha idishlarga nisbatan chanoq so'zi qo'llangan. Hozir paxta ko'sagining har bir xonasi ham "chanoq" deyiladi.

*Eshqobil Shukur,
"Boboso'z izidan"*






QUTB YULDUZI

Bu mavzuda o'rganamiz

- osmon jismlari, yulduzlar xaritasi, qutblar haqida ma'lumot
- atoqli otlar imlosi
- uyushiq bo'laklar
- vergul qo'llash
- ijodiy matn tuzish.



Rasmlar asosida savollarga javob bering.





1. Birinchi rasmda nimalar tasvirlangan? Tushunganlaringizni so'zlab bering.
2. Qutb yulduzi haqida nimalarni bilasiz?
3. Ikkinchi rasmda nimalar tasvirlangan? Dunyo tomonlari qanday nomlanadi?
4. Quyoshning chiqish va botish nuqtasi qayer?
5. Sizningcha, dunyo tomonlarini bilish nima uchun kerak?



Berilgan til birliklaridan foydalanib chizma (2-rasm, 36-bet) asosida dunyo tomonlari va oraliq tekisliklar joylashuvini tushuntiring.

Namuna *Bola qarab turgan nuqta – janub.*

old	qarama-qarshi	teskari	ro'baro	orqa	o'ng
chap	tomon	so'l	oraliq	tekislik	yonbosh



Berilgan so'zlarni izohi bilan moslab yozing. Ushbu so'zlarning talaffuzi va imlosiga e'tibor bering.

qutb

Yer sharining kichraytirilgan tasviri.

kompas

Dunyo tomonlarini aniqlaydigan asbob.

globus

Osmon bilan yerning o'zaro tutashgan chizig'i.

ufq

Yerning aylanish o'qi bilan sirti kesishgan nuqta.



Boshqa tillardan kirgan so'zlar olinma yoki o'zlashma so'zlar deyiladi. Misollar: *globus, kompas, shimol, sharq.*



Tasavvur qiling: siz shimolga qarab turibsiz, shu holatda yon-atrofingizda (o'ng, chap va ortingizda) nimalar bor? Ularni tasvirlab yozing.



Yon-atrofingizga qarang. Atrofdagi odamlar, jonzotlarning harakatini kuzating. Quyidagi so'zlardan foydalanib ular qanday vaziyatda ekani haqida gaplar tuzing va yozing.

ataylab

jo'rttaga

qasddan

noiloj

chor-nochor

ilojsizlikdan



QUTB YULDUZI

Bilasizmi, yulduzlarning ham "yulduzi", ya'ni mashhurlari bo'ladi. Qutb yulduzi ana shundaylardan biri. Chunki u o'tgan davrlar mobaynida ko'plab adashganlarga yo'l ko'rsatib, o'z manzillariga eson-omon yetib olishlarida ko'makchi bo'lgan.

Qadimda dengizchilar yoki sahrodagi karvonlar yulduzlarning joylashishiga qarab yo'lni aniqlashgan. Yulduzlarni o'rganib, ularning xaritasini chizib beradigan kishilarni esa "munajjim" deb atashgan.

Qutb yulduzi osmondagи eng yorqin yulduzlardan biri bo'lgani uchun uni topib olish qiyin emas. Olimlarning aytishicha, kunlar, oylar, ba'zan yillar o'tishi bilan yulduzlarning samodagi o'rni o'zgarib turar ekan. Faqatgina Qutb yulduzi o'z joyidan hech qachon jilmaydi, doim osmonning shimoliy qismida yaraqlab turadi. Shunday o'ziga xos xususiyati tufayli sayyoohlar Qutb yulduziga qarab shimol, janub, sharq va g'arbni aniqlay olishgan.

Qutb yulduzi Katta Ayiq yulduz turkumiga kiradi. U Quyoshdan 120 marta katta bo'lib, 10 ming marta kuchliroq nur taratadi. Odamlarga yo'l ko'rsatib turgani uchun uni "yo'lchi yulduz" deb ham atashgan. Juda olisda bo'lgani bois ushbu yulduz nurlari Yergacha 472 yilda yetib keladi.

"Jajji akademik" jurnalidan





1. Qutb yulduzi mashhurligining sababi nima?
2. Munajjimlar nima bilan shug'ullangan?
3. Qutb yulduzi o'z joyini o'zgartirib turadimi? Javobingizni izohlang.
4. Matndan Qutb yulduzi haqida berilgan **daliliy tavsifni** aniqlang.
5. Nima uchun "yo'lchi yulduz" deyilishini izohlang. Kitoblarda ushbu so'z birikmasini uchratganmisiz? Uni yana qanday ma'noda qo'llaymiz?



Matndagi kun so'ziga qaysi izoh mos keladi? Yozing.

Sutkaning quyosh chiqqandan botgunigacha bo'lgan qismi

Yerga issiqlik va nur taratib turuvchi yulduz, quyosh, oftob

Matndagi oy so'ziga qaysi izoh mos keladi? Yozing.

Yerning tabiiy yo'ldoshi, tunda Quyosh nurini aks ettirib turuvchi osmon jismi

O'rta hisobda 30 kunlik muddat, yilning o'n ikkidan bir qismi



Matndan qiya yozuvda berilgan gaplarni ko'chiring. Bir xil so'roqqa javob bo'lgan, o'zaro teng bog'langan so'zlarning tagiga chizing.



Gapda biror bo'lak (masalan, ega) bir nechta bo'lishi va o'zaro teng bog'lanishi mumkin. Bunday bo'laklar **uyushiq bo'laklar** (masalan, *uyushiq egalar*) deyiladi.

Uyda **Nodira** yoki **Alimardon** qoladi.

Mazkur gapdagi *Nodira*, *Alimardon* bo'laklari uyushgan, ya'ni 1) ikkalasi ham ega; 2) o'zaro teng (*yoki vositasida*) bog'langan; 3) bitta so'zga (*qoladi so'ziga*) tobelangan.

Gapning barcha bo'laklari: kesim, ega, ikkinchi darajali bo'laklar va undalmalar uyu-shib kelishi mumkin:

Kenja qizimiz aqli, biroq qaysarroq. (kesimlar uyushgan)

Haydarali na bozorga, na maktabga, na uyg'a bordi: kunini tog'asining bog'ida o'tkazdi. (ikkinchi darajali bo'laklar uyushgan)

Abbos, Aziza, bu yoqqa kelinglar. (undalmalar uyushgan)



Muhokama uchun savol. Uyushiq bo'laklar orasida qachon vergul bo'lmaydi?



Matndagi atoqli otlarni aniqlab, yozing. Ular doim bosh harf bilan yoziladimi? Fikringizni izohlang.



Yana qanday yulduzlar bor? Ular haqida kitob, gazeta, jurnal, internet manbalaridan ma'lumot yoki afsona, rivoyat topib, o'qing. Yulduzning o'ziga xos jihatlari haqida maqola yozing.




Matnlarni o'qing va savollarga javob bering.

1

Men uchun ikki buyuk inson bo'lgan. Qo'shiqchi Jon Lennon hamda yozuvchi Xorxe Luis Bortex. Bolaligimda yozuvchi Bortex bilan uchrashishni juda-juda orzu qilar edim. Oxir-oqibat bu buyuk inson bilan uchrashish uchun avtobusga o'tirib, Rio de Janeirodan Argentinaga yo'l oldim. Menga berilgan manzil bo'yicha keldim. Adib uyi qarshisidagi mehmonxona hovlisida, **kursida** o'tirardi. Men unga yaqinroq bordim. U bilan suhbatlashish uchun ikki kecha-kunduz yo'l bosib, bu yerga kelgandim. ***Ammo uning salobati tufayli bo'lsa kerak, mum tishlab qoldim.*** O'z-o'zimga "Men o'z yo'lchi yulduzim bilan yuzma-yuz turibman. Yulduzlar esa hech qachon gapirmaydilar. Ular bilan **pinhona** gaplashish mumkin", deb **taskin** berdim.

Paulo Koelo



2

O'shanda men 5-6 yoshlarda edim. Bir kuni otam g'ishtga o'xshash, qog'ozga o'rog'liq nimadir qo'ltiqlab keldi. G'alati o'yinchoq bo'lsa kerak, deya akalarim va men qotib turardik. Otam qo'llarini yuvib kelib, asta qog'ozning iplarini yechdi. Bu rus adibi Nikolay Nosovning "Bilmasvoy va uning sarguzashtlari" nomli qalin, muqovasida ajoyib suratlari bor, chiroyli, katta, yap-yangi kitob edi.

Rahmatli ota-onam o'qituvchi edilar. Otam o'qituvchilik bilan birga mакtabda kutubxonachilik ham qilar edilar. Ikki akam bilan men bo'sh paytda kutubxonaga chiqib, kitob, gazeta-jurnallarni taxlashar, "Gulxan", "G'uncha" jurnallarining yangi sonini birinchi bo'lib o'qib, keyin hammaga maqtanardik. Kechqurunlari onam **tancha** atrofida dasta-dasta daftar tekshirar, otam boshchiligidagi biz darsliklar, **supradek juldur** xaritalarni ayvonga yoyib, piyolaga bug'doy unidan xamir tayyorlab yelimlar edik. Men kartonlardan muqova qirqib, varaqlarni joy-joyiga taxlardim. Akalarim xaritadan shahar, qit'alarni topish o'ynashar edi. Darslar va boshqa yumushlarni tugatgach, ko'pincha oydin kechada otamdan urush dahshatlarini, onamdan ajoyib kitoblar mazmunini maroq bilan tinglardim.

Keyinchalik ko'p qo'llanmalar, badiiy asarlar o'qidim. **Bu kitoblar qalbimga ijod zavqini soldi, hikoyalar yoza boshladim.** O'qituvchilik bilan birga bolalar adabiyoti bilan jiddiy shug'ullandim.

Men bugun ham o'g'il-qizlarimizga Alisher Navoiy, Abdulla Qahhor, Oybek, Aziz Nesin, Antuan de Sent-Ekzyuperi, Pushkin, Tolstoy va boshqa ijodkorlarning bitmas-tuganmas xazinalari shunday mayoq bo'lishini juda-juda istayman.

Muhayyo To'laganova



1. Birinchi matndagi hikoya qahramoni kim?
2. Birinchi hikoya qahramoni Xorxe Luis Borxes bilan nima maqsadda uchrashishga qaror qildi?
3. Birinchi matnda ajratib ko'rsatilgan jumlanı izohlang. Undagi iboradan yana qanday vaziyatda foydalanish mumkinligi haqida o'ylab ko'ring.
4. Birinchi hikoya qahramonining o'ziga taskin bergan jumlasini qayta o'qing. Nima uchun u izlab borgan odamini o'zining "yo'lchi yulduzi" deb atayotganini tushuntirishga harakat qiling.
5. Ikkinci matn qahramonining oilasi haqida sizda qanday tasavvur uyg'ondi?
6. Nima deb o'ylaysiz, biror kitob yoki jurnalni o'qib chiqqanligi haqida boshqalarga maqtanish yaxshimi? Siz ham shunday qilganmisiz? Bunday paytda inson o'zini qanday his qiladi?
7. Ikkinci matnda ajratib ko'rsatilgan iborani izohlang.
8. Ikkinci hikoya qahramoni qaysi kasblarni egalladi? Bunga nima sabab bo'lgan deb o'ylaysiz?



Matnda ko'k rang bilan ajratib ko'rsatilgan so'zlarni berilgan izohlari bilan moslashtirib ko'chiring. Ushbu so'zlarni qo'llab boshqa gaplar tuzing.

- 1 Xamir yoyish, non yasash uchun mo'ljallangan dasturxonsimon ro'zg'or buyumi.
- 2 Xonaning o'ttasi yoki chekkaroq qismiga to'rtburchak chuqurchaga o'rnatilgan, ustiga ko'rpa yopilib, atrofiga ko'rpachalar to'shalgan xontaxtadan iborat bo'lib, ichiga o'tin yoki ko'mir cho'g'i solinadi.
- 3 Bir kishi o'tirishi uchun mo'ljallangan, odatda, to'rt oyoqli oddiy moslama, o'rindiq, suyanchiqsiz stul.
- 4 Kiyilaverib yoki tutilaverib eskirib ketgan buyum, asosan kiyimga nisbatan qo'llanadi.
- 5 Yupatuvchi narsa, gap, ish-harakat, tasalli.
- 6 Kishilardan maxfiy ravishda, birovga bildirmay, yashirinchha.



Matnda berilgan atoqli otlarni aniqlang, ularni quyidagi guruhlarga ajratib yozing.

Joy nomlari

Shaxs nomlari

Jurnal nomlari



Matndagi uyushiq bo'laklar ishtirok etgan gaplardan birini tanlang va namunadagidek tahlil qiling.

Namuna G'alati o'yinchoq bo'lsa kerak, deya akalarim va men qotib turardik.

1. Uyushiq bo'laklar: akalarim va men.
2. Gapdagi vazifasi: ega.
3. Uyushiq bo'laklarni bog'lovchi vosita: va.



"Mening yo'lchi yulduzim" mavzusida matn yozishga tayyorlaning.



"Mening yo'lchi yulduzim" mavzusida ijodiy matn yozing. Berilgan ko'rsatmalarga rioya qiling.

Matningiz quyidagi qismlardan iborat bo'llishi lozim:



Matningizda quyidagi til birliklari va rasmlardan foydalanishga harakat qiling:

atoqli otlar (kishilar, predmet, hodisa va joylarga atab qo'yilgan otlar)

olmoshlar (hamma, butun, har kim, har bir, jami, har qachon, har qayerda)

uyushiq bo'laklar





Yozgan matningizni taqdim etishga tayyorlaning, xatolar ustida ishlang.



Do'stingizdan sizga o'z yo'lchi yulduzi haqida gapirib berishini so'rang. Uning nutqini kuzating. Nutqidagi muhim ma'lumotlarni yozib oling. Suhbatingiz mazmunli bo'lishi uchun do'stingizga quyidagi savollar bilan murojaat etishingiz mumkin:



1. Sen hayotda qanday insonlarga havas qilasan?
2. Yon-atrofingda shunday insonlar bormi? Ular haqida gapirib ber.
3. Ular bunday fazilatlarga yoki yutuqlarga qanday erishgan bo'lishi mumkin?
4. Hayotdagi eng buyuk maqsading nima? Ushbu maqsadga erishish uchun bugungi kunda nimalar qilyapsan?



O'QING VA MULOHAZA QILING


"UYA" VA "UY"



Qushlar ini ma'nosini ifodalagan "uya" so'zining "uy" so'ziga aloqasi bo'lishi ehtimolga yaqin. Chunki qadimda turkiy tillarda, xususan, xakaslar tilida "uya" so'zi *oila, urug', avlod* degan ma'nolarni anglatgan.

Hozir tilimizda "uy" yashashga mo'ljallangan qurilma ma'nosidan tashqari *oila, yurt, avlod* ma'nolarini ham anglatadi. "Avvalo uyingda tinching bo'lsin", "O'z uyingni o'zing asral!" degan gaplar ham shu ma'noni ifodalab keladi.

JO'YALI GAP



"Alisher Navoiy asarlari tilining izohli lug'ati"da "jo'ya" so'zi "jo'yak", "ariq" ma'nosini anglatishi ta'kidlangan. Dehqonlar poliz arig'ini "jo'ya" deyishadi. Tilimizda ma'noli gapning "jo'yali gap", mantiqsiz fikrning "nojo'ya fikr" deyilishi ham shundan kelib chiqqan. Jo'yasiz ekin unmaydi, tez qurib qoladi. Jo'yasiz gapning holi ham shu.

Toki bir jo'ya aro kesmakta tok,
Ayladi oni yilon sanchib halok.

(*Alisher Navoiyning
"Lison ut-tayr" asaridan*)

Eshqobil Shukur, "Boboso'z izidan"



C VITAMINI

Bu mavzuda o'rganamiz

- inson salomatligida to'g'ri ovqatlanishning ahamiyati • C vitaminini • sohaga oid til birliklari
- infografikani tushunish • miqdor va tartib sonlar • sifatlar imlosi.



Infografikaga asoslanib C vitaminini haqida so'zlab bering.

C vitaminini (askorbin kislotasi) moddalar almashinuvida, to'qimalar faoliyatida muhim ahamiyatga ega. U qonning suyulishida ishtirok etadi. Virus va bakterial infeksiyalardan himoya qiladi. Terida pigmentlarning to'g'ri taqsimlanishida ko'maklashadi.

100 gramm mahsulot tarkibida



Na'matak
470 mg



Qizil bulg'ori
50 mg



Petrushka
150 mg




Bryussel karami
120 mg




Apelsin
100 mg



Limon
120 mg



- Jigar faoliyatini yaxshilaydi.
- Yaralarning bitishini tezlatadi.
- Qontomirlarni mustahkamlaydi.
- Immun tizimini kuchaytiradi.



- Milklar qonashi.
- Uyqusizlik.
- Charchoq.
- Teri qurishi.
- Tish yemirilishi.
- Tananing ko'karishi.

Kundalik me'yor

Bolalar
0–13 yoshgacha
40–50 mg

Ayollar
19 yoshdan yuqori
75 mg

Erkaklar
19 yoshdan yuqori
90 mg

1. C vitaminiga boyligi bo'yicha qaysi mahsulotlar 1-, 2-, 3-o'rinni egallaydi?
2. C vitamini tanamiz uchun qanchalik muhim?
3. C vitaminining qaysi xususiyatini eng muhim deb hisoblaysiz? Javobingizni asoslang.
4. Sizning C vitaminiga bo'lgan kundalik ehtiyojingiz qancha?



Infografika asosida beshta xulosa yozing.

Namuna Katta yoshli erkaklar bir kunda eng kamida 90 mg C vitamini iste'mol qilishi kerak.



Infografika asosida quyida berilgan vaziyatlarning to'g'ri yoki noto'g'ri ekanini aniqlang. Xulosangizni asoslang.

1

Azizaning oyisi charchoq hissi hamda milklarining tez-tez qonashidan shikoyat qilib shifokor ko'rigiga bormoqchi. Qo'shnisi unga ko'proq petrushka va qizil qalampir yeyishni tavsiya qildi.

2

Pishloq, baliq va qo'ziqorin B2 vitaminiga boy. Ularni karam, kartoshka va limon bilan qo'shib yeyish juda foydali.

3

Bekzodning yoshi 12 da, u C vitaminiga bo'lgan kunlik ehtiyojini qoplash uchun har kuni bittadan olma yeydi.

4

Nodir o'yin chog'ida jarohat oldi. Buvisi undagi yara tezroq bitishi uchun C vitaminiga boy mahsulotlardan ko'proq iste'mol qilish kerakligini aytди.

5

Salima matabning 9-sinfida o'qiydi. Oyisi unga har kuni 100 g na'matak mevasidan damlama tayyorlab beradi. Salima uni kun bo'yи ichib yuradi.



Sonlar miqdor yoki tartibni bildiradi. Shunga ko'ra, ular ikki guruhga bo'linadi:
1) miqdor sonlar; 2) tartib sonlar.

Miqdor sonlarning ishlatalishiga misollar:

Ushbu taomni yanada xushbo'y qilish uchun unga **bitta** limon suvini siqb, solish mumkin.

100 g na'matak mevasidan tayyorlangan sharbatni oilamiz bilan ichdik.

Tartib sonlarning qo'llanishiga misollar:

Insonning **birinchi** ehtiyojlari sirasiga ilm olishni ham kiritish kerak.

Yetinchi sinfda o'qiydigan bolalarning C vitaminiga bo'lgan bir kunlik ehtiyoji o'g'il bolalar uchun 75 mg ni, qizlar uchun esa 65 mg ni tashkil etadi.



Berilgan jadval asosida turli yoshdagи kishilarning C vitaminiga bo'lgan kundalik ehtiyojini ta'minlash uchun tavsiyalar yozing. Bunda yuqorida berilgan infografika ma'lumotlari hamda miqdor va tartib sonlardan foydalaning.



Yoshi	Erkaklar (mg, 1 kunda)	Ayollar (mg, 1 kunda)
6 oygacha	40	40
7–12 oylik	50	50
1–3 yosh	15	15
4–8 yosh	25	25
9–13 yosh	45	45
14–18 yosh	75	65
19 yoshdan katta	90	75

Namuna 9 yoshli bolalar kuniga 45 mg C vitamini qabul qilishi lozim. Buning uchun ular bir dona olma yeyishlari kerak.



Belgilash olmoshlaridan foydalanib C vitamini iste'moli bilan bog'liq 7 ta tavsiya yozing.

Namuna Har qanday meva va sabzavot tarkibida ma'lum miqdorda C vitamini bor.

QO'LLASH BO'YICHA YO'RIQNOMA

Preparatning savdo nomi: Vitamin C

Ta'sir etuvchi modda: askorbin kislotasi

Dori shakli: chaynaladigan tabletkalar

Tarkibi (bir tabletka):

faol modda: askorbin kislotasi – 300 mg;

yordamchi moddalar: qand kukuni yoki saxaroza, laktoza, sukraloza, polivinilpirrolidon K30, sorbitol, aerosil, **magniy** stearati yoki kalsiy stearati, **quruq** apelsin xushbo'yi.



Tavsifi

To'q sariq rangli va oq dog'lari bo'lgan, dumaloq, yassi shaklli, och sariq rangli, bir tomoni ariqchali tabletkalar.

Farmakoterapevtik guruhi
Vitamin.

Farmakologik xususiyatlari

Askorbin kislotasi (C vitamini) organizmda uglevodlar almashinushi, qon ivishi, to'qimalar regeneratsiyasini boshqarishda, immunitetni mustahkamlashda **muhim** ahamiyatga ega. Odam organizmi askorbin kislotasini ishlab chiqarmaydi, bu vitamin faqat ovqat bilan tanaga kiradi. Me'yorida, **to'g'ri** va **sifatli** ovqatlanilsa, organizmda C vitamini **taqchilligi** sezilmaydi.

Qo'llanishi

C vitamini bolalarning **faol** o'sish davrida, homiladorlikda, emizishda, **aqliy** zo'riqishda, **toliqishda**, stress holatlarida, **uzoq** va **og'ir** kasalliklardan **keyingi** sog'ayish davrida qo'llanadi.

Nojo'ya ta'sirlari

- Preparat **allergik** reaksiyalarga sababchi bo'lishi mumkin.
- Me'da-ichak yo'llarining **shilliq** qavatlariga nojo'ya ta'sir qilish ehtimoli bor.

Qo'llash mumkin bo'lmagan holatlar

Qon ivishi ortganda, qandli diabetda va qonda qand miqdorining oshishi bilan kechadigan holatlarda **katta** dozada qabul qilish mumkin emas.

Maxsus ko'rsatmalar

Preparat bolalar ololmaydigan joyda saqlansin va yaroqlilik muddati o'tgach, qo'llanmasin.

Saqlash sharoiti

Quruq, yorug'likdan himoyalangan joyda, +25°C dan yuqori bo'lmagan haroratda saqlansin.

Yaroqlilik muddati

2 yil.

Dorixonalardan berish tartibi
Shifokor retseptisiz.



1. Dori ichishdan oldin qo'llash bo'yicha yo'riqnomalar bilan tanishish nega muhim?
2. C vitaminining fanda yana qanday nomi bor?
3. Oxirgi marta qachon, qanday mahsulotning qo'llash bo'yicha yo'riqnomasi bilan tanishdingiz?
4. Yo'riqnomalarda faol va yordamchi moddalar ajratib ko'rsatiladi. Ularning farqi nimada bo'lishi mumkin?
5. Yo'riqnomada dori tavsifi berilishi nima uchun muhim?
6. Mazkur preparat qanday salbiy ta'sir ko'rsatishi mumkin ekan?
7. "Qo'llash bo'yicha yo'riqnomalar" doridan tashqari yana nimalarda bo'ladi?



Berilgan so'zlarni izohi bilan moslashtirib ko'chiring.

Preparat

massaga ega bo'lgan zarralar majmui, jismlarni tashkil qilgan narsa.

Modda

biror narsaning aniq o'lchovga ega miqdori.

Regeneratsiya

shifokorning dori tarkibi, dozasi va undan qanday foydalanish haqida bemorga beradigan yozma ko'rsatmasi.

Stress

laboratoriya yoki fabrikada tayyorlangan kimyoviy yoki farmatsevtik mahsulot.

Doza

sifat-belgilarning bayoni, ta'rifi, tasviri.

Shifokor retsepti

tashqi ta'sir natijasida sodir bo'ladigan kuchli hayajonlanish, bezovtalik, asabiylik holati.

Tavsif

organizmning yo'qolgan yoki jarohatlangan a'zo va to'qimalarni qayta tiklashi.



Yo'riqnomada matni asosida berilgan topshiriqlarni bajaring.

1. Yo'riqnomadan C vitaminining organizm uchun zarurligini bildiruvchi uchta ma'lumotni ko'chiring.
2. C vitamini qabul qilish tavsiya etiladigan uchta holatni yozing.
3. C vitamini qabul qilish tavsiya etilmaydigan uchta holatni yozing.



Yo'riqnomada matni asosida berilgan testlarni yeching. Test kalitini tuzib, javoblarni daftarga belgilang.

1. Matn asosida berilgan xulosalarning qay biri noto'g'ri?

- A) Dorixonadan "Vitamin C" preparatini shifokor retseptisiz olish mumkin.
- B) "Vitamin C" preparatini shifokor retseptisiz qabul qilish mumkin.
- C) "Vitamin C" preparatini qabul qilish muddati shifokor tomonidan belgilanadi.
- D) C vitamini organizmga faqat ovqat bilan kiradi.

2. Preparatning qo'llanishi organizm uchun foydali va ahamiyatli ekani yo'riqnomaning qaysi qismida aytilgan?

- A) "Qo'llanishi" qismida
- B) "Qo'llash usuli va dozalari" qismida
- C) "Farmakologik xususiyatlari" qismida
- D) "Qo'llash mumkin bo'limgan holatlar" qismida



Bolalar ichishi mumkin bo'lgan biror dorining qo'llash bo'yicha yo'riqnomasi bilan tanishing. Undan o'zingiz eng muhim deb bilgan beshta ko'rsatmani ko'chiring.





Matnda qo'llangan olinma so'zlarni ajratib yozing, ularni talaffuz qilish mashqlarini bajaring.



C vitaminining dori shaklidagi tavsifiga oid qismni ko'chirib oling. "Qanday?" so'rog'iga javob bo'lувчи so'zlarning tagiga chizing.



O'zingiz ichgan birorta dorining shunday tavsifini yozing.



Sifatlar tuzilishiga ko'ra **sodda, qo'shma, juft** va **takroriy** bo'ladi.

Sodda sifatlar: sariq, qalin, tinch, berahm.

Qo'shma sifatlar: qimmatbaho, shifobaxsh, kamgap.

Juft sifatlar: yaxshi-yomon, maza-bemaza, yakka-yu yagona.

Takroriy sifatlar: mayda-mayda, oppoq-oppoq, shirin-shirin, yo'l-yo'l.

Qo'shma sifat qismlari qo'shib, juft va takroriy sifat qismlari esa chiziqcha bilan yoziladi.



Yo'riqnomada ajratib ko'rsatilgan so'zlardan "qanday?" so'rog'iga javob bo'lувчи so'zlarni aniqlang. Ularni sodda tub va sodda yasama sifatlarga ajratib yozing.

Sodda tub sifatlar

?

Sodda yasama sifatlar

?



Quyida berilgan sifatlarni tuzilishiga ko'ra to'rt turga ajrating. Ular ishtirokida nutqiyl mavzuga doir gaplar tuzib, yozing.

Sersuv, xushta'm, achchiq-achchiq, ta'msiz, shifobaxsh, katta-katta, katta-kichik, kamquvvat, barra-barra, turli-tuman, ichakuzdi, qoramtiir.

Sodda sifatlar

Qo'shma sifatlar

Juft sifatlar

Takroriy sifatlar



Yo'riqnomadan sonlar bilan bog'liq ma'lumotlar keltirilgan gaplarni ko'chirib oling. Ularni miqdor yoki tartibni ifodalashi bo'yicha tahlil qiling.



Berilgan matnni o'qing. Shu matn asosida limon iste'mol qilishga doir yo'riqnomalar yozing.

LIMON MEVASI HAQIDA

Limon mevasining nordon va o'tkir ta'mi insonni tetiklashtiradi. Undagi C vitaminini esa immunitetimizga turli kasalliklar bilan kurashishda yordam beradi.

Bundan tashqari, limon kislotasi ovqat hazm qilishni osonlashtiradi, organizmda moddalar almashinuvini yaxshilaydi. Temir moddasiga boyligi sabab kamqonlikni davolaydi. Eng muhim, shamollahsha juda ham samarali yordam beradi.

Biroq limonning zararli taraflari ham yo'q emas. Masalan, oshqozon yoki ichak yarasidan aziyat chekayotganlar, citrus mevalarga allergiyasi borlar uni iste'mol qilmasligi kerak. Limon tish emaliga salbiy ta'sir qiladi. Uni juda ko'p miqdorda iste'mol qilish esa qon bosimiga yomon ta'sir ko'rsatadi. Oshqozon shilliq qavatiga salbiy ta'sir etishi tufayli uni och qoringa iste'mol qilish tavsya etilmaydi.

Limon yuqori haroratda foydali xususiyatlarini yo'qotadi. Shu sababdan qaynoq choyga limon solish xato. Bir kunda bir necha bo'lak limon iste'mol qilish mumkin. Limonning o'zini yegandan so'ng tish emaliga zarar keltirmasligi uchun og'izni chayish zarur.

Limon xarid qilayotganda mevaning qattiq va tarangligiga e'tibor qiling. Meva yumshoq bo'lsa, demak, eskirgan. Foydali va sersuv limonning po'sti silliq va qattiq bo'ladi.

Limonni sovitkichda 4–5 haftagacha konteyner yoki yelim xaltalarga solib saqlash mumkin. Xona haroratida esa bir haftacha yaxshi saqlanadi, so'ng quriy boshlaydi.

Internet ma'lumotlari asosida tayyorlandi.

Eslatma

Yo'riqnomada "Vitamin C" preparatini qo'llash bo'yicha yo'riqnomadan andaza oling. Yoriqnomada qismlari uchun sarlavhalar qo'ying.



Oila a'zolaringizdan limonning kundalik hayotdagi maishiy ahamiyati (tozalikni saqlashda, dog'larni ketkazishda va h.k.) haqida so'rang. O'rganganlaringizni eslatma sifatida yozib oling.



Quyidagi parchada ajratib ko'rsatilgan so'zlarning asosini aniqlang. Ularni namunadagidek tahlil qilib, yozing.

Namuna

Yara.

1. Inson tanasining shikastlanishidan hosil bo'ladi.
2. Biror ishni bajarishga loyiq bo'lmoq; bajara olmoq; asqatmoq.

Biroq limonning zararli taraflari ham yo'q emas. Masalan, oshqozon yoki ichak yarasidan aziyat chekayotganlar, citrus mevalarga allergiyasi borlar uni iste'mol qilmasligi kerak. Limon tish emaliga salbiy ta'sir qiladi. Uni juda ko'p miqdorda iste'mol qilish esa qon bosimiga yomon ta'sir ko'rsatadi. Oshqozon shilliq qavatiga salbiy ta'sir etishi tufayli uni **och** qoringa iste'mol qilish tavsya etilmaydi.



O'QING VA MULOHAZA QILING

MAGAZINDAGI XAZINA



"Magazin" – bir qarashda ruscha so'zga o'xshaydi. Lekin u asli sharqqa oid, ya'ni arabcha bo'lib, "maxazin" shaklida bo'lgan va boshqa tillarga ko'chgan.

Alisher Navoiyning mashhur

*Yigitlikda yig' ilmning maxzanin,
Qarilik chog'i xarj qilg'il ani...*

satrlaridagi "maxzan" ham asli shu so'zga borib taqaladi. Bu so'zlarning shakliga diqqat bilan qaralsa, ularning tarkibida "xazina" so'zining borligini sezish mumkin. "Maxazin" so'zining tub ildizi "saqladi", "to'pladi" degan ma'noni anglatgan.

"Mag'oza" so'zi ham "magazin" so'ziga yaqin. "Xo'ja Nasriddin" filmida "Mag'oza" – "almashtirish" degani" degan gap bor.

"AMMA" M BILAN "AMAKI" M

Amma bilan amaki hayotda qarindosh bo'lgani kabi tilda ham bir-biriga qarindoshdir. Bu so'zlar ikki tomchi suvday bir-biriga o'xshaydi.


Bir qarashda "amma" so'zining "amaki" so'zi bilan tub ma'nosi bir xil ekanini anglash qiyinroqday. Chunki bu so'zlarning biri ayol, biri esa erkak qarindoshga nisbatan qo'llanadi. Biroq mohiyat nuqtayi nazaridan bu ikkovi bitta so'z ekanini ilg'asa bo'ladi.

"O'zbek tilining etimologik lug'ati"da izohlanishicha, "amaki" so'zi ham, "amma" so'zi ham bitta ildizdan o'sib chiqqan bo'lib, ularning tub ma'nosi arabchada "otaning akasi" ma'nosini anglatadi.

Ma'no taraqqiyoti natijasida bu so'z ikkiga ajralib, biri otaning aka-ukasi, biri esa otaning opa yoki singlisini ifodalaydigan bo'lib ketgan.

Eshqobil Shukur, "Boboso'z izidan"





KURASH – MILLIY SPORT TURI

Bu mavzuda o'rganamiz

- milliy kurash tarixi • an'analar • sifatlarning yasalishi • bog'lovchilar • dialog tuzish • murojaat birliklari.



1. "Monolog" hamda "dialog" atamalari haqida nimalarni bilasiz?
2. Monolog va dialogning farqli jihatlari nimada ko'rindi?



Ushbu chizmani xattaxtada to'ldiring.

monolog

dialog



"Yulduzlar mangu yonadi" asaridan olingan parchalarni to'g'ri ketma-ketlikda qo'yib, dialog hosil qiling.

- | | | | |
|---|--|---|---|
| 1 | – Yana-tag'in jahon sporti emish deng. | 5 | – Shu, Maksim polvon juda sovuq olishar ekan, nima dedingiz? |
| 2 | – U fransuzlarniki-a? | 6 | – Aytganday, shu bola ikki marta jahon championi bo'ldi-ya. |
| 3 | – Himm, juda lanj olish. Klassik kurashda oyoq bilan chil berish degan gap yo'q. | 7 | – Balli! Uzoqlarga qarab yashaymiz-u, oyog'imiz ostidagi gavharni ko'rmaymiz. |
| 4 | – Mengboy kalning gapida jon bor. Kitoblik Sayfiddin Hodiyev bor-ku, yaqinda o'sha bilan o'tirib qoldim. Trenerlar meni jahon championi qilib yetishtirdim deb suyunadi, bilmaydilarki, men bolaligimdan to'ylarda olishib yurgan tayyor polvon edim, deydi. | 8 | – Shu, fransuzlargayam qoyilman, o'zining olishini butun jahonga yoygan. |
| 9 | – Sportchi-da, seksiyada tarbiya topgan. Ular kitobda nima yozilgan bo'lsa, shuni qiladi. | | |



10 – Sport ham gapmi, san'at! Ko'ryapsizmi, Tilovberdining o'ynab olishuvini. Buni hech qaysi trener, seksiya ham o'rgatolmaydi.

11 – Televizorda Montreal olimpiadasini ko'rdilaringizmi? Klassik kurashni olib ko'rsatdi. Bir sovug'-e, shuyam olish bo'ldi-yu.

12 – Men yaqinda sambo olishi haqidagi kitobni ko'rdim. Hamma chillarning rasmi bor. Xoh ishoning, xoh ishonmang, oyoqdan olishdan boshqa hammasi o'zimizning olishda bor ekan-e.

13 – Mo'min muallim, mana, siz o'qimishli odamsiz, uyingizda kitobingiz ko'p deb eshitaman. Siz aytинг, nega endi bir lanj klassik kurash butun jahon sporti bo'ladi-yu, o'zimizning olishni faqat to'yda yo "Hosil bayrami"da ko'ramiz? Yo olishimiz sport emasmi?



1. Suhbat nima haqida edi?
2. Suhbatdoshlar nima haqida kuyinib gapirishmoqda?
3. Qaysi so'z "kurash" so'ziga ma'nodosh sifatida qo'llangan?
4. Nima deb o'ylaysiz, suhbatda ko'tarilgan muammo hozirgi kunda o'z yechimini topganmi? Qanday?



Ikki yoki undan ortiq shaxs o'rtaсидаги suhbat **dialog** deyiladi.



Yuqoridagi dialog parchalarida qo'llangan tire belgisiga diqqat qiling. Tire belgisining bu xususiyati haqida qoida yarating.



Quyidagi dialogni rollarga bo'linib o'qing. Ajratib ko'rsatilgan so'zlarni asos hamda so'z yasovchi qo'shimchalarga ajrating (ba'zi so'zlar asos va qo'shimchaga emas, ikkita so'zga ajraladi).

- Karimboy, yoshlarga nima bo'lyapti?
- Tushuntiribroq gapir, nimani aftyapsan?
- Yoshlarni aytaman-da, hammasi o'zicha **aqlii, bama'ni** ish qilyapman deb o'laydi.
- Obbo, yana nimadan ko'ngling to'lmayapti?
- Kecha to'yda bakovullik qildim, bir yoshgina polvon davraga maykaga o'xshagan kiyimda chiqib kelsa bo'ladimi. Uni mayka ham deb bo'lmaydi aslida. Ishton yo'q, maykaning davomi ishton vazifasini o'taydi. Yana uning qip-qizil hamda **guldor** ekaniga o'laymi.
- Iya, shunaqa kiyimda kurash tushgani chiqibdimi?

– Ha-da, bor, boshqa kiyim kiyib chiq, uyalmaysanmi shuncha odam oldida, desam, biz musobaqalarda shu kiyimda chiqamiz, deydi. Sport ustasi ekan bu kishim.

– Qiziq-ku, maykaning qayeridan tortib kurash tushadi? Qattiqroq tortsang, u bechara uzilib ketadi-ku! Raqib uchun juda **noqulay** bu kiyim.

– Men ham shuni aytsam, siz qayerdan ham tushunardingiz, men bu kiyimda jahon championatlarida qatnashganman deydi, olifta!

– Kurashga qo'yadingmi, axir?

– Qo'ymadim, bor ota-bobong kiygan yaktakmi, choponmi kiyib, belbog' bog'lab chiq, dedim. Axir, kurashda shu belbog' va chopondan tortib kurashiladi-ku, boplabmanmi?

– Haa, to'g'ri qilbsan, ishtonni ham bir nima qildinglarmi yo chopon tagida qoldimi? (kuladi)

– Hartugul, sheriklari tushungan odamlar ekan, pati yulingan **kasalmand** tovuqning egniga choponga qo'shib ishton ham ilib yuborishibdi.

– O'zi kurashishni bilarkanmi?

– Haa, bu tomondan ancha epchil, **serharakat** bola ekan. Oxirida yengib, yutuqni olib ketdi. O'zi raqibi ham **devqomat**, lekin **quyonyurak** ekan-da, nuql qochib yurdi. Gavdasi katta bo'lgani bilan yuragi yo'q ekan **xomsemizning...**



Ikki qariyaning suhbatiga tayanib ayting-chi, maykasimon kiyim kiyib chiqqan bola qaysi sport turi bilan shug'ullanadi?



Sifatlar ikki xil usulda yasaladi:

1. So'zga qo'shimcha qo'shib: *aql + li*, *ser + harakat*.

2. So'zga so'zni qo'shib: *quyon + yurak*, *jigar + rang*.

-li, -dor, -mand, ser-, ba- qo'shimchalari bilan yasalgan sifatlar o'sha narsa mavjud yoki ko'p ekanini anglatadi: **farzandli** – farzandi bor, **serfarzand** – farzandi ko'p.

-siz, be-, no- qo'shimchalari bilan yasalgan sifatlar o'sha narsa yo'q yoki kam ekanini anglatadi: **suvsiz** hovuz – suvi yo'q, **suvsiz** olma – suvi kam.



Quyidagi jadvalga moslab so'zlar yozib keling. Bunda "+" belgisi o'sha narsa bor ekanini, "–" esa yo'q ekanini anglatadi.

+

–

aqli

aqlsiz




Nega jigarrang, havorang, siyohrang so'zlari qo'shib yoziladi-yu, oq rang, qizil rang so'zlari ajratib yoziladi?



Matnni o'qing. Savollarga javob bering.

KURASHNING QAYTA TUG'ILISHI



Kurash – sportning qadimiy turlaridan biri. U 5 ming yildan ortiq vaqtidan beri mavjud. O'zbek kurashida xalqimizning ruhiyatiga, asl xislatlariga azal-azaldan xos bo'lgan mardlik, jasurlik, bag'rikenglik, raqibga nisbatan oliyanoblik, halollik, insonparvarlik xususiyatlari mujassamlashgan.

Tarixiy ma'lumotlarga qaraganda, Amir Temur hukmronligi davrida milliy kurashning 400 ga yaqin usuli ma'lum bo'lgan. Bu usullarning deyarli barchasi hozirgacha saqlanib qolgan.

Qadimdan bayram sayillarida, to'ylarda odamlar to'planib, davra hosil qilishgan va unda polvonlar o'zaro kurash tushishgan. Odamlar qishloqqa qishloq, urug'ga urug', tumanga tuman bo'lib bellashishgan. G'olibga turli sovg'alar berilgan. Mag'lubning o'rtoqlari, aka yoki ukasi o'z yeri va oilasi sha'nini himoya qilishni istasa, g'olib bilan bellashishiga ruxsat berilgan. G'irromlik qilgan, raqibiga atay zarar keltirmoqchi bo'lgan polvonlar davradan quvilgan. Ular el orasida g'irromchi deya nom chiqarib, sharmanda bo'lganlar. Halol kurashganlarni esa hatto mag'lub bo'lsa ham, el olqishlagan. Kurashchilarining asosiy maqsadi o'z tug'ilgan yeri, ota-bobolari or-nomusini himoya qilish bo'lgan.

Bayram va to'ylardagi kurashni yoshi katta polvonlar yoshlarga o'rnak bo'lish maqsadini ko'zlab boshlab berganlar. Bu holatning go'zal ta'rifini Tog'ay Murodning "Yulduzlar mangu yonadi" asarida ham ko'rishingiz mumkin. Kurash ana shunday otadan bolaga, ustozdan shogirdga o'tib, saqlanib kelgan.

1980-yillarning boshida mashhur o'zbek kurashi ustasi, dzyudochi va sambochi Komil Yusupov o'zbek kurashining boy merosini tadqiq etish ishlarini boshlab yubordi. Ushbu sport turining qayta tiklanishi uchun Komil polvon dastlab kurashning xalqaro me'yorlarga mos bo'lgan yangicha qoidalarini ishlab chiqishga bel bog'ladi. To'qsoninchi yillarning boshlariga kelib, u ushbu sharaflı vazifani muvaffaqiyatli ado etib, o'zbek kurashini xalqaro arenaga olib chiqishni o'z oldiga maqsad qildi. Avvaliga u o'zi ishlab chiqqan kurash qoidalarini jamoatchilik, mutaxassislar va ishqibozlar e'tiboriga havola etdi.

Yangi qoidalar o'zbek kurashining eng ardoqli an'analarini va maxsus kiyim-bosh (kurashchilar oyoqyalang, yashil va ko'k yaktak, qizil belbog' va oq ishtonda maydonga chiqqan), musobaqalarni o'tkazish joyi va bellashuvning davom etish muddati kabi xalqaro sport me'yorlarini o'zida mujassam etdi. Sport mutaxassislari Komil Yusupov ishlab chiqqan kurash qoidalari to'laligicha xalqaro sport talablariga javob berishini e'tirof etdilar. Kurash qoidalaring asosiy afzalliklaridan biri shundaki, ular bellashuvni yotgan holda davom ettirishga yo'l qo'ymaydi. Sportchilardan birining tizzasi gilamga tegishi bilanoq hakam bellashuvni to'xtatadi va kurashchilar turgan holda musobaqani davom ettirishadi. Bu hol kurash jadal va tezkor, muxlislar uchun qiziqarli va maroqli bo'lishini ta'minlaydi. Bundan tashqari, kurash qoidalari belbog'dan pastki qismni ushlovchi yoki og'riq qo'zg'atuvchi va bo'g'uvchi uslublarni ishlatalishni taqiqplaydi. Shu tariqa kurash sportchilarga tan jarohati yetkazilishining oldi olingan eng xavfsiz sport turlaridan biriga aylandi.

Kurashning yangi qoidalari ko'ra, ishlatilgan usullarga bajarilishiga mos ravishda "chala", "yonbosh", "halol" baholari, qoidaga zid harakatlarga esa "tanbeh", "dakki", "g'irrom"



jazolari beriladi. Kurashchi "halol" bahosini olsa (yoki raqibi "g'irrom" bilan jazolansa), bu uning g'alabasini bildiradi. Ikki bor "yonbosh" bahosini olish (yoki raqibining ikki bor "dakki" bilan jazolanishi) ham g'alabani anglatadi. "Chala" baholari hisobga olib borilib, ko'p baho olgan kurashchiga g'alaba beriladi.

Kurash faollarining sa'y-harakatlari O'zbekiston bilan chegaralanib qolmadi. Ular 1992-yildan boshlab Janubiy Koreya, Kanada, Yaponiya, Hindiston, AQSH, Monako va Rossiyada o'tkazilgan qator nufuzli sport anjumanlarida o'zbek kurashini tanitishga qaratilgan tadbirlarga bosh-qosh bo'ldilar.

Birinchi xalqaro musobaqa bilan bir paytda mamlakat yana bir muhim tarixiy voqeanning guvohi bo'ldi. 1998-yilning 6-sentyabrida Yevropa, Osiyo va Amerikaning 28 mamlakati vakillari Xalqaro kurash uyushmasiga asos soldilar. XKU xalqaro miqyosda o'zbek kurashini namoyon etuvchi rasmiy tashkilotga aylandi. Dastlabki ta'sis kongressi davomida yangi xalqaro sport tashkilotining nizomi tasdiqlandi, kurashning xalqaro qoidalari qabul qilindi.

Asror Mo'minov



1. Muallif matnga nega shunday sarlavha tanlagan?
2. Kurash dastlab ko'ngilochar o'yin bo'lganini matnning qaysi qismlaridan bilish mumkin?
3. Kurashni xalqaro darajaga olib chiqishda jonbozlik ko'rsatgan polvon kim?
4. Nima deb o'ylaysiz, nega kurashning qonun-qoidalari xalqaro talablarga moslab qayta ishlab chiqildi?
5. Bayram va to'ylarda kurashchilar taroziga chiqib keyin bellashmagani aniq, sizningcha, raqiblar qanday tanlangan?
6. Kurashning qanday turlarini bilasiz?
7. Kurash atamalaridan qaysilarini bilasiz?
8. Kurash bilan birga yana nimalar xalqaro sport maydoniga kirib bordi deb o'ylaysiz?



Quyidagi iboralarning kurashga qanday aloqasi bor?

kuragi yer ko'rmagan

yulduz sanamoq

chil bermoq



Quyidagi jadvalda kurash bo'yicha jahon championatlari haqida ma'lumot berilgan.
Jadval asosida partadoshingizga ikkita savol bering.

Tartib	Yil	Mezbon shahar	Mamlakat	O'zbekiston terma jamoasi qo'lga kiritgan medallar soni
1	1999	Toshkent	O'zbekiston	3
2	2000	Antalya	Turkiya	4
3	2001	Budapesht	Vengriya	2
4	2002	Yerevan	Armaniston	7
5	2005	Toshkent	O'zbekiston	13
6	2007	Ulan Bator	Mongoliya	11
7	2009	Alushta	Ukraina	14
8	2011	Termiz	O'zbekiston	14
9	2013	Istanbul	Turkiya	15
10	2015	Xurramobod	Eron	8



Quyidagi ma'lumotlarni jadval ko'rinishida ifodalang.

Kurash bo'yicha Osiyo championatlarida O'zbekiston terma jamoasi qayd etgan natijalar

- 2003-yili Eron Islom Respublikasining Tehron shahrida bo'lib o'tgan musobaqada O'zbekiston terma jamoasi jami 5 ta medalni qo'lgan kiritgan.
- Afg'onistonning Kobul shahrida bo'lib o'tgan 2006-yilgi musobaqada esa medallarimiz soni Tehrondagidan bittaga ko'paygan.
- 2008- hamda 2011-yillarda Eron Islom Respublikasining Tehron va Ilam shaharlarida bo'lib o'tgan musobaqalarda yurtimiz polvonlari 5 tadan medalni qo'lga kiritishgan.
- 2012-yili Hindistonning Kochi shahrida bo'lib o'tgan Osiyo championatidan o'zbek kurashchilari jami 13 ta medal bilan qaytishgan.
- O'zbek polvonlari 2015-yilda Livanning Bayrut shahrida bo'lib o'tgan musobaqada 14 ta medal olgan.



1. "Bog'lamoq" so'zining qanday ma'nolarini bilasiz?
2. Sizningcha, gaplar, so'zlar bir-biriga nimalar vositasida bog'lanadi?





Quyidagi birikmalarni o'qing. Ularning ma'nosida qanday farqlarni sezyapsiz? Bir xil ma'no anglatayotgan birikmalarni ketma-ket yozing.

Namuna medal hamda kubok, medal bilan kubok

medal va kubok
yo medal, yo kubok
dam medal, dam kubok
medal ham kubok

medal yoki kubok
medal hamda kubok
goh medal, goh kubok

medal bilan kubok
na medal, na kubok
ba'zan medal, ba'zan kubok



Gaplarni o'qing. Mazmun to'g'ri bo'lishi uchun quyidagi so'zlardan mosini qo'yib, yozing.

va

bilan

biroq

ammo

chunki

lekin

balki

Hamma sport turini hurmat qilaman, ... kurashga mehrim bo'lakcha.

Uning devday kelbati bor, ... yuragi yo'q, qo'rqaq.

Bo'ri polvon raqibning hylalariga uchmas, ... o'ziga qarshi foydalanishga urinardi.

Tilovberdining to'pori, ... aqlli do'sti bor.

Naim tutaqib ketdi, bakovul raqibi g'irrom qilganini ko'rmaganga oldi.



So'zlarni bir-biriga bog'lash uchun xizmat qiladigan birliklar **bog'lovchilar** deyiladi.

Ular o'zidan oldin va keyin kelgan birliklarni turli maqsadlarda bog'lashga xizmat qiladi.

Masalan:

medal va kubok (har ikkisi)

yo medal, yo kubok (ikkisidan faqat bittasi)

na medal, na kubok (ikkisi ham emas, hech biri)

ishyoqmas, ammo aqli; *ishyoqmas, lekin aqli;* *ishyoqmas, biroq aqli* (ikki jihatning zidlanishi)

Bog'lovchilar gaplarni ham bog'lay oladi:

Eshik ochildi va ichkariga Karima kirib keldi.

O'yin ertaroq tugadi, chunki to'pimiz teshilib qoldi.

Hozir kelishib olaylik, toki keyin tushunmovchilik bo'lmasin.



Quyidagi tushunchalar asosida gaplar tuzing. Bog'lovchilardan foydalaning.

kurash bo'yicha kubokni yutib oldi

u bilan kurashish armon bo'lib qoldi

harakatlaridan ko'ngli to'lmadi

boshi og'rib turgan edi

yurt bayrog'ini baland ko'tardi

hammani yenga olaman deb o'yladi

yoshlarni mensimadi

kubokni yuta olmadi



**Bog'lovchilar so'zlar va gaplarni bog'lagan o'rirlarga 4 tadan misol topib, yozing.
Boshqa fan darsliklaridan ham foydalaning.**



1. Bog'lovchilar haqida nimalarni bilib oldingiz?
2. Ko'mak bermoq deganda nimani tushunasiz?



Quyidagi ko'makchilarni ma'nosiga ko'ra guruhlang. Bunda lug'atlardan foydalani-shingiz mumkin.

sababli, sari, singari, uchun, tufayli, qarab, qadar, bo'ylab, haqida, kabi, tomon, to'g'risida, bilan, sayin, uzra, birla, bo'yicha, yanglig', chog'li, doir, so'ng, buyon

Yo'nalish

Sabab

Maqsad

O'rin

Chegara

Mavzuga tegishlilik



Yuqorida biror ustunga ham mos kelmagan so'zlar bormi? Nega shunday deb o'ylaysiz?



Ikki ustundagi birliklarni o'zaro qiyoslang. Ma'nosida qanday o'zgarish sodir bo'lmoqda?

maydon tomon yurdi

maydon bo'ylab yurdi

tatami sari yurdi

tatamiga qadar yurdi

ukasi uchun kurashdi

ukasi tufayli kurashdi

bakovul haqida o'yladi

bakovul kabi o'yladi



Butun sinf birgalikda ko'makchilar haqida qoida yarating. Ko'makchi hamda bog'lovchilarni o'zaro qiyoslang.



Guruhlarga bo'lining. Tasavvur qiling, sport klubni ochdingiz. Sport klubining reklama banneri hamda to'garaklar e'lonini tayyorlang. Ko'makchi va bog'lovchilardan foydalaning.

1. Sport klubining reklama bannerini tayyorlang.
2. Sport klubidagi to'garaklar haqida e'lon bering.



O'QING VA MULOHAZA QILING

"Candle" va "qandil"

Inglizcha "candle" va o'zbekcha "qandil" o'rtasidagi o'xshashlikni sezsangiz kerak. Lekin ingliz tilida yana bir so'z bor – *chandelier*, uning ma'nosi "qandil" bilan aynan bir xil. *Candle* va *chandelier* bir o'zakka borib taqaladi. Farqi shundaki, *candle* eski ingliz tiliga bevosita lotin tilidan, *chandelier* esa fransuz tili orqali o'tgan.

Yuqoridagi so'zlarning etimologiyasiga keladigan bo'lsak, ular lotincha *candere* – "yiltillab turish, oqarib ko'rinish" fe'liga borib taqaladi. Bu fe'ldan Yevropa tillarida hosil bo'lgan so'z arab tiliga "qandil" shaklida o'tgan, undan fors tiliga, undan esa o'zbek tiliga o'tgan.



Jo'ra, o'rtoq, oshna ma'nodoshmi?

"Jo'ra", "o'rtoq", "oshna". Bu so'zlarni ko'p ishlamatamiz. Ko'pincha qo'shib ishlamatamiz. Lekin aslida ular bir-biridan ma'no jihatdan farq qilgan.

Ma'lumotga qaraganda, "jo'ra", "o'rtoq", "oshna" so'zlari tanishlarning uch xil kategoriyasini bildirgan.

– jo'ra – ko'chadagi, mahalladagi tanishlar, ijtimoiy aloqalar bo'yicha ularga yaqin turuvchi boshqa mahallada orttirilgan tanishlar; bu kategoriyaiga kiruvchilar bilan choyxona va harifonalar uyushtirilgan;

– o'rtoq – yaqin qarindoshlar ichidagi tengdoshlar va yangi davrdan boshlab sinfdoshlar, ular bilan choyxona qilinmagan, balki doim bir-birinikiga mehmonga, hasharga, yordamga borish odad bo'lgan; to'ylarda, ma'rakalarda asosan o'rtoqlar xizmat qilgan;

– oshna – boshqa qishloq va shaharlardagi do'stlar, tanishlar, yangi davrdan boshlab esa kursdoshlar ham; boshqa yurtga borganda ularnikida qolish, begona joyda ulardan yordam so'rash odad bo'lgan; oshnachilik avloddan avlodga o'tgan – ikki oshnaning farzandlari ham oshna bo'lgan, bir-biriga yo'lchiliklarda yordam berishda, safar chog'i uyida kutib olishda davom etgan.

"Do'st" esa ko'proq balandparvoz, poetik so'z bo'lgan. Keng tarqalmagan. Va har xil ma'noda qo'llanishi mumkin bo'lgan.

Shuningdek, yana bir kategoriya bo'lgan – "sherik". Bular hamkasblar, umumiyl ishga, manfaatga ega odamlar bo'lgan.

Bugungi kunda ijtimoiy munosabatlar ko'payishi tufayli bu kategoriylar qo'shilib ketdi (aslida, o'tmishda ham bir kishi ham o'rtoq, ham jo'ra bo'lishi mumkin edi, lekin baribir bu juda keng tarqalmagandi). Shu munosabat bilan bu so'zlar ham sinonimga aylanib qoldi.

Eldor Asanov



KELAJAK KASBLARI

Bu mavzuda o'rganamiz

- kasb tanlashdagi muhim jihatlar • yaqin kelajakda talab kuchayadigan kasblar
- yuklamalar va ularning gapdagi vazifasini aniqlash • fe'llarning tuzilishiga ko'rta turlari
- bosh bo'laklar • ikkinchi darajali bo'laklar • tabriknoma yozish.



Audiomatnni tinglang va savollarga javob bering.





- 1.** Rivojlanayotgan mamlakatlarda qaysi soha mutaxassislariga talab oshib bormoqda?
- 2.** Injiniring sohasida kimlar faoliyat yuritadi? Ularning vazifalari nimalardan iborat?
- 3.** Nima uchun IT mutaxassislari iqtisodiyotning hal qiluvchi kuchi sifatida e'tirof etilmoxda? Axborot texnologiyalarining mamlakat taraqqiyotidagi o'rni haqida nimalarni bilasiz?
- 4.** Zamonaviy tibbiyot soha mutaxassislariga qanday talablarni qo'ymoqda? Zamonaviy shifokorlarga xos bo'lgan sifatlarni sanang.
- 5.** O'zbekistonda turizm sohasi mutaxassislariga qanchalik ehtiyoj bor? Bu kasb orqali yurtimiz iqtisodiyotining rivojlanishiga qanday hissa qo'shish mumkin deb hisoblaysiz?
- 6.** Logist-naqliyotchi kasbi haqida nimalarni bilib oldingiz? Bu qanday kasb ekani haqida ustozingiz bilan fikr almashing.
- 7.** Nima uchun har bir davlatda ekologlarga ehtijoy bor deb o'ylaysiz? Siz ushbu soha mutaxassi bo'lganingizda nimalarga e'tibor bergen bo'lar edingiz?
- 8.** Kimyogar va energetiklarning vazifalari nimalardan iborat? Ular kelajakda iqtisodiy soha taraqqiyotiga qanday qilib o'z hissasini qo'shishi mumkinligi haqida o'ylab ko'ring.
- 9.** Robotlar va mikrotizimlardan foydalanishning ahamiyati haqida gapiring. Ular insonga nima uchun kerak?
- 10.** Jurnalist va imjmeykerlarning qanday foydali jihatlari bor? Ularning vazifalari va buning ahamiyati haqida nimalarni bilasiz?
- 11.** O'zbekiston sharoitida yana qanday kasb egalariga ehtijoy borligi haqida ma'lumot bering.
- 12.** Har qanday kasbda muvaffaqiyat qozonish uchun inson qaysi sifatlarga ega bo'lishi muhim deb hisoblaysiz?





Berilgan so'zlar ichidan to'g'ri yozilganini aniqlab, ularni daftaringizga ko'chiring.

Injiniring sohasi mutaxassislari

Ay-ti mutaxassislari

Injenering sohasi mutaxassislari

I-T mutaxassislari

Injeynering sohasi mutaxassislari

IT mutaxassislari

Lagist-naqliyotchilar

Jurnalist va imijmeykerlar

Logist-naqliyotchilar

Jurnalist va emijmeykerlar

Lo'gist-naqliyotchilar

Jo'rnalist va imijmekirlar

Energetiklar

Nanatexnologlar

Inergetiklar

Nanotexnologlar

Energitiklar

Nanotexnologlar

Turizim sohasi mutaxassislari

Xizmat ko'rsatish sohasi mutaxassislari

Turizm sohasi mutaxassislari

Hizmat ko'rsatish sohasi mutaxassislari

Turizm soxasi mutahassislari

Xizmat ko'rsatish soxasi mutahassislari



Berilgan rasmlardagi raqamlarning kasblar bilan mosligini aniqlang hamda ularni talaffuz qiling. Urg'uli bo'g'inni aniqlang.



Matnni o'qing. Gaplarga qo'shimcha ma'no yuklaydigan so'z va qo'shimchalardan mosini qo'yib, yozing.

Bu kasb egalariga hamma zamonlarda ehtiyoj katta bo'lgan. ... eng qulay, shohona sharoitlarda, to'kin-sochinlikda umr kechiradigan odam ham kasal bo'ladi-ku.

Zamonaviy tibbiyot shifokorlar oldiga yangi texnologiyalardan unumli foydalana olish shartini ... qo'yyapti. Yangi texnologiyalar tashxis va muolaja jarayonini yengillashtirib... qolmay, anqlik darajasini ... kuchaytiradi. Bunday ko'nikmaga ega shifokorga esa talab yuqori bo'lishi tabiiy.... .

Qo'yish uchun: -kina, ham, -gina, go'yo, -da, axir, -mi, xuddi.



So'z yoki gaplarga so'roq, ta'kid, ayirish-chegegaralash, gumon, o'xshatish, inkor kabi ma'nolarni yuklovchi so'z yoki qo'shimchalar **yuklamalardir**.

Yuklamalarga:

- 1) axir, hatto, faqat, ham, xuddi, go'yo, go'yoki, naq, hech, sira, nahotki, na ... na so'zlari;
- 2) -mi, -chi, -gina (-kina, -qina), -dir, -u, -yu, -da, -a singari qo'shimchalar kiradi.

Ularning birinchi guruhi **so'z-yuklamalar**, ikkinchi guruhi esa **qo'shimcha-yuklamalar** hisoblanadi.



Quyidagi gaplarda yuklama qanday ma'no bildirayotganini aniqlang. Yuklamalar olib tashlanganda gap mazmunida qanday o'zgarish bo'layotganiga e'tibor qarating.

Namuna Raqib bu usuldan xabardor ekan-**da**. (ta'kid)

1. Bizni bu azobdan **faqat** direktorning qarori qutqarib qola oladi.
2. Ertangi o'yin uchun ham, ehtimol, Sobirov qaydnomaga kiritilmagan**dir**.
3. Abduxoliq otasining **naq** o'zi.
4. Xafa bo'lma: seni **ham** o'zlari bilan olib ketishadi.



Yuklamalardan mosini qo'yib, gaplarni ko'chiring. Gap mazmunida qanday o'zgarish bo'lganiga e'tibor bering.



1. Har bir kasb-hunarning hayotda o'z o'rni, ahamiyati bor.
2. Yetakchi sohalarga ixtisoslashgan o'quv yurtlariga kirishda katta raqobat bo'ladi.
3. Sayyohlik sohasi dunyoning juda ko'p mamlakatlarida iqtisodiyotning jon tomiri hisoblanadi.
4. Odamlarning turmush darajasi oshib, moddiy ahvoli yaxshilangani sari sayohat qilish istagi kuchaya boradi.



Matnda berilgan ma'lumotlar diagramma ko'rsatkichlariga mosligini aniqlang. Tushunganlaringizni yo'riqnomaga asosida gapirib bering.

Yo'riqnomा:

- matnni o'qib chiqing;
- diagrammaga nom tanlang;
- ranglarga e'tibor bering;
- matndagi raqamlar hamda diagrammadagi ko'rsatkichlarni solishtiring;
- fikringizni xulosalang.



UNICEFning maxsus loyihasi bo'lgan **U-REPORT** yoshlar platformasi 2019-yil 13-may kuni yoshlarni kasbga yo'naltirish bo'yicha so'rovnomalar o'tkazdi. Unda 6300 dan ortiq o'zbekistonlik yoshlar qatnashdi. **Respondentlarning javoblari tahliliga ko'ra**, kasb tanlashga quyidagi 4 omil ta'sir o'tkazadi:

- shaxsiy qobiliyat (34%);
- kasbga muhabbat (20%);
- moliyaviy imkoniyatlar (20%);
- ota-onalar qarori (11%).

Ishtirokchilarning 82 foizi yoshlarni kasbga yo'naltirish hukumat tomonidan tashkil etilishi kerak deb hisoblaydi.



1. Matnda ajratib ko'rsatilgan so'zlarni talaffuz qiling. Qaysi so'z(lar) ma'nosini o'zbek tilida ham ifodalash mumkin deb hisoblaysiz?
2. Matnda nima uchun o'zbekistonlik so'zi kichik harfda yozilgan? Bu to'g'rimi? Javobingizni izohlang.



Matn bilan tanishing. Matndagi sodda fe'llarni ko'makchi fe'lli so'z qo'shilmalari bilan almashtirib, ularni ko'chiring. Fe'l ma'nolarida qanday o'zgarish bo'layotganini aniqlang.

Namuna aytilmoqda – aytib kelinmoqda.

Nanotexnologiya bugun mashinasozlik, tibbiyot va hatto oziq-ovqat sanoatida qo'llanyapti. Robotlar va mikrotizimlardan foydalanadigan soha va tarmoqlar soni tobora ko'paymoqda. O'z-o'zidan bu sohada faoliyat yurituvchi mutaxassislarga ham talab ortaveradi.



4 ta guruhga bo'lining hamda fe'llarning tuzilishiga ko'ra turlariga misollar topib, xattaxtaga yozing. Ularning imlosiga e'tibor bering.



Quyida berilgan fe'lllar ishtirokida tanlagan kasbingiz haqida gaplar tuzib, yozing. Fe'llarning tuzilishi va imlosiga e'tibor bering.

Sodda fe'l	Qo'shma fe'l	Juft fe'l	Takroriy fe'l
tanlamoq (kasb nomi) bo'lmoq	yelib-yugurmoq	o'ylay-o'ylay
suhbatlashmoq	baxshida etmoq	qo'llab-quvvatlamoq	ishlab-ishlab



Berilgan matnlar bilan tanishing. Ularda qo'llangan fe'llarni quyidagi tartibda guruhlarga ajratib yozing. Ko'makchi fe'lli so'z shakllaridagi ma'noga diqqatingizni qarating.

Sodda fe'l

Qo'shma fe'l

Ko'makchi fe'lli so'z shakli

I. Reytingi baland yo'nalishlarda ta'lim olganlar bora-bora boshqa yo'nalishdagilarga qaraganda ko'payib ketadi. Shu sababli ishga qabul qilish me'yorlari o'zgarib, yangi-yangi tartib va talablar qo'shiladi.

II. Taraqqiyot yo'lidan shaxdam odimlayotgan mamlakatimizda ham malakali mutaxassislarga, yangi ixtisoslik egalariga talab kundan kun ortib boryapti. Muvaffaqiyatga erishmoqchi bo'lgan har qanday ish beruvchi chet tillarini puxta o'zlashtirgan, bilimini amaliyotda qo'llay oladigan, guruh ichida ishslash qobiliyati va shaxsiy fazilatlarga ega mutaxassisni o'z jamoasida ko'rishni istaydi.

III. O'zbekiston turizmi jadallik bilan ildamlab boryapti. Bu vaziyat sohada yetuk kadrlarga ehtiyoj paydo qiladi.

IV. Germaniyada yoshlarni kasbga yo'naltirish mактабдан, hatto bog'chadan boshlanadi. Ko'п kuzatganman: bolalar universitetimizga tez-tez kelib turishadi. Murabbiylar o'quvchilarga avtomobil maketlari, kichik robotlarni ko'rsatib, tanishtirishadi. Bu ularda texnikaga qiziqish hissini uyg'otishga yordam beradi.



Matnni o'qing va savollarga javob bering.

KELAJAKDA ISHSIZ QOLMANG!


Bilasizmi, dunyo juda tez sur'atda rivojlanib, o'zgarib bormoqda. Mutaxassislarning aytishicha, yaqin kelajakda hozir mavjud kasblarning ko'pi keraksiz bo'lib qoladi va yangi kasblar paydo bo'ladi. Agar kelajakda ishsiz qolishni xohlamasangiz, hoziroq kasb tanlash masalasida jiddiyroq o'ylab ko'ring.

Robot texnologiyalari biz kutgandan ham tezroq rivojlanmoqda. Ayrim zavod va fabrikalarda ishlab chiqarish to'liq avtomatlashtirilgan. Ya'ni robotlar kuchidan foydalaniladi, odamlar esa deyarli ishlamaydi. **Yaqin 20–30 yildan keyin esa robotlar hozir odamlar bajarayotgan ko'plab vazifalarni o'z zimmasiga olar ekan.** Shuning uchun kasb tanlashda bu ishni kelajakda robotlar qila olishi yoki yo'qligi haqida ham o'ylab ko'ring.

Kelajakda olimlarga, ayniqsa, fizika, matematika, astronomiya, kimyo, biologiya kabi soha mutaxassislariga ehtiyoj ortadi. Axborot texnologiyalari rivojlangani uchun dasturchilik eng daromadli kasbga aylanadi. Kompyuter va axborot texnologiyalari bilan bog'liq har qanday kasb egalari kelajakda yaxshi ish bilan ta'minlanadi.

Kelajakda shifokor, o'qituvchi va murabbiylarga ham yaxshi oylik beriladi. Chunki bu kasblarni robotlar hech qachon egallay olmaydi. **Ammo kompyuter grafikasining rivojlanishi tufayli kelajakda aktyorlarga ehtiyoj bo'lmasisligi mumkin.** Hatto bugun ham ayrim filmlarda aktyorlarning o'rnnini kompyuter dasturi orqali yaratilgan qahramonlar egallab ulgurgan. Shuning uchun mashhur kino yulduzi bo'lishni orzu qilib yurgan bo'lsangiz, bu haqda qayta o'ylab ko'ring.

Kasb tanlashda O'zbekistondagi sharoitni ham hisobga oling. Ya'ni yurtimizda qanday kasblarga ehtiyoj bor, qanday sohalar hali rivojlanmagan yoki umuman bizga kirib kelmagani haqida o'ylang. Tag'in o'zingizcha, hech kim bilan maslahatlashmay kasb tanlab, keljakda ishsiz qolib ketmang!



1. Matn muallifi ushbu fikrlari orqali kimlarga murojaat qilmoqda?
2. Matnning asosiy maqsadi nimadan iborat?
3. Robotlarning asosiy vazifasi haqida gapiring.
4. Keljakda qanday kasb egalariga ehtiyoj ortishi kutilmoqda? Buning sababini tushuntirishga harakat qiling.
5. Aktyorlarning vazifasini kompyuterlar qay darajada uddalay oladi deb hisoblaysiz? Kompyuter dasturlarida yaratilgan qahramonlar faoliyatini qanday baholaysiz?
6. Tanlaydigan kasbingiz borasida kimlar bilan maslahatlashishni ma'qul ko'rasiz?
7. Matn bilan tanishganingizdan so'ng sizda tanlagan kasbingizni o'zgartirish fikri paydo bo'lmadimi? Javobingizni izohlang.



Xattaxtada robotlarga o'rnnini beradigan kasblarni bir ustunga, robotlarga o'rnnini bermaydigan kasblarni esa ikkinchi ustunga yozing.

Robotlarga o'rnnini beradigan kasblar

Robotlarga o'rnnini bermaydigan kasblar



Matnda ajratib ko'rsatilgan gaplarni yozing. Gap bo'laklarini quyidagi belgilariga ko'ra farqlang.

- shaxs, narsa, voqeа-hodisaning harakatini ifodalagan;
- harakat-holatning bajaruvchisini ko'rsatgan;
- gapning biror bo'lagiga bog'lanib, uni izohlab, to'ldirib kelgan;
- otga bog'lanib, uning belgisini anglatgan;
- ish-harakatning o'rni, payti, holati, bajarilish sababi, maqsadi, miqdor-darajasini bildirgan.



Gapda har bir bo'lakning o'z vazifasi bor.

Kesim gapni shakkantiruvchi asosiy bo'lak sanaladi, qolgan bo'laklar uning atrofida birlashadi. Gapning maqsadi, zamoni va shaxs-soni kesim orqali ifodalanadi.

Ayrim zavod va fabrikalarda mahsulotlarni ishlab chiqarish jarayoni to'liq avtomatlashtirilgan.

Kesimda ifodalangan harakatning bajaruvchisini, kim yoki nima haqida gap borayotganini ko'rsatuvchi bo'lak egadir. Kesim va ega gapning asosiy mazmunini ifodalagani bois **bosh bo'laklar** deyiladi.

*Romanning oxirgi 28 sahifasini bultur **Anvar tarjima qilgan edi.***

Berilgan gapning asosiy mazmuni – Anvar tarjima qilgani. Qachon, nimani tarjima qilgani esa ikkinchi darajali ma'lumotlar bo'lib, ular **ikkinchi darajali bo'laklar** orqali ifodalanadi.

Bundan tashqari, kesim bilan munosabatga kirishmaydigan gap bo'laklari ham bo'lib, ular (undalma, kirish va kirimalar) doim tinish belgilari bilan ajratib yoziladi.

Senga, **do'stim**, alohida e'tibor kerak.

Darhaqiqat, o'zлари ham universitetda ishlagan edilar.

2002-yilda (o'shanda men qishloq maktabiga qatnardim) dadam bizni shaharga olib ketdilar.



Quyida berilgan iboralar bilan tanishing. Partadoshingiz bilan keljak kasblari mavzusida iboralar bilan bog'liq nutqiy vaziyatlarni yarating. Iboralar yordamida fikr ifodalashning ahamiyatli jihatlari haqida o'ylab ko'ring.

1. Peshona teri to'kilmoq.
2. Ishga solmoq.
3. Miridan sirigacha bilmoq.
4. Tinkamadori qurimoq.
5. Tishi o'tmoq.
6. Uddasidan chiqmoq.
7. Fahmi yetmoq.
8. Xamirdan qil sug'urganday.



Berilgan iboralarning qaysilaridan o'z ma'nosida ham, ko'chma ma'noda ham foydalanish mumkin? Ularni ajrating, o'z ma'nosni va ko'chma ma'nosidan foydalanib gaplar tuzib, aytинг.



Sinfoshlaringiz o'rtasida "Keljakda kim bo'lmoqchiman?" mavzusida so'rovnomaga o'tkazing. Unda quyidagi savollardan foydalaning:

1. Keljakda kim bo'lmoqchisiz?
2. Bu kasbni tanlashingizga kim yoki nima sabab bo'lgan?
3. Ushbu kasbni egallash uchun nimalar qilish zarurligi haqida o'ylab ko'rganmisiz?



O'tkazgan so'rovnangizning natijalari haqida tahliliy matn yozing va to'plangan ma'lumotlarga nisbatan munosabatingizni ifodalang.



Quyidagi mavzulardan birini tanlang hamda esse qoralamasini tayyorlang.

Robotlarga o'rnnini beradigan kasblar

Robotlarga o'rnnini bermaydigan kasblar

Yozadigan matningiz quyidagi tarkibiy qismlardan iborat bo'lishi lozim:

kirish (robotlarga o'rnnini beradigan/bermaydigan kasblar haqida umumiylar ma'lumot);
asosiy qism (fikringizni asoslovchi 2–3 ta dalil, sharh);
xulosa (kirish, asosiy qismdan kelib chiqqan holda 2–3 ta gap, yakunlovchi fikr).



Esseni daftaringizga yozing. Qayta tahrirdan so'ng o'qituvchingizga taqdim eting.



Berilgan namuna asosida kasbiy bayramlar bilan bog'liq tabriknoma yozing. Tabriknoma yozishda qo'llanadigan til birliklariga alohida e'tibor qiling.

TABRIKNOMA



Avvalo, o'z hayotini el-yurt salomatligini asrashdek g'oyat mas'uliyatli va sharaflı ishga bag'ishlagan barcha shifokor va hamshiralarni kasb bayrami – Tibbiyat xodimlari kuni bilan chin qalbimdan samimiyl tabriklab, o'zimning chuqur hurmatim va ezgu tilaklarimni bildirishdan mammunman.

Xalqimiz sizlarni dunyodagi eng ulug' kasb egalari, muqaddas qasamyodiga sodiq, o'z ishiga fidoyi insonlar deb biladi va mashaqqatli mehnatingizni yuksak qadrlaydi.

Sizlarni qutlug' kasb bayramingiz bilan samimiyl muborakbos etib, barchangizga baxtsaodat, xonardonlaringizga fayz-u baraka tilayman.

Qo'lingiz dard ko'rmasin, hamisha sog'-omon bo'ling, aziz shifokorlar!

*Prezident Shavkat Mirziyoyevning
tibbiyat xodimlariga yo'llagan tabrigidan*





VETERINAR

Bu mavzuda o'rganamiz

- qishloq xo'jaligida veterinarlik kasbining ahamiyati • hayvonlarni, tabiatni asrash • sohaga oid til birliklari • belgilash olmoshlari • matn va lug'atlar ustida ishlash • taqlid so'zlar • fe'l zamонлари.



1. Uyingizda qanday hayvonlar boqasiz? Ularni nima maqsadda boqishingiz haqida gapirib bering.
2. Uy hayvonlarini parvarishlashga doir nimalarni bilasiz?
3. Uy hayvonlaringiz kasal bo'lib qolganmi? Bunday holatlarda qanday yo'l tutish kerak? Hayvonlarni shifokorga olib borganmisiz?



Rasmlarga qarang. Savollarga javob bering.





1. Veterinarlik kasbi haqida nimalarni bilasiz?
2. Veterinarlik kasbining qanday yo'nalishlari bo'lishi mumkin?
3. Bu kasb nima uchun kerak va muhim?





Veterinariya sohasiga oid bo'lgan atamalar bilan tanishing. Ularni izohlashga harakat qiling.

1

Biologik chiqindilar

2

Veterinar osoyishtalik

3

Epizootiya

4

Ozuqabop qo'shimchalar

5

Kelib chiqishi hayvonotga aloqador mahsulot



Yuqoridagi atamalar uchun berilgan izohlarni aniqlang. Atamalar izohini sinfda muhokama qiling. Hayotiy misollar topishga harakat qiling.

1

Hayvonlar yemishida yetishmaydigan ozuqaviy va mineral moddalar hamda vitaminlarning manbalari sifatida foydalaniladigan, kelib chiqishi organik, mineral va sintetik moddalar.

2

Go'sht va go'sht mahsulotlari, sut va sut mahsulotlari, baliq va baliq mahsulotlari, tuxum va tuxum mahsulotlari, shuningdek, asalarichilik mahsulotlari.

3

Veterinariya-sanitariya jihatidan xavfli deb topilgan hayvonlarga tegishli chiqindilar, hayvon jasadi.

4

Biror hududda hayvonlarning o'ta xavfli va yuqumli kasallikkleri tarqalishi.

5

Hayvonlarning sog'lig'iga salbiy ta'sir qilmaydigan, epizootiya mavjud bo'limgan qulay shart-sharoitlarning yaratilishi.



Yuqoridagi atamalar yordamida veterinar kasbining majburiyatlari bilan bog'liq bo'lgan gaplar tuzib, yozing.

Namuna Veterinar hayvonotga mansub mahsulot va xomashyoni qayta ishlovchi korxonalarning veterinariya-sanitariya holatini nazorat qilishi lozim.



Uy hayvonlari va parrandalarning tana a'zolari qanday nomlanadi? Ularni ikki ustunga ajratib yozing.

Parrandalar

Qoramol

?

?



Tasavvur qiling, uyingizdagi hayvon yoki parrandada kasallik belgilari paydo bo'lgani uchun uni veterinar ko'rígiga olib boardingiz. Shifokor qabulidagi suhabatni dialog ko'rinishida yozing.



MUHIM KASB



Shunday kasblar borki, qanchalar muhim va ahamiyatli bo'lmasin, ko'pchilik ularni **pisand qilmaydi**. Yoshlar esa bu kasblarni egallahsga unchalik **qiziqmaydi**. Biroq bu kasb egalari bo'lmasa, hayotimiz qiyinlashib, turli muammolar **kelib chiqadi**. Ana shunday kasblardan biri veterinarlikdir. Aholi orasida bu kasb egalarini "mol doktori" deb **atash urf bo'lgan**. Lekin mazkur atamaning qamrovi veterinar kasbi uchun biroz **torlik qiladi**. Sababi veterinar hayvonlarni davolash bilan birga go'sht-sut mahsulotlarini nazorat qilish markazlarida, laboratoriyalarda, veterinariya ilmiy-tadqiqot institutlarida faoliyat yuritishi ham mumkin.

Veterinarning asosiy vazifalariga hayvon kasalliklarini davolash va oldini olish, rivojlanib borishini tekshirish, emlash, mikrochiplash, jarrohlik amaliyotini o'tkazish, shuningdek, mijozlarga hayvonlarni parvarish qilish bo'yicha maslahat berish kiradi.

Veterinarlik jamiyatimizdagi eng muhim kasblardan biridir. Ayniqsa, qishloq xo'jaligida uning ahamiyati yuqori. Chunki qishloq xo'jaligi mahsulotlarining hajmi va sifati shu kasb egalarining malakasiga bog'liq. Hududlarda malakali, zamonaviy bilimlarga ega veterinarlar ko'paysa, odamlarning chorvachilikdan topadigan daromadi ortadi. Yurt rivojlanadi.

Aytgancha, siz dunyoga mashhur yozuvchi Chingiz Aytmatovning asl kasbi veterinar bo'lganini bilasizmi? Yozuvchi ilk asarlarini qishloqda veterinarlik qilib yurgan vaqtлari yozgan ekan.

Xullas, agar kasb masalasida biror qarorga kelmagan bo'lsangiz va hayvonlarni yaxshi ko'rsangiz, veterinarlik haqida ham o'ylab ko'ring.



1. Nega yoshlar veterinarlik kasbiga unchalik qiziqlaydi? Balki, ular bu kasb haqida yaxshi bilishmas?
2. Veterinarning vazifasiga nimalar kiradi? Sizningcha, ularning qay biri muhimroq?
3. Veterinarlikning ahamiyati ko'proq qaysi sohada ko'rindi? Nima uchun?



Matn mazmuni asosida quyidagi topshiriqlarni bajaring.

1. **"Shunday kasblar borki, qanchalar muhim va ahamiyatli bo'lmasin, ko'pchilik pisand qilmaydi".** Ushbu fikrga izoh sifatida keltirilgan gapni aniqlang va yozing.
2. Muallifning matnni yaratishdan maqsadi yoshlarning veterinarlik kasbiga bo'lgan qiziqlishini oshirish va uni egallashga da'vat etish bo'lgan. Ushbu maqsad aniq ko'riniib turgan jumlalarni topib, yozing.
3. Bu kasb egalari qanday sifatlarga ega bo'lishi kerak deb hisoblaysiz? Ularni yozing.



Matn tarkibidan veterinarlik sohasi bilan bog'liq atamalarni topib, yozing. Atamalarning ma'nolarini sinfdoshlaringiz bilan muhokama qiling.



Matnning birinchi xatboshisida ajratib ko'rsatilgan fe'llarni namunadagidek tuslab, yozing.

O'tgan zamonda

pisand qilmadi

Hozirgi zamonda

pisand qilmayapti

Kelasi zamonda

pisand qilmoqchi emas



Fe'l ifodalagan harakat-holatning uch zamondan biriga tegishli bo'lishi haqida ma'lumotga egasiz. Bular: o'tgan zamon, hozirgi zamon, kelasi zamon.

O'tgan zamon shakli yordamida fe'lidan anglashilgan harakat-holat nutq so'zlanib turgan paytdan oldin bajarilgani ifodalanadi. Bu zamon shakli **-di, -(i)b, -gan (-kan, -qan)** qo'shimchalari va **edi** so'zi yordamida hosil qilinadi. **-(i)b** qo'shimchasidan so'ng har doim shaxs-son qo'shimchasi keladi.

Va nihoyat, Manzura ham o'z orzusiga yet*di*.

Kechagi musobaqada bizdan faqat 2 kishi ishtirok et*ibdi*.

O'zi bu tanishingiz nima uchun kel*gan*?

Bu beg'amxo'ja uch yil oldin ham til o'rganmoqchi **edi**.



Berilgan fe'llarni o'tgan zamon shakliga aylantirib, yozing. Bunda quyidagi vositalardan foydalanishingiz mumkin.

Bormoq, aytmoq, qaramoq, ko'zdan kechirmoq, tavsiya qilmoq, qo'llamoq, yotmoq, ko'rmoq, oqmoq, ko'zi yoshlanmoq, aksrimoq, to'lamoq, xarid qilmoq, kirmoq, yubormoq, yo'talmoq, ko'paymoq, yedirmoq, taqsimlamoq.

O'tgan zamon qo'shimchalarini

-di

-gan (-kan, -qan)

- (i)b

Shaxs-son qo'shimchalarini

-m, -k, -ng, -ngiz

-man, -miz, -san, -siz

-man, -miz, -san, -siz, -di/-dilar



Berilgan fe'llarning o'tgan zamon shakllaridan foydalanib veterinarlik sohasi bilan bog'liq mazmundagi gaplar tuzib, yozing.



Normurod Norqobilovning "Oqbo'yin" nomli qissasidan olingan parchani o'qing.

OQBO'YIN

Oqbo'yin notanish hidni darrov ilg'adi. Parvo qilmadi. Tovuq patini o'ynashda davom etdi. Patni ertalab topgan, nimaligiga aqli yetmay boshi garang edi. In yonidagi chirik xashaklar ustida cho'zilib yotgan ona it bezovta g'ingshiganidan so'nggina qadam tovushlari kelayotgan tomonga o'girildi. Besh odimcha narida uy egasi – Sodiq aka bilan **norg'ul** bir odam – Karim podachi, egnida **yag'iri chiqqan** paxtalik, oyoqlarini kerib turardi. Undan go'ng, pichan, **silos** va yana allambalolarning hidi anqirdi. Oqbo'yin bu xil tashriflarga ko'nikkan, har keldi-ketdidan so'ng og'a-inilaridan birortasi g'oyib bo'ladi, keyin onasi tuni bilan g'ingshib chiqadi.

Karim podachi oyoqlari ostida o'ralashayotgan inisi – Oqto'shni qo'liga olib, obdan paypaslab ko'rди, panjalarini diqqat bilan ko'zdan kechirdi. Yoqtirmadi. Oqto'sh nari ketishni xayoliga ham keltirmay, tag'in suykala boshlagandi, Karim podachi etigi uchi bilan turtib yubordi. Joni og'rigan Oqto'sh angillagancha onasi tomon pildirab ochdi.

2



Karim podachi – **sinchi**, itni

farqlay biladi. Umri fermada o'tgan bu odam itni ishqibozlik uchun emas, zarurat yuzasidan asraydi. Negaki, qish kezları qir oshib keladigan bo'rilardan kuygan – jondor desa yetmish yetti tomiri tortishadi, bo'rilarga yemish bo'lgan tomday-tomday novvoslari ko'z oldiga kelib, ichi-tashi baravar yonadi. Avvallari ahvol aytarli darajada yomon emasdi, salgina po'pisa-yu **qutqu** bilan jondor zotini daf etmoq mumkin edi. Ammo uch yil burun Yoldor degan bir maxluq paydo bo'lди-yu podachidan halovat ketdi. Arloni bo'ri itlarni pisand qilmaganidek, miltiqqa ham osongina chap berardi. Tunlari bo'ri poylayverib, biqinini shamollatib qo'yanidan so'ng, Karim podachi qopqon qo'yib ko'rди. Biroq Yoldor qolib, qopqonga ferma tevaragida aylanib yuradigan daydi eshaklardan biri tushdi. **Et**ni dorilab yo'lga tashladi. Yoldor emas, iti zaharlanib o'ldi. Keyingi asragan iti esa g'oyat yuraksiz chiqdi. Yoldorning qorasini ilg'ar-ilg'ammas eshik tirnab, g'ingshigancha ichkariga intiladi, ba'zida qishloqqa qochib qolardi... Shundan buyon podachi yaxshi it qidirib yuradi.

3



1. Qissa qahramoni kim yoki nima? Sizningcha, uning ko'rinishi qanday?
2. Qissa qahramonining hayotida qanday voqeа ro'y bermoqda?
3. Yoldor nima? Nega podachi uni shunchalar yomon ko'radi?
4. Sizningcha, qissaning davomida qanday voqealar sodir bo'ladi?



Matn asosida berilgan testlarni yeching. Javobingizni izohlashga harakat qiling.

1. Quyidagi gaplar orqali qissa qahramoni haqida nimalarni bilib olish mumkin?

"Oqbo'yin notanish hidni darrov ilg'adi. Parvo qilmadi. Tovuq patini o'ynashda davom etdi".

- a) Oqbo'yin – qiziquvchan, o'yinqaroq. Pat o'ynashni yaxshi ko'radi.
- b) Oqbo'yin – it. Biroq hali jajji o'yinqaroq kuchukcha.
- c) Oqbo'yin – beparvo kuchukcha.
- d) Oqbo'yin – juda ham sezgir it.

2. Matndan olingan ushbu fikr orqali muallif nima demoqchi?

"Oqbo'yin bu xil tashriflarga ko'nikkan, har keldi-ketdidan so'ng og'a-inilaridan birortasi g'oyib bo'ladi, keyin onasi tuni bilan g'ingshib chiqadi".

- Ona it kasal, shuning uchun keldi-ketdilardan so'ng tuni bilan g'ingshib chiqadi.
- Ona it yaqindagina ko'plab kuchukchalarni dunyoga keltirgan.
- Kunora odamlar kelib kuchukchalarni ko'rishadi, ma'qul kelsa, olib ketishadi.
- Bu xonadonga odamlar tez-tez kelib turadi, bu – odatiy holat.



Ushbu so'zlarning ma'nolarini matn mazmuni yordamida aniqlang hamda ularni ko'chirib yozing.

sinchi hayvonlarning tashqi ko'rinishi, o'zini tutishiga qarab, fe'lini aytib bera oladigan odam

sinchikov, kuzatuvchan, voqeа-hodisalarning rivojini oldindan biladigan odam

qutqu yomon ishga, yo'lga undash, teskari tashviqot olib borish, gjigijlash

qo'rquv holati, hissi, dahshat, vahima

et go'sht

odamning badani



Matnda berilgan hayvon nomlariga e'tibor bering. Nega ular matn tarkibida bosh harf bilan yozilgan? Izohlang.

Bu hayvonlarga nega shunday nom tanlangani haqida izoh yozing. Yana qanday hayvon nomlarini bilishingiz, nima uchun hayvonlarga shunday nom berilishi haqida yozing.

Oqbo'yin, Oqto'sh, Yoldor, ...





Matn tarkibida qo'llangan iboralarning izohini yozing. Iboralarni o'zingiz yozgan izohlar bilan almashtirib, matnni qayta o'qing. Qanday farq borligini partadoshingiz bilan muhokama qiling.

Ko'zdan kechirmoq

Boshi garang bo'lmoq

Yetmish yetti tomiri tortishmoq

Ichi-tashi baravar yonmoq

Chap bermoq



Matnning birinchi xatboshisini ko'chiring. O'tgan zamon fe'llarini aniqlab, ularning tagiga chizing.



Ushbu rasmlarni diqqat bilan kuzating. Ularda qanday holatlar tasvirlangani haqida suhbatlashing.



Suhbat asosida hayvonlar bilan qanday munosabatda bo'lish kerakligi haqida qoidalar yozing.



Hadislar bilan tanishing, ularning mazmuni haqida suhbatlashing.

Abdulloh ibn Abbos(r.a.)dan rivoyat qilinadi. "Rasululloh sollallohu alayhi vasallam hayvonlarni bir-biri bilan urishtirishdan qaytardilar".

Imom Termiziy rivoyati

Abdulloh ibn Umar (r.a.) molning yuziga belgi qo'yishni rad etib: "Janob Rasululloh molning yuziga tamg'a bosishdan qaytarganlar", – dedilar.

Imom Buxoriy rivoyati

Hishom ibn Zayd rivoyat qiladi: "Men Anas bilan birga Hakam ibn Ayyubning huzuriga kirdim. Anas bir guruh bolalar bir tovuqni bog'lab qo'yib, toshbo'ron qilayotganlarini ko'rib: "Rasululloh sollallohu alayhi vasallam jonivorlarni ushlab olib, qiyashdan qaytarganlar", – dedi".

Imom Buxoriy rivoyati



"Hayvonlarga shafqatsizlarcha munosabatda bo'lman!" mavzusida matn yarating. Bunda o'z qoidalaringizni hadislar yordamida dalillash tavsiya etiladi.



Yozgan matningizni tahrir qiling. Bu matndan qanday savollarga javob olish mumkinligi haqida o'ylab ko'ring.



MUSTAHKAMLASH



Hayvonlarga xos taqlid so'zlardan hosil bo'lgan fe'llar bilan tanishing. Ularni ikki ustunga ajratib yozing.

Holatga taqlidni bildiruvchi fe'llar

g'ingshimoq

Tovushga taqlidni bildiruvchi fe'llar

akillamoq

Akillamoq, g'ingshimoq, miyovlamoq, pishqirmoq, vovullamoq, chiyillamoq, uvullamoq, vishillamoq, ma'ramoq, vizillamoq, parillamoq, vaqillamoq, g'uvullamoq, angillamoq, lapanglamoq, dikanglamoq, dupurlamoq, qurullamoq.



Ushbu fe'llarni o'tgan zamon shaklida qo'llab gaplar tuzing va yozing.



Hayvon nomlari bilan bog'liq iboralar ma'nosini namunadagidek izohlab yozing. Ularni qo'llash bilan bog'liq og'zaki dialoglar yaratib, uni partadoshingiz bilan ijro etib bering.

Namuna Ilonning yog'ini yalagan – ayyor, mug'ombir.

1. Qo'yи mingga yetmoq.
2. Otdan tushsa ham, egardan tushmaslik.
3. Ilonning yog'ini yalagan.
4. Eti suyagiga yopishgan.
5. Teringga somon tiqilgur.
6. Sichqonning ini ming tanga.
7. Podadan oldin chang chiqarmoq.
8. Pashshadan fil yasamoq.
9. Mushugini pisht demoq.
10. Qo'y og'zidan cho'p olmagan.



Kasal hayvonlar bilan qanday munosabatda bo'lish kerakligi haqida yozing. Bunda quyidagi ma'lumotlar va birliklardan foydalaning.

Kasallangan hayvonlarning belgilari:

- asosiy to'dadan ajralib turish;
- tebranib yurish;
- qattiq hurkib tushish;
- yo'tal, burundan suyuqlik kelishi;
- ich ketishi;
- isitma ko'tarilishi.


Til birliklari:

har bir inson, har kim, har kungi, har yerda, har qachon, har qancha, har kuni, har narsa, har bir, har qaysi.



O'QING VA MULOHAZA QILING

* * *



O'ylasam, izlanishlarimiz kabi g'ofilligimiz-da poyonsiz ekan. So'zni eshitamiz, so'zlashni qotiramiz, lekin so'z mag'zini chaqish aksar xayolimizga kelmaydi. Nega shunday deymiz, deya o'zimizga savol bermaymiz. Bu sinoat to'la olam bamisoli olisdag'i yulduzlardek noayon qolaveradi. Uzum yedim, "uzum" dedim, bilsam, tokdan uzib yedim, degandek, o'z qo'lim bilan ishkomdan uzum uzaturib, bu so'zning uzmoqdan olingani xayolimga kelgan edi. Axir ungan narsani unum, g'uj o'sgan mevani g'ujum, jamiyat tuzilishini tuzum, cho'g'ning qo'ridan qolgan kulni qurum, deymiz. Oq'izga solib yutganimiz yutum, tomoqdan qult etib o'tgan suv qultum bo'lganidek, ishkomdan uzib yeganimiz uzum bo'ladi-da, deya o'z sodda kashfiyotimdan suyungan edim.


* * *

...Diyetani biz parhez o'rnda ishlatamiz. Lekin aslida diyeta "taom" demakdir. Yemakning hamma xili – qazi-qarta ham, yovg'on sho'rva ham diyeta hisoblanadi. Arslonning diyetasi – kiyik, kiyikning diyetasi – giyoh.

Qadimgi Yunonistonda eng yuqori davlat organi bo'lgan xalq majlisi a'zolariga beriladigan ish haqi ham diyeta deb atalgan...

Erkin Vohidov, "So'z latofati" kitobidan





MAQSADLI XARAJATLAR

Bu mavzuda o'rganamiz

- muhim hayotiy, iqtisodiy ko'nikmalar • zaruriy, majburiy, ixtiyoriy xarajatlar • hisob-o'lchov so'zlar • miqdor va tartib sonlar • sonlarning imlosi • munozara matni.



1. Siz odatda nimalarga pul sarflaysiz?
2. O'ylab ko'ring-chi, qaysi xarajatlaringiz keraksiz?



Xarajat turlarini ularning izohi bilan moslashtiring.

ZARURIY

MAJBURIY

IXTIYORIY

A Ushbu tur yashashingiz uchun juda ham muhim bo'lgan narsalarga sarflaydigan pulingizni anglatadi. Masalan, oziq-ovqat sotib olishga ketadigan xarajat. Un, yog', mevalar, kartoshka, piyoz kabi narsalar yashash uchun muhim hisoblanadi, shuning uchun ham bu turdag'i xarajatlarni qilmaslikning iloji deyarli yo'q.



B Ushbu tur xarajatlarga ham pul sarflashingiz kerak. Aks holda sizni turli ko'ngilsizliklar qarshi olishi mumkin. Masalan, yo'l haqi. Siz biror transport xizmatidan (avtobus, poyezd, metro, taksi) foydalandingizmi, uning haqini ham to'lashingiz kerak.



D Ushbu tur xarajatlari kundalik emas. Ular uchun pul sarflash ixtiyoriy bo'ladi. Masalan, bodroq sotib olishga ketadigan xarajat. Siz bodroq sotib olmasangiz ham, yashay olasiz, lekin uning iste'moli sizga rohat bag'ishlashi mumkin. Demak, bu turdag'i xarajatlarsiz yashasa bo'ladi, ammo ular sizga zavq yoki rohat berishi ham mumkin.





Quyidagi xarajat turlarini jadvalga joylashtiring. Oilangizda bulardan qaysilari mavjud?

telefon aloqasi uchun

ijara uchun

oziq-ovqat sotib olish uchun

ichimlik suv uchun

gaz uchun

dori-darmon sotib olish uchun

o'quv kurslari uchun

issiq suv uchun

bog'cha uchun

sayohatga borish uchun

konsertga kirish uchun

sartarosh yoki salon uchun

yo'l haqi uchun

elektr energiyasi uchun

kiyim-kechak sotib olish uchun

muzqaymoq uchun

gigiyenik vositalalar uchun

restoranda ovqatlanish uchun

so'nggi rusumdagи
smartfon uchun**Zaruriy****Majburiy****Ixtiyoriy**

Xarajat turlarini nega bunday tasniflaganingizni og'zaki tushuntirib bering.



Quyidagilarni o'lhash uchun qanday o'chov birliklaridan foydalanamiz? Daftaringizga yozing.

kartoshka

elektr energiyasi

tabiiy gaz

yo'l haqi

yer maydoni

xonardon

balandlik

sut

uzunlik

vaqt

pul

un



Sizningcha, xarajatlar maqsadli yoki maqsadsiz bo'lishi mumkinmi? Shu haqida esse yozing. O'z fikringizni misollar bilan isbotlang. Esse yanada sifatli bo'lishi uchun "maqsad", "maqsadli", "maqsadsiz" so'zlarining izohini lug'atdan ko'rib oling.



Esse yozish jarayonida nimalarni bilib oldingiz?

Esseda yozgan fikrlaringizni qisqa tarzda sinfdoshlaringizga tushuntirib bering.



Quyidagi test savollarini diqqat bilan o'qing. Keyin sizga audiomatr eshittiriladi. O'sha matnni eshitish jarayonida testlarning javobini belgilashingiz kerak bo'ladi. Testni hozir yechib qo'y mang. Kitobga belgilamang.

TEST SAVOLLARI

1. To'g'ri javobni toping.

"Numerativlar" qaysi atama bilan ma'nodosh emas?

- A) hisob so'zlari B) o'lchov so'zlari C) son

2. Hukmning to'g'ri yoki noto'g'ri ekanini aniqlang.

Hisob so'zlari ot so'z turkumiga mansub.

- A) to'g'ri B) noto'g'ri

3. To'g'ri javobni toping.

"1 kilo shakar" birikmasida "kilo" qaysi so'z o'rnda ishlatalgan?

- A) kilometr B) kilogramm C) gramm

4. To'g'ri javobni toping.

Sof hisob so'zlari haqida to'g'ri ma'lumotni toping.

- A) Faqtgina o'lchov birligini bildirmaydi, boshqa ma'nolari ham bo'ladi.
 B) Faqtgina uzunlik va hajm o'lchov birliklarini o'z ichiga oladi.
 C) Faqtgina o'lchov birligini bildiradi, boshqa ma'nolari mavjud emas.

5. To'g'ri javobni toping.

Quyidagilardan qaysi biri orqali og'irlikni ifodalash mumkin?

- A) kilometr B) sentner C) sotix

6. To'g'ri javobni toping.

"Eskirgan", "arxaik" atamalari qanday so'zlarga nisbatan ishlataladi?

- A) hozirda ishlatilmaydigan
- B) maqollarda qo'llanadigan
- C) qadimda ishlatilmagan

7. To'g'ri javobni toping.

Quyidagilardan qaysi bir arxaik o'lchov birligi hisoblanadi?

- A) chaksa
- B) tiyin
- C) sotix

8. To'g'ri javobni toping.

Hisob so'zlari ikki xil bo'ladi: sof va ...

- A) vazifadosh
- B) asl
- C) yordamchi

9. Hukmning to'g'ri yoki noto'g'ri ekanini aniqlang.

Predmetni bildirgan ba'zi so'zlar o'lchov birligini ham anglatishi mumkin.

- A) to'g'ri
- B) noto'g'ri

10. To'g'ri javobni toping.

Quyidagi qaysi gapda sof hisob so'zi qo'llangan?

- A) Narimon eshikni ochdi-yu bir uy bug'doyni ko'rib, qotib qoldi.
- B) Naima tushundiki, bir daqiqa ham kutish mumkin emas, ketish kerak.
- C) O'n qadam sanab, mana shu joydan chegara chizish kerakligini aytди.



Audiomatnni tinglang va daftaringizga javoblarni belgilab boring.



Quyidagi maqollarning ma'nosini izohlashga harakat qiling.

Obro' misqollab keladi, botmonlab ketadi.

Uyida chaksa uni yo'q, tom boshida qo'sh tandir.

Tentakka Quva bir tosh.



Guruhlarga bo'lining. Audiomatndan o'rganganlaringiz asosida "Hisob so'zlari" nomli qoida yarating. Har bir guruh o'zi yaratgan qoidani izohlab berishi lozim.



Muhokama qiling. Nima uchun xarajatlar haqidagi mavzuda hisob so'zlari o'rnilmoqda?



Oilangizning bir oylik xarajatlari jadvalini tuzing. Kattalardan yordam oling. Bir oyda taxminan qancha pul sarflar ekansiz?

Xarajat nomi	O'Ichov	Xarajat turi	Sarflanadigan pul
Yo'l haqi	-	majburiy	120 000 so'm
Kartoshka	10 kilogramm	zaruriy	50 000 so'm
?	?	?	?



1. Nimalar bizni xarajat qilishga undaydi?
2. Xarajatlarning darajasi hammada bir xilmi? Javobingizni izohlang.
3. Blog, blog yuritish, bloger haqida nimalarni bilasiz?



Iqtisodchining blogidan olingan matnni o'qing. Savollarga javob bering.

XARAJATLARNI FARQLASH

Oylik maosh olishimiz bilan juda ko'pchiligidan uni turli sarf-xarajatlarga taqsimlab chiqamiz. Barcha xarajatlar ham birdek emas. Ijara haqi, kommunal to'lovlari kabi ba'zi xarajatlar borki, ular zaruriy va majburiydir. Yana bir tur xarajatlar bizning hayotimizni yanada to'liq va quvonchga boyroq qilsa-da, zaruriy yoki majburiy hisoblanmaydi, ular mutlaqo ixtiyoriyidir.

Zaruriy, majburiy va ixtiyoriy xarajatlar o'rtaсидаги farqni tushunish byudjetimizni to'g'ri taqsimlab, sarf-xarajatimizni kamaytirishga yordam berishi mumkin.

Byudjet bu bir oy davomida biz topadigan va sarflaydigan barcha pullarning miqdoridir. Byudjet hisobini



yuritish surf-xarajatni nazorat qilish, u ishlab topadigan pulimizdan ko'payib ketishining oldini olishga yordam beradi.

Byudjetni taqsimlayotganda xarajatlarni ikkita katta turga ajratib olish mumkin: zaruriy va ixtiyoriy (ixtiyoriydan boshqa xarajatlar ham zaruriy xarajatlar tarkibiga kiradi).

Zaruriy xarajatlar shundayki, ular odatda har oy takrorlanadi, ularga pul sarflamaslik, qo'polroq qilib aytilsa, bizni nobud qiladi desa ham bo'ladi. Masalan, *ijara haqi, kommunal to'lovlar, oziq-ovqatlar, yo'l haqi, dori-darmon* va h.k.

Ixtiyoriy xarajatlar esa ega bo'lish yoqimli, lekin hayot uchun zaruriy bo'lмаган narsalarga qilingan xarajatlardir. Ixtiyoriy xarajatlarni yashash tarzini yanada sifatli qilish uchun sarflangan pul deb tushunsak ham bo'ladi. Ular bilan hayotni yanada jozibali qilish mumkin, lekin atarsiz ham yashasa bo'ladi. Ixtiyoriy xarajatlarning zaruriy xarajatlardan yana bir katta farqi ularning turli oyda turlicha bo'lishidir.

Odamlarda ixtiyoriy xarajatlar turlicha bo'lishi mumkin. Ulardan ba'zilari ni keltiraman: restoranda ovqatlanish, uyga taom chiqitirish, sport mashg'ulotlariga borish, go'zallik salonlariga qatnash, hashamatli aksessuarlar, taqinchoqlar, qimmat kiyimlar, gazeta, jurnallar obunasi, konsert va teatr uchun chiptalar, sa-yohat, tug'ilgan kun yoki to'yona uchun qilingan xarajatlar.



Agar byudjet hisobini yuritmasak va pulni rejasiz sarflayversak, bora-bora ixtiyoriy xarajatlarimiz ko'payib ketishi mumkin. Bu esa, o'z navbatida, zaruriy xarajatlar uchun kamroq pul qolishini anglatadi. Zaruriy xarajatlarning vaqtida qilinmasligi turli katta-kichik muammolarga sabab bo'lishi mumkin. Masalan, haqini vaqtida to'lamasangiz, kommunal xizmatlardan vaqtincha uzib qo'yilasiz, ya'ni uyingizda yo elektr toki, yoki suv bo'lmay qoladi.

Ammo ixtiyoriy xarajatlar ham butunlay keraksiz emas. Masalan, sport zaliga qatnash sog'lig'ingiz va ruhiyattingiz uchun zarur bo'lishi mumkin.

Byudjet hisobi ana shunday vaziyatlar ko'z oldimizda yaqqol namoyon bo'lishiga yordam beradi.

Ixtiyoriy xarajatlaringizni nazorat qilib borishni tavsiya qilaman. Buni qanday eplash mumkin deysizmi? O'z tajribam bilan bo'lishishga tayyorman.

Dastlab, bir oy davomida sarflagan hamma pulimni yozib yurdim. Quyidagi jadval menga juda qo'l keldi:

Xarajat	Sarflangan pul	Sana
Non	12 000	Har kuni
Taksi uchun yo'l haqi	16 000	02.03.2022
“Coca-Cola” 0,5 litr	5000	02.03.2022
Internet uchun	85 000	12.03.2022

Ana shundan keyin menda bir oy davomida nimalarga pul sarflashim haqida to'liq ma'lumot paydo bo'ldi.

Keyin barcha xarajatlarimni sinchiklab o'rorganib chiqdim va kerakli-keraksizga ajratdim. Masalan, taksida emas, sal vaqtli yo'lga chiqib, avtobusda ketsam, 14 600 so'm tejar ekanman, "Coca-cola" o'rniga gazsiz oddiy suv olsam, 3000 so'm yonga qolarkan. Quyidagi savollar asosida barcha xarajatlarimni taftish qilib chiqdim: "Bu menga kerakmi?", "Bu meni qanchalik baxtli qildi?". Keyingi oydan asta-sekin pul sarflayotganda o'ylab ko'rishni odat qildim. "To'xta, shuni olmasang, nima bo'ladi? Avtobusda ketsang, kech qolasanmi? Shu qimmat soat nimaga kerak, telefoningda soat bor-ku?! Har kuni gazli ichimlik ichish sog'liq uchun ham zararli!..". Shunday qilib, men har oy maosh olgan kunimoq barcha zaruriy xarajatlarga pul ajratib qo'yadigan bo'ldim.

Ba'zi xarajatlar bo'ladiki, ular boshqa takrorlanmasligi, lekin zaruriy bo'lishi mumkin. Masalan, 5 500 000 so'mga yangi noutbuk sotib oldim. Bu ishim uchun kerak edi, u bilan ancha samarali ishlab, ko'proq pul topishim mumkin. Ana shunday kutilmagan, lekin zaruriy xarajatlarni ham ko'zdan qochirmaslik lozim. Odatda bunday xarajatlar uchun oldindan pul to'plash kerak bo'ladi.

Xullas, kirim-chiqimlar hisobini to'g'ri yurita olsangiz, xarajatlariningizni bemalol nazorat qilishingiz mumkin.

Hoshimjon Ayoziy





1. Ixtiyoriy va zaruriy xarajatlar orasidagi farqlarni sanang.
2. Byudjet hisobini yuritish nima uchun kerak deb o'ylaysiz?
3. Biror nimaga pul yig'moqchi bo'lsak, qaysi turdag'i xarajatlarni kamaytirish lozim?
4. Muallif o'z byudjetini nazorat qilish uchun nimalar qildi?
5. Sizningcha, muallif nimaga non uchun xarajat qarshisiga "har kuni" deb yozib qo'yg'an?
6. Muallif kabi siz ham o'zingizni so'roq qilib ko'rghanmisiz? Qachon? Nima maqsadda shunday qilgansiz?
7. Matnni kattalarga ham o'qib bering.



Matndagi zamon qo'shimchalarini aniqlang. Nima deb o'ylaysiz, ular qaysi zamonga ishora qilmoqda? Nega shunday deb o'ylaysiz?



Sizningcha, qaysi biri to'g'ri? Nima uchun?

7-sinf

7-inchi sinf

7 sinf

Nº 16-maktab

16-maktab

16-sonli maktab



Munozara matnlarining ijobjiy va salbiy jihatlarini qiyoslovchi turi bor. Bunday matnda masala qarama-qarshi fikrlar asosida ko'rib chiqiladi.

Bunday matn quyidagicha shakllantirilsa, uning sifati yuqori bo'lishi ta'minlanadi.

Kirish. Bu birinchi xatboshi bo'lib, mavzu bayon qilinadi. Unda muallif hech qanday shaxsiy fikr bildirmaydi, shunchaki, masala yuzasidan umumiy fikrlarni yozadi.

Asosiy qism. Bu qism kamida ikkita xatboshidan iborat bo'ladi. 1-xatboshida ijobjiy jihatlar va ularga asos bo'la oladigan dalillar, 2-xatboshida salbiy tomonlar va ularga asos bo'la oladigan dalillar keltiriladi.

Xulosa. Bu xatboshida muallif masalaga o'z fikrini bildiradi va yakuniy mulohazalarini yozadi.





Esse yozishda ko'mak beradigan ba'zi tavsiyalar:

- Yozishga kirishishdan oldin **masalaning ijobiy va salbiy jihatlari ro'yxatini tuzib oling.**
- Asosiy qismdagi har bir jihatga alohida to'xtaling va har bir fikrni hayotiy dalillar bilan asoslang.
- *Shuni aniq aytishim mumkinki, to'liq ishonamanki, qat'iy ishonamanki kabi birliklarni qo'llamang.*
- Adabiy til me'yorlariga amal qilgan holda, so'zlashuv uslubini qo'shmasdan yozing.
- Mavzuga mos fakt, iqtibos, ibora va maqollar keltirishga harakat qiling.
- Har bir xatboshini uning nima haqida ekaniga ishora qiluvchi jumla bilan boshlang.



Quyidagi vaziyat asosida esse yozing. Essega chiroqli sarlavha toping.


Odamlar hayotini yanada zavqli qilish uchun ixtiyoriy xarajatlarini ko'paytirib yuboradilar. Ixtiyoriy xarajatlarning ijobiy va salbiy jihatlarini muhokama qiling va o'z qarashlaringizni esseda ifodalang.



Yozib kelingan esselar tahlili va tahriri.

Har bir o'quvchi o'z essesini o'qib beradi, qolgan o'quvchilar aniqlashtiruvchi savollar beradi hamda matn tuzilishining qoidaga mos ekanini tekshiradi.





BOBOMNING PENSIYASI

Bu mavzuda o'rganamiz



- pensiya tizimining iqtisodiy ahamiyati • qavm-qarindoshlikni ifodalovchi til birliklari
- ravishlar imlosi, ularning yasalishi • otlarning lug'aviy shakllari • infografika yaratish.



O'zbek tilida qarindosh-urug'lar qanday nomlanishini bilasizmi? Ayting.



Rasmlarga qarang va savollarga javob bering.



1. Rasmda kimlar tasvirlangan bo'lishi mumkin? Ularni shevangizda qanday ataladi? Adabiy tilda-chi?
2. Sizningcha, rasmda qavm-qarindoshlardan kimlar tasvirlanmagan?





To'g'ri yozilgan so'zlarni aniqlab, daftaringizga ko'chiring. Har ikki so'z to'g'ri bo'lishi ham mumkin.

kennoyi/kelinoyi

qarindosh-urug'/qarindosh urug'

nabira/nevara

otayu ona/ota-yu ona

xola/hola

evara/avara

amakivachcha/amakivacha

tog'ayu jiyan/tog'a-yu jiyan



Qarindoshlaringiz ro'yxatini tuzing. Ushbu ro'yxatni namunadagidek izohlab yozing.

Namuna

xolam – onamning singlisi/opasi.



Quyidagi so'zlarni izohi bilan moslab yozing.

So'zlar

Izohi

Evara

Bitta ota-onadan dunyoga kelgan bola; o'g'il yoki qiz (ota-onaga nisbatan)

Nevara

Ma'lum bir urug' vakillarining kelib chiqishi va o'zaro qarindoshlik darajasini ko'rsatuvchi ro'yxat

Oila

O'g'il yoki qizning farzandi (bobo va buviga nisbatan)

Farzand

Evaraning farzandi – o'g'li yoki qizi (katta boboga, buviga nisbatan)

Shajara

Nevaraning bolasi (bobo va buviga nisbatan)

Chevara

Er-xotin, ularning bola-chaqalari va eng yaqin tug'ishganlaridan iborat birga yashovchi kishilar jamoasi

Eslatma

Xesh-aqrabo – ikki qismdan iborat juft so'z:

- xesh forsiy so'z bo'lib, qavm-qarindosh, yaqinlar degan ma'noni anglatadi;
- aqrabo esa arab tilidan olingan va u ham yaqinlar, yor-birodarlar degan ma'nolarni bildiradi.

Demak, xesh-aqrabo deganda qavm-qarindoshlar, urug'-aymoqlar, do'st-birodarlar va barcha yaqin kishilar nazarda tutiladi.



Berilgan parchani o'qing va ajratib ko'rsatilgan qo'shimchalarga diqqat qiling. Qaysi so'z(lar)da -lar qo'shimchasi hurmat ma'nosini, qaysi so'z(lar)da ko'plikni ifodalayapti?

Hadeb bobomlarning uyiga ketib qolayotganimizni ko'rgan dadam bir juft chiroqli to'tiqush olib keldilar. Bo'yni qop-qora, qanotlari sariq va yashil. Bu qushlar nega "to'ti" deyilishini bilib oldik. Ular "to'-ti, to'-ti" deb sayrar ekan.

"Gulxan" jurnalidan



Oila a'zolaringiz, qarindoshlaringizdan kimlarning ismida -jon, -xon, -oy, -bek yoki shunga o'xhash qo'shimchalar bor? Ularning ismlarini yozing. Nima uchun ismlarga bunday qo'shimchalar qo'shilishini izohlang.



Berilgan matnlarni o'qing. Ajratib ko'rsatilgan so'zlarni qachon va qanday holatlarda ishlatalamiz? So'zlashuv nutqidan yoki sevimli asaringizdan shu kabi so'zlarni topib, ko'chiring.

I. – Voy, **tentakkinam**. Jasur va kuchli bo'lishing yetarli emas. Aql bilan ish qilmasang, hech narsaga erisholmaysan.

II. Bolaginam! Men senga eng asosiysini aytmabman-ku? Chinakam botir inson bo'lish uchun faqat jasur, kuchli, aqli bo'lishning o'zi kamlik qiladi, eng asosiysi – bilim. Samolyotda uchish uchun ham, qayiqda suzish uchun ham, hamma-hammasi uchun chuqur bilim kerak.

"Eng asosiysi" hikoyasidan



Quyidagi so'zlarga -gina erkalash qo'shimchasi hamda egalik qo'shimchalarini qo'shing. Imlo qoidasiga rioya qilgan holda ular ishtirokida gaplar tuzib, yozing.

bosh, ota, ona, uka, qiz, nabira, oyoq, peshona, bo'y



Otlarning -cha, -choq, -chak kabi qo'shimchalarni olgan shakli kichraytirish shakli; -gina (-kina, -qina), -jon, -xon, -oy kabi qo'shimchalarni olgan shakli esa erkalash shakli hisoblanadi.

-gina (-kina, -qina) qo'shimchasi erkalashdan tashqari achinish ma'nosi uchun ham xizmat qiladi: **Bolaginam, onaginang o'rgilsin, keldingmi?**

Esda saqlang! -gina ayiruv-chejaralov yuklamasi erkalash qo'shimchasidan 1) faqat so'zi bilan almasha olishi; 2) egalik qo'shimchasidan keyin kelishi; 3) urg'usiz bo'lishi bilan farqlanadi: **Betobligimda bolamgina tepamda turdi.** ("faqat bolam" – yuklama)





Berilgan fe'llar bilan bog'lana oladigan so'zlarni aniqlang, ularni jadvalning kerakli ustuniga yozing. Bir so'z har uchala fe'lga mos kelishi ham mumkin.

Yildan yilga, dastlab, majburan, arang, har kuni, oz-ozdan, oyma-oy, doimo, asta-sekin, birgalikda, ancha, darrov, bafurja, hozircha, kech, har doim, erta, picha, sal, kunma-kun, oydan oyga, ko'pincha, oz-moz.

jamg'armoq

oyma-oy

to'lamoq

oyma-oy

hisoblamoq

oyma-oy



O'zingiz hosil qilgan birikmalar yordamida "Oilamiz byudjeti" mavzusida kichik matn yarating. Unda oilangizga bir oyda qancha mablag' kelishi va u qanday sarflanishi haqida ma'lumot bering.



Oilaviy byudjetingiz bilan bog'liq infografika yaratishga harakat qiling. U 3 qismdan iborat bo'lishi lozim.

AZIZOVLAR OILASI

DAROMAD

Oylik
maosh:
.....

Pensiya:
.....

Qo'shimcha
daromad:
.....

XARAJAT

Majburiy to'lovlar:
.....

Qo'shimcha
to'lovlar:
.....

Bu oy uchun
rejalashtirilgan
alohida
xarajatlar:
.....



JAMG'ARMA



1. Maosh nima? Uni kimlar oladi?
2. Eng ko'p maosh to'lanadigan kasblarni bilasizmi? Ularni sanang.



Matnni o'qing va savollarga javob bering.

KEKSALARING "MAOSHI"



Yodgorning bobosi ham, buvisi ham pensiyaga chiqqan. Ular ishlamasalar ham, har oyda pul olishadi. Yodgor esa bunga **sira** tushunmaydi: "Qanday qilib odamlar ishlamasa ham, maosh olishlari mumkin?"

Bir vaqtlar Yodgorning bobosi avtomobil zavodida muhandis, buvisi esa mакtabda o'qituvchi bo'lib ishlagan. Ular keksalikda mehnat qilib pul topish qiyin ekanini yaxshi bilar edi. Chunki odam qariganida **tez** charchaydigan bo'lib qoladi. Shu sababli Yodgorning bobosi va buvisi yoshlikda ko'p mehnat qilib, o'z vaqtida daromad soliqlarini to'lab borishgan. Boshqacha aytganda, ular **har oyda** to'lab borgan soliqlari hisobidan pensiya jamg'armasi shakllantirilgan. Kishining mehnat faoliyati qanchalik uzoq bo'lsa, unga to'lanadigan pensiya miqdori ham ko'p bo'ladi. Yodgorning bobosi 60 yoshda, buvisi esa 55 yoshda ishdan bo'shab, **shu yildan** pensiyaga chiqqanlar. O'shanda boboning mehnat faoliyati 35, buviniki esa 30 yilga teng edi.

Endi tasavvur qiling, bobo 5 million so'm maosh to'lanadigan korxonada ishlagan. **Har oy** maoshining 12 foizini soliq sifatida ushlab qolingan. Bu 600 000 so'm degani.

$$35 \times 12 = 420 \text{ oy.}$$

$$420 \times 600\,000 = 252\,000\,000.$$

Ko'rdingizmi, Yodgorning bobosi mehnat faoliyati davomida davlatga kattagina – 252 million so'm soliq to'lagan. O'z vaqtida u kishi to'lagan soliqlarni davlat qariyalarning nafaqasi va boshqa ko'plab ijtimoiy ehtiyojlar uchun sarflagan. Demak, bobo ham pensiya-chiqqanidan **keyin** boshqalar to'layotgan soliqlar hisobidan nafaqa olib turishga haqli. Ijtimoiy adolat mana shunday bo'ladi.

"Jippi akademik" jurnalidan





1. Yodgorning ushbu matn mazmunini yuzaga chiqarishdagi o'rni va ahamiyatini tushuntiring. Muallif nima uchun ushbu qahramondan foydalangan?
2. Yodgorning bobosi va buvisi qayerda ishlagan? Ular nima maqsadda yillar davomida soliq to'lashgan?
3. Maoshdan ushlab qolinadigan mablag'larning pensiya bilan qanday aloqasi borligi haqida suhbatlashing.
4. Sizning bobongiz va bivingiz yoki biror qarindoshingiz pensiya yoki nafaqa oladimi?
5. Ota-onangiz yoki yaqin qarindoshingizdan maoshining qancha qismini keksalik uchun jamg'arib borishayotganini so'rang.



Matnda ajratib ko'rsatilgan so'zlarga so'roq bering va ularni ko'chiring. Ushbu so'zlarni qatnashtirib mavzuga aloqador gaplar tuzing.



So'zlarga qo'shimchalardan mosini qo'shib, yangi so'zlar yasang.

yil

do'st

-cha

-ona

fidoyi

ochiq

-lab

-an

vijdon

taxmin

-larcha

-chasiga

ota

fidokor

hafta



Yasagan so'zlaringiz ishtirokida gaplar tuzing.



Nutqimizda harakat-holatning bajarilish tarzi, payti, o'rni, daraja-miqdori kabi belgilari bildiruvchi so'zlar bor, ularni **ravishlar** deymiz. Ularning tuzilishiga ko'ra quyidagi turlari bor:

- **sodda:** hamisha, doimo, ko'p, oz;
- **qo'shma:** bir talay, shu vaqt, biroz, har doim;
- **juft:** erta-kech, eson-omon, nari-beri, bugun-erta;
- **takror:** oz-oz, tez-tez, sekin-sekin, ustma-ust.



Faraz qiling, qaysidir kasb yoki hunarni egallagansiz. Belgilangan yoshgacha ishlab, pensiyaga chiqdingiz. Taxminiy pensiya jamg'armangizni hisoblab chiqing.

Yo'riqnomadan foydalanishingiz mumkin:

- Qaysi kasb yoki hunar bilan shug'ullanasisiz?
- Qayerda ishlaysiz?
- Maoshingiz taxminan qancha bo'ladi?
- Har oy qanchadan jamg'arishingiz mumkin?
- Bir yilda qancha bo'ladi? Pensiya yoshiga yetganingizda-chi?
- Har oy pensiya olganingizda uni qanday sarflaysiz?



Uy vazifasi yuzasidan taqdimot qiling.



Bo'sh o'rirlarni mos ravishlar bilan to'ldirib, gaplarni ko'chiring. O'zingizga yoqqan hikmat asosida matn yozing. Matningizda ravishlardan foydalaning.

Hikmatlar

Yoshlik bilan keksalik orasidagi muddat ... qisqa!

Keksalik xuddi qorday ... bosadi, ... tursangiz – hammayoq oppoq.

Qariganingda ... yoshliging haqida o'ylaysan.

Qariganda ko'zlar yuzdan bosh orqasiga o'tib qoladi: ... orqaga qaraysan, ... hech narsani ko'maysan, ya'ni qolgan umring bilan emas, balki xotiralar bilan yashay boshlaysan.

Biz ... yashashni orzu qilamiz-u, ammo qarishdan qo'rquamiz.

... o'zimizni yoshimizga munosib tarzda tutaylik.

Sizni ... qayerdadir ko'rgandekman.

So'zlar

ko'proq

uzoq

ertalab

hamisha

to'satdan

orqasiga

avval

naqadar

nuqul

zo'rg'a

sekinroq

oldinda



Sevimli kinofilm yoki multfilmingizni qayta ko'ring. Qahramonlar nutqida qo'llangan ravishlarni qayd etib boring. Ularning gapda tutgan o'rnnini quyidagi jihatlariga ko'ra aniqlang.

- holatni ifodalagan;
- paytni ifodalagan;
- o'rinni ifodalagan;
- miqdor-darajani ifodalagan;
- maqsad-sababni ifodalagan.

MUSTAHKAMLASH



"Keksalarning maoshi" matnida keltirilgan sonlarni so'zlar bilan yozing. Bu sonlarning aytilishi va yozilishida farq bormi? Qanday?

Namuna 63 – oltmis uch.



Quyidagi ravishlarga so'roq bering hamda ularni guruhlarga ajratib yozing.

endi	sal	ataylab	avval	kecha-kunduz
olg'a	noiloj	jim	tashqarida	qasddan
hamon	so'ngra	bafurja	oz	dastlab
picha	to'satdan	jo'rttaga	xiyol	piyoda
ko'p	tasodifan	ancha	astoydil	hozircha
ichkarida	birma-bir	yayov	doimo	yakkama-yakka
	kam	yonma-yon	zo'rg'a	

Holat	Payt	O'rin	Miqdor-daraja	Maqsad-sabab
jim	hamon	ichkarida	oz	qasddan



"Qarisi bor uyning parisi bor" maqolini izohlab kichik ijodiy matn tuzing. Matningizda ravishlardan o'rqli foydalanishga harakat qiling.



Turli sohalarda o'z biznesini yo'lga qo'ygan saxovatli inson nafaqadagi keksalar uchun bir nechta imtiyozlarni belgiladi. Ular bilan tanishing.

Xizmat turi	To'lov miqdori	Chegirmalar
Mehmonxona	80 000 so'm (bir kunga)	15 %
Sartaroshxona	Har 25 000 so'mlik xizmat uchun	20 %
Dorixona	Har 100 000 so'mlik xarid uchun	12 %
Shifoxona	Har 200 000 so'mlik xizmat uchun	18 %



Erkin bobo va Umri buvi xizmatlardan quyidagi shaklda foydalanishgan bo'lsa, ular belgilangan imtiyozlar asosida har bir xizmat uchun qancha pul to'lashi kerakligini aniqlab, matn ko'rinishida yozing. Matningizda ravishlardan foydalaning.

Erkin bobo	Umri buvi
Mehmonxona (2 kun)	?
Sartaroshxona (35 000)	?
Dorixona (120 000)	?





O'QING VA MULOHAZA QILING

PAND-NASIHAT



“Pand-nasihat” tilimizda o’git ma’nosini anglatishini hammamiz yaxshi bilamiz. Biroq undagi “pand” so’zi boshqacha ma’noga ega. Ya’ni “pand” so’zining tub ildizi “yolg’on”, “aldov” ma’nosini anglatadi.

Shuning uchun tilimizdagи “pand berib ketibdi” iborasi “o’git beribdi” mazmunida emas, “aldab ketibdi” mazmunida tushuniladi. Lekin “pand-nasihat berish” deganda, dastlab “aldab-suldar yo’lga solish” ma’nosini anglashilgan.

Qolaversa, “pand” so’zining tilimizda ikkinchi ma’nosni paydo bo’lgan. Ya’ni birinchi ma’nosni aldab ketish, ikkinchisi dakki berish. “Pand-nasihat”dagi *pand so’zi dakki berish* ma’nosidagi “pand”ga to’g’ri keladi.

“MUJMAL” ASLI MUJMALMI?

“Mujmal” so’zini hozirgi paytda *lanj, mavhum, na u yoqlik, na bu yoqlik, tushunarsiz, tayinsiz* degan ma’nolarda ishlatalamiz. Lanj, kesib gapirmaydigan, ezma kishilarga nisbatan “mujmal odam” deymiz. Holbuki, bu so’zning tub ildizi “qisqa”, “lo’nda” ma’nolarida keladi. Bu ma’no so’zning hozirgi ma’nosiga mutlaqo zid. Alisher Navoiy asarlarida ham “mujmal” so’zi “qisqa” ma’nosini ifodalagan. Masalan, “Sab’ayi sayyor” dostonida shunday misralar bor:


*Dostonlarki aytdim mujmal,
Manga yo’q hech anda bahs-u jadal.*

Mazmuni: men bu dostonlarni shunchalik qisqa bayon qildimki, so’zlarim orasida birorta ham bahsga sabab bo’ladigan, tushunilmaydigan o’rin yo’q.

Shuningdek, arabcha “mujmal” so’zining “yig’indi” degan ma’nosni ham borki, u “jumla” so’ziga to’g’ri keladi.

Eshqobil Shukur, “Boboso’z izidan”





FIZIKA HAYOTNI YENGILLASHTIRADI

Bu mavzuda o'rganamiz

- fizikaning hayotdagi o'rni • fanga oid til birliklari • otlarning lug'aviy shakllari • tinish belgilari • lug'at bilan ishlash.



1. "Fizika" so'zini eshitganda xayolingizga nimalar keladi?
2. Fizika fani nimalarni o'rgatadi?
3. Fizikani o'rganishning qanday ahamiyati bor deb o'ylaysiz?



Savol-javoblarni o'qing. Fizikaga doir bu bilimlar hayotimizni qanchalar yengillatishi mumkinligi haqida mulohaza qiling. O'zingiz ham hayotiy misollar topishga harakat qiling.

Savol: sizda qizil hamda yashil pomidorlar bor va ular aralashib ketgan. Qisqa vaqt ichida ularni qanday qilib bir-biridan ajratish mumkin?



Javob: pomidorlar suv to'la katta idishga solinadi. Og'irlikdagi farqi sabab pishgan pomidorlar idish tubiga cho'kadi, yashillari esa yuzaga qalqib chiqadi.




Savol:sovun ko'pigi naychadan puflansa, hosil bo'lgan shaffof pufak nega avval yuqoriga ko'tarilib, so'ng pastlay boshlaydi?

Javob: puflab chiqarilgan havo iliq va uning zichligi atrofdagi havo zichligidan kichik. Biroz muddatdan so'ng sovun pufagi ichidagi havo soviydi, zichligi ortadi va u pasaya boshlaydi.

Savol: temir ham, yog'och ham bir xil haroratga ega. Nega qo'l tekkizganda metall yog'ochga nisbatan sovuq tuyuladi?



Javob: chunki ularning harorat o'tkazuvchanligi turlicha. Yog'ochdan yasalgan predmetni qo'lga olganimizda qo'limiz harorati yog'ochning yuzasiga o'tadi, uning ichiga bu haroratning tarqalishi sekin kechadi. Metall predmetni ushlaganimizda esa haroratimiz nafaqat uning yuzasiga, balki ichiga ham tez tarqala boshlaydi. Shuning uchun butunlay qizib olmagunicha metall sovuq tuyulaveradi.



Savol: nega botqoqdan oyoqni tortib olish qiyin? Botqoqqa botib ketmaslik uchun nima qilish kerak?

Javob: balchiqdan oyoqni tortib olayotganda oyoq tagi bilan botqoq tubi orasida havosiz bo'shilq paydo bo'ladi. Shu sababli bunda inson nafaqat yopishqoq balchiq qarshiligini, balki atmosfera bosimini ham yengishi kerak. Shuning uchun tayanch maydonini kengaytirish lozim. Buning uchun esa uzun taxta bo'lagi, tayoq yoki daraxt shoxlaridan foydalansa bo'ladi.

"Qiziqarli fizika" kitobidan



1. Aiting-chi, nega pishgan pomidorlar xomiga nisbatan og'ir bo'ladi?
2. Vaqt o'tib sovun pufagining pastlashiga nima sabab bo'ladi?
3. Nega temir yog'ochga nisbatan sovuq tuyuladi?
4. Nega botqoqda harakatlanish qiyin?
5. Bu hodisalar boshqacha ko'rinishda hayotimizda yana uchraydimi? Qaysi holatlarda?



Matndan vergulni qo'llashga doir uch turdagи gaplarni topib, yozing.

1 uyushiq bo'laklar orasida

2 qo'shma gap tarkibidagi sodda gaplar orasida

3 kirish so'zlarni ajratish uchun



Yuqoridagi savol-javob matnidan qanday ma'lumotlar olganingizni yozma shaklda ifodalang. Bunda uyushiq bo'laklardan foydalaning.



Botqoq bilan bog'liq matn tarkibidagi gaplarni quyidagi xususiyatlar asosida tahlil qiling va shu orqali uyushiq bo'laklarga oid bilimlaringizni mustahkamlang.

Namuna oyoq tagi, botqoq tubi

Bir xil so'roqqa javob bo'ladi

Bir xil gap bo'lagi vazifasini bajaradi

Sanash ohangi bilan aytildi



Matn tarkibidagi uyushiq bo'laklar qanday vositalalar bilan bog'langaniga e'tibor bering. Quyida berilgan vositalalar yordamida uyushiq bo'lakli gaplar tuzib, yozing.

, (vergul)

ham

bilan

-u, -yu

va



Fizika kitobingizdan uyushiq bo'laklar ishtirok etgan 7–10 ta gapni ko'chirib, yozing. Uyushiq bo'laklar qaysi vositalalar yordamida bog'lanayotganini aniqlang.




Matnni diqqat bilan o'qing, savollarga javob berishga tayyorlaning.

FIZIKA QONUNLARI NIMA UCHUN KERAK?

Fizika to'g'risida gap ketsa, biz qandaydir murakkab **formula**, **gipoteza-yu**, **teoremlarni**, **xullas**, oddiy odamga keraksiz, tushunarsiz voqealarni **tasavvur qila boshlaymiz**. Go'yo bu soha bizga begona – juda-juda uzoqda.

Balki **qulog'ingizga chalingandir**, fizikada "kvant mexanikasi" va "kosmologiya" degan tushunchalar bor. Aslida bu ikki tushuncha olam qonuniyatlarining ilmiy asosidir. Bizning hayotimizni tashkil qiluvchi hamma narsa: sayyoralar-u yulduzlar, bulutlar-u vulqonlar, mevalar-u shirin taomlar, binolar, tovushlar, musiqa asboblari, xullas, bari shu ikki qutb orasida joylashgan. Qolaversa, bularning hammasini fizik qonunlar boshqaradi.

Atrofga diqqat bilan qarang, fizika qonunlarining amalda qanday ishlayotganini his qilishga urining. Yoki o'zingiz buni sinab ko'ring. Buning uchun sizga ikkita tuxum kerak bo'ladi. Biri xom, ikkinchisi qaynatib pishirilgan bo'lsin. Ularni aylantirasiz. Keyin esa to'xtatasiz. Qaynatilgan tuxum shu zahoti to'xtab qoladi. Xomi esa to'xtashni "istamaydi". Chunki siz uning faqat qobig'ini to'xtatdingiz, ichidagi suyuqlik hamon aylanishda davom etmoqda. Bu ichki impuls momenti saqlanish qonunining ko'z oldingizda namoyon bo'lishidir. Uni soddarоq qilib shunday tushuntirish mumkin: **tizim** o'zining doimiy o'qi atrofida aylanishni boshlar ekan, to nimadir uni to'xtatmaguncha aylanishda davom etaveradi. Bu koinotning asosiy qonunlaridan biri hisoblanadi.



Demak, oshxonamizda sinab ko'rishimiz mumkin bo'lgan qonun **misli ko'rilmagan texnologiyalarning tuzilishini ham tushuntirib berishga qodir!**

Bizni o'rabi turgan olamning qanday tuzilganini bilish uchun dastlab uning asosi bo'lgan fizik qonuniyatlarni o'rganishimiz kerak. Fizika faqat murakkab formulalardangina iborat emasligini tushunishimiz lozim. U har birimizga juda yaqin, **ko'z oldimizda**. Aslida uni bilishimiz, uni o'rganishga qiziqishimiz taraqqiyotning negizidir. Unutmang, fizika qiyin fan emas, aksincha, u hayotimizni yengillashtiruvchi fandir.

daryo.uz saytidan



1. "Olamdagi hamma narsani fizik qonunlar boshqaradi" degan fikrni qanday tushunish mumkin? Izohlab bering.
2. Nega qaynatilgan tuxum aylanishdan to'xtadi, xom tuxum esa yo'q? Matn asosida javob bering.
3. Matn orasida berilgan suratda nima aks etgan deb o'ylaysiz? Olim nima bilan mashg'ul?
4. O'ylab ko'ring-chi, fizikaga doir qaysi qonunlar biz bilgan texnik qurilmalarning ixtiro qilinishiga sabab bo'lgan?
5. Nima uchun "Fizika hayotimizni yengillashtiradi", deymiz?

Kvant mexanikasi – fizikaning juda kichik o'lchamli zarralar qonuniyatini o'rganuvchi bo'limi.

Kosmologiya – koinotning tuzilishi va rivojlanishini o'rganuvchi fan.



Matnda ajratib ko'rsatilgan so'zlarning izohini o'qing. Ularni sinfda muhokama qiling.

Formula	biron-bir qonun, qoida yoki voqe-hodisani izohlash, ifodalash uchun qo'llanadigan aniq va qisqa ta'rif, belgilarning o'zaro uyg'un birikmasi.
Gipoteza	hali tajribada sinalmagan, isbot qilinmagan ilmiy taxmin, faraz.
Teorema	qat'iy mantiqiy mushohada bilan isbotlanadigan tasdiq.
Qonun	borliqdagi voqe-hodisalar o'rtasida hamisha mavjud bo'lgan barqaror bog'lanish, munosabat.
Tizim	o'zaro uzviy tartibda bog'liq bo'lgan narsa, hodisalar birligi, majmui.



Berilgan jumlalarda ajratib ko'rsatilgan qismlarni shunday so'zlar bilan almashtirib yozingki, jumlaning ma'nosi o'zgarmas.

• Go'yo bu soha bizga begona – juda-juda **uzoqda**.

• Balki qulog'ingizga **chalingandir...**

• Bizni **o'rab** turgan olam...



Matn mazmuni asosida quyidagi topshiriqlarni bajaring.

1. Ushbu matnni qayerlarda uchratish mumkin? Ro'yxatni davom ettiring:
Gazeta, ...

2. Matn tarkibidan uning siz, biz va umuman butun ommaga mo'ljallanganini aniqlashtiruvchi gaplardan birini topib, yozing.

3. Matn tarkibidan tavsiya ma'nosi ifodalangan jumlanani aniqlab, yozing.

4. Matnda berilgan tajribaning fizika bilan bog'liq ekanini asoslovchi jumlanani aniqlab, yozing.



Matnning har bir qismida berilgan ma'lumotlarni bitta gap bilan ifodalang. Ularni o'zaro bog'lang, berilgan matnni kichik matnga aylantirib yozing.

Masalan:

1. Bilasizmi, fizika fani siz va biz o'ylaganchalik murakkab fan emas.
2. ...
3. ...
4. ...



"Energiyaning bir turdan boshqa turga aylanishi" deb nomlangan tajribani tomosha qiling. Quyidagi savollar asosida tajriba bosqichlarini ketma-ketlikda yozing.

1. Tajriba uchun nimalar kerak bo'ladi?

2. Tajriba qanday amalga oshiriladi?

3. Bu tajriba natijasida nimalarni bilib olish mumkin?



Tajriba
uchun
havola



“Fizika hayotni yengillashtiradi” matnidan olingen quyidagi gapda ko’plikni ifodalovchi –lar qo’shimchasi uyushiq bo’laklarning qaysi biriga tegishli? Nima uchun muallif uni shu tarzda qo’llagan?

Fizika to’g’risida gap ketsa, biz qandaydir murakkab **formula**, **gipoteza**-yu, **teorema**larni, xullas, oddiy odamga keraksiz, tushunarsiz voqeа-hodisalarни tasavvur qila boshlaymiz.

Siz ham –lar qo’shimchasini shu tarzda uyushiq bo’laklar orasida qo’llab 3 ta gap tuzing va yozing.



“Fizika hayotni yengillashtiradi” matnidan olingen ushbu gaplarni taqqoslang. Ularda qo’llangan tirening vazifasini tushuntiring.

Go’yo bu soha bizga begona – juda-juda uzoqda.

Go’yo bu soha bizga begona, juda-juda uzoqda.

Bizni o’rab turgan olamning qanday tuzilganini bilish uchun avvalo uning asosi – fizik qonuniyatlarni o’rganishimiz kerak.

Bizni o’rab turgan olamning qanday tuzilganini bilish uchun avvalo uning asosi bo’lgan fizik qonuniyatlarni o’rganishimiz kerak.




Quyida berilgan gaplar tarkibida tire tinish belgisi tushib qolgan. Gapning mazmunidan kelib chiqqan holda uning o’rnini aniqlang va gaplarni ko’chirib yozing.

1. Fazo haqidagi tasavvurlarimizni faqat matematik ko’rinishda sonlar bilan ifodalashimiz mumkin.
2. Doskaga bo’r bilan chizilganda, avtomobil qorli yo’lda yurganda, osmondagи tosh bo’lagi meteor atmosferadan o’tganda, iz qoldiradi.
3. Maydonda tinch turgan to’pga boshqa jism futbolchining oyog’i ta’sir etmaguncha, u o’zining tinch holatini saqlaydi.
4. Tezlanish vaqt birligida jism tezligining o’zgarishiga son jihatdan teng keladigan kattalik.





Rasmlardagi holatlarni fizik qonuniyatlar asosida tahlil qiling. Holatlarni izohlab kichik matn yozing. Fizik olimlarday fikrlashga harakat qiling.



Matn tarkibidan fizika faniga xos bo'lgan atamalarni aniqlab, yozing. Ularni o'z bilimlaringiz asosida davom ettiring.



Fizik qonuniyatlar bilan bog'liq bo'lgan va barcha bilishi muhim bo'lgan 5 ta qoida yozing. Bunda uyushiq bo'laklar, izohlash ma'nosidagi bo'laklardan, tire va vergulning qo'llanilish qoidalariidan foydalaning.



Savol-javoblarni o'qing. Issiq havo uchun kiyim tanlashda fizikaga doir bilimlarning naqadar muhim ekanini mulohaza qiling.

Savol: cho'l safariga qanday kiyingan ma'qul?

Javob: avvalo, qizib ketmaslik uchun tabiiy tolalardan tayyorlangan kiyim kiyish kerak. Chunki tabiiy tolalar o'zida ko'p miqdorda havoni saqlab turadi. Kunduzi cho'lda havo harorati tana haroratidan baland bo'ladi va bu issiqlik tanaga o'tadi. Tabiiy matolardan tikilgan kiyimlar orasidagi havo esa issiqlikni kam o'tkazadi, natijada tana qizib ketishining oldi olinadi. Shuning uchun ham cho'lda tabiiy matodan qavat-qavat kiyim kiyib yurish maqsadga muvofiqdir.



Tasavvur qiling, siz Everest cho'qqisini zabit etishga otlandingiz. Sizga nimalar kerak bo'ladi?



Rasmdagi narsalarning qaysilarini tog' safari uchun olasiz? O'z tanlovingizni fizikaga doir bilimlar bilan asoslab, matn yozing.



Yozgan matningizda quyidagi savollarning javobi bo'lishi kerak:

- Nega ayrim narsalarni tog' cho'qqisiga olib borib bo'lmaydi? Fizikaga tayanib aytganda, ular nega befoyda?
- Siz tanlagan narsalar tog'da nima uchun kerak bo'ladi? Ular nimasi bilan foya keltiradi?
- Siz yana nimalarni o'zingiz bilan olasiz, ular nega kerak bo'ladi?



Tuzgan matningizni partadoshingizga bering, partadoshingiz uni o'qisin. Ustozingiz bilan birgalikda xatolar ustida ishlang.




Berilgan fizik qoida bilan bog'liq hayotiy misollar qidiring. Topgan misollaringiz asosida hayotiy qoidalari yozing.

Fizik qoida

Deformatsiya deb tashqi kuch ta'sirida jismlar shakli va o'lchamining o'zgarishiga aytildi.





ELEKTROMOBIL

Bu mavzuda o'rganamiz

- kamxarj, ekologik bezarar avtomobillar
- qisqartma so'zlar imlosi
- qisqartma so'zlarni hosil qilish
- kelishik shakllari
- belgili va belgisiz qo'llanadigan kelishik shakllari.



1. Sizningcha, "elektromobil" so'zining ma'nosi nima?
2. Avtomobil va elektromobil o'rtasida qanday farq bo'lishi mumkin?




Ushbu chizmani xattaxtada to'ldiring.


avtomobil

elektromobil



Avtomobil qismlari qanday atalishini bilasizmi? Quyidagi so'zlarni kerakli o'rnlarga qo'yib o'qing.





bumper fara shina g'ildirak rul davlat raqami
 oyna artkich tutun trubinasi tormoz chirog'i yukxona
 yonko'zgu oldoyna yonoyna eshik kapot



Audiomatnni tinglang. Savollarga javob bering.

1. Nega ushbu hikoya "Syurpriz" deb nomlangan?
2. "Bugun Salimning kuni emas edi", deganda nima nazarda tutilmoxda?
3. Sizningcha, baxtsiz hodisaning sababchisi kim?
4. Hikoya kimning tilidan so'zlangan?



Hukmlarning to'g'ri yoki noto'g'ri ekanini aniqlang. To'g'ri hukmlarni ko'chiring.

Salim hovlida yashaydi.

Salim Akbar ustani anchadan beri kuzatib yurgan edi.

Akbar usta mashinani buzib qo'ygan edi.

"Malibu"ning tormozi ishlamay qoldi.

Akbar usta "Malibu" o'g'irlangan haqida militsiyaga xabar bergen edi.

Mashinani olib qochish juda oson kechdi.

Ichki ishlar bo'limi mashinasi o'g'irlangan "Malibu"ni quvib kelayotgan edi.

Salim qizil chiroqda to'xtashni istamadi.



Hikoya voqealari davomida qanday qoidalar buzildi? Daftaringizga yozing.



"Kelajakdagи avtomobilim" mavzusida matn yozing. Matnda quyidagilar aks etishi lozim:

- avtomobilning nomi
- avtomobilning xususiyatlari
- nega aynan shunday avtomobil xohlashingiz



1. Avtomobilning yana qanday qismlarini bilasiz? Ularning nomini aytинг.
2. Elektromobil va avtomobilning qaysi jihozlarida farq bo'lishi mumkin?



Matnni o'qing. Savollarga javob bering.

ELEKTROMOBIL O'ZI NIMA?

Odamlar manzilini yaqin qiluvchi avtomobil bugun yanada rivojlanib, ko'p qulayliklarni o'zida jamlamoqda. Kun sayin qiziqish va ehtiyoj ortib borayotgan elektromobillar o'zi qanday qulayliklarga ega? Benzin yo gazda yuradigan mashinalardan ko'ra foydaliroqmi yoki uni quvvatlash ham muammoli masalami?

Elektromobil o'zi nima?


Elektromobil – ichki yonuv dvigateli bilan emas, mustaqil energiya manbai bilan ishlaydigan, bir yoki bir nechta elektr dvigatellari tomonidan boshqariladigan avtomobildir. U shaharda foydalanishga qulay, odatiy avtomobil turlariga qaraganda ancha yengillashtirilgan. Akkumulyatorlari almashtirishga mo'ljallangan holda yaratiladi. Elektromobil ishqibozlari uning tabiatga zarar yetkazmasligi, ya'ni o'zidan zaharli gazlar chiqarmasligini asosiy ustunlik deb biladilar.

Elektromobillarning boshqa transport vositalaridan farqlari:

- elektromobillar odatiy avtomobilarga nisbatan kamxarj;
- yo'llarda deyarli ovoz chiqarmay harakatlanadi;
- motor moyi sarflamaydi;
- elektromobil rekuperativ tormozidan o'zining elektron akkumulyatorini qayta quvvatlash uchun foydalanishi mumkin;
- elektroenergiya ishlab chiqaruvchi amortizatorlaridan ham qayta quvvatlash uchun foydalanishi mumkin.



O'zbekistonga import qilingan elektromobillar soni



O'zini o'zi quvvatlash nima?

Elektromobil yurgan paytga o'zini o'zi quvvatlaydi. Bilasiz, mashina yurishi uchun gaz bosiladi. Ma'lum tezlikka yetgach esa, gazni vaqtincha qo'yib yuborish mumkin. O'zini o'zi quvvatlash jarayoni ayni shu vaqtida sodir bo'ladi, ya'ni gazdan oyog'ingizni olishingiz bilan g'ildiraklar to'xtagunicha ularning aylanishi hisobiga elektromobil quvvat oladi.

Elektromobilning kamxarjligi nimada?

Elektromobillar odatda to'liq quvvatlangandan so'ng 250 km yo'l bosadi. Buncha yurishga ketadigan quvvat esa 47 kW. Agar elektromobilni uy sharoitida quvvatlasangiz, 47 kW uchun o'rtacha 14 000 so'm sarflaysiz. Shuncha masofa bosib o'tish uchun o'rtacha 35 litr benzin sarflanadi. Uning narxi esa 240 000 so'mga borib qoladi.

Elektromobillar ekologik toza, ichida yonuv dvigateli o'rniiga elektrodvigatel bo'lGANI



uchun o'zidan zaharli havo, karbonat angidrid chiqarmaydi, yonilg'i tejashga imkon beradi. Tashqaridan havoni faqat konditsiyalash maqsadida yutadi.

Mashina saloniga filtr orqali toza havo kiradi. Shovqinsiz harakatlanishi, boshqarishdan oldin qizdirishga to'g'ri kelmasligi – uning qo'shimcha qulayliklari sifatida ko'rildi.

Muammolar nimada?

Mutaxassis muammo sifatida quvvatlashga ketadigan uzoqroq vaqt ni ko'rsatishini aytdi. Bu, albatta, foydalanayotgan stansiyangiz qancha tok berishiga bog'liq. Quvvatlash stansiyalari ham hali yetarli emas.

220 voltli stansiyalar uylarga o'rnatilganida foydalanuvchi mashinani kechasi – foydalanishga zarurat bo'lmaydigan vaqtida quvvatga qo'yishi maqsadga muvofiq. Chunki mashina 8 soatdan 10 soatgacha 0 dan 100 foizgacha to'liq quvvatlanadi.

Agar kunlik yuriladigan kilometrlar kamroq bo'lib, mashina quvvati tugamagan bo'lsa, uni 220 volt kuchlanishli stansiyada 3–4 soatda ham to'ldirish mumkin.

Elektromobilarning ehtiyyot qismlari ham biroz muammoli masala. Bu ularning bizda boshqa davlatlarga nisbatan endi ommalashayotgani, yangilik bo'layotgani bilan bog'liq. Shuning uchun buni vaqtinchalik muammo desak, xato bo'lmaydi.

Muqaddas Musayeva



1. O'zbekistonga import qilingan elektromobillar sonini yillar kesimida aytib bering.
2. O'zini o'zi quvvatlash jarayonini qanday tushundingiz? Aytib bering.
3. Elektromobilning qulaylik tomonlarini sanang.
4. Elektromobilning ekologiyaga qanday foydasi bor? Zarari ham bor deb o'ylaysizmi?
5. Elektromobillar bilan bog'liq ikkita maummoni tushuntirib bering.



Matnda ostiga chizilgan so'zlarga diqqat qiling. Tushib qolgan kelishik qo'shimchasini o'z joyiga tiklab, birikmalarni yozing.



Ba'zan qaratqich va tushum kelishiklari qo'shimchasi yozuvda tushib qoladi, lekin ular doim o'z ma'nosini saqlab qolgan bo'ladi. Ana shunday holatlar uchun *belgisiz qo'llanish* atamasi ishlataladi.

Kelishik qo'shimchasi matnda ko'rinish turgan bo'lsa, belgili, ko'rinnmayotgan bo'lsa, belgisiz qo'llangan bo'ladi.

Qaratqich kelishigi qo'shimchasini olgan so'z o'zi bog'langan so'z bilan ketma-ket kelganda kelishik qo'shimchasi tushib qolishi mumkin: **sinfning** jurnali – *sinf jurnali*; **maktabimizning** hovlisi – *maktabimiz hovlisi*.

Tushum kelishigi qo'shimchasini olgan so'z ham o'zi bog'langan so'z bilan ketma-ket kelganda kelishik qo'shimchasi tushib qolishi mumkin: **ovqatni** yemoq – *ovqat yemoq*; **uyni** buzmoq – *uy buzmoq*.

Agar kelishik qo'shimchasini olgan so'z va u bog'langan so'z orasida boshqa bir so'z qo'llansa, kelishiklar albatta belgili qo'llanadi:

sinf jurnali – **sinf yangi jurnali** – *sinfning yangi jurnali*;

ovqat yemoq – **ovqat tez yemoq** – *ovqatni tez yemoq*.



Qaratqich va tushum kelishigining belgili va belgisiz qo'llanishiga 4 tadan misol yozing.



Quyidagi gaplarni o'qing. Mazmunini tahlil qiling. Qaratqich va tushum kelishiklarini belgili qo'llash shart bo'lgan o'rinalar haqida qoida yozing.

Akmal kitobi uyda qolgan ekan.

Akmalning kitobi uyda qolgan ekan.

Komila kitob o'qish foydasi haqida bilib oldi.

Komila kitob o'qish**ning** foydasi haqida bilib oldi.

Sojida o'z ruchkasini partadoshiga berib turdi.

Sojida o'zin**ning** ruchkasini partadoshiga berib turdi.

U sumkasida onasi solib qo'ygan tushlik bor edi.

Uning sumkasida onasi solib qo'ygan tushlik bor edi.

O'qituvchi hovlida o'ynab yurgan Sobir chaqirdi.

O'qituvchi hovlida o'ynab yurgan **Sobirni** chaqirdi.

Men kecha Asila ko'rdim.

Men kecha **Asilani** ko'rdim.

Asila o'yinni to'xtatdi-yu, u yetaklab ketdi.

Asila o'yinni to'xtatdi-yu, **uni** yetaklab ketdi.




1. Grafik chizmalar deganda nimani tushunasiz?

2. Grafik chizmalar bizga nima uchun kerak?



Berilgan grafikka qarang. Ko'rsatilgan qismrlarning nomini toping.

- 1 nom
- 2 kalit
- 3 vertikal o'q
- 4 gorizontal o'q
- 5 gorizontal o'zgaruvchi
- 6 vertikal o'zgaruvchi



Grafik asosida quyidagi hukmlarning to'g'ri yoki noto'g'ri ekanini aniqlang.

Grafik 4 yil davomida sotilgan elektromobillarning xaridorlari orasida erkaklar va ayollarning ulushi qanchaligini ko'rsatadi.

Gorizontal o'q sotilgan avtomobillar sonini ko'rsatadi.

Vertikal o'q foizlarni ko'rsatadi va har darajada 10% ga o'sadi.

Sariq o'q ayollar ulushini ifoda etadi.

Grafikda faqat o'sish haqida ma'lumotlar bor.

Tanlangan davr mobaynidagi savdolarda erkaklarning ulushi doim ko'p.

Ayollar ulushida keskin o'sish kuzatilmaydi.

Oxirgi 2 yilning xulosasi bir-biriga yaqin.




Bo'sh o'rnlarga muqobil so'zlardan birini qo'yib, matnni o'qing.

Grafik 2018-yildan 2021-yilgacha bo'lgan vaqt oralig'ida sotilgan elektromobillarning xaridori orasida qaysi jins vakillari qanday ulushda ishtirok etganini (1) (2) ... o'q yillarni, (3)... o'q esa foizlarni ifodalaydi. Grafikda bir qarashda erkaklar ulushi (4) ... borayotgandek ko'rindi, ammo bu erkaklar kamroq elektromobil sotib olayotganini anglatmaydi. Aksincha, elektromobillar sotuvi yil sayin o'sib bormoqda. Grafik esa sotilgan elektromobillarning necha foizini ayollar, necha foizini erkaklar sotib olganini ko'rsatadi. (5)... ikki yil orasidagi farq unchalik katta emas – 10% ni tashkil etadi, lekin (6)...-yilda ayollarning ulushi keskin oshganini ko'rishimiz mumkin. Keyingi yilda esa o'tgan 2020-yilgi natija deyarli takrorlangan. Ushbu yilda ayollar ulushining o'sishini 3% deb ko'rsatish mumkin.




1	2	3	4	5	6
belgilaydi	gorizontal	gorizontal	o'sib	dastlabki	2021
ko'rsatadi	vertikal	vertikal	kamayib	boshidagi	2020
asoslaydi				so'nggi	
tushuntiradi				oxirgi	



Ushbu grafikni tavsiflab matn yozing.



O'zingiz istagan mavzuda grafik tayyorlang. Quyidagi shakklardan birini tanlashingiz mumkin. Grafikni og'zaki tushuntirib berishga tayyorlaning.



Tayyorlab kelgan grafigingizni og'zaki tushuntirib bering. Xato va kamchiliklaringizni to'g'rilang.

Boshqalarning nutqiga diqqat qiling. Tushunmagan o'rirlaringizda savol bering.



MUSTAHKAMLASH



1. Oxirgi ikkita mavzuda nimalarni o'rgandingiz? Nimalar yodingizda qoldi?
2. Qaysi holatlarda vergul qo'yilishi shartligi yodingizdam?



Qaratqich kelishigining belgili va belgisiz qo'llanishi haqida savol tuzib, sinfdoshlaringizga bering. Javoblarni izohlang.



Quyidagi gaplardan qaysi birida tushum kelishigini belgisiz qo'llash mumkin? Nega? Qaysi gaplarda tushum kelishigini belgili qo'llash shart? Nega? Gaplarni yozing.

Bozorda Salima... ko'rdik.

Bozorda handalak... ko'rdik.

Sinfdoshlari Akmal... ko'rgani keldi.

Akmal sinfdoshlariga ovqat... tutdi.

Jobir to'yib ovqat... yedi.

Jobir ovqat... to'yib yedi.

Biz u... ko'rishga bordik.

Biz yo'lbars ... ko'rishga bordik.

Bobomlarnikida hashar – hamma uy... qurishga kelyapti.

Uy ... bir haftada qurib bo'ldik.



Quyidagi gaplarda vergulning ishlatalishiga diqqat qiling. Vergul uyushiq bo'laklar orasida qo'llangan gaplarni ko'chiring.

1. Kitob, qalam, ruchka, daftar – menimcha, hammasini oldim.
2. Baland bo'yli, uzun sochlari yelkasiga tushgan, atlas ishton kiyib olgan chet ellik sayyoh yigitni ko'rganimda kulishdan o'zimni zo'rg'a tiyib turdim.
3. O'qituvchi sekin, ammo vahimali ohangda gapira boshladi.
4. "Ustoz, siz ham matabda o'qiganmisiz?" – deb qoldi bir o'quvchim.
5. Mehmonlar oldiga ikkita non, bir choynak choy, ikkita piyoladan boshqa hech narsa qo'ya olmadim.
6. O'ylab qarasam, hamma narsam bor ekan, nolishga umuman haqqim yo'q.
7. Fizika, kimyo, biologiya, astronomiya kabi fanlar menga umuman qiziq emas edi.



"Karim matabga otlandi" mavzusida kichik matn tuzing. Uyushiq bo'laklardan foydalaning.



O'QING VA MULOHAZA QILING

"TAYYOR"DAGI "TAYR"




"Tayr" so'zi tilimiz tarixida "qush" ma'nosini anglatgan. Bu so'zning tub ildizi "uchish" mazmunini ifodalagan. Alisher Navoiyning "Lison ut-tayr", ya'ni "Qush tili" degan mashhur dostoni bor. Xo'sh, shakl jihatidan bir-biriga yaqin bo'lgan "tayr" va "tayyor" so'zlari o'rtaida qanday yaqinlik bor? Gap shundaki, biror ishga hozirlanib, shay turish mazmunida keladigan "tayyor" so'zining tub ildizi "uchadigan", "uchuvchan" degan ma'noni bildiradi.

"SURBET"NING SURLIGI

Tilimizda "surbet" so'zi yuzi qattiq, gap kor qilmaydigan, orsiz kimsalarga nisbatan qo'llanadi. Xo'sh, nega ularni "surbet" deymiz? "Surbet" so'zining o'zagi "sur" so'zi dudlab yoki osib quritib qo'yilgan, qoqlangan go'sht mazmunini ifodalab keladi. Bunday go'sht uzoq vaqt quyoshda qurib, shamolda qotib, juda qattiq bo'lib qoladi. Sur go'sht, sur baliq birikmalari bor. Yuzi qattiq, uyatsiz kimsalarni "surbet" deyish shundan kelib chiqqan.

*Eshqobil Shukur,
"Boboso'z izidan"*





TUTILMAY GAPIRAMAN

Bu mavzuda o'rganamiz


- chiroqli va mazmunli nutq so'zlash • ravon so'zlash • taqdimot tayyorlash • talaffuz qoidalari • gap urg'usi • egalik shakllari.

1. Odatda og'zaki fikr ifodalashda qanday qiyinchiliklarga duch kelasiz?

2. Ravon nutq qanday bo'ladi?



Rasmlar asosida savollarga javob bering.





1. Nima deb o'ylaysiz, siz kamera oldida so'zlashga tayyormisiz? Hayotingiz davomida bunday holatni boshingizdan o'tkazganmisiz yoki bu jarayonni kuzatganmisiz?
2. 2-rasmni izohlang. Hammaning e'tiborini o'ziga jalb etish va ta'sirli nutq so'zlash uchun nima qilish kerak?
3. 3-rasmda qanday holat tasvirlangan? Birinchi va ikkinchi so'zlovchining holatini tushuntiring.
4. 4-rasmdagi holatni izohlang. Shu holatning aksi qanday bo'lishi mumkin?
5. Jamoat joylarida va omma oldida so'zlashning o'zaro yaqinlar va oila a'zolari bilan suhbatlashishdan qanday farqi bor? Bunda nimalarga e'tibor berish kerak?



Sinfdoshlaringiz og'zaki nutqda qanday kamchiliklarga yo'l qo'yishadi? Yozing.

- *juda tez gapirishadi;*
- ...



Matnni o'qing va savollarga javob bering.

Ayrim bolalar o'ta tortinchoq bo'lib, ko'pchilik orasida so'zlashdan, fikrlari atrofdagilar tomonidan qabul qilinmay, izza bo'lishdan cho'chishadi. Ular **doskaga** chiqarilganda yoki tug'ilgan kunda tabrik uchun so'z berilganda terlab ketishadi. Lom-mim deyolmay, hatto yig'lab yuboradigan tengdoshlarimiz ham bor. Bu holat ilmiy tilda peyrofobiya deb ataladi. Xatolarimiz uchun ko'ishlaridan, do'stlarimiz oldida kamchiliklarimizni aytib tanqid

qilishlaridan, keyin ustimizdan kulib yurishlaridan hadiksirash esa atixifobiya deyiladi. O'z xohish-istiklarini, fikrini boshqalarga ayta olmaydigan bolalarda aybdorlik va nuqsonlilik **komplekslari** kuchli rivojlangan bo'ladi. Agar siz o'zingizda shunday qo'rquv alomatlarini payqagan bo'lsangiz, darhol kundalik tuting. Unga fikrlaringizni yozib, eng yaqin do'stingizga bering va mulohazalarini sizga aytib borishini iltimos qiling. Unutmang, o'z fikringizni ochiq bayon etish huquqingiz bor. Garchi uni qabul qilmasalar ham, o'z ovozingiz, o'rningiz borligini bildirib qo'ying.

Umida Sadatova





1. Peyrofobiya yoki atixifobiya kasalliklari haqida nimalarni bilib oldingiz?
2. O'zingizda ushbu kasallikning alomatlari bor deb hisoblaysizmi? Qachon, qanday vaziyatlarda shunday hissiyotlarni boshingizdan o'tkazganingiz haqida gapirib bering.
3. Ushbu kasalliklarning oldini olishda muallif tavsiyasi qay darajada yordam berishi mumkin? Sizda ham bu borada takliflar bormi?
4. Matnda ajratib ko'rsatilgan so'zlarning tilimizda muqobili bormi? Javobingizni izohlang.



Matn asosida gaplarning kesimini aniqlab, yozing. Undan oldin kelgan so'zlarni alohida ohang bilan qayta o'qib ko'ring.

Ular doskaga chiqarilganda yoki tug'ilgan kunda tabrik uchun so'z berilganda **terlab ketishadi**.



Gap tarkibidagi bo'laklardan birining boshqalariga nisbatan kuchliroq, ta'kidlab talaffuz qilinishiga **gap urg'usi** yoki **mantiqiy urg'u** deyiladi. Gap urg'usi gapda e'tibor qaratilayotgan asosiy jihatni aniqlab beradi.

Sojida birinchi o'rinni oldi. ("boshqa kishi emas, aynan Sojida")

Sojida **birinchi** o'rinni oldi. ("boshqa o'rinni emas, aynan birinchi o'rinni")

Og'zaki nutqda gap urg'usining o'rni erkin. Biroq yozuvda o'quvchiga tushunarli bo'lishi uchun gap urg'usini olgan bo'lak kesimidan bitta oldin joylashgani ma'qul.

Sojida teatrga **kecha** borgan edi. (qachon borgani)

Sojida kecha **teatrga** borgan edi. (qayerga borgani)

Notiqlik (ritorika)da gap urg'usi muhim vosita sanaladi. Notiqning eng katta quroli bu – so'z va ohang.



Muhokama uchun savol. Yod olgan she'ringizdan to'rt-sakkiz qatorini o'qing. Qaysi bo'lak ta'kidlab o'qilishiga e'tibor qarating. Ayting-chi, she'rlarda oddiy gaplardan farqli ravishda gap urg'usi qanday bo'laklarga tushadi?



Omma oldida nutq so'zlashga tayyorgarlik ko'rish bilan bog'liq 5 ta tavsiya yozing.

Namuna Nutqingizni qat'iy ohangda va o'zingizga ishonch bilan boshlang.



Gap urg'usi haqidagi qoidaga amal qilgan holda quyida berilgan matnni audio shaklida yozing. Nutqingizni qayta-qayta eshitib ko'ring. Eshitish jarayonida yondaftarchangizga qanday kamchiliklarga yo'l qo'yaningizni belgilab boring.

Do'stim Ahmad!

"Bir-birimiz bilan tez-tez xat yozishib turamiz", – deb va'dalashgan edik. Negadir o'shanda menga unchalik ishonqiramovding... Zaynab, sen: "Anqarada o'zingga yangi o'rtoqlar topgach, bizlarni esdan chiqarib yuborasan", – degan eding.

*Mana, so'zimning ustidan chiqyapman.
Demak, sizlarni unutmabman.*

Anqaraga ko'chib kelganimizga bir hafta bo'ldi. Yangi uyga joylashib ham oldik. Senga ilgariroq xat yozishning iloji bo'lindi.

Chunki yangi mакtabga endi qatnay boshladim. Yangi manzilimizni ham kuni kecha dadamdan bilib oldim. Xat yozishni sendan boshlayapman.

To'g'risini aytganda, o'qishlar avji qizib turganida maktabni tashlab, Istanbuldan chiqib ketishga hecham ko'nglim bo'lmovdi, ham sinfdosh o'rtoqlarimga o'rganib qolgan edim. Axir to'rt yildan ko'p birga o'qidik-da. Ammo ilojim qancha, dadam Anqaraga yangi ishga o'tdi. Uy ichi bilan ko'chib keldik. Yaqin og'aynilari dadamga Anqaradan yaxshiroq ish topib berishdi, bu haqda senga Istanbulda ham aytgan edim. Dadam uchta sinfdosh o'rtog'i bilan hozir bir firmada ishlayapti. Uchovi ham oilasi bilan bir binoda turisharkan. Ular dadamga ham ish, ham shu binodan bo'sh uy topib qo'yishibdi. Dadamning o'rtoqlari ham bola-chaqali ekan. Bir binoda to'qqiz bola bo'lib qoldik. Yoshlarimiz har xil. Beshtamiz bitta maktabga qatnaymiz. O'zim tengi bir bola bilan bir sinfda o'qiyapman. Ukam Metin yangi mакtabdan, yangi o'rtoqlaridan yotsirab yuribdi. Men bo'lsam hammasiga darrov ko'nikib ketdim.

Hayotda ro'y beradigan muhim voqealar haqida yozib turishga kelishib olgan edik. Yangi uy, yangi mакtab, yangi o'rtoqlar – bular mening hayotimda muhim gap bo'ldi. Hammasi shu, boshqa yangiliklar yo'q.

Istanbuldagи sinfdosh o'rtoqlarimni juda tez sog'inib qoldim. Sizlar bilan qachon va qayerda ko'rishamiz endi?

Menga o'xshab sen ham bergan so'zingning ustidan chiqasan deb ishonaman. O'rtoqlarning hammasiga mendan salom aytib qo'y. Hammangizga muvaffaqiyat tilayman.

Sinfdoshing Zaynab Yolqir

Aziz Nesin, "G'aroyib bolalar" asaridan



Matnni o'qing va savollarga javob bering.

* * *

Chiqish qo'ng'irog'i chalinganda Hasan sinf **jurnalini** yopayotgan ustozining oldiga keldi-da, astagina pichirladi:

- Dildora opa, "O'qish"dan bergan **vazifangizni** tayyorlab keldim. Iltimos, hozir so'rang.
- Tayyorlangan bo'lsang, darsda so'ray qolay. Hozir tanaffus, dars boshlanishi bilan birinchi bo'lib sendan so'rayman.
- Ustoz, oyim ham iltimos qildilar. Akam ko'pchilikning oldida uyaladi, gapi esidan chiqib ketadi, – dedi ularning suhbatiga quloq solib turgan Zuhra.
- Tushunarli, lekin seni darsga yaxshi tayyorgarlik ko'rib kelgанинги, shuning uchun yaxshi baho olганнингни sinfdoshlarинг ko'rishi kerak-ku!

Hasan indamay yerga qaradi.

- Ha, mayli, unda o'zingga yoqqan, tanaffusda o'ynaydigan o'rtoqlaringни ayt-chi, – Hasanga sinovchan tikildi Dildora opa.

– Hojiakbar bilan Iroda.

– Yaxshi. Zuhra, bor, ularni chaqirib kel.

Zuhra tashqariga yugurdi... Aytigan o'quvchilar kelishgach, Hasan doska yoniga bordi. Ko'zlarini chirt yumib, Tolib Yo'loshning "Mohir qo'llar qo'shig'i" she'rini to'xtamasdan aytdi. Keyin ko'zini ochdi-da, "bo'ldi", degandek chuqur nafas oldi. O'rtoqlari chapak chalib yuborishdi.

- Ayting-chi, bolalar, Hasan she'rni qanday aytib berdi?
- Zo'r, juda yaxshi aytib berdi, – deyishdi sinfdoshlari.
- Ana, ko'rdingmi, ko'pchilikning oldida she'r aytishning hech qanday qo'rinchli joyi yo'q ekan. Qara, do'stlaring qanday xursand bo'lishdi. Shunday chiroyli javob bersang, hech qaysi sinfdoshing ustingdan kulmaydi, aksincha, sevinadi. Men senga bir shart bilan "besh" baho qo'yaman. Keyingi safar ko'zingni yummashdan, barcha sinfdoshlarинг oldida javob berasan, kelishdikmi?

Hasan cho'chibgina bosh irg'adi.

Muhabbat Hamidova



1. Hasanning ustozi – Dildora opaning harakatlarini tushuntirishga harakat qiling. Uning maqsadi nima edi?
2. Hasanning doskadagi holati tasviri berilgan jumlalarni qayta o'qing. Hikoya muallifi bu tasvir orqali nima demoqchi?
3. Hikoya qahramoni Hasan qanday bola? Uning bunday fe'l-atvori yaxshimi yoki yomon? Javobingizni izohlang.
4. Siz-chi, siz ham doskada javob berayotganingizda o'zingizni shunday his qilasizmi? Bu jarayonda o'zingizni qanday his qilishingiz haqida gapirib bering.
5. Matnga qanday sarlavha qo'yish mumkinligi haqida o'ylab ko'ring. O'z taklifingizni bering.



Hasan ko'zlarini chirt yumib, Tolib Yo'ldoshning "Mohir qo'llar qo'shig'i" she'rini to'xtamasdan aytganida uning atrofida kimlar borligini yozing. Bosh harflar imlosiga rioya qiling.

Matnda ajratilgan so'zlar qaysi so'zga tobelanib kelganini aniqlang va namunadagidek yozing.

Namuna *mening oyim, ...*



"Kim ifodali o'qiy oladi?" musobaqasi

- 1** Qayd yozish uchun bir nechta qog'oz parchasini tayyorlab oling.



- 3** Bir-biringizning nutqingizni kuzating, kamchilik va yutuqlarni qayd etib boring.

- 2** Matnni hikoya qahramonlarining holatiga tushib, rollarga bo'linib o'qing.

- 4** Qaydlaringizni nutq egasiga bering.



Tanishgan matningiz asosida audiomatn tayyorlang. E'tibor bering, hikoyadagi muallif hamda boshqa qahramonlar rolini o'zingiz ijro etishingiz lozim.



1. Audiomatn tayyorlash jarayonining sizga yoqqan va yoqmagan jihatlari haqida gapiring.
2. Bu mashg'ulot og'zaki nutqingizni rivojlantirishga xizmat qila oladimi? Javobingizni izohlang.
3. Nutqni ravon qilish uchun yana qanday mashqlar zarur deb o'ylaysiz?



Quyidagi qo'shimchalar bilan tanishing, ular egalik shakllari hisoblanadi. Oldingi darsda tanishilgan matndan aynan shu qo'shimchalar mavjud bo'lgan so'zlarni aniqlang va ko'chiring.

Shaxs	Birlik	Ko'plik
I shaxs	ona+m, nutq+im	ona+miz, nutq+imiz
II shaxs	ona+ng, nutq+ing	ona+ngiz, nutq+ingiz
III shaxs	ona+si, nutq+i	ona+si, nutq+(lar)i





Egalik shakli shaxs, narsa, voqeа-hodisa, о'rin-joyning qaysi shaxs va songa tegishli ekanini bildiradi. Masalan, *mening nutqim*, *sening ovozing*, *sizning muvaffaqiyatlarингиз*.

Fe'l shakllariga qо'shilgan egalik qо'shimchalari bajaruvchining shaxsi va soni haqidagi ma'lumot beradi. Masalan: *o'qiganim* *o'zimga foyda*.



Berilgan so'zlarga egalik qо'shimchasini qо'shib, o'zi bog'lanib kelishi mumkin bo'lgan so'zlar bilan birgalikda yozing.

Namuna so'z+i: otamning so'zi; yutuq+i: do'stimning yutug'i (yutuqi emas!).

gap

og'iz

xato

ovozi

hayajon

yutuq



Tilak, so'roq, yoshlik singari so'zlarga egalik qо'shimchasi qо'shilganda ko'p hollarda asosning oxirgi k, q tovushi g va g' tarzida talaffuz qilinadi va shunday yoziladi: *tilagi*, *so'rog'i*, *yoshligi* kabi.

Bo'g'iz, o'g'il kabi ikkinchi bo'g'inida i unlisi ishtirok etgan aksariyat so'zlarga egalik qо'shimchasi qо'shilganda o'sha i unlisi tushib qoladi va shunday yoziladi: *bo'g'zi*, *o'g'li* kabi.

Nutq, erk, axloq, huquq, idrok, ishtirok singari ayrim so'zlarga egalik qо'shimchalari qо'shilganda asosda hech qanday o'zgarish bo'lmaydi. Buni tallafuzdan ham bilib olish mumkin.



Partadoshingiz bilan viloyat, shahar, tuman, korxona, muassasa, istirohat bog'larining nomini yozib chiqing.

Toshkent shahri, "Ashxobod" bog'i.



Aiting-chi, ulardagi -i egalik qо'shimchasi qarashlilikni bildiryaptimi?



Ba'zan III shaxs egalik qо'shimchasi qarashlilikni emas, **xoslik** ma'nosini ifodalab keladi. Bunda oldingi so'z bosh kelishikda qо'llanadi, -ning qо'yib bo'lmaydi.

Navoiy viloyati (Navoiyning viloyati emas, Navoiy nomli viloyat), futbol o'yini (futbolning o'yini emas, futbol nomli o'yin), "KIA" kompaniyasi ("KIA"ning kompaniyasi emas, "KIA" nomli kompaniya)



Berilgan so'zlarning talaffuzi hamda imlosiga e'tibor bering. To'g'ri deb hisoblaganlaringizni ko'chirib oling.

o'rtoqim

o'rtog'im

shaharim

shahrim

istakim

istagim

og'zim

og'izim

o'rnim

o'rnim

idrogim

idrokim

ko'nglim

ko'ngilim

yurakim

yuragim



Sinfdoshlaringiz tayyorlab kelgan audiomatnlarni tinglang. Ularni tahlil qilishda faol ishtirok eting.



Havola orqali "Yosh kitobxon" tanlovi ishtirokchilarining televideniyedagi chiqishlarini kuzating. Ularning nutqiga munosabatingizni yozing. Matningizda kimning nutqini kuzatganingiz, u so'zlagan nutqning sizga yoqqan tomonlari hamda kamchiliklari haqida dalillar to'plang. Munosabatingizni gapirib berishga tayyorlaning.



Uyda tahlil qilgan nutqingiz yuzasidan o'z munosabatingizni bildiring. Quyidagilarga rioxva qiling:

Kimning nutqini tahlil qilganingiz
(ishtirokchi haqidagi ma'lumotlar).

Ishtirokchining nutqidagi kamchiliklar.

Ishtirokchining nutqidagi yutuqlar.

Taklif va tavsiyalaringiz hamda yakuniy xulosangiz.

"Yosh kitobxon" – 2022-yilgi mavsum | 10–14 yosh toifasi | 1-shart

**YOSH
KITOBXON**


**RESPUBLIKA BOSQICHI
10–14 YOSH**



1. Ayting-chi, sizga ko'proq qaysi ishtirokchining nutqi yoqdi? Aynan qaysi jihatlari?
2. Ko'p kitob o'qish og'zaki nutqimizning ravon bo'lishiga yordam beradimi? Javobingizni izohlang.



Nutqingizdagagi kamchiliklar ustida ishlang. O'zingiz yoqtirgan suxandon, radioboshlovchi yoki jurnalistning nutqini kuzating. Unutmang, nutqiy ravonlikka tinimsiz mashqlar orqali erishiladi.




YOZUVCHI BO'LISH OSONMI?

Bu mavzuda o'rganamiz

- badiiy ijod, badiiy uslub • yozuvchilik sirlari • matn tuzish • ko'chma ma'noli so'zlar • iboralar • tasviriy ifoda • omonimlar • hikoya yozish.



Adiblarning adabiyot va yozuvchilik haqidagi fikrlarini muhokama qiling.



Adabiyoti bo'limgan, adabiyotining **taraqqiysi**ga intilmagan va **adib**lar yetishtirmagan millat **oxiri** bir kun hissiyotdan, o'ydan, fikrdan mahrum qolib, sekin-sekin inqirozga yuz tutadi.

Abdulhamid Cholpon




Adabiyot atomdan kuchli, **lekin** uning **kuchini** o'tin yorishga **surf qilish** kerak emas.

Abdulla Qahhor




Yozuvchi sayoz joyda cho'kadi.

Asqad Muxtor



Odamlarni, umuman, o'quvchini halollikka, imonga, diyonatga chorlagan ijodkorning o'zi halol, imonli bo'lishi kerak. Aks holda, uning yozganlari yolg'on bo'ladi. Hech kim ishonmaydi.

Odil Yoqubov



Erkin A'zam



1. Ayting-chi, hissiyotdan, o'ydan, fikrdan mahrum millat qanday bo'ladi? Millat uchun buning oqibati qanday? Madaniy bahs yuriting.
2. Qahhor adabiyot atomdan kuchli ekanini ta'kidlagan. Adabiyot kuchini o'tin yorishga sarflash deganda nimani tushunasiz?
3. "Yozuvchi sayoz joyda cho'kadi" – Asqad Muxtor bu bilan nima demoqchi?
4. Odil Yoqubov ijodkor halol, to'g'riso'z bo'lishi kerakligiga urg'u bergen. Bu ijodda nima uchun muhim? Buning aksi bo'lgan asarlarni bilasizmi?
5. Erkin A'zam yozuvchi yangi gap aytishi kerak ekanini ta'kidlaydi. Sizningcha, asardagi yangi gap nima? U qanday bo'lishi mumkin? Qaysi ijodkorlar qaysi asarlarida yangi gap aytgan?



Birinchi va ikkinchi fikrlar tarkibida ajratib ko'rsatilgan so'zlarning ma'nodoshlarini aniqlab, ma'nodosh so'zlar qatorini hosil qiling. Fikrda nima uchun aynan shu so'zdan foydalanilganini tushuntiring.

Rivoj, xarajat qilmoq, ammo, taraqqiy, quvvat, adoq, taraqqiyot, ravnaq, darmon, yozuvchi, ket, oyoq, nihoya, pirovard, intiho, biroq, illo, kuch, mador, majol, chiqim qilmoq.



Har bir ma'nodosh so'zlar qatoridan bittadan so'z tanlang. Ular ishtirokida gaplar tuzing.



Odil Yoqubovning fikridan o'z ma'nodoshiga ega bo'lgan so'zlarni aniqlang, ularning ma'nodoshlarini yozing.





Badiiy asar matni badiiy uslubda yoziladi. Bu uslubda so'zning tasvir imkoniyatlaridan keng foydalaniladi. Odatda badiiy matn chirolyi o'xshatishlarga, ramzlarga boy bo'ladi. Shu sababli badiiy uslubning xususiyatlari haqida so'z borganda, avvalo, uning obrazliligi e'tiborga olinadi.

Ijodkor badiiy nutqda so'zning o'ziga xos qirralari, xilma-xil ma'nolari vositasida o'quvchiga estetik ta'sir o'tkazishni maqsad qiladi.

Masalan, "Har yili bir keladigan bahor sevinchi yana ko'ngillarni **qitiqlay boshladi**. Yana tabiatning dildiragan tanlariga **iliq qon yugurdi**" ("Kecha va kunduz" romanidan) parchasida ajratilgan qismlarga e'tibor qarating. Bu o'rinda yozuvchi so'zlarni ko'chma ma'noda qo'llab, o'quvchiga bahor manzaralarini o'zgacha ko'rish imkonini beradi. Ya'ni o'quvchi shunchaki bahorni emas, "ko'ngilni qitiqlayotgan" bahorni tasavvur qila boshlaydi. Eslang: qishning sovuq kunlari tugab, ko'kda quyoshning ilk nurlari chakkangiz, quloqlaringiz, iyaklaringiz ostiga tushganda tabiat sizni qitiqlaganday bo'limganmi? Balki, adib shu lahzalarni tasvirlashga uringandir.

Endi o'ylab ko'ring: "Yana tabiatning dildiragan tanlariga **iliq qon yugurdi**" deganda muallif qanday manzarani tasvirlagan bo'lishi mumkin?


Shulardan xulosa qilish mumkinki, "badiiy matn", "badiiy uslub", "badiiy nutq" deganda sizni olamga, voqeа-hodisalarga boshqacha bir nigoh bilan qarashga undaydigan, hissiy zavq ug'otadigan til (matn) tushuniladi.



Quyidagi parchada ajratib ko'rsatilgan so'zlarning ma'no nozikliklariga diqqat qiling. Ushbu so'z va birikmalarning qaysilari o'z ma'nosida, qaysilari ko'chma ma'noda qo'llanayotganini aniqlang va yozing.

Shoirlik olamidan eson-omon quvilgach, mehmonxonaning choyshab, bolish, ko'rpa singari mayda-chuydalari saqlanadigan omborida **uch kecha-yu uch kunduz** qimirlamay uxladim. Qiladigan ishim, hasratimni aytib **ko'ngil yozadigan** biron mehribon kishim yo'q edi. **O'z yog'imda o'zim qovurilib**, o'ylab, **shirin-shirin xayollar** surib yotaverdim. To'rt kun deganda o'rnimdan turib, biron ishning boshini tutguncha ermak bo'lar-ku, deya mehmonxonaning administratori, **qoshi mushukning dumiga o'xshaydigan** E'tibor Umarovadan o'ch olishga tushdim. Nega desangiz, bu xotin pora olishda **ustasi faranglardan**.

Xudoyberdi To'xtaboyevning
"Sariq devni minib" romanidan





Quyidagi parchani ko'chiring. Undagi badiiy tasvirni ifodalashga xizmat qilayotgan birliklarni aniqlang, shunday so'z va birikmalarning tagiga chizing.



Zebining yuzini shu tobda butun qish ichi to'planib qolgan horg'inlikning asarlari egallagan edi. Uning ikkala yuzi, ayniqsa, ko'rpaning katta-katta qavig'iga tikilgan andishalik ko'zлari hovur bosgan oynakning betiga o'xshardi. Aksincha, Saltining yuzlari charaqlagan yulduzday, sernash'a, quvnoq va har qanday andishadan yiroq bo'lib, ko'nglining chuqur burchaklaridan chiqib kelgan sevinch to'lqinlarini aks ettirardi. Shu uchun u Zebining so'ng so'zlaridagi og'ir ma'yuslikni payqay olmadi. Uning ko'zлari Zebida bo'lsa ham, nazarlari boshqa yoqlarda edi.

Cho'ponning "Kecha va kunduz" romanidan

"О'TKAN KUNLAR" YOZILGAN XONA...

Dadamning ijodxonalari o'n ikki yog'ochli, oqlangan, **kungay**, alohida tinch **uy** bo'lib, eshik, deraza, shift (toqi)lari och havorangga bo'yalgan, tokchalariga xitoyi ko'ra, lagan, samovar, choynak, guldar patnislari qator-qator **qo'yilgan**; kosa, piyola, **taqsimchalar** qavat-qavat terilgan; **taxmon**larga xonatlas ko'rpa, ko'rpacha, paryostiqlar taxlangan; uzun devorga gilam qoqilgan; yerga to'shalgan **bo'yra** ustidan katta guldar gilam **yozilgan** uy edi.



Sandal ustida dasta-dasta uzun kambar yozuv qog'ozlari, **uchlab** tayyorlangan o'nlab siyohqalamlar turar edi. Qog'oz tagiga qo'yib yozish uchun esa qora, qalin muqovali katta jurnal-daftar bo'lardi.

Dadam ijodxonalarini ozoda, tartibli bo'lishini xohlar, hatto tokchada o'rinsiz yoki qiyshiq turgan buyum ham u kishiga xalal bergandek, g'ashiga tekkandek tuyular edi.

Dadamning ijodiy ishlari sandalga o'tirgan kundan boshlab darhol silliq yurishib ketavermas edi, albatta. Sandalga tirsaklanib, qo'llarida qalam, **o'ylanib** o'tirib-o'tirib, birinchi **kun** yarim qog'oz yozsalar – yozar, bo'lmasa yo'q, o'rinalidan turib ketar va hovliga chiqib yumush qilib yurgan oyimga: "Qo'l qalamdan chiqib qolibdi", – deb kular edilar. Ammo o'zlarini zo'r lab yozuv kursiga qayta-qayta o'tiraverar, ikkinchi kun yana yarim qog'oz, uchinchi kun bir qog'oz, so'nggi kunlarda ikki, uch qog'oz... shu tariqa asta ish yurishib ketardi.

U kishi ish chog'ida go'yo tashqaridagi biror sharpaga qulq solganday, chaqnagan o'tkir ko'zlarini uzoq bir nuqtaga tikib, butun kuchini fikrlashga yo'naltirgan kabi jiddiy, o'ychan o'tirar va o'qtin-o'qtin quyilib kelgan fikr to'lqinlarini tezroq qog'ozga tushirib qolish uchun shoshilar edilar. U kishi shu qadar tez va shaxt bilan yozardilarki, yozish sur'ati stenograf tezligida edi desam, balki, mubolag'a bo'lmas. Qalamning qog'oz uzra yurishini, "to'q-to'q" nuqta urishlarini eshik ochiq bo'lsa, qo'shni xonadan yoki ochiq deraza orqali hovlidan bemalol eshitish mumkin edi.

Bunday shiddat bilan ishlash bir-ikki abzas yoki ba'zan bir, ikki, uch qog'oz to'lguncha to'xtovsiz davom etar, so'ng go'yo kuchli kurashdan charchagan kabi bir necha daqiqa **o'ylanib** dam olar, achchiq-achchiq choy ichar, kursi ustidagi meva-chevalardan totinar va xayol surib yana yozuvga kirishardilar.

Habibulla Qodiriyning "Otam haqida" asaridan



1. Shu matnni o'qigunga qadar Abdulla Qodiriyni qanday tasavvur qilgansiz?
2. Endi qanday tasavvur qilyapsiz? Nimalar o'zgardi?
3. Sizningcha, o'zbek xalqi nima uchun bu yozuvchini ardoqlaydi? Qaysi ishlari uchun?



Matndan ajratib olingan quyidagi qismlarga e'tibor bering. Bu so'z va jumlalar Abdulla Qodiriyl haqida nimalarini "aytyapti"? Izohlashga harakat qiling.

ijodxonalari... alohida tinch uy bo'lib...

uchlab tayyorlangan o'nlab siyohqalamlar...

ijodxonalarini ozoda, tartibli bo'lishini xohlar...

qiysiq turgan buyum ham u kishiga xalal bergandek...

ishlari sandalga o'tirgan kundan boshlab, darhol silliq yurishib ketavermas edi...

ish chog'ida go'yo tashqaridagi biror sharpaga qulq solganday ...

o'tkir ko'zlarini uzoq bir nuqtaga tikib...

u kishi shu qadar tez va shaxt bilan yozardilarki...

so'ng go'yo kuchli kurashdan charchagan kabi...

achchiq-achchiq choy ichar...

xayol surib...

"to'q-to'q" nuqta urish...



So'zlarni izohi bilan moslashtirib ko'chiring.

Kungay

yassi, yuza idish; likop.

Taqsimcha

uy yoki ayvon devorida: sandiq o'rnatib, ustiga o'rino ko'rpa yig'ib qo'yiladigan tokchasimon maxsus joy.

Taxmon

tozalangan qamish cho'pidan to'qilgan to'shama.

Bo'yra

quyoshga qaragan, quyosh tik tushadigan.



Muallif matnda Abdulla Qodiriyning ijod jarayoni bilan bog'liq holatlarni boshqa bir holatga qiyoslab tushuntirishga harakat qilgan. Ana shunday mazmundagi jumlalarni aniqlab, yozing.

Masalan: U kishi ish chog'ida go'yo tashqaridagi biror sharpaga qulq solganday, chaqnagan o'tkir ko'zlarini uzoq bir nuqtaga tikib, butun kuchini fikrlashga yo'naltirgan kabi jiddiy, o'ychan o'tirar va o'qtin-o'qtin quyilib kelgan fikr to'lqinlarini tezroq qog'ozga tushirib qolish uchun shoshilar edilar.



Ushbu jumlalarda o'xshatish-qiyoslash bilan bog'liq qanday vositalardan foydalanilganiga e'tibor bering. Muallif nima uchun bunday jumlalarni qo'llaganini tushuntirishga harakat qiling.



Matnda tagiga chizilgan so'zlarning o'zaklari shakldosh so'zlar hisoblanadi. Ma'nosi matndagi so'zning ma'nosi bilan bir xil so'z qatnashgan gaplarni ko'chirib yozing.

1. Yoz:

- A. Vatan mavzusida yozilgan she'rlar ko'p, ularda ona yurt madhiga aytilmagan sifatlar qolmagan go'yo.
- B. O'tgan yozda, uzumzorga har kecha bir odam o'g'rilikka tushib, sizga olib qo'ygan eng yaxshi uzumdan o'g'irlab keta boshladi.

2. Uy:

- A. O'tgan asrning boshlarida, odamlarning uyida radio-televizor tugul, oddiygina elektr chirog'i bo'limgan zamonlarda kishilar sham va qora chiroq yorug'ida kun kechirardilar. Ayniqsa, uzoq qish kechalari xalq kitoblari, turli dostonlar o'qilar, bir uy bolalar ham bu ma'rifat nuridan bahramand bo'lib o'sardilar.

B. Dunyodagi tillarni-ku,

Lug'at qilib uyishdi.

Shu jumladan, o'zbekcha ham

Bir-ikki so'z deyishdi.

(Abdulla Oripov)

3. Och:

- A. Abdulla Avloniy – ma'rifat yo'lida har qanday mehnat va mashaqqatni yengib o'tgan bobolarimizdan biri. Avloniy ochgan maktab o'z davrining yangi usuldagи ilg'or maktablaridan biri edi.

- B. Rasululloh sollallohu alayhi vasallamdan bir kishi so'radi: "Islomda eng yaxshi xislatlar qaysi?" Dedilar: "Ochlarga taom ularish, tanigan va tanimaganga salom berish".

(Hadis)



Matnda tagiga chizilgan yana shunday shakldosh so'zlar ishtirokida yuqoridagidek gaplar tuzib, yozing.



Berilgan parcha bilan tanishing, unda qo'llangan iboralar mazmunini sharhlang. O'zingiz o'qiyotgan badiiy asar yoki "Adabiyot" darsligingizdan shunday iboralar qatnashgan gaplarni topib, yozing.

Qovun-tarvuz paykalining yassi qirga tutash qismida Normat qoraning chaylasi qo'nqaymagunga qadar jonsarak dalasichqon – Do'ngkalla o'zicha quv, o'zicha baxtiyor edi. Quvligi shundaki, ko'kdagi va yerdagi turli g'animlarni o'z vaqtida payqab, hamisha yashin tezligida bekina bilar, so'ng esa go'yo ularni boplab dog'da qoldira olganidan quvongandek, raqibining qorasi o'chishi bilan ohistagina chiyillab qo'yardi.

Normurod Norqobilov





Quyida berilgan izohlar “O’tkan kunlar” yozilgan xona” matnidagi qaysi so’zlarga tegishli ekanini aniqlab, yozing.

1

Og’zaki nutqni qog’ozga so’zma-so’z yozib oluvchi mutaxassis.

2

Xonaning o’rtasiga yoki chekkaroq yeriga chuqurchaga o’rnatilgan, ustiga ko’rpa yopilgan, atrofiga ko’rpachalar to’shalgan xontaxtadan iborat isinish uchun maxsus joy.

3

Bir kishi o’tirishi uchun mo’ljallangan, odatda, to’rt oyoqli oddiy moslama, o’rindiq.

4

Tasvirlanayotgan yoki ta’riflanayotgan kimsa, narsa, hodisalarni o’quvchiga yaqqol, ta’sirli qilib yetkazish uchun ularning sifatlarini orttirib, bo’rttirib ko’rsatish.



Matndan vergulning qo’llanishi bilan bog’liq quyidagi qoidalarga mos keladigan misollarni topib, yozing.

Sanash ohangida aytildigan bo’laklar – uyushiq bo’laklar orasida

So’zlovchining o’z fikriga qo’shimcha munosabatini bildiradigan so’zlarni ajratish uchun

Qo’shma gap tarkibidagi sodda gaplar orasida



Egalik qo’shimchalari qatnashgan birikmalar bilan tanishing. Ularning qaysilarini narsalarning uch shaxsdan biriga tegishliligini ifodalagan, qaysilarida esa bunday ma’no sezilmaydi? Ularni ikki ustunga ajratib yozing.

Dadamning ijodxonalari, yozuv qog’ozlari, uyning tokchalari, dadamning ijodiy ishlari, yozish sur’ati, dadamning ko’zlari, fikr to’lqinlari, dadamning kuchi, qalamning yurishi, kursi usti.



Abdulla Qahhor qalamiga mansub “Anor” hikoyasining birinchi xatboshisini o’qing.

“Turobjon eshikdan hovliqib kirar ekan, qalami yaktagining yengi zulflinga ilinib tirsakkacha yirtildi. Uning shashti qaytdi. Jo’xori tuyayotgan xotini uning qo’lidagi tugunchani ko’rib, kelisopni kelining ustiga qo’ya chopdi. Keli lapanglab ag’anadi, chala tuyilgan jo’xori yerga to’kildi”.





Mazkur xatboshi qahramonlar hayotida juda ham muhim voqeа sodir bo'lganidan darak berib turibdi. Yozuvchi qaysi holatlar tasviri bilan buni ifodalamoqda? Parchadagi har bir so'z va gapning ma'nosini, muhim voqeani tasvirlashdagi vazifasini izohlab bering.



G'afur G'ułomning "Mening o'g'rigina bolam" hikoyasini o'qing.
Hikoyadan undalmalar ishtirok etgan gaplarni aniqlab, ularni daftaringizga ko'chiring.



Manba
uchun
havola

HIKOYANING QURILISHI

Odatda kichik hikoyalar quyidagi ketma-ketlikda yoziladi.

1. Kirish: bosh qahramonlar bilan tanishuv, voqeа sodir bo'layotgan joy, ob-havo va h.k.
2. Muammoning tug'ilishi: asardagi voqealarni harakatga keltirgan narsa va hodisa.
3. Voqealarning rivoji: muammo atrofida bo'lib o'tgan voqealar ketma-ketligi.
4. Kulminatsiya: hikoyaning eng ta'sirli, eng muhim qismi.
5. Yechim: hikoyaning xulosasi, voqealarning yakuni.



Yuqorida berilgan qolip asosida "Mening o'g'rigina bolam" hikoyasining qurilishi haqida kichik matn yozing. O'z fikringizni misollar bilan asoslang.

Hikoya yozishga kirishing.

Hikoyaning mavzusi, g'oyasi nima?

Uning qahramonlari qanday odamlar bo'ladi?

Voqealar qanday muammo atrofida rivojlanadi?

Asarning xulosasi qanday bo'ladi?



Dars davomida hikoyaning rejasi va qoralamasini yozing.



Hikoya yozing. Uni yaqinlaringiz va sinfdoshlaringizga ko'rsating.



O'QING VA MULOHAZA QILING

"EL" VA "QO'L"

"El" so'zining xalq, odamlar, qabilalar ittifoqi, urug'-aymoq, tinchlik, murosa, do'stlik, davlat, hokimiyat kabi ma'nolari bor. Bu so'zning tarixi, tub ildizi borasida ham olimlar turli fikrlarni bildiradilar. "Turkiy tillar etimologik lug'ati"da "el" so'zi "qo'l" ma'nosidagi "il" so'zidan kelib chiqqan deyiladi. Qo'lning al, il, ilg, ilik shakllari hozir ham tilimizda, shevalarimizda bor.

Sabr aylasang, murodingga yetarsan,

Nasib bo'lsa, yor ilkidan tutarsan,

– deyiladi "Tohir va Zuhra" dostonida.

Ba'zi izohlarda "el" ilgida hokimiyat, boshqaruv, rahbarlik bor degan ma'noni anglatadi, deb aytilgan. "Qo'li uzun", "ilgida tutib turadi" kabi iboralar ham qo'lda qudrat bor ma'nosini ifodalab keladi. Alisher Navoiy ham "el" so'zini "qo'l" va "xalq" ma'nosida qo'llagan.

Xulosa qilib aystsak, odamlar birlashgan joyda el paydo bo'ladi. Demak, qo'lda barmoqlar birlashadi, "bir musht holiga kelish" degan ibora ham birlashishni bildiradi.

Eshqobil Shukur

"KABOB"NING O'ZBEKCHASI

Kabob – go'shtni sixga tortib, so'ng qo'raga terib, cho'g' damida pishiriladigan taom. U Yaqin Sharq, Kavkaz va Markaziy Osiyoda juda mashhur. Menimcha, tandirda yoki qozonda tayyorlanadigan turlari keyinroq paydo bo'lgan.


O'zbekchaga forschadan kirib kelgan kabob so'zining ildizlari akkadcha *kuydirmoq*, yoqmoq ma'nosidagi "kababu" so'ziga borib taqaladi. U nafaqat turkiy tillar, hatto arab, ingliz va rus tillariga ham o'tgan. Albatta, talaffuz o'zgarishlari bilan.

Xo'sh, uning o'zbekchasi nima? Hozir so'zlashuv tilida biz asosan ana shu o'zbekcha muqobilini ishlatamiz: *shashlik*. Hayron bo'l mang, aynan shashlik. U ruscha yoki forschada emas, turkiycha so'z.

Shashmaqom va shashlikdagi shash umuman boshqa-boshqadir. "Shashmaqom"dagi shash forschada olti sonini bildirsa, "shashlik"dagi shash "sish" so'zining o'zgargan shakli. "Devonu lug'atit turk"da sish, shish shaklida kelgan bu so'zni bugun six shaklida ishlatamiz. Sishliq – sixga terib pishirilgan taom demakdir. Bugungi tilimizdagи suqmoq, suqilmoq fe'llari ana shu sish – six o'zagidan yasalgan.

Rus tilining etimologik lug'atlarida ham shashlikning asli turkiycha *shishlik* ekani ta'kidlanadi. "Shashlik" rus tilida kabobga nisbatan faol ishlatiladi.

Orif Tolib



OCHIQ OSMON OSTIDAGI MUZEY

Bu mavzuda o'rganamiz

- Xiva shahri va madaniy yodgorliklar • muzeylar • nomshunoslik • gap urg'usi • omonim iboralar • tavsifiy matn yozish.



Quyidagi rasmlarga qarang. Savollarga javob bering.

1. Bu muzeylardan birortasiga borganmisiz?
2. Ular haqida eshitganmisiz?
3. Nima deb o'ylaysiz, nega bu muzeylar shunday nomlangan?
4. Nomiga qarab ularda nimalar namoyish qilinishini taxmin qila olasizmi?
5. Hududingizda qanday muzeylar bor? Ularda nimalar namoyish qilinadi?
6. Muzeylar nima uchun kerak?





Temuriyler tarixi davlat muzeyi




O'zbekiston davlat tabiat muzeyi








Termiz davlat arxeologiya muzeyi



O'zbekiston tarixi davlat muzeyi



O'zbekiston amaliy san'at muzeyi



Alisher Navoiy nomidagi davlat adabiyot muzeyi



Quyidagi belgilarga mos keluvchi ko'satmalarni yozing.

Masalan: "Suratga olish taqiqlanadi!" yoki "Suratga olmang!"



Muhokama uchun savol. Nomlash bizga nima uchun kerak? Nega narsalarga nom beramiz?



"Dron nega "dron" deyilgan?" audiomatnini tinglang. Savollarga javob bering.

1. Dronlar dastlab qanday nomlangan?
2. Dron degan nom qanday xususiyatga asoslanib tanlangan?
3. Arilar va dronlar o'ttasida qanday o'xshashlik bor?
4. Nom tanlashda nimalarga e'tibor qaratilar ekan?



O'zingiz bilgan daryo, ko'l, qishloq, tuman yoki boshqa narsaning nomlanishi haqida kichik izlanish olib boring. Xulosalar asosida kichik matn yozing.



1. Sizningcha, muzey deb atalishi uchun bino yopiq bo'lishi shartmi?
2. Muzy shahar deganda nimalar ko'z oldingizga keladi?



Matnni o'qing. Savollarga javob bering.

INSON HAYOTI DAVOMIDA KO'RISHI KERAK BO'LGAN SHAHAR

Xorazm – qadimgi Buyuk ipak yo'lining markazida joylashgan bo'lib, O'zbekistonning yuqori **sayyohlik salohiyatiga** ega mintaqalaridan biri hisoblanadi. Xivaning xalqaro miqyosda "Ochiq osmon ostidagi muzey shahar" deya e'tirof etilishi va YUNESKOning Butunjahon madaniy merosi ro'yxatiga kiritilishi nafaqat Xorazm viloyati, balki mamlakatimizning jahon turizm bozoridan munosib o'rin egallashiga mustahkam zamin yaratadi.

"Sharq gavhari" deya ta'rif beriladigan qadimiylar hamda navqiron Xivani tomosha qilish uchun Xorazmga borsangiz, sayohatingizni albatta Ichon qal'adan boshlaysiz. Bu ko'hna shaharning sharqona ruhini his etish uchun uning bozorlarini, milliy hunarmandchilik saboqlari o'tkaziladigan maxsus maktablari-yu tor ko'chalarini sayr qilishingiz mumkin. Ayniqsa, noyob osoriatiqlarga boy Xiva muzeylari jahon sayyoohlarni hayratga solayotgani ham haqiqat.

Xiva **muzeyi fondida** 39 mingga yaqin eksponatlar saqlanmoqda. Ularni bir bor ko'rish uchun dunyoning turli burchaklaridan kelayotgan sayyoohlarni oqimi yilning to'rt faslida ham to'xtamaydi. Joriy yilning o'tgan 5 oyi davomida bu shaharga 515 ming 800 nafar, jumladan, 32 ming nafar chetellik sayyoohlarni tashrif buyurgani fikrimiz tasdig'idir. Xizmat ko'rsatish sifatining yaxshilanishi, turli madaniy tomoshalarning uyushtirilishi natijasida xorijiy sayyoohlarning viloyatda qolish davomiyligi 2012-yilda o'rtacha 1,1 sutkani tashkil etgan bo'lsa, joriy yilda 2 sutkaga yetdi. Bu esa yangi ish o'rinnari yaratilib, qo'shimcha valyuta tushumi paydo bo'ldi, savdo va xizmatlar hajmi ham ortdi deganidir.


Mutaxassislarining tahlillariga ko'ra, Xorazm viloyati turistik **ekskursiya** resurslarining zichligi hamda ular tarkibidagi **tarixiy-me'moriy obyektlar** ko'rsatkichi bo'yicha mamlakatimizda birinchi o'rinda turadi. Xorazmda neolit davridan to XIX asrgacha bo'lgan davrni qamrab olgan 254 ta madaniy meros **yodgorligi** bo'lib, ularning 18 tasi **arxeologiya**, 132 tasi **me'morchilik**, 66 tasi **haykaltaroshlik**, 6 tasi diqqatga sazovor joylar va 32 tasi **muqaddas** qadamjolardir. Ularda mamlakatimizning turli hududlaridan kelgan mohir ustalar **restavratsiya** hamda ta'mirlash ishlarni olib boryapti.

Vazirlar Mahkamasining 2017-yil 19-mayda qabul qilingan "Xorazm viloyatidagi "Nurillaboy" tarixiy majmuasini **rekonstruksiya** va restavratsiya qilish to'g'risida"gi qarori asosida ushbu maskanda ham keng ko'lamli ta'mirlash ishlarni olib borildi. Natijada **badiiy galereya, amfiteatr, qabullar uyi, hunarmandlar markazi**, milliy uslubdagi ovqatlanish shoxobchalarini o'z ichiga olgan ajoyib sayyoohlilik majmuasi bunyod etildi.

Darhaqiqat, inson hayotida sayohat qilish alohida o'ringa ega. Negaki sayohatda, birinchi navbatda, siz uchun yangilik bo'lgan o'zgacha muhitni, tabiat mo'jizalari, inson aql-u zakovati bilan bunyod etilgan qadimiylar hamda zamonaviy inshootlarni ko'rasiz. Xorijliklar mehnat ta'tiliga chiqqach, albatta, biror manzilga sayohatga otlanadi. Biz esa bunga ko'p ham hafsalha qilavermaymiz. Xorijiy davlatlarga borishni qo'ya turing, Xorazmda yashab, hatto, umrida bir bor Xivani borib ko'rmaslik mumkinmi?

Odilbek Odamboyev,

"Xalq so'zi" gazetasining 2018-yil 20-iyul sonidan





1. Jahon turizm bozori deganda nimani tushundingiz? Sayyohlik salohiyati deganda-chi?
2. Xivaning jahon turizm bozoridan mustahkam o'rin egallashiga nima sabab qilib ko'rsatilmoqda?
3. "Turistik eksursiya resurslarining zichligi" deganda nima nazarda tutilmoqda?
4. Eng ko'p madaniy meros obyektlari qaysi turga tegishli?
5. Nima deb o'ylaysiz, nega O'zbekistonda bo'lsa ham, Ichan qal'ani borib ko'rmaganlar ko'p? Bunga qanday sabablar bo'lishi mumkin?
6. O'zbekistonliklarning Ichan qal'aga ko'proq borishlarini ta'minlash uchun nimalar qilish kerak deb o'ylaysiz?



Muzeysga oid quydagi so'zlarning ma'nosini lug'atdan toping. O'zingiz uchun muhim deb hisoblagan so'zlarni yozib oling.

muzey fondi

eskponat

restavratsiya

rekonstruksiya

yodgorlik

me'morchilik

muqaddas qadamjo

haykaltaroshlik

arxeologiya

galereya

amfiteatr

qabullar uyi



Bo'sh o'rnlarga yuqoridagi so'zlardan mosini qo'yib, gaplarni ko'chiring.

1. Yaponiyalik olim sovg'a qilgan buyumlar evaziga ... yanada boyidi.
2. Shunday ...dan bor, ularni biror bino ichiga sig'dirib bo'lmaydi, shuning uchun ular ochiq osmon ostidagi eksponat bo'lib qoladi.
3. Inson qo'li bilan yaratilgan ... eksponatlari bilan tanishish uchun o'ng tomonga yurishingiz kerak.
4. Tuproq ostidan topilgan buyumlarni avaylab-asrab ... muzeyiga topshirdik.
5. Ikki yuz yillik tarixga ega bo'lgan buyumlar ... qilinishi va mutaxassislar nazorati ostida bo'lishi zarur edi.
6. Majmuaning ... qilinishi oxirgi yillarda amalga oshirilgan eng quvonarli ishlardan biri bo'ldi.



Matn asosida 3 ta savol tuzing. Partadoshingiz bu savollarga og'zaki javob berishi lozim.



Uyga borib, kattalardan quydagi savollarga javob olib, yozib keling.



1. Xiva shahriga, Ichan qal'aga borganmisiz? Nega?
2. Qaysi muzeyga borgansiz? Nega?
3. Tarixiy buyumlarni ko'rganingizda qanday hislarni tuyasiz? Nimalarни о'ylaysiz?
4. Muzeylarning bitta yaxshi va bitta yomon tomonini aytинг.



1. So'rovnoma ga ko'ra, kimning oilasidagilar muzeylarga ko'proq borishgan ekan?
2. Savolga javob so'raganingizda kattalarda qanday munosabat bo'ldi?



Quyidagi gaplarni o'qing. Ajratib ko'rsatilgan so'zlarni jadvalning kerakli ustuniga joylashtiring.

1. O'zbekistonda **muzeylar** juda ham ko'p.
2. **Dadamlar** bilan muzeyga borganimiz esimda, eksponatlarni birma-bir tanishtirgan **edilar**.
3. **Akalarim** bilan birga Ichan qal'ani aylandik. Adashib qolishimizdan juda ham qo'rqqan edim, lekin unday bo'lmasdi.
4. Ichan qal'ani aylanar ekanman, baland **minoralar**, **gumbazlar**, turli xil **naqshlarni** ko'rib, **ko'zlarim** qamashib ketdi. O'zimni boshqa davrga tushib qolgandek his qildim.
5. Yozda **Xorazmlarni** aylanib kelaman, **olimlar** bilan aylanishni reja qilganman, **Karimalar** ham men bilan boradi.
6. Ichan qal'a **martlarda** yanada go'zal bo'lib ketadi deb eshitganman.
7. O'tgan safar mahallamiz raisi ko'nmagandi. Bu safar **o'zları** bosh bo'lib borarmishlar.
8. Shaharga kiraverishda ajoyib do'kon bor ekan, **do'ppilar** sotilarkan.

Ko'plik	Hurmat	Kesatish	Birgalik	Taxmin	Ma'no kuchaytirish	Umumlashtirish, jamlash





-lar qo'shimchasi ko'plikni anglatishini bilamiz: olma (bitta olma), **olmalar** (bir nechta olma). Bu **-lar** qo'shimchasining birlamchi vazifasi bo'lib, uning quyidagi boshqa vazifalari ham bor:

1. Hurmat. Qarindoshlik munosabatini bildiruvchi so'zlarga qo'shilib, hurmat ma'nosi ni ifodalaydi: akalarim – bir nechta aka; **akamlar** – hurmat.

2. Ma'no kuchaytirish. Faqat birlik sonda qo'llanadigan so'zlarga qo'shilib, ma'noni kuchaytirishga xizmat qiladi: boshim og'rib ketdi – bitta bosh; **boshlarim** og'rib ketdi – bitta bosh, lekin bosh og'rig'ining kuchli ekani anglashilmoqda.

3. Kesatish. O'zlik olmoshiga qo'shilganda kesatish, mazax qilish ma'nolarini yuklaydi: o'zi kelibdi – oddiy ma'no; **o'zları** kelibdilar-da – kesatish ma'nosi.

4. Birgalik. Atoqli otlarga qo'shilib, birgalikda ekanlikni anglatadi. Sobir bilan – Sobir ismli bola bilan; Sobirlar bilan – Sobir ismli bir nechta bola emas, Sobir va uning sheriklari bilan.

5. Taxmin. Payt va masofani bildiruvchi so'zlarga qo'shilib, taxminni anglatadi: soat beshda – aniq besh; soat **beshlarda** – taxmin, roppa-rosa besh emas, undan sal oldin yoki sal keyin.

6. Umumlashtirish, jamlash. Atoqli otlarga qo'shilib "unga o'xshash kishilar" ma'nosida qo'llanadi: Shirinning fojiasi ("Farhod va Shirin" asaridagi Shirin obrazi); **Shirinlarning** fojiasi (Shirin obrazi va unga o'xshash boshqa ko'plab obrazlar, odamlar).

Mahsulot nomiga qo'shilganda **-lar** har xil turdag'i narsalarni jamlab ifodalaydi: suv sotilmoqda – aynan bir turdag'i suv; **suvlar** sotilmoqda – turli xil suvlar (gazli, gamsiz, shirin, rangli).



Chap va o'ng ustunni o'zaro qiyoslang. *-lar* qo'shimchasi qanday vazifa bajarayotganini aniqlang.

akanglar	akalaring
zavqim	zavqlarim
un	unlar
Xivani	Xivalarni
olimlar	olimlar
yozning oxirida	yozning oxirlarida



Yuqoridagi qoidanining har bir bandiga mos keladigan bittadan gap tuzib, yozing. Partadoshingiz *-lar* qo'shimchasi qaysi gapda qanday vazifa bajarayotganini topishi kerak. Qidadagi so'zlardan foydalanmang. Tuzilgan gaplar muzey mavzusiga aloqador bo'lismiga diqqat qiling.



Audiomatnni tinglang. So'rovnoma natijasini taqdim qilish haqida o'z xulosalariningizni aying.

Birinchi navbatda ...

Keyin ...

Oxirida ...



Qo'shnilar, boshqa bolalar, ko'chadagi odamlar orasida quyidagi ikki savol asosida so'rovnoma o'tkazing. Natijalarni yozib keling.

1. O'zbekistondagi qaysi muzeylarni bilasiz?

2. Qaysi muzeylarga borgansiz?



1. So'rovnoma o'tkazishda qanday qiyinchiliklarga duch keldingiz?
2. Savollaringizga javob berishni istamaganlar ham bo'ldimi? Nega bunday qilishdi deb o'ylaysiz?



So'rovnoma natijasini bayon qilishda quyidagi matn tuzilmasiga amal qilish yaxshi samara beradi:

- 1. Kirish.** So'rovnomaning maqsadi, kimlar orasida o'tkazilgani, qanday savol berilgani haqida yozilgan bitta xatboshi.
- 2. Asosiy qism.** So'rovnomada berilgan savollarga olingan javoblarning umumlashma natijasi yoziladigan xatboshi. Ushbu xatboshi savollarning soniga qarab o'zgarib turadi. Har bir savolning natijasini alohida xatboshida yozgan ma'qul.
- 3. Xulosa.** So'rovnomadan siz chiqargan xulosa. Masalani yechish yoki holatni yaxshilash uchun taklif yoziladigan xatboshi.



O'tgan darsdagi audiomatr, yuqoridagi qoidalar hamda o'qituvchingiz tavsiyalarini asosida uyda to'plab kelgan ma'lumotlaringizni yozib bering.



Quyidagi ma'lumotni o'qing. Undan so'ng pastdagagi iboralarning turli ma'nolarini topishga harakat qiling.




Shakldoshlik (omonimlik) nafaqat so'zlarda, balki iboralarda ham kuzatiladi.

Boshga ko'tarmoq (I) va boshga ko'tarmoq (II) iboralari faqat yozilishi jihatidangina bir xil, lekin ular turli ma'nolarni anglatuvchi alohida-alohida birliklar sanaladi: onani boshga ko'tarmoq (e'zozlamoq); xonani boshga ko'tarmoq (to'polon qilmoq). Yukni boshga ko'tarmoq birikmasi esa ibora emas, chunki u yerda barcha so'zlar o'z ma'nosida qo'llanmoqda. Ibora hosil bo'lishi uchun ko'chim – ko'chma ma'no ifodalanishi zarur.

joni chiqdi

boshiga ko'tardi

yelkasiga tushdi



TEMIRYO'LLAR

Bu mavzuda o'rGANAMIZ

- temiryo'llar tarixi, uning taraqqiyotdagi o'rni • jamoat transportidan foydalanish odobi
- qo'shaloq tinish belgilarining qo'llanishi • matn tuzilishi, tarkibiy qismlari • matndan ko'zlangan maqsadni anglay olish.



1. Temiryo'llardan nima maqsadda foydalanamiz?
2. "Toshkent – Samarqand yo'nalishi". Nima uchun so'zlar orasiga tire (katta chiziq) qo'yilgan?





Rasmlarga qarang va savollarga javob bering.

1



2





1. 1-rasmda “O’zbekiston temiryo’llari” aksiyadorlik jamiyatining logotipi aks etgan. Undagi belgilar nimani anglatishi haqida o’ylab ko’ring.
2. 2-rasmdagi belgi nimani anglatadi? Temiryo’llar bilan bog’liq yana qanday belgilarni bilasiz?
3. Siz yashaydigan hududda temiryo’llar bormi? Ular atrofida harakatlanishda qanday qoidalarga rioya qilish kerakligi haqida bilasizmi?
4. 3- va 4-rasmlarga izoh bering.
5. 5-rasmdagi mashina kutilmaganda temiryo’lda to’xtab qolgan. Vaziyatning yechimini aytинг.
6. 6-rasmda qanday vaziyat tasvirlangan? Izohlang.



Rasmda berilgan vaziyatlar asosida temiryo’l kesishmalarida harakatlanishga oid qoidalari yozing.





Matnni o'qing, matn tarkibida qo'llangan so'zlarning imlosiga diqqat qiling. So'zlarni to'g'ri yozib, matnning muayyan qismini daftaringizga ko'chirib oling.

BIZDA MAXSUS CHEGIRMALAR MAVJUD



2021-yil yanvar oyidan boshlab xalqaro yo'naliishlarda qatnaydigan yo'lovchi **poyezd/poezd**lariga chiptalarning oldindan **harid/xarid** qilish muddatiga qarab quyidagicha chegirmalar belgilangan:

45% chegirma – **kupe/kupye** va maxsus vagonlar uchun chiptani **poyezd/poezd**ning jo'nash kunidan 45–31 kun oldin **xarid/harid** qilinsa;

35% chegirma – **kupe/kupye** va maxsus **vagonlar/vago'nlar** uchun chiptani **poyezd/poezd**ning jo'nash kunidan 30–6 kun oldin **xarid/harid** qilinsa;

Shuningdek, **platskart/platskart** vagonlar uchun chiptani poyezdning jo'nash kunidan 45–31 kun oldin xarid qilinsa, 35% chegirma taqdim etiladi. **Platskart/platskart** vagonlar uchun chiptani **poezd/poyezd**ning jo'nash kunidan 30–6 kun oldin **xarid/harid** qilgan yo'lovchilar 25% chegirmaga ega bo'ladilar.

Chiptani **poezd/poyezd**ning jo'nash kunidan 5 kun oldin va undan kamroq vaqt qolganda xarid qilgan yo'lovchiga esa, 5% ustama qo'shilishi belgilangan.

Mazkur chegirmalar ichki yo'naliishlar, shuningdek, guruh bo'lib yo'lga chiqqan yo'lovchilarga nisbatan **tatbiq/tadbiq** etilmaydi.



Yuqorida berilgan matn mazmuni asosida chegirmalar bilan bog'liq ma'lumotlar quyidagi vaziyatlarning qaysilarida to'g'ri, qaysilarida noto'g'ri talqin etilganini aniqlang. Har bir javobingizni izohlang.

1

Bugun 24-noyabr, qozog'istonlik Gulnora Yangi yilni kutib olish uchun uyga ketishni rejalashtiryapti. Bobosi unga xavfsizroq bo'lgani uchun poyezdda kelishni tayinlagan. Bu Gulnoraga ham ma'qul keldi, chunki u shu kunlarda chiptalarni chegirmadagi narxi bo'yicha sotib olishi mumkin.

2

Ishlab chiqarish bo'yicha tadbirdorlikni yo'lga qo'yan Nodirbek zudlik bilan ish bo'yicha Rossiya ketishiga to'g'ri kelib qoldi. Poyezd uchun chiptaning narxini internet orqali ko'rib, keyin vokzalga keldi. Lekin unga chiptani 5% oshgan narxda sotib olishi mumkinligini aytishdi.

3

Madinaning dadasi qizining tug'ilgan kuniga kelishni rejalashtirdi va shu sababli 24 kundan keyin Tojikistonga yetib borishi kerakligini o'ylab qoldi. Shundan keyin u poyezdga chipta xarid qilish uchun vokzalga keldi. Vokzalda u 400 minglik kupe chiptasini 350 mingga sotib oldi.

4

Chet ellik sayyohlardan biri Namangan shahridagi gullar bayramini tomosha qilish uchun Toshkentga keldi. U qolgan yo'lni poyezdda bosib o'tmoqchi. Uni kutib olgan mezbon esa chiptani bir hafta oldin xarid qilish kerakligini, shunda unga 35% chegirma belgilanishini ma'lum qildi.

5

Aziza va Nodiraning oyisi 15-aprel kuni Samarqandga borishni rejalashtirdi. Qizlar oyisiga platskart vagonlar uchun chiptalarni bir oy oldin xarid qilsa, maxsus chegirmaga ega bo'lishini aytishdi.



Berilgan matnni o'qing. Poyezd va uning harakatini yana nimalarga o'xshatish mumkinligi haqida o'ylab ko'ring. Yonma-yon kelgan unli va undoshlarni aniqlab, yozing. Ularni talaffuz qiling. Talaffuz va imlodagi nomuvofiqlikni namunadagi kabi izohlang.

Namuna poyezd – poyez.



Ilm olish fursati bu – yoshlik. Yoshlikda vaqt ni behuda sovurganlarning hayoti relsdan chiqib ketgan poyezdni eslatadi. O'ylab ko'ring-a, bir sutkada 8 soat uxlasangiz, 6 soat darsda bo'lsangiz, ovqatlanish uchun 3 soat ajratsangiz, boring, 2 soat boshqa zarur ishlar uchun vaqt sarflasangiz, 19 soat band bo'lgan hisoblanasiz. Qolgan 5 soatimiz... Har kuni 5 soatdan vaqt zoye qilsak, 1 oyda 150 soatni, bir yilda esa 1800 soatni uvol qilgan bo'lamic. Bu degani bir yilda 75 sutka umrimizni havoga sovurdik degani. Unutmang, bo'shliqlar o'rnini illatlar egallaydi!

Dildora Bozorova





Temiryo'l kesishmalarida harakatlanishga oid qoidalar bilan tanishing. Berilgan rasmlar qaysi izoh bilan mos kelishini aniqlang va yozing.



1. Kesishmadan keyin hosil bo'lgan **tirbandlik** tufayli haydovchi kesishmada to'xtashga majbur bo'ladigan hollarda kesishmaga kirish taqiqlanadi.

2. **Shlagbaum** holatidan qat'i nazar, **svetoforning** taqiqlovchi ishorasida kesishmaga kirish taqiqlanadi.

3. Kesishma navbatchisining taqiqlovchi ishorasida (navbatchi haydovchilarga oldi yoki orqasi bilan turgan holda tayoqchani, qizil chiroq yoki bayroqchani yuqoriga ko'tarsa yoki qo'llarini yonga uzatsa) kesishmaga kirish taqiqlanadi.

4. Kesishma oldida turgan **transport** vositalarini qarama-qarshi harakatlanish bo'lagiga chiqib, aylanib o'tish taqiqlanadi.

5. Kesishma orqali harakatlanish taqiqlangan hollarda haydovchi to'xtash chizig'i hamda svetofor bo'limgan paytda shlagbaumga kamida 5 **metr** qolganda to'xtashi kerak.

6. Svetofor ishorasidan qat'i nazar, shlagbaum yopiq turgan yoki yopila boshlagan holatda, kesishmani to'suvchi qurilma ko'tarilib turgan yoki ko'tarila boshlagan holatda temiryo'l kesishmasiga kirish taqiqlanadi.




Berilgan izohlar va belgilar qaysi atamalar bilan bog'liq ekanini aniqlang va yozing.

Poyezd qatnovi uchun o'rnatilgan bitta izga ega bo'lgan temiryo'l.

Yo'lning poyezd, mashina o'tadigan joylarida qatnovni to'xtatib qo'yish uchun xizmat qiladigan, qo'lda yoki avtomatik boshqariladigan ko'tarma g'ov yoki to'siq.

Avtomobil va temiryo'lning bir tekislikdagi kesishishi.

Poyezd qatnovi uchun o'rnatilgan ko'p izga ega bo'lgan temiryo'l.



Quyidagi so'zlarni talaffuz qiling. Berilgan variantlardan qaysisi to'g'riliginani aniqlang va yozing. So'zlarning ma'nosini og'zaki izohlang. Qaysi so'zlarning o'zbek tilida muqobili bor?

avtomagistral	avto'magistral	relis	rels
shlagbaun	shlagbaum	platforma	platfo'rma
svetafo'r	svetofor	inspektor	inspektr
metr	metir	avtobus	aftobus
trotuar	trotuvar	transport	transpo'rt



Yuqoridagi so'zlar qaysi tillardan o'zlashganini lug'at yordamida aniqlang va yozing. Boshqa tildan o'zlashgan yana qanday so'zlarni bilasiz?



Temiryo'lida harakatlanishga oid belgilari bilan tanishing. Ular yordamida tengdoshlaringiz uchun qoidalar yozing.



1. Olim nima bilan shug'ullanadi?
2. Olimning katta yoki kichigi bo'ladimi? Javobingizni izohlang.





Matnni o'qing, savollarga javob bering.

MENI KICHIK OLIM DEYISHADI



Assalomu alay-kum, do'stim! Ah-vollaringiz qalay?! Yaxshi yuribsizmi?! Keling, tanishib olaylik. Ismim – Olimjon, 6-sinfda o'qiyman. Men olamga mash-hur, buyuklar yurti Buxoro tomondan-man. Biz tomonlarni Qiziltepa deyishadi. Bu yerdan qadim-da Buyuk ipak yo'li va ko'plab karvonlar o'tgan. Ha, biz tomon-dan-chi, Zarafshon daryosi oqib o'tadi. Aytishlaricha, ana shu daryoning ostida

oltin darvoza bor emish. Undan qadimiylar afsonaviy shaharga kirilarmish. Lekin bu shahar haqida hech kim aniq bir narsa deya olmaydi. Biznikiga mehmonga kelmoqchi bo'lsangiz, Buyuk ipak yo'lidan, katta-katta karvonlar qatnagan yo'ldan o'tasiz. Jizzax tog'laridagi dovondan shundoq tushganingizdan so'ng, mashinada bir soat yursangiz, go'zal Samarqandga yetasiz, yo'l ikkiga bo'linadi, bir tomoni Samarqandga kiradi, bir tomoni esa Buxoroga. Esingizdami, haligi, sehrli qalpoqchasi bilan sarguzashtlar ko'rsatgan Hoshimjon bor-ku, shu bolaga juda havasim keladi-da, dunyoga nomi ketgan bola. Ha, nima deyat-yotgan edim, Buxoro yo'lidan to'g'ri yurib kelsangiz, Navoiy shahriga duch kelasiz, undan o'tib, Qiziltepaga, o'ngga burilib, yigirma daqiqqa yursangiz, Zarafshon daryosiga yetasiz. Ko'prikdir o'tsangiz bas, bizning qishloq ko'rindi. Hoshimjon bilan men, ya'ni Olimjon boshqa-boshqa viloyatdanmiz. Shunday bo'lsa ham, ismlarimiz bir-biriga yaqin, o'xshab ketadi. U Hoshimjon, men esa Olimjon. Bobom meni kelajakda katta olim bo'lsin deb ismimni Olimjon qo'yganlar...

Nima deyatuvdim? Ha, Buyuk ipak yo'lidan yurganingizda Jizzaxning baland-baland dovonlaridan borib tog'hing choqqisiga yetsangiz, shundoqqina boshingiz tepasida oppoq bulutlarni ko'rasiz. Hozir bu joylar obod bo'lib, kengayib ketgan. Bobomning aytishlaricha, bir vaqtlar bu dovondan bittagina karvon zo'rg'a o'ta olgan. Hatto buyuk bobokalonlarimiz Imom Buxoriy, Imom Termiziy ham ilm izlab shu yo'llardan o'tgan ekanlar. Dadamning aytishlaricha, yaqin-yaqingacha bu joylarda mashinalar bir-biriga yo'l berib, asta-sekin harakatlanar ekan. Buni qayerdan bilasan, deysizmi?! Chunki dadam mana shu yo'ldan katta yuk mashinasini bir necha bor minib o'tganlar. Endi esa bu yerlardan mashina tugul, vagonlar ham bemalol o'tadi.

Ha, aytgancha, biz tomonlarni poytaxt bilan bog'laydigan poyezd yo'li qurildi. Qanaqa poyezd deysizmi? "Afrosiyob". Ko'z ochib yumguncha yetib kelasiz. Bir minib ko'ring, so'zimning rostligiga ishonasiz. Endi Toshkentga shu tezyurar poyezdda boramiz. Mashinalar baland tog'larni chumolidek aylanib o'tgunicha poyezd ana shu qoyalarning ostidan shuvillab o'tadi-yu bizni poytaxtga eltadi. Qanday maza!..

Otabek Quvvatov



1. Muallifning matnni yaratishdan maqsadi qanday edi?
2. Matnda Buyuk ipak yo'li hamda Zarafshon daryosi haqida qanday ma'lumotlarni uchratdingiz?
3. Hikoya qahramoni nima uchun o'z so'zi davomida Hoshimjonni yodga oldi?
4. Hikoya qahramoniga nima maqsadda Olimjon deb ism qo'yishgan? Siz-chi, ismingizning ma'nosi va nima uchun sizga shunday ism tanlangani haqida hech o'ylab ko'rganmisiz?
5. Olimjonning dadasi qanday kasb egasi bo'lgan, bu inson haqida sizda qanday tasavvur uyg'ondi?
6. Olimjon qanday bola? Uni ta'riflang, bunday xulosaga kelganingiz sabablarini tushuntirishga harakat qiling.
7. "Afrosiyob" poyezdi haqida nimalarni bilasiz?



Olimjon o'zi haqida gapirar ekan, kitobxon bilan aloqa o'rnatish uchun bir necha o'rnlarda unga murojaat qiladi. Shunday mazmundagi gaplarni ko'chiring, qanday til birliklaridan foydalanilganiga e'tibor bering.



Hikoya qahramoni haqida to'rtta dalil va to'rtta fikr yozing.

Masalan: Hikoya qahramoni Olimjon 6-sinfda o'qiydi (dalil).

Hikoya qahramoni Olimjon juda mehmondo'st bola (fikr).



Olimjonning qishlog'iga borish yo'li tasvirlangan o'rnlarni qayta o'qing. Unga yetib borish uchun yo'l xaritasini chizing.



Temiryo'llarning qanday afzallikkleri borligi haqida o'ylab ko'ring. Ular haqida yozing.



"Meni kichik olim deyishadi" matni tarkibida tinish belgilarining qo'shaloq holatda ishlatalishiga doir misollarni aniqlang, ularni daftaringizga ko'chirib oling. Buning sabablarini quyida berilgan eslatma yordamida tushuntirishga harakat qiling.



1. His-hajjon bilan aytigan so'roq gaplar oxirida so'roq va undov belgisi ketma-ket qo'yiladi.

Axir bu yerlar muqaddas ziyyaratgoh hisoblanadi, nahot shunday joyda ham o'z yomonligingni qo'ymasang!?

2. So'roq va undov gaplar kuchli his-hajjon bilan aytilsa, ketma-ket ikkita bir xil yoki uchta bir xil belgi qo'yilishi mumkin.

Diqqat, diqqat!!! Poyezd harakatlanishga hozirlanmoqda. Barcha yo'lovchilardan o'z joylarini egallashlarini so'raymiz.

3. So'roq va undov mazmunini bildirgan gaplarda fikr tugallanmay qolsa, mazkur belgilardan so'ng ko'p nuqta qo'yiladi.

"Poyezd ertaga qoldirilgan bo'lsa, endi nima bo'ladi?.. Axir bugun qanday bo'lmasin yetib borishim kerak", – deya bo'shashib joyiga o'tirib qoldi Nozima.

4. Muallif gapi va ko'chirma gap o'rtasida tinish belgilari ketma-ket ishlatalishi mumkin.

"Bugungi reys bilan Toshkentga yetib boraman, bezovta bo'lman", – dedi boshlig'imiz.



Qoidada berilgan har bir holat uchun mustaqil ravishda bittadan misol topib, yozing.



"Meni kichik olim deyishadi" matni tarkibidan quyidagi jadvalga mos keluvchi misollarni aniqlang va xattaxtaga yozing.

Atoqli otlar

Sifatlar



Boshqa viloyatlik do'stingizga siz yashayotgan shahar/qishloqqa qanday kelish mumkinligini tushuntirib, xat yozishga tayyorlaning. Buning uchun avval quyidagi ma'lumotlarni aniqlab oling.

Qayerdan qayerga?

Qanday transport vositalarida kelish mumkin?

Shahar yoki tuman markazidan kelish usullari

Buning uchun qancha vaqt sarflanishi va muhim qoidalar



Ma'lumotlaringiz asosida xat yozing. Xatingiz orqali do'stingizda qiziqish uyg'otish uchun uyingiz tomon keladigan yo'lni Olimjondek tasvirlashga harakat qiling. Yo'lning tabiati, unda uchraydigan qiziqarli hodisalar haqida tasavvur hosil qiling. Bunda yuqoridagi jadvalda berilgan ma'lumotlardan foydalaning.



Yozgan xatingizni qayta o'qib chiqing hamda tahrirlang.

MUSTAHKAMLASH



Yozgan xatingizni sinfda o'qib bering. Partadoshingizning maktubiga munosabat bildiring.



"O'zbekiston temiryo'llari" AJ xodimlari tomonidan e'lon qilinadigan xabar matnini o'qing. Bunda operatorlarga xos ohang va uslubdan foydalaning.

Diqqat, diqqat!!!

Hurmatli yo'lovchilar, Fag'ona vodiysi-da kuzatilayotgan noqulay ob-havo sharoiti va tog'li hududlardagi kuchli yog'ingarchilik sababli, poyezdlar harakat xavfsizligini hamda yo'lovchilar xavfsizligini ta'minlash maqsadida 2022-yil 5-may kuni Toshkent – Andijon – Toshkent yo'nalishi-da harakatlanadigan 60/59-sonli hamda 62/61-sonli yo'lovchi poyezdlari harakati vaqtincha, ya'ni bir kunga to'xtatiladi.



Tinish belgilarining qo'shaloq holda ishlatalishiga oid misollarga e'tibor bering va ularni izohlang.



Tire so'zlar orasida kelganda "undan bungacha", "u bunga qarshi" kabi ma'nolar uchun xizmat qiladi.

Toshkent – Andijon shaklida Toshkentdan Andijongacha bo'lgan yo'nalish tushuniladi. "Navbahor" – "Nasaf" shaklida esa "Navbahor" va "Nasaf" jamoalari qarama-qarshiligi haqida gap bormoqda.

Yuqoridagi holatlarda tire har ikki tomondan bo'sh joy bilan ajratib yoziladi.





Quyida berilgan qoidalar yordamida temiryo'llarda harakatlanishni o'rgatish bo'yicha eslatma tayyorlang. Uni turli belgilar yoki rasmlar bilan boyitishingiz mumkin. Eslatma tayyorlash jarayonida quyidagi so'zlardan foydalaning.

Har kim, har qancha, har bir, hamma, har qanday, har narsa, har nima.

Temiryo'llar, ayniqsa, temiryo'l kesishmalari, ogohlantirish belgilari qo'yilgan joylarda yurmang, o'ynamang.

Poyezdlar tagiga kirmang, piyodalar ko'priklari va o'tish joylaridan foydalaning.

Poyezd kelishi arafasida platformaning chekkasida turmang va yugurmang.

Poyezd batamom to'xtamaguncha unga chiqmang va undan tushmang.

Vagon oynalaridan boshingizni chiqarmang.

Poyezd harakatlangan vaqtda tamburning tashqi eshiklarini ochmang va sakrab tushmang.

Favqulodda holatlar yuz berganda zudlik bilan aloqa tugmasini bosing, so'ng nazoratchiga nima bo'lganini, qaysi vagonda ekaningizni shoshilmasdan aytинг.

Egasiz qoldirilgan sumka, paket va boshqa narsalarni ko'rganda shu zahoti ichki ishlар xodimlari yoki poyezd mashinistiga xabar bering.

Vagonda tozalik va gigiyena qoidalariga rioxqa qiling.

Chiptangizda ko'rsatilgan joyni egallang.

Ortiqcha shovqin solmaslikka harakat qiling.

Kattalar va bolalar bilan qo'pol muomalada bo'lmaning.



O'QING VA MULOHAZA QILING

YOQILG'I VA YONILG'I



Bu ikki so'z mazmun jihatidan bir-biriga yaqin. Lekin ma'nō qirralari farqlanadi.

Yonilg'i yonadigan suyuq modda, suyuq yoqilg'ini bildiradi. Benzin, kerosin, solyarka va shu kabi mahsulotlar yonilg'i sanaladi.

Yoqilg'i esa issiqlik energiyasi olish uchun yoqiladigan ashyoni anglatadi.

Yonilg'i o'rnila yoqilg'i so'zini ishlatish tahrir nuqtayi nazaridan xato. Deylik, non ham, sho'rvva ham mohiyatiga ko'ra bir ishni bajaradi – qorin to'yg'azadi.

Lekin nonni ichib bo'lmaydi, sho'rvani esa ichish mumkin. Shu singari yoqilg'i-moylash mahsulotlari, avtomobilarga yoqilg'i quyish shoxobchasi, jamoat transporti yoqilg'isini tejash kabi iboralarda yoqilg'i o'rnila **yonilg'i** so'zini ishlatish yaxshiroq va to'g'riroqdir.

Milliy ensiklopediya bu so'zga shunday izoh beradi:

"Dvigatellarda ishlatiladigan yoqilg'i, masalan, benzin, kerosin, yadro yoqilg'isi, reaktiv yoqilg'i va boshqalar *yonilg'i* deb ataladi".

VOHA VA VODIY: FARQI NIMADA?

"Voha" so'zi arab tilidan kirgan, o'zbek tilida cho'l va chalacho'llarda obod qilingan yerni anglatadi.

"Vodiyl" so'zi ham arab tilidan kirgan, o'zbek tilida daryo bo'ylab cho'zilgan yoki tog'lar orasidagi keng tekislik; ekin ekiladigan, obod yer; mamlakat, yurtning bir bo'lagi; diyor ma'nolariga ega. Ko'chma ma'noda biror narsa uchun xos bo'lgan joy, makonni anglatadi.

Hudud nomlari bilan ishlatganda voha va vodiylining bitta aniq, keskin farqi bor: voha – cho'l va chalacho'l hududda obod qilingan joy, vodiyl esa daryo yoqasi bo'ylab joylashgan yoki tog'lar orasidagi tekislik joy:

Zarafshon vohasi. Xorazm vohasi. Toshkent vohasi. Buxoro vohasi.


Farg'ona vodiysi. Surxon-Sherobod vodiysi. Qashqadaryo vodiysi (viloyatdagi vodiyl, Zarafshon tizmasining janubi-g'arbiy tarmoqlari oralig'ida). Hisor vodiysi.

Voha va vodiyl tushunchasi viloyat tushunchasidan farqlanadi. Voha va vodiyl bir viloyat hududidan katta bo'lishi yoki bir viloyat ichida bir necha voha yo vodiyl joylashishi ham mumkin. Milliy ensiklopediyaga ko'ra, Farg'ona vodiysida bir nechta katta vohalar bor.



Orif Tolib





“BOBURNOMA” – MEMUAR ASAR

Bu mavzuda o'rganamiz

- memuar asar haqida tushuncha • Bobur siyemosining tarixiy ahamiyati • joy nomlari
- ko'chirma gaplar imlosi • eskirgan so'zlar • tabdil • shevaga oid so'zlar • so'z yasalishi
- tarjimayi hol.



Zahiriddin Muhammad Boburning “Boburnoma” asaridan olingan asl matn va shu matnning tabdilini diqqat bilan o'qing. Topshiriqlarni bajarish orqali eski turkiy til va zamonaviy o'zbek tilining o'xhash hamda farqli jihatlari bilan tanishing.

“(Andijon) ... Farg'ona viloyatining poytaxtidur. Oshlig'i vofir, mevasi farovon, qovun va uzumi yaxshi bo'lur. Qovun mahalida poliz boshida qovun sotmoq rasm emas. Andijonning noshpotisidan yaxshiroq noshpoti bo'lmas.


“(Andijon) ...Farg'ona viloyatining poytaxtidir. G'allasi mo'l, mevasi ko'p, qovun va uzumi yaxshi bo'ladi. Qovun pishig'ida poliz boshida qovun sotish urf emas. Andijonning nokidan yaxshiroq nok bo'lmas”.

“Samarcandni Iskandar bino qilg'ondur. Mo'g'ul va turk ulusi Semirkand derlar. Temurbek poytaxt qilib edi. Temurbekdin burun Temurbekdek ulug' podshoh Samarcandni poytaxt qilg'on emastur. Qo'rg'onini faslning ustidin buyurdumkim, qadam urdilar. O'n ming olti yuz qadam chiqdi.

“Samarcandni Iskandar qurban. Mo'g'ul va turk xalqi Semirkand deb ataydilar. Temurbek (Amir Temur) poytaxt qilgan edi. Temurbekdan ilgari Temurbekday ulug' podshoh Samarcandni poytaxt qilgan emas. Qal'asining devori ustidan qadamlab o'lchab chiqishni buyurdim. O'n ming olti yuz qadam chiqdi”.

“Alisherbek naziri yo'q kishi erdi. Turkiy til bila to she'r aytibturlar, hech kim oncha ko'p va xo'b aytqon emas”.

“Alisherbek o'xshashi yo'q kishi edi. Turkiy tilda she'r yozganlar, hech kim unchalik ko'p va yaxshi yozgan emas”.



Zahiriddin Muhammad Bobur surati.
1605–1615-yillarda chizilgan,
Londondagi Britaniya muzeyida saqlanadi

1

2

3

Tabdil (“o’zgartirish”, “almashtirish”) – hozirgi odamlar tushunishi qiyin bo’lgan tilda (masalan, eski turkiyda) yozilgan matnni zamonaviy tilga moslashtirish.



Birinchi parchada ajratib ko’rsatilgan so’zlarning tabdilini juftlashtirib, namunadagidek yozing. Ularning qaysilarida qo’shimchalar bilan bog’liq o’zgarishlar borligini aniqlang.

Namuna poytaxtidur – poytaxtidur, ...



Berilgan parchalar tarkibidan quyidagi birikmalarining “Boburnoma”dagi shaklini aniqlang va yozing. So’zlardagi qo’shimchalarining qo’llanish shakliga e’tibor bering.

Namuna poytaxtidur – poytaxtidur, ...

poytaxt qilgan emas –

olti yuz qadam chiqdi –

o’xshashi yo’q kishi edi –



Birinchi parchadagi ayrim so’zlarning hozirgi o’zbek adabiy tilidagi tabdili bilan tanishing.

oshlig’i

vofir

farovon

qovun mahalida

noshpoti

g’allasi

mo’l

ko’p

qovun pishig’ida

nok

Ikkinci parchadagi shunday so’zlarni aniqlang va yuqoridagi jadval shaklida yozing.



“Boburnoma”da Bobur o’z otasi Umarshayx Mirzoga bergen ta’rifini o’qing. Parchada ajratib ko’rsatilgan so’zlardan qaysilarining ma’nolarini bilasiz?

“...past bo’yluq, tegirma soqolliq, qo’ba yuzluk, tanbal kishi edi. To’nni bisyor tor kiyar edi, andog’kim, bog’ bog’laturda qornini ichiga tortib bog’latur edi, bog’ bog’lag’ondin so’ng o’zini qo’ya bersa, bisyor bo’lur edikim, bog’lari uzulur edi.



Ajratib ko’rsatilgan so’zlar uchun berilgan izohlar bilan tanishing. Ulardan foydalanib Umarshayx Mirzo haqidagi parchanening tabdilini mustaqil yozing.

bo’yluq – bo’yli

tanbal – semiz (dangasa)

qo’ba – sarg’ish

bisyor – rosa

tegirma – yumaloq

bog’ – belbog’

andog’kim – shunchalikki



“Boburnoma”ning zamonaviy tilga tabdil etilgan shaklini o’qishga kirishing.




“Boburnoma” asarining elektron shaklini yuklab oling.



BOBURNING SHOH ASARI

- 1** “Boburnoma” – kitobxon uchun go’yo ko’p seriali film. Bu ulug’ ko’zguda deyarli 50 yillik Mavarounnahr, Xuroson, Hindiston va ularga yondosh mamlakatlarda kechgan voqeа-hodisalar tizilishadi va kitobxon ko’z o’ngida namoyish etiladi.
- 2** Bobur – buyuk podshoh, mumtoz shoir, nazariyotchi adabiyotshunos, faqih, tilshunos, san’atshunos, etnograf, hayvonot va nabotot olamining bilimdoni sifatida ko’pqirrali faoliyat va ijod sohibi edi. Birgina “Boburnoma” uning yigirmadan ortiq sohalarga qiziqqaniga yaqqol misoldir.
- 3** Asardagi voqeа-hodisalar muayyan ma’noda uning qismat sarguzashtlariga chambarchas tutashib ketgan. Shuning uchun asarni boshdan oxirigacha o’qigan kitobxon o’smir Boburni, yigit shahzoda Boburni, oshiq Boburni, umrbod jangovar lashkarboshi Boburni, podshoh va mutafakkir, mehribon ota Boburni barcha zafar-u mag’lubiyatlari, fazilatlari-yu nuqsonlari bilan ravshan tasavvur eta oladi. Muallif “Boburnoma”ni yozish uchun qo’liga qalam olgan kunidan boshlab voqeа-hodisalar talqini va kishilar shaxsiyatiga doir fikr-mulohaza, ma'lumotlarning faqat rostini yozishga ahd qilgan: “Bo’lgan voqealarni rost yozganman. Chunki bu asarda shu narsa lozim topilganki, har so’zning rosti bitiladi va har ish aynan qanday voqe bo’lgan bo’lsa, shunday aytiladi”, deb yozadi u.
- 4** Bobur mardlikda himmati yuksak davlat arbobi edi. Hirotdan Kobulga borishda qor otning qornidan keladigan yo’llarda o’zi oldinga tushib qor tepib, lashkarga yo’l ochadi. Boshqalar g’orda qor bo’ronidan jon saqlasalar, Bobur qorda o’ra qazib, o’sha yerda tong ottiradi. Shuning uchun ham “Boburnoma”ni fransuz tiliga tarjima qilgan Pave de Kurteyl Boburga quyidagicha haqqoniy baho beradi: “Bobur – har qanday



sinovga bardosh bera oluvchi, o'zida iroda va matonatni mujassamlashtirgan shaxs. U ishning ko'zini biladigan, qo'shinni mohirlik bilan boshqara oladigan, ularning ishonchini qozona olgan sarkarda edi".

Vahob Rahmonov



1. Zahiriddin Muhammad Boburning hayoti va ijodi haqida nimalarni bilasiz?
2. Sizningcha, Boburning tarixda qilgan eng muhim ishlari qaysilar?
3. Nima uchun Boburnoma memuar asar hisoblanadi?



Memuar (fransuzcha *memories* – xotiralar, esdaliklar) – muallifning o'tmishda o'zi ishtirok etgan yoki guvohi bo'lgan voqealar haqidagi xotiralari bayon qilingan adabiy asar, yodhoma. Memuar asarda muallif tarixni imkon qadar haqqoniy yoritishga urinadi. Ko'p hollarda bunday asarlarga tarixiy manba sifatida qaraladi.



Pave de Kurteylning Bobur haqida aytganlarini ko'chirma gapning turli xil shakllarida ko'chiring. Tinish belgilarni to'g'ri qo'llang.

1

Muallif gapi: "Ko'chirma gap".

2

Muallif gapi: "Ko'chirma gap", – muallif gapi.

3

"Ko'chirma gap", – muallif gapi, – ko'chirma gap".

Pave de Kurteyl

Bobur – har qanday sinovga bardosh bera oluvchi, o'zida iroda va matonatni mujassamlashtirgan shaxs

deb yozgan



Matn asosida berilgan testlarni yeching. Javoblarni daftaringizga belgilang va izohlang.

1. Muallif nima sababdan “Boburnoma”ni ko’p seriali filmga qiyoslagan?

- A) Kitobda Mavarounnahr, Xuroson, Hindistonda kechgan 50 yillik voqea-hodisalar batafsil yozilgani va o’quvchiga juda ko’p ma’lumot berilgani uchun
- B) Kitobda Mavarounnahr, Xuroson, Hindistonda kechgan 50 yillik voqea-hodisalar tizimli yozilgani va o’quvchi ma’lumotlar bilan tizimli tanisha olgani uchun
- C) Kitobda Mavarounnahr, Xuroson, Hindistonda kechgan 50 yillik voqea-hodisalar tizimli aks etgani va muallif bularni o’quvchining ko’z o’ngida jonlantira olgani uchun
- D) Kitobda Mavarounnahr, Xuroson, Hindistonda kechgan 50 yillik voqea-hodisalar tizimli aks etgani va o’quvchi buni o’z ko’zi bilan ko’rgani uchun

2. “Boburnoma”da Boburning butun umr yo’li aks etgani haqidagi xulosa matnning qaysi qismida berilgan?

- A) 1-qismda
- B) 2-qismda
- C) 3-qismda
- D) 4-qismda

3. Muallif “Boburnoma”dan olingan quyidagi fikrlarni aynan keltirishdan nimani maqsad qilgan?

Bo’lgan voqealarni rost yozganman. Chunki bu asarda shu narsa lozim topilganki, har so’zning rosti bitiladi va har ish aynan qanday voqe bo’lgan bo’lsa, shunday aytildi.

- A) Muallif ushbu parchani keltirish orqali Boburning rostg’oyligi haqida ma’lumot bermoqchi bo’lgan.
- B) Muallif ushbu parchani keltirish orqali o’zining Bobur haqidagi fikrlarini dalillamoqchi bo’lgan.
- C) Muallif ushbu parchani keltirish orqali “Boburnoma”ning shakli va mazmunidan o’quvchilarni xabardor etmoqchi bo’lgan.
- D) Muallif ushbu parchani keltirish orqali o’quvchilarni asarni o’qishga qiziqtirishni maqsad qilgan.



Boburning quyidagi sifatlarini dalillovchi gaplarni aniqlang va yozing.

Bobur – mard odam.

Bobur – sermahsul ijodkor.

Bobur – matonatli shaxs.



Matndan “kim?” so’rog’iga javob bo’luvchi shaxs otlarini aniqlang va yozing.

Namuna kitobxon, ...



"Boburnoma"dan olingen parchani o'qing. Notanish so'zlarning izohini quyida berilgan so'zlar ichidan toping. Shu so'zlar yordamida lug'at tuzish qoidalariga riosa qilgan holda lug'at yarating. Matnning tabdilini yozing.

Temurbekning va Ulug'bek mirzoning imoroti va **bog'ot'i** Samarqand **mahallotida** ko'ptur. Samarqand arkida Temurbek bir **ulug' ko'shk** solibtur, to'rt **oshyonliq**, Ko'k saroyga **mavsum** va mashhur va **bisyor** oliv imorattur. Yana Ohanin darvozasig'a **yovuq** qal'aning ichida bir masjidi **jum'a** solibtur, **sangin**, **aksar**, Hindustondin eltgan sangtaroshlar anda ish qilibturlar.

bog'lari	yaqin	aksariyat	juda, ko'p	qavatli
jome'	tosh yo'nuvchi	katta, azim, buyuk, zo'r	yuksak	ma'lum



Abdulla Qodiriying tarjimayi holi haqida ma'lumot beruvchi ikki xil uslubdagi matnni qiyoslab o'qing.

1

1894-yilning 10-aprel kuni toshkentlik Qodir ota oilasida ikkinchi o'g'il dunyoga keldi. Unga Abdulla deb ism qo'yidilar. **Abdulla juda zehnli bola bo'ldi. Uning otasi garchi madrasada o'qimagan bo'lsa-da, ilmlı kishilarni juda hurmatlar, farzandlarining ham o'qimishli, ziyoli inson bo'lishini orzu qilardi.** Shu bois o'zlari yashaydigan Samarqand darboza mahallasida yangi ochilgan rus-tuzem mакtabiga о'tancha o'g'li Abdullani berishga qaror qiladi. Chunki yosh Abdulla bundan oldin Zangiota mahallasidagi eski usuldagи maktablardan birida mulla Olim ismli o'qituvchidan saboq olgan. U **ziyarkligi, qiziquvchanligi va ilmga chanqoqligi bilan boshqalardan ajralib turardi.**



Abdulla Qodiri madrasa talabasi,
1912-yil



1. Ushbu tarjimayi hol kimga tegishli?
2. Ajratib ko'rsatilgan gaplarni qo'llashdan maqsad nima?
3. Matnda yozuvchi bilan bog'liq qanday sifatlar borligiga e'tibor bering, ularni yozing.

2

Abdulla Qodiri 1894-yilning 10-aprelida Toshkent shahrida dunyoga keldi. Otasi Qodir ota bog'bon bo'lgan. Abdulla oilada ikkinchi o'g'il farzand edi. U 1904–906-yillarda musulmon maktabida ta'lim oladi. Birinchi ustozи mulla Olim bo'lgan. 1908–1912-yillarda rus-tuzem maktabida o'qiydi. So'ng ta'limni Abulqosim shayx madrasasida davom ettiradi. 1925–1926-yillarda esa Moskvadagi adabiyot kursida o'qidi.



Bu matn tarkibida Abdulla Qodiri shaxsi bilan bog'liq sifatlarning berilgan yoki berilmaganini tahlil qiling. Buning sababini tushuntiring.





Har ikkala matnda keltirilgan bir xil mazmundagi ma'lumotlarning ifoda shakliga e'tibor bering. Ularning o'zaro farqini tushuntirishga harakat qiling.

Tug'ilishi

1894-yilning 10-aprel kuni toshkentlik Qodir ota oilasida ikkinchi o'g'il dunyoga keldi. Unga Abdulla deb ism qo'ydilar.

Ta'lrim olishi

Yosh Abdulla rus-tuzem mакtabida tahsil olishdan oldin Zangiota mahallasidagi eski usuldagи maktablardan birida mulla Olim ismli o'qituvchidan saboq olgan. U ziyarakligi, qiziquvchanligi va ilmiga chanqoqligi bilan boshqalardan ajralib turardi.

Abdulla Qodiriy 1894-yilning 10-aprelida Toshkent shahrida dunyoga keldi.

U 1904–1906-yillarda musulmon mакtabida ta'lim oladi. Birinchi ustozи mulla Olim bo'lgan. 1908–1912-yillarda rus-tuzem mакtabida o'qiydi.



Berilgan xususiyatlarning qaysilari badiiy uslub, qaysilari rasmiy uslubdagi tarjimayi holga tegishli ekanini aniqlang. Ularni ikki ustunga ajratib yozing. Badiiy uslubdagi va rasmiy uslubdagi tarjimayi holni yozish qoidalariغا oid xulosalar chiqaring.

ko'chma ma'nodagi so'zlar

aniq sanalar, yil, oy, kunning ifodalanishi

shaxs haqidagi ma'lumotlar ketma-ketlik asosida yozilishi

tasviriy vositalar

birinchi shaxs tilidan yozilishi (tug'ilganman, o'qiganman, ...)

ma'lumotlarning aniqligi

iboralardan foydalanish

muayyan qolipning mavjudligi



Quyidagi shakldosh va ko'p ma'noli iboralarning ikki xil ma'nosi bilan tanishing. Ularni qatnashtirib o'zingiz yaxshi biladigan qahramon yoki ijodkorning tarjimayi holi bilan bog'liq gaplar tuzing va yozing.

Balog'atga yetmoq.

1. Yoshi oila qurish darajasiga bormod.
2. Biror sohada yetuk, yuksak darajaga erishmoq.

Boshidan kechmoq.

1. O'z hayotida ko'rmoq, his qilmoq.
2. Ma'lum bir muddat fikrlamoq.

Iziga tushmoq.

1. Zimdan butun hatti-harakatini ta'qib qilmoq, kuzatib yurmoq.
2. Turmushdagi o'zgarishlarning odatiy holatga kelishi.

So'z bermoq.

1. Ahd-u paymon qilmoq.
2. So'zlash uchun navbatni bermoq.

O'ng kelmoq.

1. Qulay bo'lmoq.
2. Voqelikka, chinga aylanmoq.



Berilgan iboralarning qaysilari ikki xil mazmunni ifodalashi mumkinligini aniqlang, ularni ikki ustunga ajratib yozing.

1. Yerga qaratmoq.
2. Qattiqxo'l bo'lmoq.
3. Quloq solmoq.
4. Qo'l ko'tarmoq.
5. Havasi kelmoq.
6. Bosh suqmoq.
7. Bosh ko'tarmoq.
8. Bahridan o'tmoq.
9. Gapida turmoq.
10. Diliga tugmoq.



Berilgan birliklarning qaysilari rasmiy tarjimayi holga, qaysilari badiiy uslubda yozilgan tarjimayi holga tegishli ekanini aniqlab, ularni ajratib yozing.

Tug'ilganman, o'qiyman, oilada 4 nafar farzandmiz, opam Abdullayeva Nargiza 9-sinfda o'qiydi, matematika va ingliz tili fani mening jon-u dilim, oilada birin-ketin 4 nafar farzand tug'ilgan, ko'r-ko'rona o'rganganman, tahsil olganman, onam uy bekasi, dunyoga kelganman, havasim kelib yurdi, ma'lumotim oliy, kasbim injener, o'zi asli buxorolikman, ziyoli oilada tavallud topganman, qiziqishim baland bo'lgan, hozirda oyim uy ishlari bilan band, jon-jahdim bilan o'qiganman, otam o'z kasbining mohir ustasi, ona tili va adabiyot fanlariga qiziqaman, ota-onamning gaplariga qulq solib kam bo'lmadim, akam 8-sinf o'quvchisi.



Tarjimayi hol yozish qoidalariga rioya qilgan holda badiiy va rasmiy shaklda o'z tarjimayi holingizni yozing. Bunda yuqorida berilgan namunalardan foydalanishingiz mumkin.

Har ikkala tarjimayi holda quyidagi ma'lumotlarni berishga harakat qiling.

Familiya, ism, otasining ismi

Tug'ilgan kuni, oyi, yili

Qiziqishlari



Yashaydigan hududingiz, ko'rgan voqeа-hodisalaringiz, ajdodlaringiz hamda yaqinlaringiz haqida ma'lumot beruvchi kichik memuar asar yozing.



"SHARQ TARONALARI" XALQARO MUSIQA FESTIVALI

Bu mavzuda o'rganamiz

- "Sharq taronalari" festivalining madaniy ahamiyati • Registon maydoni • maqomchilik san'ati • gap bo'laklari • ko'p nuqta.



1. Sharq deganda dunyoning qaysi davlatlari tushuniladi?
2. Milliy kuy-qo'shiqlarimizdan qaysi birlarini bilasiz?
3. Xalqaro deganda nimani tushunasiz?



Rasmlarga qarang. Ularda nima tasvirlangan? Qaysi festival, tadbir yoki konsert bo'lishi mumkin? Nega shunday deb o'ylaysiz?





"Sharq taronalari" musiqa festivali haqida audiomatnni tinglang. Savollarga javob bering.



1–4-savollarga qisqa javob yozing. 5–7-savollarga og'zaki javob bering.



1. "Sharq taronalari" festivali ilk marta qaysi yili bo'lib o'tgan?
2. Festival qayerda bo'lib o'tadi?
3. Festival ochilishida kimlar nutq so'zlaydi?
4. Festival qancha vaqt davom etadi?
5. Nima deb o'ylaysiz, festival nega aynan Registon maydonida bo'lib o'tadi?
6. Festivalga nima sababdan "Sharq taronalari" deb nom berilgan bo'lishi mumkin?
7. Sizningcha, festival nima maqsadda tashkil etiladi?



Ikki nuqta belgisini qo'yishga oid ma'lumot bilan tanishing va berilgan matnning kerakli o'rniiga ikki nuqta qo'ying. O'zingiz ham qoidaga mos bitta gap tuzing.



Tasniflashda ikki nuqta faol qo'llanadi. Tasnif asosini ifodalovchi gapdan keyin ikki nuqta qo'yiladi va tasniflanuvchi birliklar yozib chiqiladi.

Kirish imtihonlari quyidagi fanlar asosida o'tkaziladi:

- 1) ona tili va adabiyot;
- 2) ingliz tili;
- 3) mantiq.

Har bir davlatning vakil guruhi uchun jami 30 daqiqa belgilangan bo'lib, ishtirokchilar o'zları uchun belgilangan muddat davomida quyidagi yo'nalishlarda ijro etishlari mumkin

1. Xalq musiqiy ijodiyoti.
2. Milliy mumtoz musiqa.
3. Zamonaviy musiqa, shu jumladan, estrada asarlari.





Guruhlarga bo'lining. "Sharq taronalari" xalqaro musiqa festivalida qatnashishga chorlovchi e'lon yozing. Unda ikki nuqtadan unumli foydalaning.



Ko'pnuqta qo'yiladigan ayrim o'rinalar bilan tanishing:

1. Gapning mazmunan tugallanmaganini ko'rsatish uchun.

Misol: Akobirning sunnat to'yini kelasini yili qilsak...

2. Gap muallifining o'ylanib qolishi, ikkilanishi, hayajonlanishini ko'rsatish uchun.

Misol: Nima desam ekan... ochig'i... men bir yomon ish qilib qo'yganimni anglab turibman, sizdan uzr so'rash uchun kelgandim.



Quyidagi gaplardan qaysi biri 1-qoidaga, qaysi biri 2-qoidaga mos?

1-qoidaga mos

2-qoidaga mos

1. Poyezdga bilet olib qo'yan bo'lsak, poyezd uch soatdan keyin ketsa...

5. Men nima qilibman... Siz...

2. Sen... sen qo'riqqa borasan.

6. Hay-hay, ukam, shundoq baobro' odam sizni ko'rgani kelsa-yu, siz xursand bo'lismiga...

3. Bo'lmasa, kunda nima ayb, xudoning hamishagidek karami keng bir kuni...

7. O'zing tengi bolalar lager palatkalarida maza qilib uxbab yotganida sen suv sepib, yo'lka supurishing... Nima desam ekan... Sal alam qiladi kishiga.

4. Mayli, chavgonni... ertaga peshindan so'ng tamosho qilg'aymiz.



"Adabiyot" darsligingizdan ko'pnuqta, boshqa darsliklaringizdan ikki nuqta qo'llangan o'rnlarni aniqlang. Namunalar ko'chiring.



Biror marta bayram, tadbir yoki festival haqida so'zlab berishingiz kerak bo'lganmi? Qanday ma'lumotlarni aytgansiz? Qanday ketma-ketlikda aytgansiz?



"Sharq taronalari" xalqaro musiqa festivali haqidagi xabardan yozib olingan audiomatnni tinglang. Nimalar haqida gapirilayotgani, ma'lumotlar qanday ketma-ketlikda berilayotganiga diqqat qiling.



Festival, tadbir yoki bayram haqida tavsiflovchi nutq quyidagilardan iborat bo'lishi kerak:

a) kirish qismida tadbir, bayram, festival nomi, bo'lib o'tish vaqt, joyi va sabablari ko'rsatiladi;

b) asosiy qism bayram, tadbir yoki festivalga tayyorgarlik haqida bitta xatboshi, jarayonning borishi haqida bitta xatboshidan iborat bo'ladi. Nutq egasi o'zi qatnashgan voqealar haqida so'zlab berganda o'tgan zamondan foydalanadi;

c) xulosa qismi odamlarning his-tuyg'ulari, mulohazalari yoki voqealari haqidagi yakuniy fikrlarini o'z ichiga oladi.

Festivallar, tadbirlar yoki bayramlar tavsiflarini jurnallar, gazetalar, sayohat varaqalarida, axborot ruhidagi TV va radio ko'rsatuvlarda uchratish mumkin. Bundan tashqari, xat va hikoyalar tarkibida ham bunday matnlar uchraydi. Ularni yaratishda badiiy, rasmiy, ommabop uslubdan erkin foydalanish mumkin.

KIRISH

1-xatboshi

nom, joy, vaqt, sabab, maqsad

ASOSIY QISM

2-xatboshi

tayyorgarlik (masalan, taomlar, dasturxon, bezaklar)

3-xatboshi

bayram, festival yoki tadbirning
borishi (kiyimlar, chiqishlar)

XULOSA

4-xatboshi

his-tuyg'ular, fikr-mulohazalar, yakuniy xulosalar



Yuqoridagi audiomatnni yana bir marta tinglang. Tavsifda qanday kamchilik va yutuqlar borligini tushuntiring.



Matnlardan olingan parchalarni bo'sh o'rnlarga kerakli so'zlarni qo'yib o'qing. Matnlar qaysi uslubda yozilgan?

sehr

mahobat

gung

quvonch

shodon

ko'zqamashtirar

gulduros

Tug'ilgan kun

Yorqin ranglar bilan bezatilgan ...li xonada bayramona muhit hukmron edi. Rang-barang chiroqlarning yog'dusi bolalarning ...dan porlab turgan yuzlarida aks etardi. Ularning chehralaridan baxtli ekanliklarini anglash mumkin. Ota-onalari esa ularning quvnoq yuzlariga faxr va g'urur bilan qarab turishibdi.

Musiqiy konsert

Qo'shiqchi sahnaga qadam qo'yar ekan, ... chiroqlar hamma yoqni yoritib yubordi. Qo'shiqchi ona haqida kuylay boshladи, qo'shig'i go'yo ...li edi. Muxlislar ham xuddi sehrlangandek qo'shiq tugaguncha ... bo'lib o'tirishdi. Qo'shiq so'ngida zalni ... qarsak bosdi.



Guruhlarga bo'lining. Sinfingizda birligida tashkil etilgan tadbir, bayram yoki barcha qatnashgan tug'ilgan kun haqida nutq tayyorlang. Har bir guruh o'zi tayyorlagan nutqni boshqalarga so'zlab beradi.



Yuqoridagi ikki parchani ommabop uslubda qayta yozing. Qaysi so'zlarni qo'lladingiz? Sababini tushuntiring.



1. Mumtoz musiqa deganda nimani tushunasiz?
2. Sizga qanday musiqalar yoqadi? Ularni eshitganingizda nimalarni his qilasiz?



Quyida matn qismlari aralash holda berilgan. Siz tartibi bilan o'qing. Savollarga javob bering.

JONLI MUSIQA FESTIVALINING OCHILISHI

A

Mana, festivalning ochilish marosimi ham boshlandi. Birinchi bo'lib O'zbekiston Respublikasi Prezidenti nutq so'zladi. Orqaroqda bo'lganim uchun tarjimon qulqochini mengacha yetib kelmadni, Prezidentning to'lqinlanib gapirganidan sezdimki, u ushbu festivalning boshlanganidan juda ham xursand. Prezident nutqidan anglaganim shu bo'ldiki, u tashrif buyurgan diplomat va nufuzli mehmonlarning barchasini alohida qutlab chiqdi. Prezident nutqidan so'ng YUNESKO bosh direktori Oudrey xonim nutq so'zladi. Shundan keyin haqiqiy ertak boshlandi. Registon maydonini eniga to'ldirib o'tirgan orkestr turli millat va elatlarning mumtoz kuylarini mahorat bilan chaldi. O'zbek xonandalari o'zlarining nimalarga qodir ekanliklarini, dunyoning istalgan mumtoz qo'shiqchilariga bas kela olishlarini isbotlamoqchi bo'lishganmi yoki festival oldidan raqiblarini sarosimaga solishni istashganmi, dahshatli darajada qoyilmaqom ijrolar qilishdi. Ohanglarning dam sokinlashib, dam tezlashib turishi odamga boshqacha zavq ularashar ekan. Raqqosalar va ularning liboslarini esa butun umr esdan chiqarmasam kerak.

B

Ana shunday hislar bilan festivalning ochilish marosimidan chiqib keldim. Hozir xonamda o'tirib, blogim uchun shu maqolani yozyapman-u, ochilish marosimi yana bir marta qayta bo'lishini istayapman. Qadrli meni o'qiydigan muxlislarim, siz bu festivalni bir marta bo'lsa ham albatta ko'rishingiz kerak. Ishonamanki, ketgan vaqtingiz, sarflagan mablag'ingizga hech qachon achinmaysiz! Ko'hna Samarqandning tarovati-yu "Sharq taronalari"ning shukuhidan uxlay olamanmi, yo'qmi – bilmayman. Sizlarga esa xayrli tun!



D Chiqishlarni tomosha qilar ekanman, o'zimni butunlay boshqa olamga tushib qolganday his qillardim, skripkaga o'xshash cholg'u asbobi hamda nay jo'rligida ijo etilgan sho'x musiqaga o'z uslubimda raqs tushib ham oldim. Atrofimdag'i o'zbeklarga o'xshab harakat qilishga urinsam ham, o'xshamadi. Shunchaki o'zimni musiqa og'ushiga otdim-u ko'zimni yumib, tanamni bo'sh qo'yib o'ynayverdim. Qo'shiqchilarning ovozlari shunchalik dardli ediki, ba'zi qo'shiqlar yangraganda so'zlarini tushunmasam ham, yig'lagim keldi.

E Samarqandga yetib kelishim bilan festivalga katta tayyorgarlik ko'rilganini his qildim. Yo'llar bo'ylab turli naqshlar bilan bezatilgan pannolar, shaharning qayeriga qarama –ko'zing tushadigan gullar. Bosh maydon Registon esa odamlar bilan to'lgan. Maydondagi har uchala binoga rangli chiroqlar shunday tushirilganki, chiroqlar naqshlar bilan uyg'unlashib yanada go'zallahib ketgan. Go'yoki osmon Registonga ingandek edi. Sahna esa juda ajoyib bezatilgan. O'zimni Sharq ertaklariga tushib qolgandek his qildim. G'ira-shira osmondan tashqari har yon naqshlarga to'lib ketgan edi. Muxlislar uchun ajratilgan o'rindiqlarga o'tirib, yon-verimga qaradim, atrofdagilar turli millat vakillari ekanini ularning tashqi ko'rinishidan bilib olish mumkin edi. Qulog'imga ispancha, italyancha, o'zbekcha, nemischa, inglizcha va yana men bilmagan bir qancha tillardagi so'zlar eshitilib turardi. Hammasi ajoyib!

F Men mumtoz musiqa shaydosiman. Mumtoz musiqa festivallarini tomosha qilish uchun butun dunyo bo'ylab sayohatlarga chiqaman. Bu safar Samarqandda bo'lib o'tadigan "Sharq taronalari" xalqaro musiqa festivalini tomosha qilish uchun qadim Samarqand shahriga keldim. Ushbu festival 1997-yildan buyon har ikki yilda bir marta tashkil etiladi. 2013-yilgi festivalni internet orqali ko'rib qolganimdayoq bu festivalni o'z ko'zim bilan, jonli kuzatishni niyat qilgan edim. Festivalni Samarqandning Registon maydonida o'tkazish odat tusiga kirgan. Odadta, avgust oyining ikkinchi yarmida tashkillanadigan ushbu festival – turli elatlarning milliy musiqalarini olamga yoyish uchun juda zo'r imkoniyat. Ushbu festival YUNESKOning xalqaro madaniy tadbirlari ro'yxatiga kiritilgan bo'lib, butun dunyo madaniy merosini saqlash, rivojlantirish va keyingi avlodga yetkazishga xizmat qilmoqda.

Emma Klark, sayyoh



1. Emma Klark Samarqandga qanday maqsadda kelgan edi?
2. Muallif ushbu matnni qayerda yozgan deb o'ylaysiz?
3. Emma Klark "Sharq taronalari" haqida qayerdan bilgan?
4. Emma o'zini butunlay unutishiga sabab bo'lgan voqeа qaysi?
5. Sizningcha, skripkaga o'xshash cholg'u asbobi qaysi?
6. Nima uchun Emmaning yig'lagisi keldi?
7. Matndagi qaysi gaplardan festivalga turli millat vakillari kelganini bilib olish mumkin?



Emma Klarkni hayratlantirgan narsalarni qisqa birikmalarda ifodalab yozing.

Namuna Skripkaga o'xshagan cholg'udan chiqqan kuy, ...



**Tasavvur qiling, o'zingiz qatnashgan to'yni tavsiflovchi matn yozishingiz kerak.
Quyidagi topshiriqlarni bajaring.**

Quyidagilardan qaysi biri siz yozadigan matnga taalluqli emas?

A. Yubiley uchun taklifnomalar
B. Dasturxon

Quyidagi mashg'ulotlarni mos ustunga joylashtiring.

mehmonlar ro'yxatini tuzish

suratga tushish

taomnomani aniqlash

kuyovnavkar

nikoh o'qitish

kelinsalom

mehmonlarni taklif qilish

raqs, musiqa

qalin berish

Marosimdan oldin

Marosim vaqtida

• Necha marta to'ya borgansiz?

• To'ya sizdan tashqari yana kimlar
bor edi?

• To'ylarning qanday turlarini bilasiz?

• Sizga yoqqanmi? Nimasi yoqqan?

• Biror esda qolarli voqeа sodir bo'lganmi?



120–180 so'zdan iborat esse yozing. Unda o'zingiz ishtirok etgan biror marosimga tavsif bering.

Yozib kelingan esselar tahlili va tahriri.

Har bir o'quvchi o'z essesini o'qiydi, qolgan o'quvchilar aniqlashtiruvchi savollar beradi hamda matn tuzilishining qoidaga mos ekanini tekshiradi.



Matningizni bildirilgan asosli taklif va e'tirozlarni hisobga olgan holda qayta yozing.

MUSTAHKAMLASH




Quyidagi gaplarni ko'chirma gapga aylantirib yozing. Har bir gapni ikki xil shaklda yozishingiz kerak bo'ladi.

1. Emma Klark O'zbekistonga birinchi marta kelayotganini aytdi.
2. Maqsud Shayxzoda Alisher Navoiy g'azal mulkining sultoni ekanini ta'kidladi.
3. Ilon Maskning aytishicha, "Tesla" eng sifatli elektromobil ekan.
4. O'qituvchimiz Eynshteyn ham mакtabda ikkichi bo'lganini aytdi.



Rasmiy hamda badiiy uslubdagi tarjimayı holning xususiyatlarini chizmada ifodalang.

Rasmiy uslubdagi
tarjimayı hol




Badiiy uslubdagi
tarjimayı hol



Ko'pnuqtaning ishlatalishiga oid ikki qoidani eslang. Shu qoidalarga mos 2 tadan misol yozing, lekin ko'pnuqtalarni qo'y mang. Partadoshingiz qayerga ko'pnuqta qo'yilishini topishi lozim.





OLIY MAJLIS

Bu mavzuda o'rganamiz

- davlat boshqaruv tizimi • parlamentning davlat boshqaruvidagi o'rni • nuqtali vergul
- rasmiy uslub.



Faraz qiling, siz Oliy Majlis deputatisiz. E'tiboringizni qaysi muammoni hal qilishga qaratar edingiz? Nima uchun?



Matnni o'qing va savollarga javob bering.

PARLAMENT NIMA?

Ko'pchilik davlatni president boshqaradi deb o'ylaydi. Ammo bu unchalik to'g'ri emas. Chunki O'zbekiston – demokratik davlat. Bu davlatni siz bilan biz, ya'ni xalq boshqaradi deganidir. Qanday qilib, axir mening dadam ham, oyim ham hech kimni va hech nimani boshqarmaydi-ku, deyishga shoshmang. Ular saylov vaqtida o'zlari ishongan odamga ovoz berishgan!

O'zbekistonda 35 milliondan ortiq odam yashaydi. Tasavvur qiling, har bir odam davlatni men boshqaraman desa, nima bo'ladi? Ha, janjallar boshlanadi! Shuning uchun odamlar o'zlari ishongan aqli va zukko kishilarni president yoki deputat etib saylaydilar. Endi president va deputatlar odamlarning istaklariga qarab ularning nomidan davlatni boshqarishadi. Lekin president va deputatlar dangasalik qilishsa, odamlarning aytganini qilmay, davlatga zarar yetkazishsa,



Parlament demokratik mamlakatlarda butunlay yoki asosan saylov asosida tuziladigan oliy vakillik va qonunchilik organidir.



xalq ularning o'rniга boshqa odamni rahbar qilib saylash huquqiga ega. Davlatni xalq boshqaradi degan gapni endi tushungandirsiz?

Odamlar saylagan deputatlar Parlament degan katta tashkilotga jam bo'lishadi. O'zbekistonda Parlament "Oliy Majlis" deb ataladi. Bu joyda xalq saylagan 250 nafar odam faoliyat yuritadi. 100 nafari senator, 150 nafari esa deputat deb ataladi. Deputat va senatorlar siz va bizning nomimizdan davlatni boshqarishadi. Ular turli qonunlar chiqarib, odamlarning yaxshi yashashi uchun harakat qilishadi. Deputat va senatorlarning ishiga hatto Prezident ham aralasha olmaydi.

Abduqahhor Rahimov, huquqshunos



1. Ayting-chi, prezidentning vazifasi nimadan iborat?
2. Demokratik davlat deganda qanday davlatni tushunasiz? Bunday davlatda davlat boshqaruvi qanday amalga oshiriladi?
3. Sizning ota-onangiz davlat boshqaruvida qay darajada ishtirok etadi?
4. Deputatlarning davlat boshqaruvidagi o'rni qanday? Senatorlar-chi, ularning vazifasi nimalardan iborat?
5. Yurtimizda o'tkaziladigan saylovlardan xabaringiz bormi? Bu jarayon haqida nimalarni bilasiz?
6. "Deputat va senatorlarning ishiga hatto Prezident ham aralasha olmaydi". Matnda berilgan ushbu ma'lumotga munosabatingizni bildiring.



Matn tarkibidan qonunchilikka oid atamalarni aniqlang va talaffuz qiling.



Aniqlagan atamalaringizni quyidagi izohlar bilan o'zaro moslashtirib, daftaringizga ko'chiring. Imlosiga e'tibor bering.

Vakolatli davlat organiga saylangan kishi, vakil.

Davlat hokimiysi tomonidan qabul qilingan, hamma uchun majburiy bo'lgan ijtimoiy-huquqiy me'yor va munosabatlarni belgilovchi rasmiy qoida.

Ovoz berish orqali davlat organlari, mahalliy o'zini o'zi boshqarish organlari va boshqa tuzilmalarni tashkil etish vositasi.

O'z fuqarolarining ijtimoiy-siyosiy huquqlarini himoya qiluvchi, bunga qarshi turuvchi kuchlarning qarshiligini sindiruvchi hokimiyat organlari va siyosiy tashkilotlari tizimiga ega bo'lgan mustaqil mamlakat.

Demokratik mamlakatlarda butunlay yoki asosan saylov asosida tuziladigan oliy vakillik va qonunchilik organi.

Qonun chiqaruvchi, davlatni boshqaruvchi oliy davlat organi a'zosi.



Matn yuzasidan chiqarilgan xulosalarning qaysilari to'g'ri ekanini aniqlang, noto'g'ri xulosalarni esa to'g'rilib aying.

O'zbekiston – demokratik davlat, bu esa davlatni xalq boshqaradi degani.

Odamlar saylagan prezident va deputatlar o'z xohishlari asosida davlatni boshqarishadi.

Odamlar saylovda ovoz berish orqali davlat boshqaruvida ishtirok etishadi.

Oliy Majlis a'zolari 150 nafardan iborat.

Deputat va senatorlar Parlamentda yig'ilib, o'z faoliyatlarini olib borishadi.

Prezident deputat va senatorlar bilan o'zaro maslahatlashgan holda davlat boshqaruvini olib boradi.



Berilgan matnlarning qaysi birida takrorga yo'l qo'yilmagan? Har ikki qismdagi so'zlar sonini sanang. Qaysi so'z hisobiga ushbu matn ixchamlashganini aniqlang. Aniqlagan so'zingiz qaysi so'z turkumiga xos?

Ko'pchilik bolalar davlatni prezident boshqaradi deb o'laydi. Ammo bu unchalik to'g'ri emas.

Ko'pchilik bolalar davlatni prezident boshqaradi deb o'laydi. Ammo ko'pchilik bolalarning davlatni prezident boshqaradi deb o'ylashlari unchalik to'g'ri emas.



Quyida berilgan QR kod orqali Oliy Majlis Qonunchilik palatasining yalpi majlisini kuzating. Oliy Majlis binosining ko'rinishi hamda majlis jarayoni haqida tavsifiy matn yarating.




Berilgan matnlarni diqqat bilan o'qing va topshiriqlarni bajaring.

1-MATN

Xalq davlat hokimiyatining birdan bir manbaidir. O'zbekiston Respublikasida davlat hokimiyati xalq manfaatlarini ko'zlab va O'zbekiston Respublikasi Konstitutsiyasi hamda uning asosida qabul qilingan qonunlar vakolat bergen idoralar tomonidangina amalga oshiriladi.

Konstitutsiyada nazarda tutilmagan tartibda davlat hokimiyati vakolatlarini o'zlashtirish, hokimiyat idoralari faoliyatini to'xtatib qo'yish yoki tugatish, hokimiyatning yangi va muvoziy tarkiblarini tuzish Konstitutsiyaga xilof hisoblanadi va qonunga binoan javobgarlikka tortishga asos bo'ladi.

O'zbekiston Respublikasi Konstitutsiyasining 7-moddasi



1. Matndagi so'zlar qanday ma'noda (o'z/ko'chma) qo'llanganini tekshiring.
2. Berilgan gaplar ifoda maqsadiga ko'ra (darak, so'roq, buyruq, istak) qanday mazmunda kelayotganini aniqlang.

Muvoziy – barobar, teng, parallel.

2-MATN

Keling, davlat organlari: Oliy Majlis, Hukumat, ichki ishlar organi, hokimiyat, sud kimning manfaatlarini himoya qilishi haqida o'ylab ko'raylik-chi.

Albatta, bizning, ya'ni har birimizning. Negaki, aynan biz, hammamiz birgalikda davlatmiz. Mabodo birdaniga hammamiz yo'q bo'lib qolsak, unda davlat organlarining nima keragi bor? Ular jamiyat, ya'ni biz mavjud ekanimiz tufayligina mavjuddirlar.

Boshqacha aytganda, davlat va davlat organlari xalq uchun, mamlakat aholisining umumiyl ishlarini hal qilish uchun mavjud bo'ladi. Ammo faqat demokratik davlatdagina buning iloji bor.

O'zbekiston Respublikasi Konstitutsiyasining 7-moddasiga muvofiq, mamlakatimizda hokimiyatning birdan bir manbai xalqdir, ya'ni kishilar o'z vakillarini – deputatlarni saylaydilar.

Deputatlar esa xalq nomidan jamiyat rivoja etib yashaydigan qonunlarni ishlab chiqadilar va qabul qiladilar.



1. Muallif matn tarkibida ajratib ko'rsatilgan so'zlardan nima maqsadda foydalangan?
2. Ushbu matn tarkibida gapning ifoda maqsadiga ko'ra turlaridan qaysilari ishtirok etmoqda?



Yuqoridagi tahlil asosida quyida berilgan xususiyatlarning qaysilari rasmiy yoki publitsistik uslubga, qaysilari har ikkala uslubga oid ekanini aniqlang.

Gaplar qisqa, aniq va barcha uchun tushunarli qilib tuziladi.

Ta'sirchan so'z va birikmalar, maqol va hikmatli so'zlardan foydalilanadi.

Gap bo'laklari odatdag'i tartibda bo'ladi.

Asosan darak gaplardan, qaror, buyruq, ko'rsatma kabilarda esa buyruq gaplardan foydalilanadi.

So'zlar o'z ma'nosida qo'llanadi.

Kesimlar xabar mazmunida, harakatning bajaruvchisi noma'lum bo'ladi.

Har bir sohaning o'ziga xos atamalaridan foydalilanadi.

Darak, his-hayajon, ritorik so'roq gaplardan, yoyiq undalmalardan, takroriy so'z va birikmalardan foydalilanadi.



Quyida berilgan fe'llarni tahlil qiling, ular qaysi uslubdagi matnga mos kelishi haqida o'ylab ko'ring va ikki ustunga ajratib yozing.

Bajariladi, aytdi, ko'rsatiladi, belgilanadi, bo'lib o'tmoqda, asoslanadi, tashkil etiladi, so'zlashmoqda, kafolatlanadi, nishonlangan, bormoqdamiz, namoyish etilyapti.

Rasmiy uslubga xos

Publitsistik uslubga xos



Rasmiy uslubda berilgan matnni o'qing. Nuqtalar o'rniغا so'z qo'yish orqali jadvalning ikkinchi ustunida berilgan matnni publitsistik uslubdagi matnga aylantiring. Bunda quyida berilgan birliklardan foydalanishingiz mumkin.

35-modda

Har bir shaxs bevosita o'zi va boshqalar bilan birgalikda vakolatli davlat organlariga, muassasalariga yoki xalq vakillariga ariza, taklif va shikoyatlar bilan murojaat qilish huquqiga ega.

Arizalar, takliflar va shikoyatlar qonunda belgilangan tartibda va muddatlarda ko'rib chiqilishi shart.

... har bir shaxs bevosita o'zi va boshqalar bilan birgalikda vakolatli davlat organlariga, muassasalariga yoki xalq vakillariga ariza, taklif va shikoyatlar bilan

... arizalar, takliflar va shikoyatlar va ... ko'rib chiqilishi

Qo'yish uchun so'zlar: bilasizmi, murojaat qilishlari mumkin, esa, shart ekanligi bosh qomusimiz – Konstitutsiyamizda alohida ta'kidlangan, qonunchilikka ko'ra, eshitdingizmi, fuqarolardan kelgan, oz fursatda, odamlardan kelgan, o'z vaqtida.



Konstitutsiyaning 79-moddasi bilan tanishing. Uning mazmunini o'z so'zlaringiz bilan sharhashga harakat qiling. Matnda qo'llangan tinish belgilariga e'tibor bering.

79-modda

O'zbekiston Respublikasi Oliy Majlisining Qonunchilik palatasi mutlaq vakolatlariga:

1) O'zbekiston Respublikasi Oliy Majlisining Qonunchilik palatasi Spikeri va uning o'rnbosarlarini, qo'mitalarning raislari va ularning o'rnbosarlarini saylash;

2) O'zbekiston Respublikasi Bosh prokurorining taqdimiga binoan O'zbekiston Respublikasi Oliy Majlisining Qonunchilik palatasi deputatini daxlsizlik huquqidan mahrum etish to'g'risidagi masalalarni hal etish;

3) o'z faoliyatini tashkil etish va palataning ichki tartib-qoidalari bilan bog'liq masalalar yuzasidan qarorlar qabul qilish;

4) siyosiy, ijtimoiy-iqtisodiy hayot sohasidagi u yoki bu masalalar yuzasidan, shuningdek, davlat ichki va tashqi siyosati masalalari yuzasidan qarorlar qabul qilish kiradi.



Reja, qaror, farmon, buyruq, qonun kabi rasmiy hujjatlardagi tasniflovchi xatboshilarda bandlar oxirida nuqtali vergul qo'llanadi. Oxirgi bandda esa nuqta qo'yiladi.



Konstitusiyaning 79-moddasi mazmunini sharhlab yozing.



Matnni diqqat bilan o'qing va matn yuzasidan berilgan topshiriqlarni bajaring.

Nigora Toshkent shahridagi 12-umumiy o'rta ta'lif məktəbida o'qiydi. U adabiyot fanini juda yoqtiradi. Kunlarning birida Nigora ustoziga 7-sinf o'quvchilari o'rtasida "Mening iste'dodim" nomli tanlov o'tkazish taklifini berdi. Ushbu tanlovda 7-sinf o'quvchilari o'zlarining iste'dodlarini namoyish qilishlari uchun ijodiy ishlarni taqdim etishi mumkinligini aytди. Ustozi Nigoraning taklifini ma'qulladi. Ular tanlov uchun ijodiy ishlar 10-oktyabrdan 10-noyabrgacha məktəbning "Yosh adabiyotshunoslar" to'garagi xonasida soat 10:00 dan 14:00 gacha qabul qilinishini hamda ushbu tanloving g'olib 15-noyabrda e'lon qilinishini kelishib oldi.

Nigora ushbu tanlovda juda ko'p o'quvchilar o'z iste'dodlarini namoyish qilishini hamda mana shu ishtirokchilar ichida haqiqiy iste'dod egasi g'olib bo'lishini juda xohlardi. Shu sababli ushbu tanlovdan ko'pchilik xabar topib, tanlovda ishtirok etishi uchun e'lon yozishni maqsad qildi. Hamda uni məktəbning hammaga ko'rindigan yerlariga osib qo'yishni rejalashtirdi. Ammo u e'lonning qanday yozilishini bilmas edi. O'qituvchisi unga e'lonlar quyidagi talablarga javob berishi lozimligini aytди:

- e'lon qilinayotgan tadbir yoki tanloving vaqtı, o'tkazilish joyi ko'rsatilishi;
- e'lon matnida tadbir yoki tanloving mavzusi aks etgan bo'lishi;
- tanlov yoki tadbirda qatnashish shartlari ham keltirilishi;
- tadbir yoki tanlovnı o'tkazuvchi tashkilotninig nomi yoki manzili keltirilishi.

E'lonlar haqida aniqroq tasavvur uyg'onishi uchun Nigora uning bir qancha ko'rinishlari bilan tanishib chiqdi:



1-e'lon:

E'LON

Toshkent shahridagi 235-umumta'lif məktəbi "Ta'tilda 5 tashabbus" onlayn tanlovlari doirasida "Ijodkor bolalar" rasmlar tanlovinı e'lon qiladi.

"Ijodkor bolalar" rasmlar tanlovi bo'yicha ishtirokchilarning ijodiy ishlari joriy yilning 6-16-iyul kunlari "Telegram" orqali qabul qilinadi.

O'quvchilar rangtasvir yo'nalishidagi erkin mavzudagi ijodiy ishlarni A3 o'lchamli qog'ozga chizib, so'ng uni qo'lida tutgan holda suratga tushib yuborishi lozim.

Tanlov g'oliblari joriy yilning 20-iyul kuni aniqlanadi va e'lon qilinadi.

2-e'lon:**E'LON**

Olmalik shahridagi 19-ixtisoslashtirilgan davlat umumta'lif maktabi "Ta'tilda 5 tashabbus" onlayn tanlovlari doirasida videoroliklar tanlovini e'lon qiladi.

Ishtirokchilarning videoroliklari 10–15-sentyabr kunlari <https://t.me/yoshkitobxonlar2020> telegram manzilida soat 10:00 dan 16:00 ga qadar qabul qilinadi. Videorolik hajmi 20 megabaytdan oshmasligi lozim. Bunda kitobxon oila o'zbek yoki jahon adabiyoti durdonalaridan eng ta'sirli yoki kulgiga boy o'rinnarini sahna ko'rinishi shaklida ijro etishi lozim. Ushbu tanlovda oilaning barcha a'zolari ishtirok etishi kerak. Tanlov g'oliblari joriy yilning 25-sentyabr kuni aniqlanadi va e'lon qilinadi.

3-e'lon:**Abituriyentlar diqqatiga!**

Qadrli o'quvchilar! Bugungi pandemiya sharoitida uni yengib o'tish uchun uyda qolish – barchamiz uchun eng to'g'ri yo'l.

Vaqt esa sizni manzilingizga tobora yaqinlashtirmoqda. Bir oydan keyin kimdir talaba bo'lishi, yoki bo'lmasisligi turgan gap. Ixtiyorингизда 1 oydan ortiq vaqt bor.

Biz sizlar uchun sifatli masofaviy darslarni taklif etamiz.

Darslar "audiodars + videodars + test + topshiriq" metodi asosida tashkil qilinadi:

- darslarni malakali o'qituvchilar olib borishadi;
- Ma'ruzalar videodarslar shaklida taqdim etiladi;
- testlar internet orqali yechiladi;
- vazifalar doimiy ravishda videoqo'ng'iroqlar orqali nazorat qilinadi;
- o'qituvchi va tinglovchi muntazam aloqada bo'ladi.

Siz o'qituvchiga bevosita savollar berishingiz va xatolar ustida ishlashingiz mumkin.

Murojaat uchun tel.: +998901234567.





Ushbu jadvalda keltirilgan ma'lumotlar yuqorida berilgan e'lonlarning qaysi biriga tegishli ekanini aniqlang.

T/r	E'london olingan ma'lumotlar	Qaysi e'longa tegishli (e'lon raqamini yozing)
1	Videorolik 21 megabayt bo'lmasligi kerak.	
2	Uyda ham sifatli ta'lif olish mumkin.	
3	Tanlov g'oliblari yoz oyida aniqlanadi.	
4	O'quvchilarning ijod namunalari o'zлari bilan birga rasmga olib yuboriladi.	
5	Bu tanlovda tasviriy san'atga qiziquvchilar qatnashadi.	
6	Bu tanlovda 4 bosqichli metod aks etgan.	



Yuqorida Nigoraning ustozi bergen tavsiyaga asosan e'lonlarda qanday kamchiliklar mavjudligini aniqlang va yozing.

1-e'lon	2-e'lon	3-e'lon
?	?	?



Nigora e'lonlar bilan tanishar ekan, ularni quyidagi ma'lumotlar bilan boyitish kerakligini tushundi. Siz berilgan ko'rsatmalar orqali qaysi e'lon matnlarini to'ldirish mumkinligi haqida o'ylang, javoblariningizi yozing.

T/r.	Takliflar	Qaysi e'longa oid?
1.	E'lonlarning dizayniga alohida e'tibor qaratish.	(har uchalasiga)
2.	Tadbirda qanday cheklovlar borligi haqida ham ma'lumot berish	?
3.	O'quv kurslarining oylik to'lovini yozish	?
4.	Videoroliklar qanday qurilmada tasvirga olinishi mumkinligi haqida ma'lumot berish	?
5.	Qo'shimcha "Diqqat, diqqat, diqqat" kabi kishi e'tiborini tortuvchi so'zlarni qo'shish	?
6.	Necha yoshdagи ishtirokchilar qatnashishi mumkinligi haqidagi ma'lumotni qo'shish	?



Nima deb o'ylaysiz, 3-e'londa o'quv markazining manzili berilishi kerak edimi?
Javobingizni izohlang.

A. Ha

B. Yo'q



Nigoraga o'zi tashkillashtirmoqchi bo'lgan "Mening iste'dodim" nomli tanlov uchun qanday e'lon matnini tavsiya qilgan bo'lar edingiz? Matnda berilgan ma'lumotlar asosida e'lon matnini yarating.



Nigoraning "Mening iste'dodim" nomli tanlovi uchun tayyorlagan e'loringizni taqdim eting.



"Konstitutsiyamiz bilimdoni" tanlovini o'tkazish uchun e'lon yozishingiz kerak. Quyida berilgan jadvalni tanlovga oid ma'lumotlar asosida to'ldiring.

Tanlov yoki tadbir nomi	
E'lon qilinayotgan tadbir yoki tanloving o'tkazilish vaqtি va joyi	
Tadbir yoki tanlovnи o'tkazish-dan maqsad, unda ishtirok etish shartlari	(Eslatma: tanlov shartlarini yozishda nuqtali verguldan foydalaning.)
Tadbir yoki tanlov o'tkazuvchi-ning nomi	



Jadvalda keltirilgan ma'lumotlar yordamida e'lon matni yozing.

Bunda quyidagi boshlanmalardan foydalanishingiz mumkin:

**DIQQAT! DIQQAT!
DIQQAT!**

**TANLOVGA
CHORLAYMIZ!**

**O'Z BILIMINGIZNI
SINAB KO'RING!**



Sevimli faningiz darsligidan nuqtali vergul qo'llangan jumlalarni toping va yozing.





O'QING VA MULOHAZA QILING

"MAHSULOT"NING O'ZBEKCHASI – "TOVAR"

Tilimizga o'rashib, o'ziga tegishli bo'limgan hududlarni ham egallab olgan monopoltariat so'zlardan biri *mahsulot*dir. Bu so'zni o'rinli-o'rinsiz qo'llayveramiz. Uning turkiycha muqobili – *tovarga esa juda kam murojaat qilamiz*. U go'yo rus yoki boshqa Yevropa tilidan kirib kelganday tuyuladi. Aslida bunday emas. *Tovar* g'irt o'zbekcha so'z.

Mahmud Koshg'ariyning "Devonu lug'atit turk" asarida tavar so'ziga *jonli, jonsiz mol, mato deb ta'rif* berilgan:

O'l aning birla tavar yarishdi – U sherigi bilan tovarni teng bo'lishdi.

Tovar rus tiliga turkiy tillardan o'tgan. U bolgar, sloven, chex, polyak kabi tillarda ham ishlatalindi.

Dastlab chorva moli ma'nosida qo'llangan *tovar* keyinchalik har qanday moddiy boylikni ifoda eta boshlagan. Qadimda ko'chmanchi turkiy qavmlarda chorva asosiy boylik bo'lgan.

Xalqning turmush tarzi tilda aks etishi – tabiiy hol. Ingliz, rus va boshqa tillarda *mablag'*, sarmoya ma'nosida qo'llanadigan **kapital** so'zi ham lotincha "caput" – *bosh, asosiy so'ziga borib taqaladi*. Qadimda Yevropada ham boylik chorva soni bilan o'lchangan, buni aniqlash uchun chorva boshi sanalgan, chorva boylikning asosiy o'lchovi bo'lgan.

Xullas, tomirida turkiy til qoni oqayotgan **tovar** so'zini bemalol ishlataverishimiz kerak. U tilimizning ming yillik tovari.

Orif Tolib


"KECHQURUN"DAGI "QURUN" NIMA?

"Kechqurun" so'zi tilimizda *oqshom* ma'nosini anglatib keladi. Bu so'zdagi "kech" so'zi hammamizga tushunarli. Xo'sh, unda "qurun" so'zi qanday mazmunni bildiradi? Manbalarda "qurun" so'zi qadimgi tilimizda vaqt ma'nosini bildirgan deb izohlanadi. "Qurun" so'zi tilimizda hozir alohida ishlatilmaydi. Lekin Manzar Abulxayrovning "Navoiy asarlarida so'z va iboralar" kitobida

Alisher Navoiy asarlarida "qurun" so'zi alohida ishlatilgan o'rinnar ko'rsatib o'tilgan. Masalan, "Nasoyim ul-muhabbat" asarida "O'z zamonida balki buncha qurunlarda alardek solik murtoz kishi yod bermas", degan jumla bor. Ervand Sevortyan lug'atida "qurun" va "qurum" so'zlari bir-biriga bog'liq holda "qorakuya" ma'nosida sharhanadi. "Kechqurun"dagi "qurun" so'zi "vaqt" ma'nosida mantiqqa to'g'riroq. "Kechki vaqt" mazmuni "kechqurun"ga mos.

Eshqobil Shukur, "Boboso'z izidan"





MUALLIFLIK HUQUQI

Bu mavzuda o'rganamiz

- mualliflik huquqlari • ko'chirmachilik illatining ijtimoiy-madaniy hayotimizga yetkazayotgan zarari • huquqiy atamalarni tushunish • gap tuzish.



1. "Muallif" so'zini qayerlarda uchratgansiz?
2. Bu so'zning ma'nosi nima?
3. Siz nimalarning muallifisiz?
4. Huquq deganda nimani tushunasiz? Sizning qanday huquqlaringiz bor?



Rasmlarga qarang. Savollarga javob bering.





1. Rasmdagi insonlar nima bilan band? Ular qilayotgan harakatni umumlashtirib, nima deyish mumkin?
2. Rasmdagilarning har biri o'z ishining yakunida aynan nimani yaratadi deb o'ylaysiz?
3. Nima uchun bir narsa yaratgan odamning mualliflik huquqi himoya qilinishi kerak?



Mualliflik huquqi haqidagi audiomatnni tinglang. Savollarga javob bering.



1. Mualliflik huquqi deganda nimani tushundingiz?
2. Nimalar mualliflik huquqi bilan himoyalanadi?
3. Ifoda shakli deganda nimani tushundingiz?
4. Mualliflik huquqi qancha muddat davomida amal qiladi?
5. Qachondir sizning mualliflik huquqingiz buzilganmi?
6. O'zingiz kimningdir mualliflik huquqini buzganmisiz?
7. Ijtimoiy tarmoqlarda birovning yozgan gapini yoki olgan suratini o'z sahifasida muallifini ko'rsatmasdan e'lon qilish mualliflik huquqini buzishga kiradimi?



Quyidagi jadvalda berilgan gaplarni o'zaro qiyoslang. Ular qanday farq qilayotganiga e'tibor bering.

Mualliflar, ijodkorlar va ularning merosxo'rlarining qonuniy huquqlarini mualliflik huquqi va turdosh huquqlar sohasi tartibga soladi.	Biror ijodkor yaratgan asarni boshqa odam o'ziniki qilib ko'rsatsa, muallifning roziligidiz undan foydalansa, ya'ni mualliflik huquqini buzsa, bu holat qonunchilikning mualliflik huquqi sohasida belgilab qo'yilgan tartib asosida hal qilinadi.
Mualliflik huquqi ijodiy faoliyat natijasi bo'lmish fan, adabiyot va san'at asarlariga nisbatan, ularning maqsadi va qadr-qimmati, shuningdek, ifodalanish usulidan qat'i nazar tatbiq etiladi.	Ijod qilib yaratilgan har qanday ilmiy, badiiy, san'at asari mualliflik huquqiga ega hisoblanadi.
Mualliflik huquqi g'oyalar, prinsiplar, usulublar, jarayonlar, tizimlar, usullar yoki konsepsiyalarga emas, balki ifoda shakliga nisbatan tatbiq etiladi.	Biror narsaning shakli aynan ko'chirib olin-ganda, mualliflik huquqi buzilgan hisoblanadi.

Mualliflik huquqi muallifning butun hayoti davomida va uning vafotidan keyin yetmish yil amal qiladi.	Yaratilgan asarning mualliflik huquqi muallif hayotligida bir umr, vafotidan so'ng yetmish yil unga tegishli hisoblanadi.
Muallifning vafotidan keyin birinchi marta e'lon qilingan asarga bo'lgan mualliflik huquqi esa asar e'lon qilinganidan keyin yetmish yil davomida amal qiladi.	Asar muallif hayotligida e'lon qilinmagan bo'lisa va vafotidan so'ng e'lon qilinsa, e'lon qilingan vaqtidan boshlab yetmish yil davomida mualliflik huquqi muallifga tegishli bo'ladi.



Quyidagi gaplardagi bo'sh o'rnlarni audiomatnga asoslangan holda to'ldirib, daftaringizga yozing.

Mualliflik huquqi va turdosh huquqlar sohasi _____ ning huquqlarini tartibga soladi.

Mualliflik huquqi quyidagi sohalarga tegishli asarlarga tatbiq qilinadi: _____

Mualliflik huquqi qo'llanadigan asarlar quyidagi shakllarda bo'lishi mumkin:

Mualliflik huquqi quyidagilarga nisbatan qo'llanmaydi: _____

Mualliflik huquqiga oid quyidagi jihat muddatsiz muhofaza qilinadi: _____



Quyidagi so'zlarning ma'nosini lug'atlardan topib, yozing.

Huquq, kod, turdosh, merosxo'r, faoliyat, qat'i nazar, oshkor qilmoq, prinsip, uslub, jarayon, tizim, usul, konsepsiya, amal qilmoq.



1. Uyga vazifada berilgan qaysi so'zlarning ta'rifini topishda qiyaldingiz?
2. Ushbu so'zlarni siz yana qayerlarda, qanday matnlarda uchratgansiz?
3. Siz qachondir shu so'zlardan foydalanishingiz mumkinmi?



Quyida O'zbekiston Respublikasining "Mualliflik huquqi va turdosh huquqlar to'g'risida"gi qonunining 3-moddasida keltirilgan asosiy tushunchalar ta'rifi berilgan. Ularni o'qib, tushunganlaringizni sinf bilan muhokama qiling.

Asar nusxasi – asarning har qanday moddiy shaklda tayyorlangan ko'chirmasi.

Ijro – asarni (shu jumladan, xalq ijodiyoti asarini), fonogrammani, ijroni, sahna asarini o'yin, ifodali o'qish, kuylash, raqsga tushish orqali jonli ijro yoki texnika vositalari yordamida taqdim etish.

Ijrochi – aktyor, xonanda, sozanda, raqqos yoki rol o'ynaydigan, kuylaydigan, o'qiydigan, ifodali o'qiydigan, raqsga tushadigan, talqin etadigan, musiqa asbobini chaladigan yoxud


adabiyot yoki san'at asarini (shu jumladan, xalq ijodiyoti asarini) o'zgacha tarzda ijro etadigan boshqa jismoniy shaxs, shuningdek, spektaklning sahnalashtiruvchi rejissyori va dirijyor.

Manzarali-amaliy san'at asari – asli yoki nusxalari amalda foydalanish ashyolari sifatida qo'llanadigan yoki ana shunday ashyolarga ko'chirilgan ikki yoki uch o'lchovli san'at asari, shu jumladan, badiiy hunarmandchilik asari yoki sanoat usulida tayyorlangan asar.

Muallif – ijodiy mehnati bilan asar yaratgan jismoniy shaxs.

Chop etish – asarning, ijro yozuvining yoki fonogrammaning xususiyatidan kelib chiqqan holda ommanning oqilona ehtiyojlarini qondirish uchun yetarlicha miqdorda asarning, ijro yozuvining yoki fonogrammaning nusxalarini asar muallifining, ijrochining yoki fonogrammani tayyorlovchining roziligi bilan muomalaga chiqarish.

Huquq egasi – mualliflik huquqiga nisbatan muallif yoki uning merosxo'rlari, turdosh huquqlarga nisbatan ijrochi yoki uning merosxo'rlari, fonogrammani tayyorlovchi, efir yoki kabel orqali ko'rsatuv yoxud eshittirish beruvchi tashkilot, shuningdek, shartnomada yoki qonunda nazarda tutilgan boshqa asos bo'yicha asarlardan yoxud turdosh huquqlar obyektlaridan foydalanish huquqini olgan boshqa yuridik yoki jismoniy shaxslar.





Quyida O'zbekiston Respublikasining "Mualliflik huquqi va turdosh huquqlar to'g'risida"gi qonunining 6-moddasi bilan tanishing.

6-modda. Mualliflik huquqi obyektlari bo'lgan asarlar
Quyidagilar mualliflik huquqi obyektlaridir:

- adabiy asarlar (adabiy-badiiy, ilmiy, o'quv, publitsistik va boshqa asarlar);
- drama va ssenariy asarlari;

- matnli yoki matnsiz musiqa asarlari;

- musiqali drama asarlari;

- audiovizual asarlar;

- manzarali-amaliy va sahma bezagi san'ati asarlari;

- xoreografiya asarlari va pantomimalar;

- rangtasvir, haykaltaroshlik, grafika, dizayn asarlari va tasviriyl san'atning boshqa asarlari;

- arkitektura, shaharsozlik va bog'-park barpo etish san'ati asarlari;

- fotografiya asarlari va fotografiyaga o'xshash usullarda yaratilgan asarlar;

- jug'rofiya, geologiya xaritalari va boshqa xaritalar, jug'rofiya, topografiya va boshqa fanlarga taalluqli tarhlar, eskizlar va asarlar;

- barcha turdag EHM uchun dasturlar, shu jumladan, har qanday dasturlash tilida va har qanday shaklda, masalan, boshlang'ich matn hamda obyekt kodida ifodalanishi mumkin bo'lgan amaliy dasturlar va operatsiya tizimlari.



Siz yuqorida sanalgan asarlarning mualliflik huquqi buzilgan holatga duch kelganmisiz? Buni sinf bilan muhokama qiling.



"Mualliflik huquqi va turdosh huquqlar to'g'risida"gi qonunning 6-moddasida ko'rsatilgan asarlarga misollar yozib chiqing.

Namuna

Adabiy asar: Normurod Norqobilovning "Oqbo'yin" qissasi.

Ilmiy asar: Cho'lponning "Adabiyot nadur?" maqolasi.



Sinfda muhokama qilingan holatlardan birini tanlab, u haqida qisqacha matn yozing. Yozgan matningizda asar qanday yo'nalishda ekani, uni kim yaratgani, mualliflik huquqi qanday shaklda buzilgani aks etishi kerak.





Matnni o'qing. Savollarga javob bering.

KO'CHIRMACHILIK TARAQQIYOTIMIZ ILDIZIGA URILGAN BOLTADIR



Parijdagi universitetda o'qiganimda xalqaro tashkilotlarga bag'ishlangan darsimiz edi. O'sha darsning ilk kunida o'qituvchi barcha talabalarga vazifalarni bo'lib berdi. Men va bitta nemis o'rtog'im birgalikda taxminan 15 varaqcha kurs ishi yozishimiz va navbatimiz kelganda uni og'zaki gapirib berishimiz kerak edi.

Kurs ishi uchun xalqaro tashkilotlar haqida internetdan ma'lumot qidirayotgan edim, bitta tayyor matn chiqib qoldi. Matn bir tashkilotning saytida e'lon qilingan bo'lib, juda mukammal yozilgan edi. Men qancha harakat qilsam ham, unday matnni yoza olmas edim. Matnni shartta ko'chirib, "WORD"ga tashlab oldim-da, nemis o'rtog'imga kurs ishining o'zimga tegishli qismini ishlab bo'lganimni xabar qildim. O'rtog'im umumiyl ishning yarmi tezda bitgani uchun xursand bo'lib ketdi, chunki u o'sha paytda o'z qismini yozishga qiyinalib, bir-biridan qiyin kitoblarni o'qish bilan ovora edi.

Kurs ishi topshiriladigan kuni ikkalamizning qismlarimizni birlashtirib, uni elektron pochtadan domлага yuborish uchun o'rtog'im bilan ertalab institutda ko'rishdik. Kurs ishini jo'natishning oxirgi muddati kechqurun edi. Ikkalamiz yozgan matnlarni ko'ra turib, nemis o'rtog'im: "Iya, sen foydalanilgan adabiyotlar ro'yxatini kiritmabsan", – deb qoldi. Men: "Shart bo'lmasa kerak deb o'ylagandim. Bu shunchalik muhimmi?" – deb so'radim, chunki matnni o'zim yozmaganidan keyin, tabiiyki, menda uning bibliografiyasi ham yo'q edi. Nemis o'rtog'im: "Albatta muhim, axir bu ilmiy kurs ishi-ku", – deb turib oldi.

O'ylanib turganimni ko'rib, nemis o'rtog'im menga yordam berishga qaror qildi. "Xafa bo'lma, hozir internetdan qidirib, sen yozgan fikrlarning ayrimlari kimga tegishli ekanini bilib olib, bibliografiya tayyorlaymiz", – dedi. Men osonlikcha qutulayotganidan xursand bo'lib ketdim. O'rtog'im men "yozgan" matnni olib, "Google"ga tashlagan edi, shundoq men ko'chirib olgan sayt eng birinchi bo'lib chiqib kelsa bo'ladimi?! U dastlab matn ko'chirilgan



ekanini payqamadi. "Mana, senikiga o'xshash matn bor ekan", – deb o'sha saytni ochdi. Saytdagi matnning bir qismini o'qidi-da, "Bu seniki bilan bir xil-ku, ko'chirmaganmiding?" – deb so'radi. "Yo'g'e, nima deyapsan, o'zim yozdim", – dedim.

U o'qishda davom etdi va oxirigacha o'qib bo'lgach, menga ayblovchi nigoh bilan qaradi-da, "Sen ko'chiribs-san-ku!" – dedi. O'zbekistonda o'qiganimda bitta talaba biror narsani ko'chirsa, ikkinchi talaba: "Buni qayerdan ko'chirding, mengayam ayt, men ham ko'chiray", – deb so'rashiga o'r ganib qolgan ekanman. Nemisning menga qilayotgan muomalasiga ensalarim qotib ketdi. "Nemis bo'lsang o'zingga" deganday ohangda, "Ha, ko'chirdim, hamma ko'chiradi-ku", – dedim. U: "Yo'q, bunaqasi ketmaydi, bu matnni o'qituvchiga jo'nata olmaymiz", – deb qoldi. "Tomi ketganmi buning?" deb o'yladim. Shunday dardi bor ekan, jo'natadigan kuni aytadimi?! Ikki oy oldin aytganida, bemalol o'zim yozishga ulgurardim-ku.

Shunday deb o'y lab turib, qarasam, o'rtog'imning ko'zlar yoshlanyapti. "Endi ikkalamiz ham o'qishdan haydalamiz va "plagiat" (ko'chirmachilik) uchun endi bizni 5 yilgacha hech qayerga o'qishga olishmaydi", – deb qoldi. Ana shundagina men qilgan ahmoqligim qanchalar qimmatga tushishi mumkinligini his qildim. O'zimni o'qishdan haydashsa, balki, indamasdan ketaverishim mumkin edi. Lekin men o'zimdan tashqari bitta begunoh insonning kelajagini ham xavf ostiga qo'ygan edim. Eng yomoni, ko'chirmachilikning g'irt o'g'rilik ekanini o'shanda birinchi marta tanamda his qildim-u, yer yorilmadi, yerga kirib ketmadim. Deyarli barcha sohalarda ko'chiraverib, bu narsalar biz uchun oddiy holatga

aylanib qolgan. Lekin bitta nemis talabasining vijdoni "oddiy" ko'chirmachilikni qabul qila olmay, ko'zi yoshlanganini ko'rib, o'zimdan uyalib ketdim. Ana shunda nima sababdan dunyoda nemislar rivojlanib ketishganini-yu, nimaga ularning ko'plab mahsulotlari dunyoda tengsiz ekanini tushunib yetdim.

Men muddat hali tugamaganini aytib, nemis o'rtog'imni tinchlantirdim. Kechgacha o'zimning qismimni yozib tugatishga va hammasi joyida bo'lishiga va'da berdim. Men uyat, mas'uliyat, millatimiz sha'ni, yaxshi baho olish istagi bilan diqqatimni bir joyga jamlab, aytilgan vaqtgacha o'z qismimni yozib tugatdim. Men yozib bo'lgunimcha, nemis o'rtog'im xavotirdan yonimda to'xtamasdan borib-kelib turdi. Kurs ishini domлага jo'natib xotirjam bo'lgach, buni qila olishimga ishonmagan nemis o'rtog'im menga qayta va qayta rahmatlar aytdi.

Navbatimiz kelganida yuborgan ishimizni kurs oldida og'zaki gapirib berdik va ikkalamiz ham yaxshi baho oldik. Nemis o'rtog'im bilan ikkalamiz bir-birimizga hamkorlik uchun minnatdorchilik bildirdik. Men qilgan ishim uchun undan yana bir bor uzr so'radim. Bo'lib o'tgan voqeа men uchun bir umrga saboq bo'lib qoldi. O'sha kundan boshlab O'zbekistonda ko'chirmachilarining soni bittaga kamayib, ko'chirmachilikning ashaddiy dushmanlarining soni bittaga ko'paydi!

*Doniyor Ro'zmetov,
xabar.uz saytidan olindi*



1. Matn muallifi qayerda o'qigan?
2. U qanday vazifa topshirishi kerak edi?
3. U nima uchun vazifani o'zi bajarmadi?
4. Nemis kursdoshi vazifa ko'chirilganini qanday bilib qoldi?
5. Nemis talaba nima uchun ko'ziga yosh oldi?
6. Matn muallifi muammoni qanday hal qildi?
7. Uning qisqa muddatda qiyin vazifani uddalashiga nima turtki berdi?
8. Matn muallifining fikri nima uchun o'zgardi?
9. Ko'chirmachilik nima uchun taraqqiyotga to'siq bo'ladi?
10. Ko'chirmachilik qilgan odamning o'zi bundan qanday zarar ko'radi?



Uch guruhga bo'lining. Matnda aks ettirilgan holatni sahnalashtirib berishingiz kerak. Buning uchun dastlab ssenariy yozing. Qahramonlar qanday harakat qiladi, qaysi harakatni bajarayotganda qaysi gapni aytadi – bularning hammasi ssenariyda aks etishi kerak.



Matndagi olinma so'zlarni daftaringizga yozing. Ular ishtirokida gap tuzing.



Matndan olingen quyidagi gaplarni o'qing. Ularning ayrimlarida undov belgisining o'zi, ayimlarida undov belgisi so'roq belgisi bilan birga qo'llangan. Gaplarning matnda bildirgan ma'nosidan kelib chiqib, ushbu tinish belgilarining nima uchun qo'llanganini tushuntiring.

1. O'rtog'im men "yozgan" matnni olib, "Google"ga tashlagan edi, shundoq men ko'chirib olgan sayt eng birinchi bo'lib chiqib kelsa bo'ladi!
2. U o'qishda davom etdi va oxirigacha o'qib bo'lgach, menga ayblovchi nigoh bilan qaradi-da, "Sen ko'chiribsan-ku!", – dedi.
3. Shunday dardi bor ekan, jo'natadigan kuni aytadimi?!
4. O'sha kundan boshlab O'zbekistonda ko'chirmachilarning soni bittaga kamayib, ko'chirmachilikning ashaddiy dushmanlari soni bittaga ko'paydi!



Quyidagi gaplarda ayrim so'zlar nima uchun qo'shtirnoqqa olingenini izohlang.

O'rtog'im men "yozgan" matnni olib, "Google"ga tashlagan edi, shundoq men ko'chirib olgan sayt eng birinchi bo'lib chiqib kelsa bo'ladi!

Lekin bitta nemis talabasining vijdoni "oddiy" ko'chirmachilikni qabul qila olmay, ko'zi yoshaqningini ko'rib, o'zimdan uyalib ketdim.



Matndan olingen quyidagi fe'llar tuzilishiga ko'ra qanday fe'l ekanini yozma tahlil qiling.

bo'lib berdi

gapirib berish

chiqib qoldi

yoza olmas edim

ishlab bo'lgan

ko'ra turib

turib oldi

o'ylanib turganim

bilib olish

xursand bo'lib ketdim

ko'chirib olgan

chiqib kelsa

o'qib bo'lgach

o'rganib qolgan ekanman

jo'nata olmaymiz

his qildim

aylanib qolgan

qabul qila olmay

rivojlanib ketishgani

tushunib yetdim

yozi tugatdim

borib-kelib turdi



"Ko'chirmachilik taraqqiyotimiz ildiziga urilgan boltadir" matni asosida bayon yozing. Uni muallif tilidan emas, o'z tilingizdan hikoya qiling.





O'QING VA MULOHAZA QILING

INSON VA ODAM

Ba'zi ma'nodosh so'zlarning juda nozik ma'nō farqlari bor. Birining o'rnda boshqasini qo'llash to'g'ri emas. Bu qoida *inson*, *odam*, *kishi*, *shaxs*, *kimsa* so'zlariga ham tegishli. Ushbu maqolachada asosiy e'tiborni *inson* so'ziga qaratamiz.

Bu ma'nodoshlardan *kimsa* so'zi salbiy ma'noda qo'llanishi mumkin. "Izohli lug'at"da berilgan misollarda ijobiy-neytral ma'noda ishlatilgan. *inson* so'zida boshqa ma'nodoshlariga nisbatan ulug'vorlik, yuksaklik bor. Ammo uni ham salbiy ma'noda qo'llash mumkin: "Xo', *inson*, bu nima noma'qulchilik, tilsiz jonivorda nima qasdingiz bor?!"

inson so'zi o'rnda ko'p hollarda *odam* so'zini ishlatish mumkin. Lekin *kishi*, *shaxs*, *kimsa* so'zlarining o'z xos o'rnlari bor. Deylik, *shaxs* jamiyat bilan bog'liq hollarda, kishining o'zligini namoyon etishi kabi vaziyatlarda qo'llanadi. Masalan:

1. *inson* zoti (*odamzot*) qadam qo'yagan orolcha topildi.
2. Har bir *inson* (*odam*, *kishi*) ta'lif-tarbiyaga jiddiy e'tibor qaratishi kerak. (Bu o'rinda *inson* yoki *odamdan* ko'ra *kishi* so'zini ishlatgan ma'qul. Ammo *inson* va *odam* so'zini ishlatish ham xato emas.)
3. *inson* – aziz, *inson* – mukarram. (Bu o'rinda hatto *odam* so'zini ishlatish ham unchalik to'g'ri emas. Boshqa sinonimlarni esa mutlaqo ishlatib bo'lmaydi.)

inson so'zini qo'llash xato bo'lgan o'rnlar ham bor. Masalan:

1. Alp Er To'nga – tarixiy shaxs. (Bu o'rinda ma'nodoshlardan faqat *shaxs* so'zini ishlatish mumkin.)
2. Er kishi ayoliga yumshoq muomala qilishi kerak. (Bu o'rinda boshqa sinonimlarni qo'llab bo'lmaydi.)
3. Faqat jig'ildonini o'ylaydigan kimsalar daraxtlarni kesib, pullab yubordi. (Bu o'rinda *kimsa* so'zini qo'llash eng to'g'risidir.)

Endi hozir muomalada yo'l qo'yilayotgan xatolarga e'tibor qaratamiz:

1. Ayni damda bir *insonimiz* qo'ng'iroq qilib, bizga bog'landilar.

Bu gapni "Hozir bir muxlisimiz (tinglovchimiz, tomoshabinlarimizdan biri) qo'ng'iroq qilib, bizga bog'landilar", deb ishlatish to'g'ri bo'ladi.

Shu ifodaning boshqa ko'rinishlari ham bor. Masalan, "Bir *insonimiz* keldilar", "Tejamkorlikning ahamiyatini to'g'ri anglagan insonlarimiz isrofdan tiyiladilar". Birinchi misolda bir so'zini ham olib tashlab, mehmonimiz, biz kutgan *kishi*, ikkinchi misolda esa kishilar yoki so'zni to'la qisqartirib to'g'ri anglaganlar deyish mumkin.

Izoh: *inson* hech kimniki bo'lmaydi. Shunday ekan, *insonim*, *insoning*, *insoni*, *insonimiz*, *insoningiz*, *insonlari* deyish xato. Qadrli *insonim* deb yozish o'rniqa qadrdonim yoki azizam deyish to'g'ri va mantiqli.

2. Tadbirga juda ko'p *insonlar* keldi.

Bu jumlada eng mos so'z *kishidir*. -lar qo'shimchasi ham ortiqcha, chunki ko'p so'zida ko'plik ma'nosи ifodalab bo'lingan. Yoki *odam* so'zini ham ishlatish mumkin.

Endi shu jumlaning sal o'zgargan shakliga e'tibor qaratamiz: "Tadbirga juda ko'p taniqli *insonlar* keldi". Bu o'rinda ham eng to'g'ri tanlov *kishi* so'zidir: "Tadbirga juda ko'p taniqli kishilar keldi".

Orif Tolib



O'QUV YILI OXIRIDA TAKRORLASH



Bo'sh vaqtingizda mutolaa bilan shug'ullanmasizmi? Ko'proq nimalarni o'qiyisiz?



Rasmida tasvirlangan jurnal, gazeta, kitoblar bilan tanishing hamda savollarga javob bering.





1. Siz rasmdagi qaysi gazetalar haqida bilasiz? Ularning nomlanishi haqida fikr bildiring.
2. Qaysi jurnallarni o'qib borasiz?
3. Qanday badiiy asarlarni sevib o'qigansiz?
4. Sizga qaysi turdagи kitoblar ko'proq yoqadi?



Jadvalni to'ldiring. Imlo qoidalariga rioya qiling.

Gazeta	Jurnal	Badiiy kitob	Ensiklopediya
"Ma'rifat"	"Jazzi akademik"	"Bolaligim – poshsholigim"	"Yer sayyorasi"



1. Sizningcha, tengqurlaringiz orasida qanday gazeta yoki jurnalga ehtiyoj bor? Uning mundarijasi, ruknlari qanday bo'lishini xohlaysiz? Shu mazmunda matn yozing.

- 1 nomi
- 2 qanday sahifalar bo'lishi
- 3 birinchi muqovadagi shiori
- 4 dizayni
- 5 qiziqarli bo'lishi uchun tavsiyalar
- 6 xulosa



Sinfdoshingiz tuzgan matnni tinglang va unga munosabat bildiring.



Tuzgan matningiz asosida gazeta yoki jurnal sahifasini tayyorlang. O'qituvchingizga taqdim eting.




Sizning tasavvuringizcha, iste'dodli qalamkash qanday bo'ladi?



Matnni o'qing va savollarga javob bering.

...



So'z – qudratli, ta'sirchan va **mas'uliyatli** qurol. Ijodkorning so'z boyligi qancha katta bo'lsa, yozish jarayoni shuncha tez va tabiiy kechadi. Bu borada, chetroqdan bo'lsa ham, ikkita misol aytish mumkin. Bundan ancha yil avval dengizga dam olishga borganimda, savdo kemasida kapitan yordamchisi bo'lib ishlovchi odam bilan hamxona bo'lib qoldik. Ko'pni ko'rgan, bilimdon kishi ekan. Uning bir odati bor edi. Har kuni cho'milishga borganda bir qo'li bilan gazetani boshi ustida baland ko'tarib oladi-da, ikkinchi qo'li bilan yonboshlab suzgan ko'yи dengiz ichkarisiga yuz-ikki yuz quloch joyga suzib boradi. So'ng suv ustiga chalqancha tushib, soatlab gazeta o'qib yotadi. Nima uchun cho'kib ketmasligini so'raganimda g'alati gap

aytdi: "Oddiy odamlar yerda yurganida o'zini qanchalik erkin sezsa, haqiqiy dengizchi ham ummonda o'zini shunday erkin his qilishi shart. Dengiz mening o'z uyim, o'z dardim".

Yana bir misol. O'tgan asrning yetmishinchı yillari sho'ro xokkeychilari bilan kanadaliklar o'rtasida ayovsiz janglar bo'lardi. Kanadaliklar orasida Bobbi Hall degan juda mohir va jangarisi bor edi. Raqiblari bilan mushtlashaverib sog' joyi qolmagan, "Ming chandiqli odam" laqabini olgan Bobbidan "Xokkeychi bo'lish uchun nima qilish kerak?" deb so'rashganida, boshqalar tekis yo'lda yurganda o'zini qanday erkin his qilsa, xokkeychi ham muz ustida shunday yurishi, oyog'ida konki borligi **hayoliga** kelmasligi kerak, deb javob qilgan edi.

Shu mantiqdan kelib chiqadigan bo'lsak, haqiqiy qalamkash ham so'zlar ummonida o'zini dengizchidek erkin his etmog'i, qachon, qanday so'z ishlatishni bilmay, ikkilanib qolmasligi kerak. Odatda asar tug'ilishi jarayonida kerakli so'zlarning o'zi quyilib keladi. Biroq "quyilib kelgan" so'zlarning duch kelganini ishlatish to'g'ri emas. Chinakam ijodkor o'nta muqobil so'z orasidan bitta eng keraklisini tanlab olishi, ya'ni so'z ummonida suzayotib, "bo'sh chig'anoq"ni emas, "ichida gavhari bor" chig'anoqni olib chiqishi lozim.

O'ziga talabchan qalamkash har bir so'zning ma'nosinigina emas, kelib chiqishini ham yaxshi bilmog'i shart. O'rinsiz ishlatilgan bitta so'z butun boshli asar **xusnini** buzishi mumkin. Haqiqiy badiiy, publitsistik asarda fikr bilan birga manzara va muhit, rang va ohang, inson qiyofasi va fe'l-atvori yaqqol ko'rinib turadi. Shoir yoki adib gullagan shaftolizorni shunday tasvirlaydiki, kitob o'qiyotganingizda bog' ichiga kirib sayr qilayotgandek, yengil shamol epkinida ustingizga shaftolining **pushti rang** gullari unsiz yog'ilayotgandek bo'ladi. Yarim kechasi olisdan o'tib borayotgan poyezd g'ildiraklari ovozini shunday tasvirlaydiki, o'sha tovushni siz ham eshitib, olis-olislarga ketib qolgingiz keladi. Qovun polizini ko'z o'ngingizga



shunaqangi aniq keltirib qo'yadiki, dimog'ingizda handalak isi gurkirab ketadi. Publitsistik asar esa ko'ngilda fikr-mulohaza uyg'otadi.

Syujet qurilishi, voqealar rivoji, detallardan to'g'ri foydalanish, ruhiy holatning aniq va teranligi, **xarakter** yaratish – bularning hammasi til mahorati bilan bog'liq murakkab muammolar. Hatto bir qarashda anchayin oson yumushdek ko'ringan portret chizishda ham katta iste'dodlar ajralib turadi. Asar qahramoni qiyofasi shunchaki portret emas, tirik odamga aylanadi. Bundan tashqari, badiiy asarda so'zning ichki musiqasi – ohangi bo'lishi shart.

Iste'dodli qalamkash uchun tabiat tasviri ham shunchaki peyzaj emas. Asardagi odamning ahvol-ruhiyasi, kechinmalari, dinamikasi va hatto talay tagma'nolarni ham oddiy peyzajga bermalol joylash mumkin.


Bir manzaraning o'zi qahramon ruhiyatidan kelib chiqib ikki xil ma'no tashishi mumkin. "Osmonda yulduzlar yorqin-yorqin porlab, uch kunlik hilol tillaqoshdek yaraqlab turar edi". Bu bir holat. "Kirlangan dokadek xira bulut ortida shom yegan oy ma'yus mung'ayib turibdi". Bunisi boshqa holat.

"Qor uchqunladi" degan ibora bilan "Gupillatib qor yog'di" degan iborada bir xil tabiat hodisasi – qor yog'ishi tasvirlanyapti. Ammo dinamika, harakat ikki xil. Yoki "Shabada esdi, deraza ortidagi bir tup terak yaproqlari erkalanib raqsga tushdi" degan jumla bilan "To'satdan qattiq shamol turdi, deraza ortidagi bir tup terak yaproqlari jonsarak qaltirab qoldi" degan jumlada ikki xil holat bor. "Oydin kechalari gullagan o'rik tagida yotsangiz, osmonning allaqaysi burchida uchib borayotgan turnalarning shodon _____ eshitiladi" yoki "Oydin kechalari yaprog'i sarg'aygan o'rik tagida yotsangiz, bulut qoplagan osmonning allaqaysi burchida uchib borayotgan turnalarning **xorg'in** nolasi quloqqa chalinadi" degan jumlalarda ikki xil fasl, ikki xil kayfiyat, ikki xil tuyg'u mavjud.

"So'z boyligini oshirish uchun nima qilish kerak?" degan savol ham tabiiy. "Ijodkor qancha ko'p o'qisa, so'z boyligi shuncha oshadi" deganlari rost. Biroq faqat kitob o'qish bilan so'z xazinasini to'ldirish qiyin. Bu xazina xalqning o'zida yotibdi. Bir so'zga o'nta ma'noni yuklaydigan askiya degan san'at faqat o'zbekda bor!

So'zning tag'in bir xazinasi – bozor! Bozorga kirib, aqalli ikki soat aylansangiz, shunaqangi tesha tegmagan gaplarni eshitasizki, bunaqasini yigirma jildli izohli lug'atdan ham topolmaysiz. Personaj tilini individuallashtiraman deb bosh qotirib o'tirishga hojat golmaydi.

Diktofonga **muxrlab** olsangiz, bir vaqtlar Abdulla Qodiriy qahramon tilidan o'zini ham, atrofdagilarni ham qoyilmaqom qilib tasvirlagan hikoyalarning zamonaviy namunalarini yozishingiz mumkin. Afsuski, biz oyog'imiz ostidagi xazinani ko'ravermaymiz. Albatta, bunday imkoniyatdan foydalanish kerak. Biroq bunday xazina sof oltin degani emas. Bir vagon qumdan bir misqol oltin ajratib ololsangiz ham katta gap!



O'tkir Hoshimov



1. Yozuvchi sharhlagan ibora va jumlalardan nimani tushundingiz?
2. "Personaj" so'zini izohlang.

Faqat bitta to'g'ri javobni tanlang.

1. Muallifning kapitan yordamchisi va xokkeychi haqidagi ma'lumotlarni keltirishdan maqsadi nima?

- A. Dengizga qilgan sayohatidagi esda qolarli voqeani so'zlab berish
- B. Dengizchining mahoratini hayotiy voqeasi asosida baholash
- C. Kapitan yordamchisining bilimli va chaqqon ekanini ko'rsatib berish
- D. Haqiqiy qalamkash sifatlarini baholashni o'xshatish asosida tushuntirish

2. Ushbu gap tarkibidagi qaysi so'z(lar) ko'chma ma'noda qo'llangan?

So'z – qudratli, ta'sirchan va mas'uliyatlil quroq.

3–5. Faqat bitta to'g'ri javobni belgilang.

3. Muallif o'ziga talabchan qalamkashning so'z ma'nolarini bilishdan tashqari yana qanday sifati bo'lishi muhimligini ta'kidlaydi?

- A. So'zlarning etimologiyasini bilish
- B. So'zlarning grammatik ma'nolarini bilish
- C. Inson qiyofasi hamda fe'l-atvorini yaqqol tasvirlay olish
- D. So'zlarning asarga husn qo'shadigan xususiyatlarini bilish

4. Muallifning fikriga ko'ra, haqiqiy publitsistik va badiiy matnga xos sifatlar qaysi javobda keltirilgan?

- A. Ruhiy holatning aniq va teranligi, xarakter yaratish mahorati
- B. Syujet va manzara, voqealar rivoji, detallardan to'g'ri foydalanish
- C. Iste'dod va tajriba, so'z boyligi va hozirjavoblik, so'z ishlatish mahorati
- D. Manzara va muhit, rang va ohang, inson qiyofasi va fe'l-atvori

5. Quyida berilgan so'zlarning qaysi biri matn tarkibidan olingan ushbu parchada tushib qolgan so'z o'rniغا ko'proq mos keladi?

"Oydin kechalari gullagan o'rik tagida yotsangiz, osmonning allaqaysi burchida uchib borayotgan turnalarning shodon _____ eshitiladi" yoki "Oydin kechalari yaprog'i sarg'aygan o'rik tagida yotsangiz, bulut qoplagan osmonning allaqaysi burchida uchib borayotgan turnalarning horg'in nolasi qulorra chalinadi" degan jumlalarda ikki xil fasl, ikki xil kayfiyat, ikki xil tuyg'u mavjud.

- A. Qichqirig'i
- B. Qiyqirig'i
- C. Ovozi
- D. Tovushi

6. Matn mazmuni asosida chiqarilgan quyidagi xulosalarning qaysi biri noto'g'ri?

- A. Ijodkor qancha ko'p o'qisa, so'z boyligi shuncha oshadi, ammo faqat kitob o'qish bilan so'z xazinasini to'ldirish qiyin.
- B. Chinakam ijodkorning iste'dodi o'nta muqobil so'z orasidan bitta eng keraklisini tanlab olishni bilishida namoyon bo'ladi.
- C. Badiiy va publitsistik asarga mos keladigan sifatlar o'zaro o'xshash bo'lib, badiiy asar fikr va mulohaza uyg'otishi bilan publitsistik asardan biroz farq qiladi.
- D. Haqiqiy qalamkash so'zlar ummonida o'zini dengizchidek erkin his etmog'i, qachon, qanday so'z ishlatishni bilmay, ikkilanib qolmasligi kerak.

7. Matnda ajratib ko'rsatilgan qismning hech qanday ishoraviy xatoliklarsiz berilgan variantini aniqlang.

- A. Bir manzaraning o'zi qahramon ruhiyatidan kelib chiqib ikki xil ma'no tashishi mumkin. "Osmonda yulduzlar yorqin-yorqin porlab, uch kunlik hilol tillaqoshdek yaraqlab turar edi". Bu bir holat. "Kirlangan dokadek xira bulut ortida shom yegan oy ma'yus mung'ayib turibdi". Bunisi boshqa holat.
- B. Bir manzaraning o'zi qahramon ruhiyatidan kelib chiqib, ikki xil ma'no tashishi mumkin. Osmonda yulduzlar yorqin-yorqin porlab, uch kunlik hilol tillaqoshdek yaraqlab turar edi. Bu – bir holat. Kirlangan dokadek xira bulut ortida shom yegan oy ma'yus mung'ayib turibdi. Bunisi boshqa holat.
- C. Bir manzaraning o'zi qahramon ruhiyatidan kelib chiqib, ikki xil ma'no tashishi mumkin. "Osmonda yulduzlar yorqin-yorqin porlab, uch kunlik hilol – tillaqoshdek yaraqlab turar edi". Bu – bir holat. "Kirlangan dokadek xira bulut ortida shom yegan oy ma'yus mung'ayib turibdi". Bunisi – boshqa holat.
- D. Bir manzaraning o'zi qahramon ruhiyatidan kelib chiqib ikki xil ma'no tashishi mumkin. "Osmonda yulduzlar yorqin-yorqin porlab, uch kunlik hilol tillaqoshdek yaraqlab turar edi". Bu – bir holat. "Kirlangan dokadek xira bulut ortida shom yegan oy ma'yus mung'ayib turibdi". Bunisi – boshqa holat.

8. Matnda ajratib ko'rsatilgan so'zlarning barchasi imloviy jihatdan to'g'ri yozilgan qatorni belgilang.

- A. Mas'uliyat, pushtirang, husn, xarakter, muhr, horg'in, hayol
- B. Ma'suliyat, pushtirang, xarakter, muhr, xorg'in, xayol, husn
- C. Mas'uliyat, pushtirang, husn, xarakter, xayol, horg'in, muhr
- D. Ma'suliya, pushtirang, xarakter, husn, muhr, horg'in

9. Matnda ta'kidlangan qahramonning o'ziga xos xarakterini ochib beradigan jumla(lar)ni aniqlang.

- A. "Yo'q, qorin janoblari to'qlar, ertalab baliq yegan edik, faqat choy bo'lsa kifoya", – dedi u kulib.
- B. "Hademay bir-ikkita sovlig'im qo'zilaydi. Og'iz ichgali bermalol tashrif buyurishlaring mumkin".
- C. Akalari izidan Samarqandga borsa, "Ko'nglim shuni xohladi, borib aytinlar otamga", deb ularni qaytarib yuborgan ekan.
- D. "Barakalla, ota o'g'il, bopladingiz!" O'g'li Husanboyni bag'rige mahkam bosib, shunday deyishni diliga tuggan Ma'rufjon Hayitboyevni suhbatga tortamiz.

10. Ushbu matnning publitsistik uslubda yozilganini hisobga olgan holda berilgan variantlardan matn uchun eng mos keladigan sarlavhani tanlang.

- A. So'z boyligini oshirish usullari
- B. Ummondag'i xazina
- C. Haqiqiy qalamkash
- D. Yozuvchiga tavsiyalar



Matndan iboralarni topib, yozing.

Namuna bosh qotirmoq, ...



"So'zning tag'in bir xazinasi – bozor! Bozorga kirib, aqalli ikki soat aylansangiz, shunaqangi tesha tegmagan gaplarni eshitasizki, bunaqasini yigirma jildli izohli lug'atdan ham topolmaysiz". Ushbu fikrga munosabat bildirib, kichik izoh yozing.



Yuqoridagi matndan qo'shtirnoq qo'llangan birliklarni ajrating hamda nima uchun ishlatilganini farqlab, izoh yozing.



Matnda qo'llangan fe'llarning zamonini aniqlang. Ko'makchi fe'lli so'z qo'shilmalarini aniqlab, yozing.



Quyida berilgan so'zlarning matn mazmuniga mos keluvchi izohlarini topib, daftaringizga ko'chiring.

portret	real hayotda mavjud bo'lgan bir yoki bir necha kishining yoki rassom tasavvuridagi qiyofanining tasviri, fotograf olgan surat.
	adabiy asarda personajlar qiyofasining tavsifi, tasviri.
syujet	badiiy asarda, filmda voqeа-hodisalar tasviri, bayonidagi izchillik va o'zaro aloqa; badiiy asar mazmuni.
	tasviriy san'atda: tasvir obyekti, predmeti.
xazina	yer yoki tabiat boyliklari, tabiiy boylik.
	biror shaxs, tashkilot yoki davlat ixtiyoridagi qimmatbaho buyumlar; mablag'; boylik; davlat.
	madaniy va ma'naviy boyliklar, durdona asarlar majmui.
	oltin, kumush kabi qimmatbaho narsalar ko'milgan, yashirilgan joy.
qahramon	biror voqeа-hodisa va shu kabilarning sodir bo'lismiga sabab bo'lgan yoki unda asosiy rol o'ynagan shaxs.
	badiiy asarning bosh ishtirokchisi.
	shijoati, dovyurakligi, botirligi bilan shuhrat qozongan, jonbozlik, mardlik qilib, o'zini ko'rsatgan shaxs.





Matndan yozuvchining o'ziga xos o'xshatishlarini aniqlab, qayta o'qing. Ularning mazmunini izohlashga harakat qiling.

Namuna Kirlangan dokadek xira bulut ortida shom yegan oy ma'yus mung'ayib turibdi.



Matnda qo'llangan omonim so'zlarni toping. Ular ishtirokida gaplar tuzing. Sinfdoshingiz bilan shunday so'zlardan topib, ularning izohini yozing.

Namuna til, ...



Matndan olgan xulosangizni yozing.



Sinfdoshlaringiz yozib kelgan xulosalarini diqqat bilan tinglang. Ularga munosabat bildiring. Munosabat bildirishda "Yaxshi", "Juda ajoyib", "Zo'r" yoki "Yaxshi yozilmagan", "Menga yoqmadni" kabi umumiy gaplarni aytmang. Aynan nimasi yaxshi yoki yomon ekanini izohlab bering.



3 guruhga bo'lining. Imloviy, ishoraviy va uslubiy xatolarga yo'l qo'yilgan matnni tahrir qiling.



Jamoaviy tahrir qilgan matningizni boshqa jamoa bilan almashtiring. Ularning tahriri bilan tanishing.



O'qituvchingiz taqdim etgan matn bilan jamoangiz tahrir qilgan matnni solishtiring. Qanday xatolar e'tiboringizdan chetda qolganini bilib oling.

Ta'til davomida allomalarimiz aytgan qimmatli o'gitlar bilan tanishing hamda ularni yondaftarchangizga qayd etib boring. Sinfdoshlaringizni Bilimlar kuni bilan tabriklash uchun to'plagan materiallaringiz asosida kichik kitobcha tayyorlang. Unga turli bezaklar berishga harakat qiling.

Ilmsiz iliksiz so'ngak kabi bo'shdir, iliksiz so'ngakka qo'l urilmaydi. Bilim bilan kishining martabasi oshadi, ilmsizlik esa kishini tubanlashtiradi. Bilimli kishi kerakli so'zni so'zlaydi, keraksiz so'zni ko'mib tashlaydi.

Ahmad Yugnakiy



BILIMINGIZNI SINANG!

O'zbekiston 2022-yildan boshlab Xalqaro o'quvchilarni baholash dasturi (The Programme for International Student Assessment – PISA)da ishtirok eta boshladi. Ushbu dasturda 15 yoshga to'lgan o'quvchilar qatnashishi mumkin.


Quyidagi topshiriqlar ketma-ketligi sizlarni ana shu baholash dasturi doirasidagi sinovlar bilan tanishtirish maqsadida ishlab chiqilgan.

ESLATMA!

Hurmatli o'quvchi! Test topshiriqlarining javoblarini kitobga belgilash mumkin emas. Daftaringizga matn nomini sarlavha ko'rinishida yozib, test raqami va kerakli javobni belgilashingiz, yozish kerak bo'lgan o'rinnlarda yozishingiz lozim.

UNUTISH YOYI

1850-yilda nemis psixologi Herman Ebbinhaus birinchilardan bo'lib inson xotirasini laboratoriya tadqiqotlariga "olib kirdi". Shu orqali u ta'lim tizimidagi eng munozarali faktni kashf qilgan olim sifatida butun dunyoga mashhur bo'ldi. Odam odatda o'rganganlarining 90 foizini 30 kun mobaynida sekin-asta unutib boradi. Juda katta hajmdagi unutish esa dars tugashi bilanoq sodir bo'ladi. Ya'ni siz hozirgina o'qigan kitobingizdan bilib olgan ma'lumotlarni o'qishni tugatishingiz bilan unutishga "kirishasiz". Bu favqulodda xotira egalaridan tashqari, barcha odamlarga xos xususiyat. Ebbinhaus o'z tadqiqotlarini ilmiy jurnalda e'lon qilib, xotiramizning "unutish yoyi"ni matematik hisoblab chiqdi va 1-chizmadagi natijaga erishdi.





Ebbinhaus qanchalik ko'p tajriba o'tkazmasin, natijalar deyarli bir xil chiqadi. Ya'ni odamlar bir soatdan so'ng, o'rgangan ma'lumotlarining 50 foizini esdan chiqarib yuboradi. Bir kundan keyin esa yana 10 foiz ma'lumot qayqqadir g'oyib bo'ladi. Xuddi miyamiz ularni keraksiz ma'lumot deya axlatga tashlab yuborgandek. Bir oy o'tib esa yana 14 foizi xotiramizdan o'chib ketadi. Shundan so'ng xotirada ma'lumotlar barqarorlashadi, doimiy xotiraga o'tib, unutish tezligi ham me'yorga tushadi.

Ko'rinib turibdiki, har qanday

ma'lumotni o'rganganimizdan keyin qanchalik ko'p vaqt o'tsa, u ma'lumotni xotirada saqlab qolish ham shunchalik susayib boraveradi. Agar siz bir marta ham o'sha ma'lumotni takrorlamasangiz yoki unga murojaat qilmasangiz, 31-kunga kelib uning 90 foizini unutib qo'yasiz. Hech qachon imtihondan oldin ko'p ma'lumot yodlab qolishga, bir necha soat oldin taqdimotingiz nutqini takrorlab chiqishga harakat qilmang – bu befoyda. Imtihondan bir kun oldin barcha ma'lumotlarni miyaga "tiqishtirish" inglizchada *cramming* deyiladi. Bu katta miqdordagi ma'lumotning baribir unutilib ketishiga olib keladi. Undan ko'ra oralatib takrorlash orqali ma'lumotlarni xotirada yaxshiroq saqlab qolish mumkin.

ORALATIB TAKRORLASH

Bu qoidaga ko'ra, siz ma'lumotlarni ora-orada takrorlab uzoqroq vaqt "xotira diskii"ngizda saqlab turasiz. Imtihonlarga 1–2 oy oldindan ma'lumotlarni sekin-asta takrorlab borish orqali tayyorlanish ancha unumli hisoblanadi.

O'ta ko'p takrorlash yoki o'rganish deganda kam-kamdan ko'p marotaba axborot olish nazarda utiladi. Bu degani yodlanishi kerak bo'lgan kitobni 1 yoki 2 soatlab takrorlash zarur degani emas. Negaki miyamizga orada ozgina dam berib turish foydali. Yarim soatlik o'qishdan so'ng 5 daqiqa tanaffus qilib, yana 5 daqiqa o'qiganlarimizni takrorlab, keyin yangi ma'lumotga o'tsak, uni yaxshiroq eslab qolishimiz mumkin bo'ladi. Nega miyaga dam berish kerak? Olimlarning aytishicha, miyaga dam berganimizda ongsiz ravishda o'sha ma'lumotlarni takrorlaymiz. Miyamizda ma'lumotlar joylashgan neyronlar qalinlashadi. Biroz vaqt o'tib takrorlaganimizda esa u neyronlar yanada mustahkamlanadi.

Harvard tibbiyot maktabi professori Kris Kerfut talabalarining ma'lumotlarni esdan chiqarib qo'yaverganidan bezor bo'lib, bir usulni o'ylab topadi. Unga ko'ra, Kerfut o'z faniga oid savol-javoblar tizimini ishlab chiqadi. Shu savollarga javob bo'la oladigan faktlarni har hafta o'quvchilarining elektron pochtasiga yuborib turadi. Har hafta yangi mavzu bilan birga eski mavzuning ayrim faktlarini ham jo'natadi. Yil oxirida esa pochta orqali xat olib turgan talabalar boshqalarga qaraganda sezilarli darajada yaxshi natija ko'rsatgan.

Shohrux-Mirzo Rahmonov

TEST TOPSHIRIQLARI

1. Qisqa javob yozing.

Odam qancha vaqt mobaynida o'rganilgan ma'lumotning 10 dan 9 qismini unutib yuboradi?

2. Qisqa javob yozing.

Matnda tilga olingan unutish davrining ko'rsatkichlari kimlarga tegishli emas?

3. To'g'ri javobni toping.

1-chizmaga ko'ra, inson o'rganilgan ma'lumotning necha foizini 19 daqiqadayoq unutadi?

- A) 40 foizdan ko'prog'ini
- B) 30 foizdan ko'prog'ini
- C) 60 foizdan ko'prog'ini
- D) 50 foizdan ko'prog'ini

4. To'g'ri javobni toping.

Qaysi davr oralig'ida nisbatan ko'proq ma'lumot unutiladi?

- A) 1-kunning dastlabki 19 daqiqasi ichida
- B) 6-kun bilan 31-kun oralig'idagi 25 kun ichida
- C) 2-kun bilan 6-kun oralig'idagi 4 kun ichida
- D) dastlabki 63-daqiqadan 2-kungacha bo'lgan vaqt oralig'ida

5. Qisqa javob yozing.

Biror ma'lumotni unutish tezligi qancha vaqtdan so'ng me'yorlashadi?

6. To'g'ri javobni toping.

Maqolada "joylash" so'zini qo'llash mumkin bo'lgan o'rinda "tiqishtirish" so'zini qo'llash orqali qanday qo'shimcha ma'noga ishora qilingan?

- A) majburlash, zo'r lash
- B) tezlik, kam vaqt sarflash
- C) tartibsizlik, qoidani buzis
- D) o'rnatish, sig'dirish

7. To'g'ri javobni toping.

Bu qoidaga ko'r'a, siz ma'lumotlarni ma'lum bir oraliqlar davomida takrorlash orqali uzoqroq vaqt "xotira diskiga" saqlab turasiz.

Gapda tilga olingan qoida qaysi?

- A) ma'lum vaqt orasida qaytarish
- B) ma'lumotlarni miyaga "tiqishtirish"
- C) xotira diskida uzoqroq saqlash
- D) imtihonga tayyorlanish

8. Qisqa javob yozing.

Ma'lumotlar joylashgan neyronlarning qalinlashuviga nima sabab bo'ladi?

9. To'g'ri javobni toping.


Kris Kerfutning tajribasi nimaga asoslangan edi?

- A) topshiriqni elektron pochta orqali yuborishga
- B) ma'lumotlarni doimiy qaytarib turishga
- C) yangi ma'lumotlarni navbatli bilan berishga
- D) imtihon savollarini oldindan berib borishga

UNUTISH YOYINI YENGISH

2-chizmada unutish yoyini qanday qilib dog'da qoldirish mumkinligi tasvirlangan. Bu yerdagi oraliqlarga qat'iy amal qilish kerak. Oraliq tashlab takrorlash ham xotiramizga yaxshi foyda beradi. Xo'sh, bu nima degani?

Ma'lumotni olganingizdan keyin ozgina dam olib, 10 daqiqadan so'ng yana bir sidra takrorlab oling. Shunda ma'lumotni bir sutka davomida unutib qo'yiamsiz. Ertasi kuni ham yana bir marta takrorlasangiz, o'sha ma'lumot xotirangizda 1 haftagacha saqlanadi. Bir haftadan keyin yana takrorlasangiz, endi u 1 oygacha unutilmaydi. Bu xotirangizdagi ma'lumot endigina o'chib ketayotganda uni joyiga qaytarib qo'yish degani. Takrorlash hech qanday qo'shimcha usullarsiz, mnemonika darslarisiz ham ma'lumotlarni doimiy xotiraga joylashtirish uchun xizmat qila oladi.



2-chizma

Ta'limga doir statistik tahlillarga ko'ra, o'quvchilar 7-sinfda olgan ma'lumotlarini 8-sinf bo'lganlarida unutib yuboradilar. Balki, yozgi ta'til vaqtida unutib yuborishar?! Sababi ular o'qiganlarini takrorlamaydi-da! Ayniqsa, O'zbekiston ta'limida ma'lumotlar yil davomida takrorlanib, mustahkamlanib borilmaydi. Yangi ma'lumot ustiga yangi ma'lumot "tiqishtiriladi". Bu oldinroq olingen ma'lumotlarning o'chib ketishiga zamin yaratadi.

Miyamiz har doim ham kerak bo'lmaydigan ma'lumotlardan xotiramizni tozalab turadi. Bu nazariyaning asosi juda sodda – odam xotirasi unutishga moyil.

Takrorlashni oson hamda foydali shaklda rejalshtirish lozim. Chakalakzorni ko'rgan bo'lsangiz kerak, xotiramiz ham unga o'xshaydi. Agar chakalakzor oralab bitta chiziqdandan hadeb yuraversangiz, u yerda so'qmoq paydo bo'ladi. Keyinroq o'sha so'qmoq ko'zga tashlanib, undan yurish yanada osonlashib qoladi. Bu so'qmoqdan yurmay qo'yilsa, o't-o'lan bosib ko'zdan g'oyib bo'ladi. Dono xalqimiz "Yuz martada yod bo'ladi, ming martada – muhr" degan gapni bejiz aytmagan. Uxlashdan oldin va uyqudan so'ng takrorlash samaraliroq natija beradi. Chunki uxlayotganingizda miya ma'lumotlarni doimiy qayta ishlab turadi.

Shohruh-Mirzo Rahmonov

TEST TOPSHIRIQLARI

1. Qisqa javob yozing.

Birinchi gapdagi qaysi birlik sarlavhadagi “yengish” so’ziga ma’nodosh?

2. Qisqa javob yozing.

Ma'lumotni bir oygacha xotirada saqlab qolish uchun nimalar qilish kerak?

3. To'g'ri javobni toping.

2-chizmaga ko'ra, oralatib takrorlash...

- A) o'r ganilgan ma'lumotni to'liq eslab qolishga yordam beradi
- B) ma'lumotning katta qismini eslab qolishga yordam beradi
- C) ma'lum oraliqlarga ega 5 ta bosqichni o'z ichiga oladi
- D) 2 kun mobaynida ma'lum oraliqlar bilan davom etadi

4. Qisqa javob yozing.

Muallif O'zbekiston ta'limining qaysi jihatini tanqid qildi?

5. To'g'ri javobni toping.

Maqolada xotira chakalakzorga o'xshatiladi. Shu “chakalakzor”dan oson o'tish yo'li bu – ...

- A) vaqt-i-vaqt bilan tanaffus qilib turish
- B) muntazam takrorlab turish
- C) doim bir manbadan o'rganish
- D) uyqudan oldin va keyin takrorlash

6. To'g'ri javobni toping.

Xulosa qismida muallif qanday vosita orqali o'zining barcha fikrlarini asoslashga urinadi?

- A) o'xshatish orqali
- B) qiyoslash orqali
- C) maqol orqali
- D) ilmiy asos orqali

GILAMPAYPOQ

Har yili dam olishga borganimda onamga gilampaypoq olib kelaman. Kavkaz tomonda ko'p bo'ladi. Juba deyishadi, jurabi deyishadi. Oyim xuddi noyob narsaga ega bo'lgandek, uzundan uzoq duo qiladi. Shundoq mehribon o'g'li borligini aytib qo'shnilar maqtanadi. Uning oyog'i kasal. Salqin tushishi bilan shishib ketadi, og'riydi.

Qo'ni-qo'shnilar ahvol so'rasa, ularniyam, o'ziniyam yupatadi.

– Ha, endi keksalik-da, o'rgilay.

Lekin onamning oyoq og'rig'i faqat keksalikdan emas. Buni boshqalar bilmasa ham, men bilaman. Yaxshi bilaman.

Bolaligimda ko'p kasal bo'lardim: qizamiq, ko'kyo'tal, bezgak... Shuning uchun oshxonadagi mixda ko'k qarg'aning patidan tortib, gultojixorozgacha ilig'lik turardi... Ayniqsa, tomoq og'rig'i yomon qiy Naydi. Oyog'im zaxga tegishi bilan to mog'im og'rishga tushadi. Oyoq bilan tomoqning nima aloqasi borligini haliyam tushunolmayman.

O'shanda necha yoshligrim esimda yo'q. Biroq juda kichkina edim. Bir kuni akalarim bilan yaxmalak o'ynab terlab ketdim. Terlab turib muz yedim. Kechqurun isitmam ko'tarildi. Quv-quv yo'talaman. Oyim to mog'imni achchiqtosh bilan chayib ko'rdi, bo'lindi, turshak qaynatib suvini ichirdi, bo'lindi... Oxiri to mog'im xippa bo'g'ilib qoldi. Og'riqni sezmayman-u, nafas olishga qiynalaman. Hushimdan keta boshlaganimni es-es bilaman. Qulog'im ostida onamning chirqillab yig'lagani, hadeb bir gapni qaytarayotgani eshitiladi:

– Voy, endi nima qilaman! Voy, bolam o'lib qoladi!

Keyin meni shosha-pisha ko'rpachaga o'radi. Bir mahal onamning qo'lida ketayotganim esimda bor. Gupillatib qor yog'ayotganini his etib turardim-u, biroq yuzimga qor tushmas edi. Onamning issiq nafasi urilib turar, u sirg'anib-sirg'anib borar, og'ir hansirar edi.

Xira chiroq miltirab turgan allaqanday uyga kirdik. Ko'z o'ngim yana qorong'ilashib ketdi. Oyim hamon chirqillaydi.

– O'lib qoladi! Bolaginam o'lib qoladi!

– Vahima qilmang, poshsha, dardni bergan Xudo, davosiniyam beradi.

Bu Hoji buvining ovozi ekanini g'ira-shira idrok etdim.

Hoji buvi boshimni tizzasiga qo'yib chalqancha qilib yotqizdi. Doka o'ralgan barmog'ini og'zimga tiqdi. Ko'nglim ag'darilib, tipirchilagancha yig'lar, ammo Hoji buvining qo'lidan chiqib ketolmasdim. U to mog'imga nimadir qildi. Dod solib qo'lini tishlab oldim. Qiziq, birpasdan keyin ahvolim yengillashdi. Ko'zimni ochsam, Hoji buvi jilmayib turibdi.

– Nega tishlaysan, kuchukvoy? – dedi boshimni silab.

Keyin tepamga oyim engashdi. U hamon hansirar, sochlari to'zg'ib ketgan, yuzi jiqla ho'l edi.

Birpasdan keyin qaddimni rostlab, tanchaga oyog'imni tiqib o'tirdim. Hoji buvi allaqanday taxir suyuqlik ichirdi. Keyin oyimga qaradi-yu, birdan xitob qildi:

– Voy poshsha-a-a! Nima qilib qo'ydingiz, tamom bo'psiz-ku!

Oyim talmovsirab, goh menga, goh Hoji buviga qarar edi.



– Oyog'ingizdan ayrilibsiz-ku! – dedi Hoji buvi boshini chayqab. – Shu ahvolda qandoq keldingiz?

Kavshandozda turgan oyimning kalishini endi ko'rdim. Kalishning ichi qorga to'la edi.

– Sarpochan kelaverdingizmi?! – dedi Hoji buvi hamon o'sha vahimali ohangda. – Endi nima qilasiz? Qarg'aning miyasini chaqib surmasangiz, cho'loq bo'lib qolasiz.

Oyim tanchadan oyog'ini chiqardi. Ikkala oyog'i qip-qizil go'sht bo'lib ketgan edi.

– Sovuq yegani yo'q, – dedi sekin. – Qaytaga isib ketdi. Qorda o'zi isib ketarkan.

Hoji buvi uning oyog'ini uqalab ko'rdi.

– Sezyapsizmi?

– Nimani? – dedi oyim oyog'iga emas, menga qarab.

– Qo'limni sezyapsizmi?

Oyim indamay bosh chayqadi-da, piqillab yig'lab yubordi.

... Ertasiga u yotib qoldi. Uzoq yotdi. Dadam bir joydan qarg'a otib keldi. Hoji buvi qo'lidan kelgancha dori-darmon qildi... Keyin oyim tuzaldi. Biroq salqin tushishi bilan oyoqlari shishib, azob beradigan bo'lib qoldi...

Har yili dam olishga borganimda onamga gilampaypoq olib kelardim. U xuddi noyob narsaga ega bo'lgandek, uzoq duo qiladi, birpasda hamma qo'shnilariga ko'z-ko'z qilib chiqadi, shundoq "mehribon" o'g'li borligini aytib maqtanadi. Shunda qor gupillab yog'ib turgan mudhish kecha, onamning qip-qizil go'shtga aylanib ketgan oyoqlari ko'z o'ngimga keladi-yu, indamay chiqib ketaman.

*O'tkir Hoshimov,
"Dunyoning ishlari"dan*

TEST TOPSHIRIQLARI

1. Voqeа kim tomonidan hikoya qilingan?

- | | |
|----------|-------------|
| A) ona | B) yozuvchi |
| C) tabib | D) bemor |

2. Yozuvchining onasiga olib kelgan sovg'asi – gilampaypoqni Kavkaz tomonlarda qanday atashadi?

3. Nima deb o'ylaysiz, gilampaypoq haqiqatan ham noyob narsami?

- | | |
|-------|---------|
| A) ha | B) yo'q |
|-------|---------|

Javobingizni izohlang.

4. Hikoyada tomoq og'rig'iда davo bo'luvchi qanday tabiiy vositalar keltirilgan?

5. Matnga asoslangan holda ushbu voqeа yuz bergen paytda hikoya qiluvchining yoshi nechada bo'lganini aniqlang.

- A) 35
C) 10

- B) 15
D) hikoyada ushbu ma'lumot berilmagan

6. "Gupillatib qor yog'ayotganini his etib turardim-u, biroq yuzimga qor tushmas edi".

Matnda berilgan ushbu jumlanı qanday izohlaysiz? Qahramonning yuziga qor tushmasligining sababi nima edi? Javobingizni hikoyada berilgan ma'lumot asosida izohlang.

7. Hikoya matni asosida tabibning bolaga qanday munosabatda bo'lganini anglab olish mumkin?

- A) Bola tabibning qo'lini tishlab olgani uchun uning jahli chiqdi.
B) Tabib onanining ahvoliga achinganidan bolani urishib berdi.
C) Bola tabibning qo'lini tishlab olgani uchun uni erkalatib "kuchukvoy" deb koyidi.
D) Tabib bolalarni yoqtirmas edi, hikoya qahramoniga ham yomon munosabatda bo'ldi.

8. " – Qo'limni sezyapsizmi?

Oyim indamay bosh chayqadi-da, piqillab yig'lab yubordi".

Onaning bosh chayqashi qanday ishorani anglatadi va u nima sababdan yig'lab yubordi?

9. Hikoyada bo'lib o'tgan voqeанинг vaqtlar o'tib onanинг sog'ligiga qanday ta'sir ko'rsatgани berilgan jumlanı aniqlang.

10. Hikoya so'ngida kelgan "mehribon" so'zi nima uchun qo'shtirnoqqa olingan deb o'ylaysiz?

11. Hikoyada keltirilgan quyidagi atamalarga mos keluvchi izohlarni aniqlang.

1. Kavshandoz 2. Sandal 3. Sarpochan 4. Achchiqtosh

Atamalar izohi	Mos keluvchi raqamni yozing
Ma'lum bir joyni isitishga mo'ljallangan, xonaning biror yeriga chuqurchaga o'rnatilgan, ustiga ko'rpa yopilib, isinish uchun foydalaniladigan qurilma.	
Alyuminiy, xrom, temir singari metallarning sulfat kislota bilan o'zaro ta'siridan hosil bo'lgan tuzlar.	
Yalang oyoq, oyoqqa paypoq kiymay, poyabzalning o'zini kiyib olish.	
Uyning oyoq kiyim yechib kiriladigan joyi	

12. Ushbu hikoyadagi ona obraziga qanday ta'rif bergan bo'lar edingiz?

13. Ushbu hikoyadan qanday saboq olish mumkin?

Ushbu topshiriqlar ketma-ketligi imloviy va grammatik savodxonligingizni sinab olishingiz uchun ishlab chiqilgan.

“HA” / “YO’Q”

1. Quyidagi so’zlarda nuqtalar o’rniga i unlisini yozildimi?

- 1) sov...q; 2) sup...rmoq;
3) qut...lmoq; 4) tush...nmoq

A) ha B) yo’q

2. Nuqtalar o’rniga u unlisini yozildimi?

- 1) tov...q; 2) bult...r; 5) qov...n; 6) yut...q

A) ha B) yo’q

3. Quyida berilgan barcha so’zlar to’g’ri yozilganmi?

manfaat, tomom, badiy, taasurot, tamon, tabiiy, taalluqli, navbat, tanka

A) ha B) yo’q

4. Quyida berilgan barcha so’zlar tutuq belgisi (‘) bilan yozildimi?

tuyg’u, cholg’u, iste’mol, e’lon, ma’naviyat, ma’rifat, in’om, o’zbek

A) ha B) yo’q

5. Quyida berilgan barcha so’zlar chiziqcha (-) bilan yozildimi?

qand-qurs, murod-maqsad, xon-taxta, kasb-hunar, vatan-parvar, osh-qozon

A) ha B) yo’q

6. Quyida berilgan barcha so’zlar bo’g’inga to’g’ri ajratilganmi?

ye-ngil, kon-gress, de-nbiz, jon-ga, ko’-ngil, si-ngil, shtan-ga, to-ngi

A) ha B) yo’q

7. Quyida berilgan barcha so’zlar to’g’ri yozilganmi?

grammatika, komissiya, minnatdor, ssenariy, taraqqiyot, tasavvuf, tilla, million

A) ha B) yo’q

8. Quyida berilgan barcha so’zlar imloviy jihatdan xatosiz yozilganmi?

tahdid, tahlika, tahsil, tahsin, taqdir, taxmin, tannarx, tahlil, hujjat, halol

A) ha B) yo’q

9. Quyida berilgan barcha so’zlar imloviy jihatdan xato yozilganmi?

tuxfa, tasbeh, timsox, tuxmat, tanbex, taxmin, raxnamo, rayxon, hisobot

A) ha B) yo’q

10. Oq // saroy, ot // quloq, dev // qomat, havo // rang, borib // kelmoq, sher // dil, yer // yong’oq, bayon // etmoq, erk // sevar

Ushbu juftliklardan qo’shma so’z hosil qilinganda barchasi qo’shib yozildimi?

A) ha B) yo’q

11. Quyida berilgan so'zlarning barchasi to'g'ri yozilganmi?

7-qism, 5-“A” sinf, 3-, 7-, 9- modda, X asr, nuqtayi nazar, tarjimayi hol, e'zoz

- A) ha B) yo'q

13. Fikr-mulohaza, kitob-daftар, do'st-dushman, el-yurt, savdo-sotiq kabi juft so'zlar tire bilan yozilganmi?

- A) ha B) yo'q

15. O'zlashma so'zlarning barchasi imloviy jihatdan TO'G'RI yozilganmi?

litsenzia, abzats, monitor, ma'no, vo'lfram, radio, okeyan, metal, kilogram

- A) ha B) yo'q

17. Quyida berilgan so'zlarning barchasi to'g'ri yozilganmi?

milliard, artilleriya, 10-sinf, XXI asr, sog', yangidan yangi, keldi-da, bola-ku

- A) ha B) yo'q

19. “Yuvosh” ma'nosini beradigan ibora bu – “qo'y og'zidan cho'p olmagan”.

- A) ha B) yo'q

12. “Har” va “hech” so'zlari bilan hosil qilingan qo'shma so'zlar qo'shib yoziladimi?

- A) ha B) yo'q

14. O'zlashma so'zlarning barchasi imloviy jihatdan to'g'ri yozilganmi?

televideniye, magistratura, dissertatsiya, kompressor, marketing, monitoring

- A) ha B) yo'q

16. MDH, BAA, O'zMU, ToshDO'TAU, O'zRFA kabi qisqartmalarda imloviy jihatdan xatolik bormi?

- A) ha B) yo'q

18. Gapdag'i barcha so'zlar to'g'ri tanlanganmi?

Ertaga tarixiy obidalarga qadam ranjida qilishni rejalashtirdik.

- A) ha B) yo'q

20. Ushbu so'zlardan faqat bittasi qo'shib yoziladi: 1) dev sifat; 2) liq to'la; 3) dardi bedavo; 4) kecha kunduz; 5) ko'p vaqt.

- A) ha B) yo'q

LUG'AT

- Aksiya** – biror maqsadga erishish uchun qilinadigan ish, harakat.
- Amfiteatr** – tomosha zali yoki auditoriyadagi yarim doira shaklida qiya ko'tarilib boruvchi o'rindiqlar.
- Ansambl** – bir butun badiy jamoa bo'lib tomosha ko'sratadigan artistlar guruhi, jamoasi.
- Arxeologiya** – qadimgi moddiy, ma'naviy yodgorliklar asosida xalqlarning tarixiy o'tmishini, turmushi va madaniyatini o'rganuvchi fan.
- Bahridan o'tmoq** – foydali deb bilgan narsa yoki kishisidan voz kechmoq.
- Bakovul** – to'y va bayram munosabati bilan o'tkaziladigan kurash, poyga, uloq kabi musobaqalarni boshqaruvchi.
- Blog** – muayyan mavzuga bag'ishlangan internet jurnal, internet kundalik, onlayn kundalik.
- Byudjet** – muayyan vaqt (yil, chorak) uchun ishlab chiqilgan, me'yorlashtirilgan va qonuniy tarzda tasdiqlangan daromadlar va xarajatlar yig'indisi.
- Chiqindi** – kerakli qismi ishlataligandan qolgan narsalar; chiqit, qoldiq.
- Chirik** – chirigan, yaroqsiz holga kelgan.
- Dahanaki** jang – og'zaki janjal, qattiq aytishish, so'kishish.
- Dastur** – muayyan maqsad, ish-harakat yoki tadbirning oldindan belgilab chiqilgan yo'l-yo'rig'i, uni amalga oshirishning tartibi, qonun-qoidasi; programma.
- Daydi** – doimiy turarjoyi va belgili kasbi bo'limgan, bir joyda qo'nim topmaydigan; darbadar.
- Diagramma** – turli miqdorlar o'rtaсидаги munosabatni tasvirlovchi chizma, grafik tasvir.
- Dialog** – ikki kishi o'rtaсидаги og'zaki muloqot, suhbat; asar qahramonlari suhbat.
- Ekotizim** – birgalikda yashaydigan organizmlar va ular yashaydigan sharoit majmui.
- Eksponat** – muzey va ko'rgazmalarda namoyish qilinadigan, ekspozitsiyaga qo'yilgan narsa.
- Emlamoq** – yuqumli kasalliklarning oldini olish uchun odam yoki hayvon organizmiga teri orqali zardob yubormoq.
- Epizootiya** – hayvonlarda biror yuqumli kasallikning muayyan hudud uchun g'ayriodatiy tarzda keng tarqalishi; o'lat.
- Estrada** – ommaviy sahna san'atining ashula, raqs, akrobatika, badiy o'qish, kichik-kichik dramatik va kulgili asarlar va shu kabilarni o'z ichiga olgan bir turi hamda shular asosida tashkil etilgan konsert-tomoshalar.
- Faoliyat** – biror sohada olib boriladigan ish, mashg'ulot, harakat.
- Fazo** – hamma tomonga cheksiz yo'nalgan bo'shliq, osmon, koinot.
- Festival** – san'atning kino, musiqa, teatr, sirk kabi sohalarida erishilgan eng yaxshi yutuqlar bo'yicha vaqt-vaqt bilan o'tkaziladigan tanlov, ko'rikdan ibrat ommaviy bayram, tantana, sayil.
- Gadjet** – kichik mexanik yoki elektron qurilma yoki vosita.
- Galereya** – suratlar namoyish qilinadigan bino, muzej.
- Haykaltaroshlik** – tosh, bronza, yog'och, gips va boshqalardan haykal yasash faoliyati.
- Hayvonot** – tirik mavjudotlar, hayvonlar olami; hayvonlar.
- Hovur** – issiqqlikdan ko'tariladigan kuchsiz, yengil bug'.
- Huquq** – davlat hokimiysi tomonidan belgilanadigan va qo'riqlanadigan, jamiyatda kishilarning o'zaro munosabatlarini va boshqalarni tartibga soladigan qonun-qoidalar, me'yorlar majmui.
- Hurkimoq** – cho'chib ketmoq (asosan hayvon va parrandalar haqida).
- Ijtimoiy** – jamiyatga taalluqli, jamiyat bilan bog'liq, jamoat, odamlarning jamiyatdagi munosabatlari bilan bog'liq.
- Ijtimoiy tarmoqlar** – onlayn platforma, undan odamlar o'zaro tanishuv, suhbat, ijtimoiy munosabatlarni yo'lga qo'yish uchun foydalanadi.
- Infeksiya** – kasallik paydo qiladigan mikroorganizmlar tufayli kasallikning yuqishi; yuqtirish.
- Injener** – texnikaning biror sohasi bo'yicha oliy malumotga ega bolgan mutaxassis; muhandis.
- Intellekt** – kishining fikrash qobiliyati, aqliy rivojlanganlik darajasi.
- Jarayon** – ish-harakat, voqeа-hodisaning birin-ketin borishi, rivoji, oqimi.
- Jo'rttaga** – ongli ravishda, atayin, ataylab, qasddan.
- Jug'rofiya** – geografiya fanining eski nomi.
- Kelbat** – qomat, bichim, qiyofa.
- Keli** – qo'lда don (arpa, bug'doy, jo'xori va boshqalar) yanchish, sholi oqlash uchun mo'ljallangan ro'zg'or buyumi.
- Kelisop** – qo'lда don (arpa, bug'doy, jo'xori va boshqalar)ni yanchuvchi asbob.
- Kimyogar** – kimyo fani bo'yicha mutaxassis, olim; kimyo sanoatida ishlovchi shaxs.
- Klassik** – klassiklar yaratgan, xalqlarning iftixoriga aylangan, namuna bo'ladigan.
- Klub** – kishilarning siyosiy ongini, madaniyatini va umumiylashtirishini oshirish, ularning dam olishini tashkil etish bilan shug'ullanuvchi madaniy-ma'rifiy, siyosiy yoki boshqa xarakterdagи ijtimoiy tashkilot, muassasa.
- Ko'chirma** – asl nusxdadan yozib, chizib, ko'chirib olingan nusxa.

Kod – aloqa (telegraf, telefon, radio va shu kabilar), avtomatik boshqarish tizimlarida, EHM (elektron-hisoblash mashinalari)da istalgan axborotni uzatish, qayta ishslash va saqlash uchun qo'llanadigan, ma'lum tartibdagi shartli belgi, ramz (simvol)lar yoki signallar tizimi.

Kommunal – jamoa bo'lib yashashga oid; jamoaviy.

Konsepsiya – qarashlar, fikrlar yo'nalishi tizimi; fikr yuritish, dunyonи tushunish, anglash usuli.

Kubok – sport musobaqalarida: g'oliblar uchun sovrin sifatida beriladigan (odatda qimmatbaho narsadan tayyorlanadigan) vaza, idish va shu kabilar.

Kupe – vagonning bir necha yo'lovchi uchun ajratilgan alohida bo'lmasi.

Laboratoriya – ilmiy tekshirishlar, tajribalar, amaliy mashg'ulotlar o'tkazish uchun kerakli apparat va asboblar bilan jihozlangan ilmiy muassasa yoki uning bo'limi va ular joylashgan bino.

Lanj – bo'shashgan; lohas.

Logistika – inson faoliyatining u yoki bu sohasini moddiy-texnik ta'minlashni boshqarish tizimi.

Mayoq – yo'l ko'ssatib turadigan, o'rnak, namuna, ibrat bo'ladigan narsa; mash'al.

Me'morchilik – bino va inshootlarni loyihalash, qurish va bezatish san'ati.

Merosxo'r – meros olishga haqi bo'lgan kishi; voris.

Meteor – kosmik fazodan Yer atmosferasiga cho'g' bo'lib, tez uchib keladigan jism.

Me'yor – biror narsa, ish va shu kabilarning miqdor, daraja jihatdan talabdag'i, belgili o'lchami.

Mikrobiologiya – mikroorganizmlarning tuzilishi, biologiyasi, fiziologiyasi, biokimyosi, sistematikasi, genetikasini, ularning odamning hayoti, jonli va jonsiz tabiatdagi mohiyatini o'rganadigan hamda mikroorganizmlar hayat faoliyatini boshqarish usullarini ishlab chiqish masalalari bilan shug'ullanadigan fan.

Mikrochiplash – uy hayvonlarini yo'qotib qo'ymaslik uchun ularning tanasiga chip o'rnatish.

Mikrotizim – kichik tizimlar.

Ministrlik – vazirlilik.

Mo'yna – ba'zi hayvonlarning kiyim-kechakka ishlataladigan yungli terisi.

Modda – rasmiy hujjat, majmua, qonun va shu kabilarning raqam yoki harf bilan ajratiladigan mustaqil bo'limi.

Monolog – sahna yoki boshqa adabiy asar ishtirokchilarining o'z-o'ziga yoki o'zgalarga qaratilgan, javob talab qilmaydigan nutqi.

Muallif – biror asar, loyiha, kashfiyot va shu kabilarni yaratgan shaxs.

Muhandis – texnikaning biror sohasini yaxshi biluvchi mutaxassis.

Muloqot – uchrashuv, suhbat.

Mum tishlamoq – og'iz ochmay jum qolmoq, indamaslik.

Mumtoz – muayyan millat va jahon fani, san'ati, adabiyotida muhim o'r'in tutadigan, millatning shon-shuhrati va faxri hisoblangan.

Munajjim – munajjimlik bilan shug'ullangan, yulduzlarga qarab fol ko'rgan kishi; astrolog.

Mushkul – hal qilinishi, yechilishi mahol bo'lgan; qiyin, og'ir.

Mutafakkir – chuqur falsafiy fikrlash iste'dodiga ega bo'lgan kishi, tafakkur egasi.

Mutaxassis – biror sohada maxsus bilim va tajribaga ega bo'lgan kishi, ixtisos egasi.

Muzey fondi – muzeylarda tarixiy ahamiyatga ega barcha eksponatlarning jamlanmasi.

Nabotot – o'simliklar dunyosi, o'simliklar.

Nanotexnologiya – atom tuzilishiga ega (juda mayda zarra) bo'lgan mahsulotlarni ishlab chiqarish va ulardan foydalanish usullari bilan shug'ullanadigan soha.

Nusxa – bir xil qilib yasash, ko'chirish uchun tayyorlangan buyum namunasi, andaza; qolip.

O'ra – chuqurlik.

Obyekt – bizdan tashqarida va bizning ongimizga bog'liq bo'limgan holda mavjud bo'lgan, subyekt (inson)ning amaliy va bilish faoliyati qaratilgan tashqi olam, borliq, voqelik, moddiy dunyo, mavjudot.

Operatsiya – texnologik jarayoning bir ish joyida bajariladigan alohida qismi.

Orkestr – musiqa asarlarini birgalikda ijro etadigan turli xil cholg'u asboblari yig'indisi va shu asboblarni chaluvchi musiqachilar jamoasi.

Oshkor qilmoq – hammaga ma'lum qilmoq.

Palatka – suv o'tmaydigan pishiq matodan, teridan tikilgan yozgi kapa, chodir.

Pantomima – kishining kechinmasi, fikrlari, hayat lavhalari, inson xarakterlari faqat tana harakati, mimika va imo-ishoralar bilan ifoda etiladigan so'zsiz teatr tomoshasi.

Respondent – ijtimoiy so'rovda qatnashuvchi shaxs; anketa savollariga javob beruvchi kishi.

Pigment – tirik organizm to'qimalari tarkibida bo'ladigan va ularning rangini belgilaydigan bo'yoq moddalar.

Podachi – podani haydab olib yuruvchi, poda boquvchi.

Posbon – muhofaza, himoya qiluvchi; saqlovchi, homiy.

Prinsip – biror ta'limat, dunyoqarash va shu kabilarning dastlabki, asosiy qonun-qoidasi.

Qadamjo – ziyorat qilinadigan joy, ziyoratgoh.

Qariyb – taxminan, deyarli, yaqin.

Qiron keltirmaq – qirilmoq, yo'q bo'lmoq.

Qo'riq – himoya, mudofaa, saqlash.

Qonunchilik – biror mamlakatga yoki sohaga oid qonunlar, huquqiy hujjatlar majmui.

Ramz – biror g'oya, tushuncha, hodisa kabilarni ifodalovchi, eslatuvchi shartli belgi, ishora.

Rekonstruksiya – takomillashtirish, yaxshilash maqsadida qayta qurish, yangidan qurish, butunlay yangicha tashkil qilish.

Restavratsiya – davrlar o'tishi bilan eskirgan va ma'lum qayta ishlashlar natijasida asl holini yo'qotgan, buzilgan san'at asari yoki arxitektura yodgorliklarini, arxeologik qazilmalarni dastlabki holatiga keltirish, tiklash hamda tiklangan asarlar, narsalarning o'zi.

Robot – inson hayoti uchun xavfli sharoitlarda, odam borishi qiyin bo'lgan obyektlarda uning funksiyasini – murakkab harakatlarini qisman yoki to'la bajaruvchi mashina-odam; avtomat.

Sambo – kurashning xilma-xil, samarali milliy usullarni qamrab olgan bir turi.

Sanitariya – aholini, atrof-muhitni sog'lomlash-tirishga, tozalikka, gigiyenik talab va me'yordarga ryoja qilishga qaratilgan chora-tadbirlar tizimi.

Sarhad – chegara, hudud.

Savanna – Afrika, Janubiy Amerika, Shimoli-sharqiy Avstraliya va Janubiy Osiyoda o'simliklarning tropik o'rmonlar va sahrolar oralig'ida tarqalgan mintaqaviy tipi.

Seksiya – ba'zi idora, tashkilot, jamiyat va shu kabilarning alohida bo'limi.

Smartfon – murakkab EHM qismlari bilan jihozlangan ko'p vazifani bajaruvchi telefon.

Suiiste'mol – biror narsadan, masalan, amal, boylikdan o'z manfaati uchun yo'l qo'yilganidan ortiqcha foydalanish.

Sun'iy intellekt – kompyuterning o'z amallarini tahlil qilish va egallangan tajribalarini o'rganishi asosida rivojlanib boruvchi dasturi.

Suxandon – gapga chechan, so'zamol; notiq, doktor.

Tadqiqot – ilmiy tekshirish ishining natijasi.

Tarmoq – asosiy yo'l, oqim va shu kabilardan bo'linib, ajralib chiqqan qism.

Tatami – dzyudo kurashi uchun mo'ljallangan tarang, elastik gilam.

Tatbiq etmoq – amalda ishlatish, qo'llash.

Tavofut – farq.

Tayanch nuqta – asos bo'lib xizmat qiladigan, suyaniladigan narsa.

Tengqur – yosh jihatdan teng yoki uncha farq qilmaydigan kishilar; birga o'sib katta bo'lgan o'rtoqlar; tengdosh.

Timsol – tushuntirish uchun yoki asos, dalil, isbot va shu kabilar sifatida keltirilgan ayrim namuna; misol.

Tizim – o'zaro bog'liq va uzviy tartibda bo'lgan narsa, hodisalar birligi, majmui.

To'da – bir yerga to'plab yoki uyib qo'yilgan narsa; uyum; gala; guruh.

Trener – sportning biror turi bo'yicha sportchilar tayyorgarligiga rahbarlik qiluvchi mutaxassis.

Turdosh – bir xil turdag'i.

Uglerod – hamma organik modalarning eng muhim tarkibiy qismi bo'lgan kimyoiy element.

Uslug – ishslash, boshqarishdagi o'ziga xos yo'l, usul.

Usul – biror narsani yuzaga chiqarish, amalga oshirish yo'l; harakat tarzi, xili, tartibi; yo'l.

Veterinar – veterinariya bo'yicha oliy malakali mutaxassis; mol doktori.

Xarajat – biror narsa uchun qilinadigan sarf; chiqim.

Yaktak – uzun, ko'krak oldi ochiq erkaklar ko'ylagi.

Yirtqich – jonivor go'shti bilan ovqatlanadigan (hayvonlar, qushlar haqida).

Yodgorlik – biror shaxs yoki voqeа xotirasi uchun tiklangan haykal; me'moriy obida.

Yo'lchi yulduz – yo'l ko'rsatuvchi, rahnamo.

Yonilg'i – yonadigan suyuq modda, suyuq yoqilg'i (benzin, neft va shu kabilar).

Yo'qchilik – iqtisodiy tanqislik, yetishmovchilik; kambag'allik, muhtojlik.

Yubiley – biror shaxsning tug'ilgan kuni yoki biror tashkilot, muassasaning muayyan yilligi bilan o'tkaziladigan tantanali marosim.

Yuridik shaxs – turli mulkchilikka asoslangan, mustaqil ish yurituvchi, qonunga ko'ra fuqarolik huquqlari va majburiyatları subyekti bo'lgan korxona, tashkilot, muassasa.

Zavol – yo'q bo'lish, mahv bo'lish.

Zulf – qizlarning sochi, kokili.

O'quv nashri

ONA TILI

**Umumiy o'rta ta'lif maktablarining
7-sinfi uchun darslik**

Muharrir *Orifjon Madvaliyev*

Rassom *Aziz Jabborov*

Texnik muharrir *Akmal Sulaymonov*

Badiiy muharrir *Sarvar Farmonov*

Dizayner va sahifalovchi *Oloviddin Sobir o'g'li*

Musahhih *Xurshidbek Ibrohimov*

Bosishga ruxsat etildi 23.06.2022 Bichimi 60x84 1/8.

Arial garniturası. Kegli 12 shponli. Ofset bosma.

Shartli bosma tabog'i 26,04 Nashriyot-hisob tabog'i 25,99

Adadi ___ nusxa. Buyurtma № ___.

Ijaraga beriladigan darslik holatini ko'rsatuvchi jadval

Nº	O'quvchining ismi va familiyasi	O'quv yili	Darslikning olingandagi holati	Sinf rahbarining imzosi	Darslikning topshirilgandagi holati	Sinf rahbarining imzosi
1.						
2.						
3.						
4.						
5.						
6.						

Darslik ijara berilib, o'quv yili yakunida qaytarib olinganda yuqoridaagi jadval sinf rahbarlari tomonidan quyidagi baholash mezonlariga asosan to'ldiriladi:

Yangi	Darslikning birinchi marta foydalanishga berilgandagi holati.
Yaxshi	Muqova butun, darslikning asosiy qismidan ajralmagan. Barcha varaqlari bor, yirtilmagan, ko'chmagan, betlarida yozuv va chiziqlar yo'q.
Qoniqarli	Muqova ezilgan, birmuncha chizilib, chetlari yedirilgan, darslikning asosiy qismidan ajralish holati bor, lekin qoniqarli ta'mirlangan. Ko'chgan varaqlari qayta joylangan, ayrim betlariga chizilgan.
Qoniqarsiz	Muqova yirtilgan, ustiga chizilgan, asosiy qismidan ajralgan yoki butunlay yo'q, qoniqarsiz ta'mirlangan. Betlari yirtilgan, varaqlari yetishmaydi, chizib, bo'yab tashlangan. Darslikni tiklab bo'lmaydi.